















~~Agnes~~

*Stentini - - Philopoli*  
*Albania - - Albanica*



*Handwritten:* R. B. [illegible]  
S. E.

1819 Anne

PA 2095

S 39

1805

104837

08

104837

40-106344





SELECTÆ  
E PROFANIS  
SCRIPTORIBUS  
HISTORIÆ.

---

PARS PRIMA.

---

LIBER PRIMUS.

DE DEO.

CAPUT I.

*Consensus populorum omnium probat Deum esse.*

1. **A**NIMAL nullum est, præter hominem, quod habeat notitiam aliquam Dei. At inter homines gens nulla est tam fera, quæ non sciat Deum esse habendum, etiamsi ignoret qualem habere deceat. Quoniam verò in re omni consensus firma gentium omnium, est vox naturæ, & argumentum veritatis; confitendum est numen aliquot divinum esse.

2. Consuetudo disputandi contra Deos est mala & impia, sive id fit seriò, sive simulatè. Itaque cum Protagoras, sophista maximus temporibus suis, posuisset in principio libri cujusdam, se

dubitare an Dii essent; jussu Atheniensium exterminatus est ex urbe eorum atque agro, librique ejus combusti sunt in concione. Ferunt quoque talentum argenti fuisse propositum præmium ei qui illum occidisset. Sic etiam dubitatio de Diis non potuit pœnam effugere.

## C A P U T I I.

*Agnoscamus Deum ex operibus suis.*

1. **Q**uis est tam vecors, qui cum suspexerit in cœlum, non sentiat Deum esse?

Pulchritudo mundi, ordo rerum cœlestium, conversio solis, lunæ, siderumque omnium, indicant satis aspectu ipso ea omnia non esse fortuita; & cogunt nos confiteri, naturam esse aliquam præstantem æternamque, quæ sit admiranda humano generi.

2. Quemadmodum, si quis venerit in ædes aliquas, aut in gymnasium, videritque ibi distinctionem rerum omnium, ordinem, disciplinam; intelliget aliquem esse profectò, qui præsit, & cui pareatur: sic, si quis intueatur motus perpetuos & certos, vicissitudines, ordines rerum cœlestium tot tantarumque; necesse est, ut fateatur, hæc cuncta gubernari à mente aliquâ. Cum autem nec mens nec potestas humana possit hoc efficere; Deus unus potest esse architectus & rector tanti operis ac muneris.

## C A P U T I I I.

*Natura Dei est optima, & præstantissima.*

1. **S**ENTENTIÆ veterum philosophorum de naturâ Dei, fuerunt variæ atque inter se dissidentes; quas longum ac difficile esset dinumerare. Naturâ duce intelligebant Deum esse; sed non conveniebant inter illos, quid Deus esset. Ita-

que cum tyrannus Hiero quævisset è Simonide , non solum poëta suavi , verum etiam viro docto sapienteque , quid Deus esset , postulavit sibi diem unum ad deliberandum. Cum idem <sup>nonno n 4</sup> quæreretur postridie ex eo , petivit biduum ; & deinceps sæpius duplicavit numerum. Admirans Hiero requisivit cur ita faceret : *Quia , inquit , res videtur mihi tanto obscurior , quanto diutius eam considero.*

2. Si , cum intramus templa , solemus esse compositi animo , habitu , incessuque : si , accessuri ad sacrificium , submittimus vultum , aptamus togam , & studemus omni modo significare modestiam : debemus quoque disputare verecundè de naturâ Deorum , ne affirmemus aliquid temerè.

Non possumus loqui rectè de numine divino , nisi simus illustrati lumine ejus. Nam numen divinum est fons luminis , sicut et bonitatis.

3. Deus non potest intelligi alio modo , nisi mens quædam libera , segregata à materia , omnia sentiens & movens.

Quid interest inter naturam Dei & nostram ! Pars melior nostrî , est animus : in illo pars nulla extra animum , totus est ratio. Effugit oculos , visendus est cogitatione.

4. Quomodo possumus intelligere Deum , nisi sempiternum ? Natura , quæ dedit nobis notionem Deorum , inculpfit quoque in mentibus , ut credamus eos æternos & beatos. Thales interrogatus , quid esset Deus ? *Quod , inquit , caret initio & fine.*

5. Nihil est quod Deus non possit efficere , & quidem sine labore ullo. Etenim ut membra hominum moventur mente ipsâ ac voluntate , sine contentione ullâ : sic omnia possunt fieri , moveri , mutari , numine Deorum.

6. Quocumque flexeris te , habebis ibi Deum occurrentem tibi : nihil vacat ab illo , ipse implet opus suum.

7. Commoda quibus utimur , lux quâ fruimur , spiritus quem ducimus , dantur nobis & imperantur à Deo.

*nepeccatorum carnis*  
 Dii fundunt munera sine intermissione diebus  
 ac noctibus. Beneficia illorum nunc offeruntur  
 ultro, nunc dantur orantibus. Qui est qui non  
 senferit munificentiam Deorum? Nemo est ex-  
 pers beneficiorum cœlestium: nemo est ad quem  
 non aliquid manaverit ex fonte illo benignissimo.

## CAPUT IV.

*Deus regit ac videt cuncta.*

1. **M**UNDUS administratur providentiâ Deo-  
 rum, iidemque consulunt rebus humanis,  
 nec solum universis, verum etiam singulis.

Hoc sit persuasum hominibus omnibus, Deos  
 esse dominos ac moderatores rerum omnium, &  
 ea, quæ gerantur, geri numine ac iudicio eorum;  
 eosdem intueri, quali mente quisque sit, & ha-  
 bere rationem piorum atque impiorum. Si mentes  
 fuerint imbutæ his opinionibus, mens supplicii  
 divini revocabit multos à scelere.

2. Ne quis putet se lucrari quicquam, si non  
 habeat aliquem conscium delicti sui. Nam ille  
 in cujus conspectu vivimus, scit omnia. Patemur  
 Deo, approbemus nos ei.

Vivendum est, tanquam vivamus in conspec-  
 tu omnium: cogitandum est, tanquam aliquis  
 possit inspicere in pectus intimum, & potest.  
 Nam quid prodest aliquid esse absconditum ho-  
 minibus? Nihil. clausum est Deo: interest animis  
 nostris, & intervenit cogitationibus mediis; imo  
 nunquam discedit.

Qui crediderit Deum inspicere cuncta non pec-  
 cabit neque clanculum, neque aperte.

Cum Thales interrogaretur an facta hominum  
 fellerent Deos: *illos ne cogitata tantummodo non agunt*  
 inquit. Admonuit nos hoc responso, ut velimus  
 habere non solum manus puras, sed etiam men-  
 tes, cum numen cœleste adsit cogitationibus nos-



tris secretis. Sextus Pythagoricus dixit simili sententiâ: *Agens injustè nequaquam latebis Deum, & ne cogitans quidem.*

## CAPUT V.

*Deus colitur & placatur pietate.*

1. **P**RIMA officia debentur Diis immortalibus, secunda patriæ, tertia parentibus, deinceps gradatim reliquis.

Tria sunt colenda maximè juvenibus, Dii, parentes, leges.

Vir bonus est summæ pietatis erga Deos: itaque sustinet animo æquo quidquid acciderit ei. Scit enim id accidisse lege divinâ, quâ universa reguntur.

Pietate adversus Deos <sup>in eorum</sup> sublata, fides etiam, & societas humani generis, excellentissima virtus justitia tollitur.

Debemus colere Deos. Cultus autem Deorum optimus est, ut veneremur semper eos mente purâ, integrâ, incorruptâ. Deus habet locum nullum in terra gratiorem animâ purâ. Non templa sunt struenda illi è saxis congestis in altitudinem: est <sup>non in templis</sup> consecrandus cuique in suo pectore.

Pietas & sanctitas efficiet Deos placatos.

2. Animadverto Deos non tam lætari precibus adorantium concinnatis arte et curâ, quàm illorum innocentia & sanctitate; & eum esse gratiorem Diis, qui intulerit delubris <sup>sanctis</sup> eorum mentem puram & castam, quàm illum, qui cum carmine meditato accesserit.

Deus colitur non corporibus opimis taurorum contrucidatis, non auro, non argento, non stipe infusâ in thesauros, sed voluntate piâ & rectâ. Itaque boni sunt religiosi etiam oblato farre ac farinâ; mali contrâ non effugiunt impietatem, quamvis cruentaverint aras multo sanguine.

Facito sacra Diis castè & purè pro facultate ;  
atque placâ eos & quando ieris cubitum , &  
quando tempus matutinum venerit , ut sint ani-  
mo benevolo in te.

## CAPUT VI.

*Deus est colendus magis piè , quàm magnificè.*

1. **H**OMINES adeant castè ad Deos , adhibeant  
pietatem , amoveant opes. Significat hæc  
lex probitatem esse gratam Diis , & sumptum esse  
removendum ab eorum cultu. Cum enim pauper-  
tas debeat esse <sup>deprecatæ</sup> probro nemini inter homines ,  
non est arcenda ab aditu Deorum. Præsertim  
cùm nihil sit futurum minùs gratum ipsi Deo ,  
quàm viam ad colendum se & placandum non  
patere omnibus.

Cùm Socrates faceret sacra tenuia de facultati-  
bus exiguis , putabat se non præstare minùs ,  
quàm eos , qui de magnis opibus cæderent hostias  
multas. Etenim aiebat non decere Deo , ut gau-  
derent potiùs sacrificiis magnis , quàm exiguis :  
quia cùm scelesti sint plerumque ditiores viris  
bonis , eorum sacrificia futura essent acceptiora.  
Itaque existimabat sacra illa & munera esse ma-  
ximè grata Diis , quæ offerrentur ab hominibus  
maximè piis.

2. Apud veteres Romanos Dii colebantur ma-  
gis piè , quàm magnificè , placabantque eos eo  
efficaciùs , quo simpliciùs , ex libamentis victus  
sui , farre & sale.

L. Papyrius imperator adversùs Samnites dimi-  
caturus , fecit votum Jovi , si vicisset , pocillum  
vini. Imagines fictiles Deorum erant tum lauda-  
tissimæ : nullæ conficiebantur ex auro , nullæ ex  
argento. Nec deinde rempublicam pœnituit eo-  
rum qui coluerant Deos tales. Quippe Jupiter  
videbatur esse magis propitius , cùm statuæ ejus



*argilla*. *Scriptoribus Historiæ.* *Cl. L. L. L.*  
fingerentur ex argillâ, non verò conflarentur  
ex auro. Simulacra Deorum lignea aut fictilia,  
sunt dicata Romæ in templis usque ad Asiam de-  
victam, undè luxuria <sup>Boetia</sup> invahit urbem.

3. Alexander magnus dicitur coluisse magnificè  
Deos à pueritiâ. Cum aliquando faciens sacrum  
injecisset manibus ambabus thura in ignem;  
Leonidas pædagogus ejus: *Adolebis*, inquit, *sic*,  
*cùm subegeris regiones eas, ubi thura nascuntur. In-*  
*terea utere parcè præsentibus.* Postea Alexander,  
Arabîâ, regione thuriferâ, redactâ in ditionem  
suam, memor reprehensionis olim factæ à Læo-  
nida, misit ei thura multa, odoresque alios, ad-  
monuitque ne vellet posthac esse parcus in hono-  
ribus Deorum.

---

## C A P U T V I I.

*Impii non placant Deum donis.*

1. **I**MPII audiant Platonem, qui vetat dubitare  
quâ mente Deus sit futurus in eos; cùm vir  
nemo probus velit donari se ab improbo.

Jucundum non esset viro probò accipere dona,  
quæ non ignoraret dari animo malo. Si pietas  
adsit, nihil non potest esse gratum Deo: contra  
autem, si desit.

Scelesti inducunt in animum suum, se posse  
placare Jovem donis & hostiis: at perdunt ope-  
ram & sumptum.

Bias navigabat aliquando cum impiis; cùm  
verò; tempestate exortâ, navis quateretur flucti-  
bus; illique invocarent Deos: *Silete*, inquit, *ne*  
*Dii audiant vos navigare in hac nave.* Idem respon-  
dit nihil homini impio percontanti quid esset pie-  
tas. Cùmque ille sciscitaretur causam silentii:  
*Taceo*, inquit, *quia quæris de rebus nihil pertinen-*  
*tibus ad te.*

2. Puras Deus, non plenas, aspicit manus.

Mentes Deorum possunt placari pietate, & religione, & precibus justis, non superstitione contaminatâ, neque hostiis cæsis ad perficiendum scelus.

Æscinus dicit apud Terentium patri: Patér, tu comprecare Deos potius quam ego; nam certè scio eos obtemperaturos tibi magis, quod es vir melior multo, quàm ego sum.

Cultus primus Deorum est, credere Deos. Deinde, scire eos esse qui præsident mundo, qui gerunt tutelam generis humani, curiosi singulorum. Vis propitiare Deos? Esto bonus. Quisquis imitatus est eos, satis coluit.

Ille honorat Deum optimè, qui facit mentem suam similem Deo, quantum potest fieri.

Dilige Deum plus quàm animam. Si non diligis Deum, non ibis ad Deum. Non amabis autem Deum, nisi habueris in te aliquid simile Dei.

Conandum est, ut efficiamur similes Deo, quantum licet homini. Homo autem efficitur similis Deo prudentiâ, justitiâ, sanctitate.

## C A P U T V I I I.

*Mens bona, & inventio artium, veniunt à Deo.*

1. **V**IRTUS non advenit à naturâ, neque à doctrinâ; sed à numine divino. Natura non dat virtutem. Nascimur quidem ad hoc, sed sine hoc.

Nemo vir bonus est sine Deo. An potest aliquis exsurgere supra fortunam, nisi adjutus ab illo? Ille dat consilia magnifica et erecta: ille habitat in unoquoque virorum bonorum. Si videris hominem interritum periculis, <sup>non inoperto</sup> intactum cupiditatibus, <sup>intactum</sup> felicem inter adversa, placidum in tempestatibus, <sup>superiora</sup> despicientem quasi ex loco superiore humana omnia; nonne admiraberis eum? Nonne dices: *Virtus illa est major & altior corpusculo in quo est: vis divina descendit illuc?*

Si quis est animo excellenti, & moderato: si quis ridet quidquid cæteri mortales timent aut

optant, cœlestis potentia agitat eum ac regit: res tanta non potest stare sine adminiculo numinis.

Itur ad astra <sup>consiliorum</sup> frugalitatem, temperantiâ, fortitudine, aliisque virtutibus. Dii non sunt fastidiosi, non invidi. Admittunt nos, & porrigunt manum ascendentibus. Imò Deus venit ad homines, & in homines. Mens bona nulla est sine Deo.

2. P. Scipio Africanus nihil cœpit priusquam sedisset diutissime in <sup>noctis</sup> cella Jovis, quasi acciperet inde mentem divinam, & consilia salutaria Reipublicæ. Propterea <sup>sub nocte</sup> solitus erat ventitare in Capitolium ante diluvium.

Cicero in oratione pro Sylla palam prædicat, consilium patriæ servandæ fuisse injectum sibi à Diis, cum Catilina <sup>conjurasset</sup> adversus eam. O Dii immortales! Vos profecto incendistis tum animum meum cupiditate conservandæ patriæ. Vos avocastis me à cogitationibus omnibus cæteris, & convertistis ad salutem unam patriæ. Vos denique prætulistis menti meæ clarissimum lumen in tenebris tantis erroris & inscientiæ. Tribuam enim vobis quæ sunt vestra. Nec verò possum dare tantum ingenio meo, ut dispexerim sponte meâ in tempestate illa turbulentissima Reipublicæ, quid esset optimum factu.

Nihil insolens & gloriosum exiit unquam ex ore Timoleontis: qui quidem cum audiret laudes suas prædicari, nunquam dixit aliud, quam se habere atque agere gratias maximas Diis, quod cum statuissem liberare Siciliam à dominatu tyrannorum, voluissent se potissimum esse ducem hujus operis. Putabat enim nihil rerum humanarum agi sine numine Deorum.

3. Quidquid boni egeris, puta acceptum esse à Diis, inquebat Bias.

M. Antonius in libro de vitâ suâ, agit gratias Diis verbis multis, quod dederint sibi sæpius monita & adjumenta ad instituendam vitam sapienter: quod eripuerint se & juvenem & senem

ab occasionibus multis peccandi: quòd concesserint bonos parentes, præceptores, amicos.

Cùm divitiæ soleant afferre hominibus aut amorem voluptatis, aut animi superbiam; opus est homini auxilio divino, ut modestiam colat.

Credendum est neminem virorum bonorum talem fuisse, nisi adjuvante Deo. Et nemo unquam fuit vir magnus sine <sup>beneficentia</sup> amlatu aliquo divino.

Si mens, virtus, fides, concordia inest in genere humano; unde hæc potuerunt defluere in terras, nisi à superis?

4. Cura priscorum in inveniando, benignitas in tradendo, est donum Deorum. Si quis fortè credit illa potuisse <sup>ab hominibus</sup> excogitari ab homine, intelligit ingratiè munera Deorum.

Ne dixeris illa, quæ invenimus, esse nostra. <sup>deus enim dicitur</sup> Semina artium omnium <sup>in terra</sup> sunt nobis, & <sup>ut ait Plato</sup> Deus magister ex occulto <sup>intra</sup> alicui & excitat ingenia.

*ab. Invero.*

## C A P U T I X.

*Templa ad augendam pietatem extructa sunt.*

<sup>deumque</sup> <sup>ex deo aut</sup> CENSEO delubra esse excitanda Diis in urbibus. Nec sequor magos Persarum, quorum consilio Xerxes dicitur inflammasse templa Græciæ. Indignabantur quippe <sup>inquit</sup> includi parietibus Deos, quibus omnia deberent esse patentia ac libera, quorumque hic mundus omnis esset templum & domus. Græci & Romani melius censere ac fecere qui, licet agnoscerent divinum numen esse ubique <sup>diffusum</sup> diffusum, tamen, ut augerent pietatem nostram in Deos, voluerunt illos incolere easdem urbes, quas nos. <sup>inquit</sup> Afferit enim hæc opinio religionem utilem civitatibus. <sup>inquit</sup> Siquidem benè dictum est à Pythagora doctissimo viro, pietatem & religionem maximè versari in animis, cùm rebus divinis operam damus in templis, cernentes simulacra Deorum.

*diffusum*

*Thales*



Thales, qui fuit unus è sapientibus illis septem, dixit, oportere homines existimare Deos omnia cernere; Deorum omnia esse plena: ut ubique tam sanctè castèque agerent, quam si in fanis essent maximè religiosi.

Olim tanta reyerentia præstabatur templis, ut in iis exicrare aut mungere nefas esset.

## CAPUT X.

*Tuta & honorata inter hostes pietas.*

1. CUM Galli, captâ urbe Româ, Capitolium considerent, & intenti essent ad id, ne quis hostium posset evadere; juvenis Romanus convertit in se civium atque hostium admirationem. Sacrificium erat statum genti Fabiæ in colle Quirilani. Ad quod faciendum cum C. Fabius Dorso descendisset è Capitolio, ferens sacra manibus, per medios hostes transiit, & nihil motus voce cujusquam & minis, in Quirinalem collem pervenit. Ibi omnibus rebus peractis solemni ter, regressus est viâ eâdem, quâ iverat, similiter constanti vultu graduque, sperans Deos, quorum cultum ne in mortis quidem periculo deseruisset, futuros esse sibi propitios. Et quidem pietas ejus tuta fuit ab hostibus: rediitque in Capitolium ad suos incolumis, Gallis aut attonitis miraculo juvenilis audaciæ, aut motis religione, cujus negligens non erat gens illa.

Cum Camillus pergeret ad delendam urbem Veios, decimam partem prædæ voverat Apollini. Urbe captâ ac direpta, ut liberaretur eo voto, Senatus misit naves tres legatos, qui ferrent Delphos, pateram auream donum Apollini. Hi excepti à Liparensibus piratis haud procul fæto Siculo, devecti sunt Liparas. Mos erat civitatis prædam dividere, velut partam publicolatrocinio. Porro eo anno erat in summo magistratu Ti-

Reverent.

Sacerdos

masitheus quidam, vir similior Romanis, quam suis; qui & legatos & Deum, cui mittebatur donum, reveritus ipse, multitudinem quoque iustâ religione implevit: adduxit in publicum hospitium legatos, persecutus est eos etiam cum præliis navium Delphos, & inde reduxit Romam hospites. Senatus hospitium propterea cum illo institui voluit, donaque ei publicè sunt data.

## CAPUT XI.

*Publica religio privatis affectibus prælata.*

CUM Galli ad Romam ferro & igne vastandam accelerare dicerentur, & nulla spes esset urbem posse defendi, multi Romanorum per agros dilapsi sunt, multi urbes petierunt finitimas, asportantes quæcumque habebant pretiosissima.

Interim virgines Vestales, omisâ rerum suarum curâ, cum constitissent, quæ sacra secum ferenda essent, & quæ relinquenda, quia vires deerant ad ferenda omnia; detulerunt in loco sacro quædam condita in dolio: alia ferentes, onere inter se parito, ingressæ sunt viam quæ ducebat ad Janiculum. Eas cum conplexisset Albinus è plebe Romanâ homo, plaustrum conjugem ac liberos vehens inter cæteram turbam quæ urbe excedebat; ratus est irreligiosum esse, sanctas Virgines pedibus ire, portantes manibus sacra populi Romani, se verò ac suos in vehiculo conspici. Itaque statim omisso, quod incœperat, itinere, descendere uxorem ac liberos iussit, Virgines sacraque in plaustrum imposuit, & pervexit Cære, quo iter erat Vestalibus. Adeo tunc in ultimo etiam casu religio publica antecellebat privatis affectibus, salvumque erat discrimen rerum divinarum.



## CAPUT XII.

*ex parte non valente*  
Impii ferius oculis dant penas.

1. **D**IONISIUS major, Siciliæ tyrannus, ut crudelitatem exercuit in suos, sic fuit impius in Deos furtis & cavillationibus. Cum in sanum Jovis venisset, detraxit ei aureum amiculum, quo fuerat à tyranno Gelone exornatus: atque in eum etiam cavillatus est, dicens: Æstate gravem esse aureum amiculum, hieme frigidum. Eique laneum pallium iniecit, quod dicebat aptum esse ad omne tempus. Idem Æsculapio barbam auream demit jussit, Neque enim, inquiebat, convenit barbatum esse filium, cum in omnibus fanis pater ejus Apollo imberbis sit. Fano quodam expilato navigabat Syracusas: & cum secundissime cursum teneret: Videtis ne, inquit, amici, quam bona navigatio detur sacrilegiis à Diis immortalibus? Non exolvit quidem statim Dionisius debita impietati supplicia: at postea insidiis suorum oppressus, interfectus est. Divina enim ira plerumque lento gradu procedit ad vindictam sui, tarditatemque supplicii gravitate compenstat.

2. Cum è Sicilia rediens Pyrrus rex Epiri, classe præterveheretur Locros, thesauros fani Proserpinæ ipsoavit, & pecuniâ in naves impositâ ipse terrâ est profectus. Quid ergo evenit? Classis ejus postero die lacerata est fœdissima tempestate, omnesque naves, quæ sacram pecuniam habebant, ejectæ sunt in littora Locrorum. Quâ tantâ clade edoctus tandem rex esse Deos, jussit pecuniam omnem conquistam referri in thesauros Proserpinæ. Nec tamen unquam postea quicquam prosperi evenit ei: pulli quoque ex Italia, ignobili morte occubuit, cum temerè noctu ingressus esset Argos. Lanceâ primum leviter vulneratus fuerat à Juvene quodam Argivo. Ma-

trem habebat hic anum pauperculam, quæ inter alias mulieres spectans prælium è tecto domus, cum videret Pyrrhum ferri toto impetu in auctorem vulneris sui, timens vitæ filii, protinus, regulam corripuit, & utrâque manu librâ dimisit in caput Regis. Quo vulnere dejectus ex equo Pyrrhus, à Zopyro quodam est obtruncatus.

3. Longo post tempore Q. Pleminius præpositus præsidio Romanorum in urbe Locrorum, cum à sacrorum spoliatio non abstinuisset, & eisdem Proserpinæ thesauros diripuisset, quos olim Pyrrhus; ex senatus consulto Prætor & legati Locros missi, præcipuam, ut mandatum erat, curam religionis habuere. Omnes enim sacram pecuniam, quæ apud Pleminium & milites erat, in thesauris Deæ reposerunt, cum eam quam duplam Româ attulerant, ac piaculare sacrificium fecerunt. Ipse Pleminius, antea à suis hostiliter laceratus, & naso auribusque mutilatus, prope exanimis relictus, Romam missus est causam dicturus. Sed ante causæ dictionem feterimo genere morbi in carcere est consumptus.

4. Xerxes ante navale prælium, quo victus est à Themistocle, miserat quatuor millia armatorum Delphos, ad diripiendum templum Apollinis, quasi gereret bellum non tantum cum Grecis, sed etiam cum Diis immortalibus. Quæ manus totâ deleta est imbris & fulminibus: ut intelligeret quàm nullæ essent hominum vires adversus Deos.

5. Contra Agesilaüs, Rex Lacedæmoniorum, magnam templis reverentiam habuit. Maxima laus fuit victoriæ quam de Atheniensibus & Bœotis apud Coroneam adeptus est, quod anterulit iræ religionem. Cum enim plerique ex fuga se in templum Minervæ coniecissent & quaeretur, ab eo, quid his vellent fieri; eos vetuit violari, etsi aliquot vulnera acceperat in prælio, & iratus videbatur omnibus qui adversus se arma

tulerant. Neque solum in Græcia sancta habuit  
 templa Deorum : sed etiam apud barbaros sum-  
 mâ religione omnia simulacra atque aras conser-  
 vavit. Sic Alexander magnus, cum Thebas ever-  
 teret, non est oblitus pietatis erga Deos : sed  
 cavit summo studio ne Deorum ædes, & alia  
 sacra loca violarentur. In expeditione quoque  
 Asiaticâ cum à Persis repeteret pœnas, abstinuit  
 à locis omnibus quæ Diis dicata erant; quamvis  
 Persæ hoc potissimum injuriæ genere sæviissent  
 in Græcia.

## CAPUT XIII.

Quæ vota facienda sint Deo.

1. **D**EUM roga bonam mentem, bonam valetu-  
 dinem animi, deinde corporis. Quidni tu  
 hæc vota sæpè facias? Scito te esse omnibus cu-  
 piditatibus liberum, cum eò perveneris, ut De-  
 um nihil roges, nisi quòd rogare possis palàm.  
 Quanta nunc cementia est multorum hominum!  
 Intulurrant Diis vota turpissima: si quis admove-  
 rit aurem, conticecent: & quod scire homines  
 nolunt, Deo narrant. Tu sic vive cum homini-  
 bus, tanquam Deus videat, sic loquere cum  
 Deo, tanquam homines audiant.

Pædalii, gens Indica, nihil aliud petebant à  
 Diis quàm justiciam.

Dicebat Apollonius has tantùm preces esse pro-  
 fundendas ab homine accedente ad Deorum tem-  
 pla: O Dii! quæ mihi conveniunt, præstate.

2. Socrates, qui fuit quasi quoddam terrestre  
 oraculum humanæ sapientiæ, arbitrabatur nihil  
 ultra petendum esse à Diis, quàm ut bona tri-  
 buerent; cum ii soli scirent, quod unicuique  
 esset utile: nos autem plerùmque ea expetere-  
 mus votis, quæ foret melius non impetrasse. Ere-  
 nim involuta densissimis tenebris mens mortalium

effundit se se in cæcas præcationes. Divitias appetit, quæ fuerunt multis exitio: honores concupiscit, qui complures perfundederunt: splendida conjugia sollicitè quærit, quæ ut aliquando illustrant, ita nonnunquam funditis domos everunt. Delinat tandem stulta inniare iis rebus, quæ illi multorum malorum causa sæpè sunt, seque totam permittat arbitrio Deorum: quia qui tribuere bona solent, etiam eligere aptissima possunt.

Permites ipsis expendere numinibus, quid Conveniat nobis, rebusque sit utile nostris; Nam pro jucundis aptissima quæque dabunt Di:

Carior est illis homo, quàm sibi, &c.

Laudabat Socrates has antiqui poetæ preces: O Jupiter! ea quæ bona sunt, nobis orantibus aut non orantibus tribue; quæ verò mala, etiam orantibus, ne concede.

## CAPUT XIV.

Homo præcipuum opus Dei.

I. **A**NIMAL hoc providum, sagax, memor, plenum consilii, quem vocamus hominem, generatum est à supremo Deo præclarâ quâdam conditione. Solum est enim ex tot animantium generibus particeps rationis & cogitationis, cum cætera sint omnia expertia. Quid est autem ratione præstantius? quæ cum adolevit, & perfecta est, nominatur, rite sapientia.

Propter ingeneratam homini à Deo rationem, est aliqua ei cum Deo similitudo, cognatio, societas. Itaque ad commoditates hominum tantam rerum libertatem, natura, hoc est Deus, largita est, ut ea, quæ gignuntur, merito videantur donata nobis esse consilio, non autem nata for-



tuito. Artes præterea innumerabiles repertæ sunt,  
docente naturâ; quam imitata ratio, consecuta  
est multa ad vitam necessaria, aut commoda.

2. Eadem natura hominem non solum mente  
ornavit, sed etiam dedit ei figuram corporis ha-  
bilem & aptam ingenio humano. Nam cum cæ-  
teris animalibus caput in terram pronum dedis-  
set; solum hominem erexit, excitavitque ad  
cœli, quasi cognationis domiciliique sui, con-  
spectum.

Pronaque cum spectent animalia cætera terram,  
Os homini sublimè dedit, cœlumque tueri  
Jussit, & erectos ad sidera tollere vultus.

Omitto opportunitates habilitatesque alias  
corporis; moderationem vocis, orationis vim,  
quæ conciliatrix est humanæ societatis.

3. In prima rerum constitutione cum Dii uni-  
versa disponent, rationem hominis habuerunt.  
Non est homo tumultuarium & incogitatum opus.  
Cogitavit nos ante natura, quam fecit. Ita est:  
carissimos nos habuerunt Dii, habentque: & in  
orbe proximos ab ipsis collocaverunt, qui maxi-  
mus honos tribui potuit.

Qui se ipse norit, intelliget se habere aliquid  
divinum, semperque & faciet & sentiet aliquid  
dignum tanto munere Deorum.

Decet eos qui student præstare cæteris anima-  
libus, summâ operâ niti; ne vitam transeant ve-  
luti pecora quæ natura finxit prona, atque obe-  
dientia ventri. Constamus animo & corpore. Al-  
terum nobis commune est cum Diis, alterum  
cum belluis. Animus debet imperare, corpus ve-  
rò servire. Itaque admiranda & detestanda est  
pravitas eorum, qui dediti gaudiis corporis, in  
luxu atque ignavia ætatem agunt: ingenium ar-  
tem incultum & socordia inunt torpescere.

## CAPUT XV.

*Virtus proprium atque unicum hominis bonum.*

**U**T ad <sup>cursum</sup> ~~cursum~~ natus, est equus, ad arandum <sup>agraribus non cultis</sup> ~~bos~~ bos, ad indagandum <sup>lucrum</sup> ~~canis~~ canis, sic homo ad duas res natus est, intelligendum & agendum convenienter naturæ, id est rationi, in quo positum est Honestum, & quod proprium atque unicum est in terris hominis bonum. Non enim refert ad felicitatem ejus quantum agrorum aret, à quàm multis saturetur, <sup>domi non opus habet</sup> quàm pretioso lecto cubet, sed quàm bonus sit. Bonus autem est si sit in eo ratio ad naturæ voluntatem accommodata & perfecta, quæ virtus & Honestum vocatur.

In quatuor partes Honestum dividi solet, Prudentiam, Justitiam, Fortitudinem, & Temperantiam. Ex singulis autem illis virtutibus certa officiorum genera nascuntur, in quibus colendis <sup>consistit</sup> sita est omnis vitæ honesta, & in negligendis turpitudine. Itaque de unaquaque seorsim agemus, & quatuor libris <sup>de eorum virtutibus</sup> complectemur quæ pertinent ad quatuor illas virtutes.

## LIBER SECUNDUS.

### DE PRUDENTIA.

## CAPUT I.

<sup>inordinabilis</sup> Inest mentibus, <sup>inextinguibilis</sup> insatiabilis cupiditas veri videndi.

**M**UNUS Proprium Prudentiæ est indagatio atque inventio veri. Qui enim maximè perspicit quid in re quaque verissimum sit, is prudentissimus haberi solet.



Tributum est à naturâ generi omni animantium, ut se, vitam corpusque tueatur: declinet ea quæ videantur nocitura; & inquiret ac <sup>parat</sup> <sup>parat</sup> omnia quæ sint ad vivendum necessaria. At inquit o atque investigatio veri, propria est hominis, qui unus est rationis particeps: & naturâ inest mentibus nostris insatiabilis quædam cupiditas veri videndi. Itaque cum sumus necessariis negotiis & curis vacui, tum <sup>avemus</sup> aliquid videre, audire, <sup>addiscere</sup>, & putamus cognitionem rerum aut occultarum aut admirabilium esse ad beatè vivendum necessariam. In scientiâ excellere, pulchrum ducimus: errare autem, nescire, <sup>decipi</sup>, malum & turpe.

## CAPUT II.

Scientia <sup>natura</sup> pabulum animi.

1. IN ipsis rebus, quæ discuntur & cognoscuntur, insunt profectò <sup>invitamenta</sup> quædam, quibus moveamur ad discendum cognoscendumque. Etenim an non videmus eos, qui ingenuis studiis, atque artibus delectantur, aliquando non habere rationem nec valetudinis, nec rei familiaris, & maximis laboribus consequi eam, quam ex discendo capiunt, voluptatem? Quem ardorem studii censetis fuisse in Archimede, qui dum in pulvere describeret quædam attentius, ne senserit quidem Syracusas, patriam suam, esse captas? Quid de Pythagora & Platone loquar, qui judicaverunt veniendum sibi esse eò, ubi aliquid esset quod disci posset, tantas regiones barbarorum obierunt, tot maria transierrunt? Quid de Democrito, qui dicitur oculis se privasse, ut animus quàm minimè abduceretur à cogitationibus, qui <sup>patrimonium</sup> <sup>neglexit</sup>, agros incultos deseruit?

2. Carneades laboriosus & diuturnus sapientiæ

miles, nonaginta expletis annis, habuit eundem finem vivendi ac philosophandi. Ita quidem se inquirendæ veritati addixerat, ut, cum recubisset cibi capiendi causâ, manum ad mensam porrigere oblivisceretur, alio abstractus cogitationibus.

Est animorum ingeniorumque nostrorum naturale, quoddam quasi pabulum, consideratio contemplatioque naturæ: & indagatio ipsa rerum magnarum occultarumque habet oblectationem.

## CAPUT III.

*Pertinax labor & disciplina naturam vincunt.*

1. **I**N Demosthene, Græcorum oratorum princeps, tantum discendi studium tantusque labor fuisse dicitur, ut tandem superaret impedimenta naturæ diligentiam atque industriam. Cum ita balbus esset, ut Rhetoricæ artis, cui studebat, primam litteram non posset dicere; perfecti exercitatione, ut nemo putaretur locutus planius eo. Deinde perduxit ad gratum auribus sonum vocem suam, quæ propter exilitatem acerbata erat. Laterum firmitate destitutus, est a labore eas vires, quas corporis habitus negaverat. Conjectis in os calculis, summâ voce versus multos pronuntiabat inambulans, & ardua loca celeri gradu scandens.

Declamitans in maris littore, in quod se fluctus irridebat, consuecebat concitata multitudinis fremitus non expavescere. Cellam quoque ædificasse subterraneam dicitur, in qua duos trefve menses continuos aliquando inclusus operam dabat gestui & voci, & quidem mediâ parte capitis abrasâ, ut in publicum sine verecundiâ prodire non posset. Sic diu præliatus adversus naturam, victor abiit, & malignitatem ejus peritachillimo animi robore superavit.

Nihil est quod non expugnet pertinax opera,  
& intenta ac deligens cura.

. . . Labor omnia vincit

Improbis.

2. Erat Cleanthi tardum obtusumque ingenium: erat & summa rerum omnium inopia. At ubi ejus animum sapientiæ amor occupavit, tarditatem ingenii acri studio ac diligentia vicit, Zenoni interdiu assistens auditor: inopiam verò, aquam à puteo noctu hauriens, acceptâ ab hortulano mercede. Aiunt eum aliquando in judicium vocatum fuisse, quod robusto admodum ac pingui corpore esset, cum nullam artem, unde viveret, videretur profiteri. At ubi quæstus sui ac victus testes adhibuit, hortulanum, cui aquam hariebat, & mulierem, apud quam pinsebat: non solum est dimissus, sed etiam ab Areopagitis iudicibus donatus decem minis, quas noluit accipere.

3. Accipimus Stilponem Megaricum Philosophum, hominem sanè acutum fuisse & temporibus suis probatum. Scribunt ipsius familiares hunc naturâ & ebriosum & mulierosum fuisse: neque hoc scribunt vituperantes eum, sed potius ad laudem. Significant enim vitiosam naturam ab eo sic edomitam & compressam fuisse doctrinâ, ut nemo unquam vinolentum illum viderit, nemo in eo vestigium libidinisprehenderit.

Zopyrus, qui profitebatur se pernoscere hominum mores naturasque ex corpore, oculis, vultu, fronte, magno in conventu dixit Socratem stupidum esse & bardum: addidit etiam mulierosum: in quo Alcibiades, qui aderat, dicitur cachinnum sustulisse. Ipse verò Socrates, *Hæc vitia sibi ingenuita fuisse naturâ* non dissimulavit; *sed ratione à se reiecta*, dixit. Et sanè vitia ex naturalibus causis nasci possunt: sed extirpari & funditus tolli non possunt, nisi voluntate, studio, disciplinâ.

Animus hominis, quidquid sibi imperat, obtinet.

Cicero Quintum fratrem laudans , quòd eos , quibus præerat in Asiâ provinciâ , contineret in officio , ostendit his verbis quid doctrina posset efficere : *Tibi fuit hoc facillimum , cujus natura talis est , ut etiam sine doctrina videatur moderata esse potuisse : ea autem adhibita doctrina est , quæ vel vitiosissima naturam posset excolere.*

---

## C A P U T I V.

### *Quæsitæ vitæ periculo scientia.*

1. **P**LATONICUS Philosophus , nomine Taurus , discipulos ad Philosophiam summo studio capeffendam excitabat multis exemplis , & eâ re quam dicebat Euclidem Socraticum factitasse. Caverant decreto Athenienses , ut , si quis civis Megarensis deprehensus esset pedem Athenas intulisse , id ei capitale foret. Tum Euclides Megarensis , qui ante id decretum consueverat Athenis commorari , ut audiret Socratem , tunicâ longâ muliebri indutus , pallio versicolori testus , & caput atque os velatum habens , nocte ex urbe Megaris Athenas commeabat , ut saltem aliquo tempore consiliorum sermonumque Socratis fieret particeps ; rursusque sub lucem , eâdem veste illâ testus , domum redibat , millia passuum multa emensus Sic ille vitæ periculum adire non dubitabat , comparandæ sapientiæ causâ.

2. Antisthenes discipulos hortabatur ad dandam operam sedulam sapientiæ : at pauci obtemperabant. Itaque tandem indignatus dimisit à se omnes , inter quos erat & Diogenes. Cùm verò hic , incensus magno audiendi Philosophi studio , ad eum tamen ventitaret , eique adhæreret pertinaciter : minatus est Antisthenes , se percussurum illi caput baculo , quem solebat manu gestare : & his minis non territum respicâ percussit aliquando.

Non



Non recessit propterea Diogenes : sed animo obstinato ad imbuendum pectus Philosophiæ præceptis : *Percute*, inquit, *si iia placet*; ego tibi caput præbebo. Neque verò tam duram invenies fustem, ut me à tua schola abigas. Admisit tandem cupidum doctrinæ discipulum Antisthenes, & eum maximè amavit.

## CAPUT V.

*Doctus indocto multum præstat.*

1. **A**ccessit ad Aristippum Philosophum paterfamilias, rogavitque ut filium suum susceperet erudiendum. Cum verò ille pro mercede petisset quingentas drachmas; pater deterritus pretio, quod ignaro avaroque homini nimium videbatur, dixit se minoris empturum esse mancipium. Tum Philosophus : *Eme*, inquit, & *habebis duos*.

Alius paterfamilias quæsit ab eodem Aristippo, quid commodi consecuturus esset filius suus, si eum litteris institui curaret? *Si nullum alium fructum percipiet*, respondit ille, *hunc certe quod in theatro* (cujus tum erant sedilia marmorea) *non sedebit lapis super lapidem*. Hoc gemino responso innuebat vir prudens, eos, quorum ingenium excultum non fuisset, similes videri posse aut mancipiorum aut lapidum. Tantumque doctrinæ tribuebat, ut interrogatus quodnam discrimen esset inter homines doctrinâ excultos, & indoctos? responderit : *Idem quod inter equos domitos & indomitos*.

Ut ager, quamvis fertilis, sine culturâ fructuosus esse non potest : sic sine doctrina animus. Cultura autem animi Philosophia est, quæ extrahit vitia radicibus, præparat animos ad satus accipiendos, eaque mandat his & ferit, quæ, cum adoleverint, fructus ferent uberrimos.



Salsè ridebat Diogenes Sinopenfis inertiam & incuriam Megarentium, qui liberos nullis bonis artibus instruebant, curam verò pecorum diligentem habebant. Dicebat enim: *Malle se Megarentis alicujus arietem esse, quàm filium.* Non ab simili sententiâ, sed aliam ob causam, dixit de Herode Judæorum rege Augustus: *Melius est Herodis porcum esse, quàm filium.* Abstinebat quippe Herodes à porcis: à filiorum cede non abstinebat.

## CAPUT VI.

*Vir doctus potius non vult ditescere quàm non potest.*

1. **C**UM Thaleti Milefio paupertatem verterent vitio cives sui, & contenderent studium Philosophiæ esse inutile ad rem augendam etiam cupienti; voluit ille objurgatores suos convincere, ostendereque Philosophum facere posse pecuniam si ei ita visum fuerit, eaque arte est usus. Intellexerat, ut aiunt, ex astrologiâ olearum ubertatem hoc anno fore. Itaque hyeme nondum exactâ, paucorum nummorum copiâ instructus, conduxit parvo pretio omnia præla & trapeta quæ Mileti & in Chio insula erant, cum nemo contrâ licitaretur. Ubi verò conficienti olei tempus venit, multis undique & simul ad præla accedentibus, ille ea elocavit tanti quanti voluit, & magnâ inde pecuniâ coactâ. probavit, facile esse Philosophis ditescere si velint: sed eos in alia longè præstantiora studium c. nferre.

2. Ego, inquit Vitruvius de se ipso, parentum curâ & præceptorum doctrinâ paravi animo possessiones & divitias, quarum ea proprietas est, is fructus, ut nihil desideretur amplius. Nonnulli hæc levia judicantes, putant eos tantum esse sapientes qui pecuniâ sunt copiosi. Itaque ad id unum contententes, audaciâ adhibitâ

notitiam consequuntur. Ego autem non ad pecuniam parandam architecturæ aliisque artibus studium dedi: sed putavi sequendam potius tenuitatem cum bona fama, quàm abundantiam cum infamia. Neque est mirandum quòd ita ignotus sim pluribus. Cæteri architecti rogant & ambiunt, ut architectentur; mihi autem à præceptoribus est traditam, oportere eum, qui curam alicujus rei suscipit, rogari, non verò rogare.

## CAPUT III.

*Ea viatica paranda sunt, quæ cum naufrago enatent.*

1. **A**BISTIPPUS Philosophus Socraticus, de quo supra, interrogatus quid differret sapiens ab insipiente? Mitte, inquit, utrumque ad ignotos, & disces. Quæ responsio quàm vera esset ipsius exemplo probatum est. Cùm ejectus naufragio in litus Rhodiorum, animadvertisset geometricas figuras, exclamavit primùm. *Benè speremus, ó amici, hominum enim vestigia conspicio.* Deinde in oppidum Rhodum contendit, & rectâ gymnasium devenit, ibique de philosophia disputans, magnis muneribus est donatus: ita ut vestitum, & quæ opus essent ad victum, præstaret iis qui unâ naufragium fecerant. Cùm deinde comites ejus in patriam reverti cupientes, interrogassent eum quidnam vellet domum renunciari, mandavit dicere; *Ejusmodi possessiones & viatica liberis parari à parentibus oportere, quæ etiam è naufragio una possent enatare.*

Namque ea sunt vera præsidia vitæ, quibus, neque fortunæ iniquitas, neque publicarum rerum mutatio, neque belli vastatio potest nocere.

2. Theophrastus homines hortando, ut docti potius essent, quàm fortunæ confiderent, prædicabat: *Doctum, solum ex omnibus, neque in alienis locis peregrinum esse, neque, amissis familia-*

*ribus & necessariis, inopem amicorum; sed in omni civitate civem censerî; adversosque fortunæ casus posse despicerè.*

Sancitum erat legibus Græcorum, ut parentes omnes à liberis alerentur. Athenienses verò illos tantum parentes ali à filiis jubebant, qui eos artibus erudissent. Etenim fortuna facillime adimit hominibus munera quæ dedit: disciplinæ verò cum animis conjunctæ, nullo tempore deficiunt, sed permanent stabiliter ad summum exitum vitæ. Itaque ego, inquit Vitruvius, maximas infinitasque parentibus ago atque ab eo gratias, quòd Atheniensium legem probantes, me erudiendum curaverunt.

3. Multi ex iis Atheniensibus, qui acceptâ magnâ clade in Sicilia, domum reverti sospites potuerunt, adierunt Euripidem, se ei salutem suam debere confitentes; dixeruntque: alios fuisse emissos è vinculis, quòd edocuisset dominos suos quædam ipsius carmina, quæ memoriâ tenuerant: alios, qui post adversam pugnam errabant per agros omnium egeni, fuisse cibo & potu recreatos, propter decantatos ejus versus aliquos. Erant quippe Siculi præ cæteris Græcis studiosissimi atque appetentissimi tragœdiarum Euripidis; quarum si quid afferretur ab iis qui in insulam appellebant, illud avidè arripiebant, lætique secum invicem communicabant. Quin etiam memoriæ proditum est, cum navis Caunia, quam lembi prædatorii premebant, ad Siculum litus confugisset; Siculos primò noluisse eam recipere; at ubi interrogati Caunii an noscent Euripidis carmina, se nosse responderunt; tum verò liberum eis receptum paruisse.

## C A P U T V I I I.

*Litteræ ornamenta hominum sunt & solatia.*

1. **S**I non tantus fructus perciperetur ex liberarum artium studiis, quantum percipi consue-

tat, sed ex his delectatio sola peteretur, tamen hæc animi remissio judicanda esset libero homine dignissima. Nam cæteræ neque temporum omnium sunt, neque ætatum, neque locorum. Hæc studia adolescentiam alunt, senectatem oblectant, secundas res ornant, adversis perfugium ac solatium præbent, delectant domi, non impediunt foris, pernoctant nobiscum, peregrinantur, rusticantur.

Si tempus in studia conferas, omne vitæ fastidium effugeris, nec noctem fieri optabis tædio lucis, nec tibi gravis eris, nec aliis supervacuis.

Videmus litteras & ingenuas artes non solum beatæ vitæ oblectationem esse, sed etiam levamentum miserarum. Itaque multi cum in potestate essent hostium, multi in custodia, multi in exilio, dolorem suum litteris levaverunt. Demetrius Phalereus, cum à patria pulsus esset injuriâ, contulit se Alexandriam ad Ptolemæum regem, multaque præclara in illo calamitoso otio scripsit. Dicitur tum monuisse regem, cujus hospitio utebatur, ut conscriptos de regno imperioque libros sibi compararet atque perlegeret: *Quia, inquit, quæ amici non audent monere reges, hæc in libris scripta sunt.*

2. Quamdiu respublica Romana per eos gerebatur quibus se ipsa commiserat, in eam curas cogitationesque ferè omnes suas conferebat Cicerone, & plus operæ ponebat in agendo, quam in scribendo. Cum autem dominatu unius Julii Cæsaris omnia tenerentur; non se angoribus dedit quibus fuisset confectus, nec indignis homine docto voluptatibus. Fugiens conspectum sceleratorum, quibus omnia redundabant, urbe relicta rura peragrabat, abdebatque se, quantum licebat, & solus erat. Cum verò nihil agere animus ejus non posset, neque vellet languere eam solitudinem, quam ipsi afferebat necessitas, non voluntas; existimavit molestias honestissime deponi



posse, si se ad Philosophiam retulisset, cui adulescens multum temporis tribuerat, discendi causâ; omne studium curamque convertit ad scribendum, atque ut qui antea occupatus profuerat civibus suis, aliquid quoque iis prodesse posset otiosus; elaboravit ut doctiores fierent & sapientiores: pluraque brevi tempore eversâ republicâ scripsit, quam multis annis eâ stante scripserat. Sic paruit virorum sapientum præcepto, qui docent non solum ex malis eligere minima oportere, sed etiam excerpere ex his ipsis si quid inest boni.

3. Doctrinæ studia & optimè felicitatem extollunt, & facillimè minuunt calamitatem: eademque & ornamenta hominum maxima sunt, & solatia.

Ipse Dionisius junior, cum tyrannide excidisset, interrogatus quid Plato philosophiaque ipsi prohibissent? *Ut, inquit, tantam fortunæ mutationem æquo animo feram.*

Et gaudium mihi, inquit Plinius, & solatium in litteris; nihilque tam lætum est, quod non per has lætius fiat, nihil tam triste, quod non per has sit minus triste. Itaque in infirmitate uxoris & amicorum periculo aut morte turbatus, ad studia, unicum doloris levamentum, confugio: quæ præstant ut adversa patientius feram.

## C A P U T I X.

*Quæ in scientiæ studio sint vitanda.*

1. **D**uo vitia vitanda sunt in cognitionis & scientiæ studio, naturali sanè & honesto. Unum. ne pro cognitâ habeamus incognita, hisque temere assentiamus. Quod vitium effugere qui volet (omnes autem velle debent) adhibebit & tempus & diligentiam ad considerandas res. Alterum est vitium, quod quidam nimis magnam operam conferunt in res obscuras atque difficiles,



eademque non necessarias Quibus vitis declinat, quod operæ curæque ponetur in rebus honestis & cognitione dignis, id jure laudabitur.

Si quis tamen ita teneatur discendi studio, ut eos deserat quos tutari debet, ab officio discedit, & à justitia, quæ in hominum tuendis commodis maxime cernitur, & contemplationi cognitionique rerum anteponenda est. Quod optimus quisque judicat, & re ipsa ostendit. Qui est enim tam cupidus percipiendæ rerum naturæ, ut si ei subito allatum sit periculum aliquod patriæ, propinquorum, amicorum, cui subvenire possit, non statim adjiciat res cognitione dignissimas?

2. Cupere omnia scire, cujuscumque modi sint, curiosorum est: duci verò cupiditate scientiæ ad magnarum rerum contemplationem, summorum virorum esse est putandum.

Si operosæ agendo nihil agunt, qui in litterarum inutilium studiis detinentur.

Ecce Romanos quoque invasit studium supervacua discendi. Cujus errores ista minuunt? cujus cupiditates prement? Quem fortiolem, quem justiolem, quem liberaliorem facient?

Cum gloriaretur quidam quod multa didicisset; dixit ei Aristippus: *Sicut qui plurima comedunt, non melius valent, quam qui sumunt necessaria: sic eruditi habendi sunt, non qui plurima legerunt ac didicerunt, sed qui nilia.*

3. Anniceris Cyrenæus magnifice de se sentiebat ob artem equitandi, & currum regendorum peritiam. Volens igitur specimen artis Platoni exhibere, juncto curru multos cursus circumegit in Academia, sic servans primam orbitam arenæ impressam à rotis currus sui, ut ne tantillum quidem ab ea declinaret. Obstupuerunt omnes rei miraculo, & aurigam ad cælum laudibus extollere. Uni Platoni talis peritia reprehensione potius, quam gloriâ, digna visa est; dixitque: *Fiçri non posse, ut, qui curam impenderet adeo*

*diligentem rebus tam exilibus, & nullius utilitatis, ea non negligeret quæ essent multo potiora, & vere digna admiratione.*

Quædam supervacua est artis imitatio, quæ vanum laborem habeat. Qualis illius fuit, qui continuè, & sine frustratione in acum inferebat grana multa ciceris ex spatio distante missa. Quem cum spectasset Alexander, donasse eum dicitur ejusdem leuminis modio. Quod quidem præmium fuit illo opere dignissimum.

Turpe est difficiles habere rugas,

Et stultus labor est ineptiarum.

Histrionum, gladiatorum, equorum, studio occupatus & obsessus adolescentum animus, quantum loci bonis artibus relinquit!

4. Etiam si longa homini vita suppeteret, tempus parce dispensandum esset, ut sufficeret necessariis. Nunc quæ dementia est, supervacua discere in tanta egestate temporis!

Non tam benignè & liberater tempus natura nobis dedit, ut liceat aliquid ex illo perdere. Videtamen quantum etiam diligentissimus pereat. Aliud cuique valetudo sua abstulit, aliud privata negotia, aliud publica, occupaverunt; vitam nobiscum dividit somnus. Ex hoc tempore tam angusto, tam rapido, tam nos auferente, quid juvat majorem partem mittere in vanum?

## C A P U T X.

*Qui rectè vivit, is scientiam utilem & necessariam est adeptus.*

**S**i quis animum virtuti consecravit, & sequitur quodcumque vocat illa: si intelligens se sociale animal esse & in commune bonum genitum, mundum ut unam omnium domum spectat; si semper tanquam in publico vivit: si sciat nec malum esse ullum, nisi quod turpe est, nec bonum nisi quod

honestum, & ad hanc legem ac regulam agat cuncta & exigit: si judisset miserrimo/omnium mortalium, quantiscumque opibus refulgeant, homines ventri ac libidini deditos quorum animus inertio torpet. Hæc si quis & sciat & præstet, consummavit scientiam utilem atque necessariam. Reliqua oblectamenta otii sunt.

Plus prodest, si pauca præcepta sapientiæ teneas, sed illa tibi in promptu & in usu sint, quam si multa quidem didiceris, sed illa non habeas ad manum.

---

## CAPUT XI.

*Naturâ tam docere cupimus, quàm discere.*

I. IMPELLIMUR naturâ, ut prodesse velimus quam plurimis, in primisque docendo, & tradendis comparandæ prudentiæ rationibus. Itaque non facile est invenire, qui non tradat alteri quod sciat ipse. Ita non solum ad discendum propensi sumus, verum etiam ad docendum.

Cupio, discebat olim Seneca, scribens ad Lucilium, in te transfundere omnia quæ ad sanandos animi morbos efficacia expertus sum. Gaudeo aliquid discere ut doceam; nec me ulla res delectabit, licet eximia sit & salutaris, quam mihi uni sciturus sum. Nullius boni jucunda possessio est sine socio. Mittam itaque tibi ipsos libros, unde salutaria hausi: & ne multum operæ impendas in totis libris perlegendis, imponam notas, ut tu, qui sectaris profutura, protinus accedas ad ea quæ probo & miror. Plus tamen tibi & viva vox & convictus sapientum proderunt quàm libri. Primum quia homines amplius oculis, quàm auribus, credunt: deinde quia longum est iter per præcepta, breve & efficax per exempla. Cleantes non expressisset moribus Zenonem, si eum tantummodo audisset. Vitæ ejus interfuit, secreta perspexit, observavit illum, an ex præ-

ceptis suis viveret. Plato & Aristoteles plus ex moribus, quàm ex verbis Socratis, traxere.

Ex commodato librorum usu, ac sermone de iis habito, fluxit illa studiorum animorumque conjunctio Polybii & Scipionis Æmiliani, cujus fama non Italiam modò ac Græciam pervasit, sed remotissimas etiam gentes.

2. Xenophontem in angiportu, obvium habuit Socrates. Cùmque videret adolescentem vultu specioso admodum & verecundo, porrecto baculo, vetuit ne præteriret. Ut constitit, interrogavit eum Socrates, ubinam venderentur quæ essent necessaria variis usibus civium? Ad quæ eum expeditè respondisset Xenophon; percontatus est, ubinam homines fierent boni probique? Id verò nescire se, respondente adolescente: *Me igitur sequere*, inquit Socrates. Ex eo tempore Xenophon cœpit esse Socratis auditor.

3. Protagoram aiunt adolescentem, victus quærendi gratiâ, vecturas onerum corpore suo factitasse. Quod genus hominum latine bajulos appellamus. Is aliquando caudices ligni plurimos funiculo brevi colligatos portabat è iure Abdera in oppidum, cujus civis fuit. Tum fortè Democritus, ejusdem civitatis popularis, homoque ante alios virtutis & philosophiæ gratiâ venerandus, urbe egrediens, videt adolescentem cum illo genere oneris tam impedito facile atque expeditè incedentem. Propè accedit, juncturam posituramque lignorum scite peritèque factam considerat, petitque ut paulum acquiescat. Quod ubi Protagoras, ut erat petitum, fecit: animadvertit Democritus caudices illos brevi vinculo comprehensos librari continerique ratione quâdam quasi geometricâ. Itaque interrogavit, quis illum acervum lignorum ita composuisset? Et cum ille à se compositum dixisset; desideravit uti solveret ac denuo in eundem modum collocaret. Paruit bajulus, ac dissolutum fasciculum composuit si-



militer. Tum Democritus solertiam hominis non docti demiratus: *Mi adolescens, inquit, cum ingenium solenter aliquid agendi habeas, sunt majora melioraque quæ facere tecum possis.* Abduxitque eum statim, secumque habuit, sumtum ministra- vit, philosophiam docuit, & esse eum fecit, quantus postea fuit.

4. Hoc docenti & discenti debet esse propo- situm, ut ille prodesse velit, hic proficere. Qui ad Philosophorum scholas venit, quotidie secum aliquid boni referat: aut sanior domum redeat, aut sanabilior. Aliquid peccatur vitio præcipientium, qui nos docent disputare, non vivere, ali- quid etiam vitio discientium, qui ad præceptores suos afferunt propositum, non animum excolen- di, sed ingenium. Hæc nobis dicere Attalum me- mini, inquit ipse de se Seneca, cum scholam ejus obsideremus, & primi veniremus, & ulti- mi exiremus.

Perditæ luxuriæ adolescens Atheniensis Pole- mo, cum è convivio, non post occasum solis, sed post ortum surrexisset, domumque reperens, Xenocratis Philosophi patentem januam vidisset: vino gravis, unguentis delibutus, fertis capite redimito, perlucidâ veste amictus, scholam ejus refertam turbâ doctorum hominum intravit, dein- de confedit, ut clarissimum eloquium & pruden- tissima Philosophi præcepta irrideret. Ortâ, ut par erat, omulium, qui aderant, indignatione, Xenocrates vultum in eodem habitu continuit, omissisque iis de quibus tum differebat. de mo- destia ac temperantia loqui cæpit. Cujus sermo- nis gravitate respicere coactus Polemo, primum coronam capite detractam projecit, paulo post brachium intra pallium reduxit, deinde oris hi- laritatem deposuit, ad ultimum totam luxuriam exuit, uniusque orationis saluberrimâ medicinâ sanatus, ex infami ganeone maximus philoso- phus evasit.



## CAPUT XII.

*Stultum est ea docere cæteros quæ ipse expertus non es.*

CUM Annibal, Carthagine expulsus, venisset Ephesum ad Anthiolum regem, invitatus est ab hospitibus suis, ut Phormionem Peripateticum audiret. Quod cum se non nolle dixisset, locutus est homo copiosus aliquot horas de imperatoris officio, & de omni re militari. Cæteri, qui illum audierant, vehementer ejus oratione delectati, quæsiere ab Annibale quidnam ipse de illo philosopho judicaret? Hic pœnus liberè respondisse fertur: *Se multos deliros senes vidisse: sed qui magis quàm Phormio, deliraret, vidisse neminem.* Neque mehercule injuriâ. Quid enim aut arrogantius aut loquatius fieri potuit, quam Græcum hominem, qui nunquam hostem aut castra viderat, & ne minimam quidem partem ullius publici muneris attigerat, dare præcepta de re militari Annibali, qui tot annos de imperio certaverat cum populo Romano omnium gentium victore? Hoc mihi facere videntur omnes illi, qui, quod ipsi experti non sunt, id docent cæteros.

## CAPUT XIII.

*Etiam seni discere decorum est.*

1. GLORIABATUR Solon, se, aliquid quotidie addiscentem, senem fieri. Quod & supremo vitæ die confirmavit. Nam cum assidentes ei amici quâdam de re inter se sermonem conferrent; caput jam morte instante gravatum erexit, interrogatusque curid fecisset? respondit: *Ut cum istud quidquid est, de quo disputatis, percepero, æquiore animo moriar.*

Cato

Cato major Græcas litteras senex didicit, quas quidem avidè arripuit, quasi diuturnam sitim explere cupiens.

Sophocles ad summam senectutem tragedias fecit. Propter quod studium cum rem familiarem negligere videretur, à filiis in iudicium vocatus est, ut iudices à rei familiaris administratione removerent eum quasi desipientem, quemadmodum apud Romanos bonis interdici solebat patribus malè rem gerentibus. Tum senex recitavit iudicibus eam fabulam, quam proximè scripserat, quæsiuitque num illud carmen hominis desipientis esse videretur? Quo recitato, sententiis iudicum est liberatus.

Diogenem admonebat quidam, ut jam senex quiesceret à laboribus. Cui ille: *Quid?* inquit, *si in stadio currerem oporteret-ne me jam vicinum metæ cursum remittere? an non potius intendere?*

2. Senecam ætate provectum non pudebat ire ad Philosophos, ut ipse refert his verbis. Quintum jam diem in scholam eo, & ab octava hora disputantem Metronactum philosophum audio. Quid ergo inquis, idem facies quod juvenes? Næ ergo mihi beatus videor, si hoc unum senectutem meam dedecet. In theatrum senex ibo, ad philosophum ire erubescam? Quid stultius, quam non discere, quia diu non didiceris? Tandiu discendum est, quamdiu nescis: & tandiu discendum est quemadmodum vivas, quamdiu vivis.

Pudet autem me generis humani. Mihi Metro-nactis domum petenti transeundum est præter theatrum. Illud semper factum est. Ibi ingenti studio judicatur quis sit bonus histrio: at in illo loco, ubi discitur quomodo quis fieri possit vir bonus, pauci sedent: & hi plerisque videntur ac vocantur inepti & inertes. Mihi contingat iste derisus. Æquo animo audienda sunt imperitorum convicia: & ad honesta vadenti contemnendus est iste contemptus.

Cur nescire , pudens pravè , quàm discere , malo ?

Turpe est , quempiam multos annos continenter laborare atque exerceri , ut vel bonus Grammaticus , vel Rhetor , vel Geometra , vel Medicus fiat : ut autem vir bonus evadat , nunquam quidquam laboris in tanto temporis spatio insumere.

3. M. Aurelius imperator sapientiæ studiis incumbebat apud Sextum Philosophum , ad ejus ædes propterea ventitans. E regia aliquando egredientem rogavit Lucius Philosophus , qui modò Romam advenerat , quò pergeret , & ad quod negotium ? Tum Marcus : *Seni etiam , inquit , discere , decorum est. Itaque ad Sextum Philosophum eo , ut sciam quæ nondum scio.* Lucius , manibus in cœlum sublatis , exclamavit. *O Jupiter ! Romanorum imperator jam senescens , tab illis è zonâ suspensis ad ludi magistrum , pergit , puerorum instar !*

## C A P U T   X I V.

### *Honos doctis habitus.*

1. **D**IONYSIUS tyrannus , qui sævitiae & superbiae natus videbatur , navem vittis ornatam misit obviam Platoni , gravissimo dicendi & vivendi magistro , venienti Syracusas. Ipse quadrigis albis excepit in littore egredientem è navì.

Consule ædes aliquas ingressuro , earum fores virgâ à victore percutiebantur , monendi causâ adesse Consulem : nisi ædes essent ejus hominis , cui habendus ab ipso magistratu honos videretur. Itaque Pompeius cum ex Asia rediens Rhodum venisset , & Posidonii Philosophi domum esset intraturus , fores ejus de more percuti à littore vetuit : & fasces lictorios januæ philosophi submisit is , cui se Oriens Occidentisque submiserat.

Gaditanus quidam Titi Livii nomine famâque commotus , ad visendum eum ab ultimis terra-

rum finibus venit, statimque ut viderat, abiit.

2. Alexander magnus, captis Thebis, posteris Pindari Poetæ in ea urbe nati pepercit, ipsiusque domum stare incolumem voluit. Inter spolia Darii Regis Persarum capto urgumentorum scrinio, quod erat auro, gemmisque ac margaritis pretiosum; varios ejus usus amicis demonstratibus: *Imò Hercule*, inquit, *librorum Homeri custodiæ datur*. Cupiebat nempe ut pretiosissimum humani ingenii opus servaretur opere quam maximè diviti. Prædicabat hunc Poetam complexum esse omnia bellandi ac regnandi præcepta; eumque tanto amore atque honore prosecutus est, ut Homeri amator cognomineretur. Interrogante aliquando Philippo patre, cur tanto opere hoc uno Poëta delectaretur, cæteros verò negligeret? *Ideo*, inquit, *pater, quod non quævis possis regem decere mihi videtur, sicut nec quodvis vestimentum. Unius Homeri ingenua est, & magnifica & verè regia*. Itaque Homeri libros secum inter bella ferre solitus erat, & cum quiesceret, eos una cum pugione sub pulvino, cui incumberebat, reponere; *militiæ viaticum & bellicæ virtutis institutionem appellans*. Cum quidam prosperè gestæ rei nuncius citato cursu accederet, vultu ingentem lætitiā præferens: *Quid mihi nuntiaturus es*, inquit, *tanto gaudio dignum; nisi forsan Homerus revixit*.

3. Alcibiades quoque Homerum magno in pretio habuit. Itaque cum fortè in scholam puerorum venisset, Homerum sibi petiit exhiberi. Cum verò ludi magister se nihil Homeri habere respondisset; colaphum ei durum inflixit, & abiit, *imperitum*, dicens, & *qui tales redderet pueros*.

Cum Zoilus, qui Homeromastix, id est Homeri flagellum, est vocatus, Alexandriam venisset, & sua contra Iliadem & Odysseam scripta Ptolomæo Philadelpho recitasset: animadvertens rex Poëtarum principem vexari absentem & inauditum, ut pote mortuum, & eum, cujus ab



cunctis gentibus scripta suspiceretur, à Zoilo vituperari; indignatus, nullum ei responsum dedit. Ille diutius Alexandriæ commoratus, & inopiâ pressus, summisit ad regem, postulans ut aliquid sibi tribueretur, Rex verò dicitur respondisse: *Homerum, qui ante annos mille decesserat, quotidie pascere multa millia hominum: debere pariter eum, qui se meliore ingenio profiteretur, posse alere non modò se unum, sed etiam plures.*

4. Sylla duxit aliquo præmio dignam sedalitatem etiam mali Poëtæ. Nam cum ille epigramma ipsi obtulisset; iussit præmium ei statim tribui, sub ea tamen conditione, ne quid postea scriberet. Julius Cæsar civitate donavit liberalium artium doctores, & medicinam Romæ professos, ut eo libentiùs & ipsi urbem incolerent, & cæteri appeterent. Optimè ille quidem: solet quippe labor impendi eò, unde emolumentum atque honos speratur. At sublati studiorum præmiis, etiam studia pereunt.

5. Mandatum est memoriæ, Platonem philosophum tenui admodum pecuniâ fuisse, atque eum tamen mercatum esse decem millibus drachmarum tres Philolai Pythagorici libros. Quidam dixerunt amicum ejus Dionem Syracusanum eam pecuniam illi dedisse. Traditum est quoque Aristotelem libros pauculos Speusippi philosophi emis-  
se talentis Atticis tribus. Isocrates pro una oratione viginti talenta accepit. Dicitur Octavia, cum Virgilium audivisset recitantem illos de filio suo versus, *Tu Marcellus eris, &c.*, diliquium animi passa esse; deinde, recepto animo, Virgilio dari iussisse pro singulis versibus dena sestertria.

6. Græci magnos honores constituerunt Athleticis, qui in Olympiis, Pythiis, Isthmiis, Nemeisque certaminibus vicerint. Nam non modò in publico Græciæ conventu laudes ferunt cum palma & corona: sed etiam cum revertuntur in suas civitates, triumphantes quadrigis invehuntur in



patriam, & constitutis è republica vestigalibus fruuntur per totam vitam. Quod cum ego animadverto, inquit Vitruvius, admiror cur non iidem honores, atque etiam majores, tributi sint scriptoribus, qui infinitas utilitates perpetuo ævo omnibus præstant. Id enim eo magis dignum erat institui, quòd Athletæ sua tantùm corpora exercitationibus efficiunt fortiora; scriptores verò non solum sua ingenia suosque sensus perficiunt, sed etiam omnium aliorum ea in libris suis præcepta dantes, quæ plurimùm juvent ad animos exacuendos & ad discendum. Quid enim Milo Crotoniæ, quòd fuit corporis viribus invictus, prodest hominibus, aut cæteri qui eo genere fuerunt victores? Pithagoræ verò, Platonis, Aristotelis, cæterorumque sapientum præcepta, omnibus gentibus edunt novos quotidie fructus, quibus qui à tenera ætat satiantur, ipsi optimos habent sensus & humanos mœurs civitatibus infundunt, æqua jura ac leges describunt, sine quibus nulla potest esse civitas incolumis. Cum ergo tanta munera privatim publicèque fuerint hominibus præparata ab scriptorum prudentia, non solum palmas & coronas his tribui arbitror oportere, sed etiam & triumphos, & divinos, si fas sit, honores decerni.

Animi remedia inventa sunt ab antiquis philosophis. Suspiciendi propterea sunt. & propè Deorum ritu colendi. Equidem quam venerationem præceptoribus meis debeo, eandem illis præceptoribus generis humani debere me existimo. Quid ergo? si Consulem videro aut Prætorem, omnia faciam quibus honor haberi solet, equo desiliam, caput adaperiam, semitâ cedam; Socratem cum Platone, & Zenonem, & Cleantem non venerabor? non tanta nomina colam?

## CAPUT XV.

*Modestia conjuncta cum doctrina.*

**D**ICEBAT doctissimus, idemque sapientissimus Socrates: *Se hoc unum scire, quod nihil sciret.*

Cum venisset Plato ad ludos Olympicos, frequentissimum omnium in Græcia conventuum, Olympiæ contubernium iniiit cum ignotis hominibus, ignotus iis & ipse. Ita verò eos cœpit ac sibi devinxit tum morum suavitate, tum sermonibus ab omni affectatione sapientiæ alienis, ut peregrini illi plurimum gauderent fortuito talis viri contubernio, ac convictu. Neque verò Academiæ aut Socratis mentionem ullam fecit. Hoc solum illis declaravit, se Platonem appellari. Cum peractis ludis Athenas venissent, perhumaniter eos excepit. Tum hospites: *Age, inquirunt, monstra nobis illum tibi cognominem Socratis discipulum, cujus magna ubique fama est. Duc nos in Academiam, & siste viro, ut aliquem ex ejus quoque colloquio fructum colligamus.* At ille leniter subridens, quemadmodum solebat: *Ego vero, inquit, ille ipse sum.* Obstupuere illi, quòd socium tandiu habuissent tantum virum, ignorantes, intellexeruntque posse eum sibi consiliare animos eorum quibuscum ageret, etiam sine consuetis illis de philosophia sermonibus.

Magna est admiratio copiosè sapienterque dicentis. Si verò iæst in oratione mixta modestiæ gravitas, nihil admirabilius fieri potest maxime, cum ea sunt in adolescente.

## CAPUT XVI.

*Non refert quàm multos, sed quàm bonos, libros habeas ac legas.*

1. **E**st lectio necessaria; alit enim ingenium, & cogitando inveniendoque fatigatum re-

scit. Nec scribere tantum, nec tantum legere debemus; sed invicem hoc illo commutandum est, & alterum altero temperandum, ut quidquid lectione collectum est, profit ad pabulum animi aut ad scribendum. Apes debemus imitari, quæ ducunt succum ex floribus ad mel faciendum idoneis, deinde disponunt per favos quidquid attulere.

Alimenta corporis tunc demum in sanguinem & vires transeunt, cum sunt concocta. Idem præstemus in his quibus aluntur ingenia: concoquamus illa.

2. Lectio omnis generis voluminum habet aliquid vagum & instabile. Paucis libris immorari & innutrirī oportet, si velis aliquid trahere quod in animo fideliter hæreat. Lectio certa prodest, varia delectat. Qui vult pervenire quod destinavit, unam sequatur viam, non per plures vagetur.

Librorum inopiam quæreris: non refert quàm multos habeas, sed quàm bonos. Distrahit animum librorum multitudo. Modò, inquis, hunc librum evolvere volo, modò illum. Fastidientis stomachi est multa degustare: quæ ubi varia & diversa sunt, nocent, non alunt. Probatos itaque libros semper lege: &, si quando ad alios divertere libuerit, ad priores redi. Aliquid quotidie auxilii adversus varias animi pestes compara: & cum multa percurreris, unum excerpe quod illo die concoquas. Hoc ipse facio.

Plinius major libros legens, adnotabat, excerpebatque. Nihil enim legit, quod non exciperet. Dicere etiam solebat nullum esse librum tam malum, ut non aliquâ parte posset prodesse.

13. Pueri legant & discant non modò quæ diserta sunt, sed magis quæ non est. Itaque non tantum auctores eligendi, sed etiam partes operis. Nam & Græci licenter quædam scripsere, & Horatium in quibusdam nolim interpretari.

Lacedæmonii libros poëtæ Archilochi jusserunt ex sua civitate exportari, quod eorum lectionem

arbitrabantur parum verecundam ac pudicam. No-  
luerunt enim eâ liberorum suorum animos imbui,  
ne plus moribus noceret, quàm ingenii prodesset.

## CAPUT XVII.

*Bibliotheca ad publicum & privatum usum compare-  
tur, non ad ostentationem.*

1. **A**NTIQUISSIMA, cujus ad nos memoria vene-  
rit, Bibliotheca ea est quam exiit apud  
Ægyptios rex Olymandias, & cujus in fronte in-  
scripta erant hæc verba: *medici animæ officina.*  
Pisistratus tyrannus, qui studia litterarum  
plurimum fovit, dicitur primus comparasse Athe-  
nis libros disciplinarum liberalium publicè præ-  
bendos ad legendum: quorum numerum ipsi Athe-  
nienfes deinde studiosius auxerunt. Sed Xerxes  
potius Athenis, urbe ipsâ præter arcem incensâ,  
abstulit asportavitque ad Persas omnem illam li-  
brorum copiam. Multis autem post annis Seleu-  
cus rex, qui Nicanor appellatus est, eosdem li-  
bros referendos Athenas curavit.

Ingens postea numerus librorum in Ægypto à  
Ptolomæis regibus conquisitus & comparatus est,  
ad millia fermè voluminum septingenta. Sed ex  
omnia (aut saltem quadringenta millia, teste  
Senecâ) in urbe Alexandriæ conflagrarunt bello  
inter Cæsarem & Pompeii liberos.

Bibliothecam Ægyptiacam instruxerat Ptole-  
mæus Philadelphus, tum profanis libris, tum  
etiam sacris petitis è Judæa. Nam cum ejus au-  
res fama Hebrææ sapientiæ tetigisset, misit Elea-  
zaro Judæorum summo Pontifici dona multa, &  
epistolam, quâ orabat ut divinos libros ad se mit-  
tendos curaret cum idoneis hominibus, à quibus  
in linguam Græcam ex Hebræa verterentur. Ut  
regis votis ac precibus satisfaceret Eleazarus, mi-  
sit selectos è singulis Tribubus senos viros senio-



res, utriusque linguae peritissimos: à quibus facta est illa celeberrima sacrorum librorum interpretatio, quae septuaginta interpretum vocatur. Praerat autem Ptolomaei Bibliothecae vir factis & scriptis illustris Demetrius Phaleraeus, quem Athenis pulsum rex benigne exceperat.

2. Primus librorum copiam Romam advexit Æmilius Paulus, devicto rege Macedonum Perseo, cujus thesauròs ne aspicere quidem dignatus est: libros verò filiis suis, quia erant litterarum studiosissimi, asportandos permisit. Deinde Lucullus è Ponticâ prædâ plures concessit. Nam reges Italici litterarum amore capti, egregiam Bibliothecam ad communem utilitatem & delectationem Pergami instituerant.

Laudanda est Luculli impensa & studium in libris. Nam & multos & optimos acquisivit, eosque liberaliter dedit utendos. Patebat omnibus Bibliotheca & in porticus ei adjectas, velut ad Musarum ædem, veniebant maximè Græci, tempusque ibi jucundè inter se tradebant, ab aliis curis liberi. Sæpe cum iis versabatur Lucullus, & inter magnam doctorum virorum turbam ambulabat.

In Tusculano cum essem, inquit Cicero, vellemque è Bibliotheca Luculli pueri quibusdam libris uti; veni in ejus villam, ut eos ipse, sicut solebam, inde promerem. Quò cum venissem, M. Caronem, quem ibi esse nescieram, vidi in Bibliotheca sedentem, multis circumfusum Stoicorum libris. Erat enim in eo inexhausta aviditas legendi, nec satiari poterat: quippe qui reprehensionem inanem vulgi non reformidans, in ipsa curia soleret legere sæpe, dum Senatus cogebatur. Itaque magis tum in otio maximâque voluminum copiâ, videbatur quasi helluo librorum: si hoc verbo in tam præclara re uti licet. Tum ego Catoni: *Certè, Cato, totam hanc copiam jam Lucullo nostro notam esse oportebit. Nam his libris*



*eum malo , quàm reliquo ornatu villæ delectari. Ætatem quidem video : sed infici tamen jam debet iis artibus quas si , dum est tener , & combiberit , ad majora veniet paratior.*

3. Quàm studiosus comparandæ ornandæque Bibliothecæ ipse Cicero fuerit , patet ex multis ejus epistolis ad Atticum.

Tu , velim , des operam , ut quàm primùm habeamus ea , quæ te nobis emisse & parasse scribis ; & cogites quemadmodum Bibliothecam nobis conficere possis. In tua humanitate positam habemus spem omnem delectationis , quàm , cùm in otium venerimus , habere volumus. Ego quotidè magis , si quid mihi è forensi labore temporis datur , in litteris conquiesco. Summum me librorum studium tenet , sicut odium jam cæterarum rerum Bibliothecam tuam cave cuiquam despondeas , quamvis acrem amatorem inveneris. Nam ego omnes meas vindemiolas eò reservo , ut illud subsidium senectuti parem. Noli desperare fore ut libros tuos facere possim meos. Quod si assequor , supero Crassum divitiis , atque omnium agros , lucos , prata contemno.

4. Comparandorum librorum impensa liberalissima est. At in ea habendus modus. Qui profunt innumerabiles libri , quorum dominus vix totâ vitâ suâ indices perlegit ? Onerat discentem turba , multòque satius est tradere te paucis auctoribus , quàm errare per multos. Nunc plerisque litterarum ignavis libri non studiorum instrumenta sunt , sed ædium ornamenta. Paretur itaque quantum satis sit librorum , nihil in apparatus. Honestius , inquis , in libros impensas effundam , quam in vasa pretiosa pictasque tabulas. Vitiosum est ubique , quod nimium est. An ignoscas homini aptanti armaria cedro atque ebore , aut inter tot millia librorum oscitanti ? Cui voluminum suorum frontes maximè placent titulique. Apud desidiosissimos videbis quidquid orationum

historiarumque est: & tectio tenus extracta loculamenta. Sicque sacrorum opera ingeniorum in speciem tantum & culvum parietum comparantur.

Indoctum gloriantem Bibliothecâ ridet Ausonius hoc epigrammate.

Emptis quòd libris tibi Bibliotheca referta est,  
Doctum & Grammaticum te, Philomuse,  
putas?

Hoc genere & chordas, & plectra, &  
barbita conde:

Mercator hodie, cràs citharædus eris.

## C A P U T X V I I I.

*Memoria augetur curâ, negligentia intercedit.*

1. **O**MNIS disciplina memoriâ maximè constat, frustra que docemur, si quidquid audimur, præterfluit. Quidam eam naturæ modò munus esse existimaverunt: sed ipsa excolendo, sicut alia omnia, augetur. Imò nihil æquè vel augetur curâ, vel negligentia intercedit quàm memoria.

Maxima & una memoriæ augendæ ars, exercitatio est & labor. Quare pueri, quorum tenacissima memoria est, statim quam plurima edificant: & quæcumque ætas operam juvandæ studio memoriæ dabit, devoret initio tædium illud scripta & lecta sæpius revolvendi, & quasi eundem cibum remanendi. Quod ipsum fieri potest lævius, si primùm pauca cœperimus ediscere; tum quotidie aliqua accessio fiat.

6. Quantum naturâ studioque valeat memoria, testis est vel Themistocles, quem constat unum intra annum optimè locutum esse Persicè, vel Mithridates, cui notæ fuerunt duæ & viginti linguæ earum, quibus imperabat, nationum: vel Crassus ille dives, qui, cùm Asiæ præesset, sic tenuit quinque Græci sermonis differentias, ut jus cuique redderet eadem linguâ, quâ quisque

postulasset : vel Cyrus denique , quem omnium militum tenuisse nomina traditum est. Quin etiam dicitur Theodectes protinus reddidisse semel auditos quamlibet multos versus.

Memoriam in Themistocle fuisse ferunt singularem , ita ut quæcumque audierat aut viderat , hæerent animo Itaque cum Simonides , sive quis alius , se ei traditurum polliceretur artem memoriæ aliquam , quæ recens inventa erat : *Oblivionis* , inquit , *malem* : *Nam memini etiam quæ nolo : oblivisci non possum quæ volo.*

Etiam oblivisci quod scis , interdum expedit.

3. Seneca rhetor hoc scriptum reliquit de suâ memoriâ. Cum senectus mihi jam tegeret multa desideranda oculorum aciem retuderit , aurium sensum hebetaverit , nervorum firmitatem infregerit , in memoriâ maximè incurrit. Hanc aliquando in me sic floruisse non nego , ut non tantum ad usum sufficeret , sed usque in miraculum procederet. Nam & reddebam duo millia nominum , quo ordine erant dicta : & plures quam ducentos versus , qui singuli à singulis condiscipulis dati erant , referebam , ab ultimo incipiens usque ad primum. Nec tantum velox erat mihi memoria ad complectenda quæ vellem : sed etiam firma ad continenda quæ acceperat. Itaque sine cunctatione etiam nunc profert quasi modo audita , quæcumque apud illam aut puer aut juvenis deposui. Imminuta tamen est ætate , & longâ desidiâ , quæ juvenilem quoque animum dissolvit. Nam si qua ei commisi intra annos proximè elapsos , sic perdidit , ut , etiamsi ingerantur , toties tanquam nova audiam.

Hortensius in auctione perfedit totum diem : & vespere recensuit omnes res , & pretia , & emptores ordine suo , ita ut in nullo falleretur.

Quidam recitatum à poeta carmen novum , suum esse dixit , & protinus memoria recitavit : cum ille , cujus carmen erat hoc facere non posset.

---

# LIBER TERTIUS.

## DE JUSTITIA.

---

### CAPUT I.

*Justitia omnium regina virtutum.*

1. JUSTITIA est omnium domina & regina virtutum: ejus splendor maximus: ex ea boni viri vulgò justī appellantur. At unum Aristidem à Græcis cognominatum fuisse Justum accepimus.

Hic Athenis natus à pueritiâ firmo constantique animo fuit, numquam ab eo, quod justum videbatur, discendens, & nullam fraudem, nullumque mendacium admittens, ne joco quidem & in ludo.

Ubi ad rempublicam accessit, non potentium amicorum præsidio niti voluit, sed consiliis factisque utilibus & justis. Non animum inflabant secundæ res, non frangebant adversæ. Id se patriæ debere existimabat: ut ei prodesset sine ullo pecuniæ aut honorum præmio.

Cùm aliquando eo præsentē pronunciaretur in theatro versus è tragædia Æschyli de Amphiarao, qui dicebatur, *non velle videri justus, sed esse*: omnes converterunt in eum oculos, tanquam ad quem hæc laus pertineret, eumque cognominaverunt Justum. Quod cognomen ut novum erat & omnium amplissimum, ita Aristidi invidiam conflavit & Themistoclis æmuli, & concitatæ ab illo multitudinis. Est enim hoc commune vitium in magnis liberisque civitatibus, ut invidia gloriæ comes sit: & libenter detrahant de iis quos vident eminere alius.



Itaque multatus est decem annorum exilium quod ostracismus vocabant.

Eo tempore, quo congregatus populus de eiciendo Aristide ferebat suffragium testulis promore inscriptum, dicitur illiteratus quidam & planè rudis tradidisse Aristidi ipsi, ut uni è populo, testulam, petiissetque ut inscriberet Aristidem. Admirante eo, & rogante num aliquid in illum peccasset Aristides? *Nihil*, inquit, *neque est ille mihi notus, sed hoc mihi non placet, quod cupidè elaboraverit ut præter cæteros Justus appellaretur.* Aristidem ferunt nihil respondisse, sed inscripsisse testulæ nomen suum hominique reddidisse.

Urbe excedens ut in exilium irer, supinas manus tetendit in cælum, deosque oravit: *Ne ullum tempus populo Atheniensi incideret, quo Aristidis reminisci necesse esset.* Tertio post anno revocatus in patriam, immemor acceptæ injuriæ utilem operam præbuit civibus in bello & pace per annos multos. Illius abstinentiæ à pecunia nullum est certius indicium, quàm quod, cum exercitiis & ærario præfuisset, in tanta paupertate decessit, ut vix reliquerit quo efficeretur. Unde factum est ut filiæ ejus publicè alerentur, & è comuni ærario dotibus datis collocarentur.

## C A P U T I I.

*Hominem justum esse gratis oportet.*

I. **T** justum esse gratis oportet: & nullum justæ actionis præmiū majus est, quàm justum esse. Nihil refert, quàm multi æquitatem tuam noverint. Qui virtutem suam prædicari vult, non virtuti laborat, sed gloriæ. Non vis esse justus sine gloria? At me hercule sæpè justus esse debebis cum infamia: & tunc, si sapias, mala opinio justitiæ parta te delectabit. Nemo mihi videtur pluris æstimare virtutem, nemo magis illi esse devotus, quàm qui boni viri famam per-



didit, ne conscientiam perderet.

M. Cato, genitus pro avo Marco Catone, princeps familiæ Porciæ, numquàm rectè fecit, ut facere videretur, sed quia aliter facere non poterat: eique id solum visum est rationem habere, quod haberet justitiam. Esse, quàm videri, bonus malebat. Ita, quo minùs gloriam petebat, eo magis illam adsequebatur.

2. Inveniuntur qui honesta in mercedem colant, & quibus non placeat virtus gratuita. At nihil habet illa in se magnificum, si quidquam venale habeat. Quid enim est turpius, quàm aliquem computare quàm mercede sit vir bonus? Calcatis utilitatibus ad virtutem eundum est, quòcumque vocavit, quòcumque misit, sine respectu rei familiaris. Interdum etiam sine ulla sanguinis sui parcimoniâ vadendum: nec unquam imperium ejus detrectandum. Quid consequar, inquis, si hoc gratis fecero? Quod feceris. Rerum honestarum pretium, in ipsis est. Si non ipso honesto movemur, ut boni viri simus, sed utilitate aliquâ atque fructu, callidi sumus, non boni.

Injustissimum est, justitiæ mercedem quærere. Reliquæ quoque virtutes per se colendæ sunt, & in iis sequi officium debemus, non fructum. Nam ut quisque maximè refert ad suum commodum quæcumque agit, ita minimè est vir bonus. Verùm, ut olim querebatur Ovidius.

Non facile invenias multis è millibus unum,

Virtutem pretium qui putet esse sui.

Ipse decor recti, facti si præmia desint,

Non movet, & gratis pœnitet esse probum.

Nil, nisi quod prodest, carum est.

### C A P U T I I I.

*Omni ratione colenda & retinenda justitia est.*

I. **Q**UAMQUAM omnis virtus nos ad se allicit, facitque ut eos diligamus, in quibus ipsa

inesse videatur: tamen justitia & liberalitas id maximè efficit.

Justis hominibus ita fides habetur, ut nulla sit in his fraudis injuriæque suspicio. Itaque his salutem nostram, fortunas, liberos rectissimè committi arbitramur. Mihi quidem videntur bene morati reges olim fuisse constituti ab hominibus, justitiæ fruendæ causâ. Nam cùm inops multitudo premeretur ab his qui majores opes habebant, confugiebant ad unum aliquem, de cujus justitiâ & prudentiâ magna erat opinio: qui cum prohiberet ab injuria tenuiores, summos & infimos æquo imperio regebat. Eadem fuit constituendarum legum causa, quæ regum. Inventæ enim leges sunt, quæ cum omnibus semper unâ atque eadem voce loquerentur.

2. Laudabat Agesilaus Lacedæmoniorum rex justitiam, ut virtutum omnium principem affirmabatque nullum esse fortitudini locum sine justitiâ. Cum ei diceret quidam à magno rege Persarum aliquid imperari: *An*, inquit, *ille major Agesilao est, si non sit justior?* Rectè quidem sentiens, magnitudinem esse metiendam justitiâ, quasi regiâ regulâ.

Dicente quodam coram rege Antigono, *regibus omnia honesta & justa est.* Subjecit rex: *Omnino barbarorum quidem regibus: nobis vero sola honesta pro honestis, sola justa pro justis habenda sunt.*

Cùm Trajanus Prefecto militum Prætorianorum gladium daret, quo is cingendus erat ad custodiam Imperatoris; educto eo è vagina, & in altum sublato: *Accipe*, inquit, *gladium hunc, ut eo, si justè imperem, p o me utaris: sîn malè, contra me.* Quoniam moderatorem omnium peccare minùs fas est, quàm ceteros.

3. Æthiopes pietatem & justitiam maximè colebant. Aedibus eorum nullæ erant fores, cumque in viis publicis multa jacerent, nemo quidquam eorum farriciebat. Coltæ quoque fores ædium nunquam occlusas habebant.

Interrogatus Leon Rex Lacedæmoniorum in qua urbe quis maximè tutus esset? *Ubi*, inquit, *Justitia polleat & injustitia jaceat.*

4. Justitia est constans & perpetua voluntas jus suum unicuique tribuendi. Itaque cum coram Agide Lacedæmoniorum rege laudarentur Elei, quòd in Olympicis certaminibus justii judices essent: *Quid mirum*, inquit, *faciunt, si quarto quoque anno per unum diem justitiâ utuntur?*

5. Nemo justus esse potest, qui quidquam æquitati anteponeit.

Quo tempore Callicratidas Lacedæmoniorum classi præfectus, pecunia maximè indigebat ad annonam navis comparandam; accessere ad eum quidam amici Lysandri, & oblatis talentis quinquaginta, postulaverunt unum quemdam ex inimicis sibi condonari necandum. Quos ille, quia æquitatem pecuniæ anteponebat, valere jussit. Aderat tum Cleander, qui cum dixisset: *Ego vero oblatam pecuniam accepissem, si Callicratidas fuissem. Et ego*, respondit Callicratidas, *si Cleander.* Sic Alexander magnus Parmenioni suadenti, ut acciperet pecuniam à Dario oblatam ad redimendam pacem, respondit: *Et ego pecuniam quam gloriam mallet, si Parmenio essem.*

Vir bonus, quod honestè se facturum putaverit, faciet, etiamsi laboriosum erit; faciet, etiamsi damnosum erit; faciet, etiamsi periculosum erit. Rursus quod turpe erit, non faciet, etiamsi pecuniam afferet, etiamsi voluptatem, etiamsi potentiam. Ab honesto nulla re deterrebitur, ad turpia nullâ spe invitabitur.

## C A P U T I V.

*Communi utilitati consulere debemus.*

1. **S**UMUS ad Justitiam nati: neque opinione, sed naturâ, constitutum est jus. Justitia  
E iij

versatur in hominum societate tuenda, tribuendoque suum cuique, & rerum contractarum fide.

Iustitiæ primum munus est, ne cui quis noceat: deinde ut communibus utatur, tanquam communibus; privatis, ut suis. Sunt privata nulla naturâ: sed quia aliquid eorum, quæ, naturâ fuerant communia, obtrigit cuique hominum variâ ratione, id quisque teneat. Si sibi plus eo appetet, violabit jus humanæ societatis.

Quoniam (ut præclarè scriptum est à Platone) non nobis solum nati sumus, sed etiam patriæ, parentibus, amicis, cæterisque hominibus, & quæ in terris gignuntur, ad usum omnium hominum creantur: in hoc naturam debemus sequi & communi utilitati consulere mutatione officiorum, dando & accipiendo; devincereque tum operâ, tum facultatibus hominum inter homines societatem.

2. Quantulum est ei non nocere, cui debeas etiam prodesse! Parva laus est, si homo mansuetus homini est, si naufrago manant porrigit, erranti viam monstrat, cum esuriente panem suum dividit. Membra sumus corporis magni. Natura nos cognatos edidit. Hæc nobis amorem indidit mutuum, & sociabiles fecit, illa æquum iustumque composuit; ex illius constitutione miserius est nocere, quàm lædi, & illius imperio paratæ sunt omnium manus ad se invicem juvandos. Itaque ille Terentianus versus in pectore & in ore sit:

Homo sum, humani nihil à me alienum puto.

3. Si hoc natura præscribit, ut homo homini, quicumque sit, consulat, ob eam causam quòd is homo sit, certe violare alterum lege naturæ prohibemur.

Ut, si in corpore humano unum quodque membrum proximi membri vires atque valetudinem ad se traduceret, debilitari & interire totum corpus necesse esset: sic, si unusquisque nostrum rapiat ad se commoda aliorum, detrahatque



quod cuique possit, emolumentum sui gratiâ: societas hominum & communitas evertatur necesse est.

Concessum est, non repugnante naturâ, ut quisque sibi malit acquirere, quàm alteri, quod pertineat ad usum vitæ: at illud natura non patitur, ut aliorum spoliis nostras facultates, opes, copias augeamus.

Chrysippus hoc scitè dixit, ut multa: qui stadium currit, eniti & contendere debet quam maximè possit, ut vincat: supplantare eum, qui cum certet, aut manu depellere, nullo modo debet. Sic in vita non iniquum est sibi quemque petere quod ad usum pertineat: alteri deripere, jus non est.

4. Forsitan quispiam dixerit: nonne igitur sapiens, si fame ipse conficiatur, auferet cibum homini ad nullam rem utili? Minimè Verò. Non enim cuiquam vita sua potior esse debet, quàm animi talis affectio, neminem ut violet commodi sui causâ. Et suum cuique incommodum ferendum est potius quàm de alterius commodis detrahendum.

Non solum naturâ, sed etiam legibus populorum, constitutum est, ut non liceat sui commodi causâ nocere alteri. Hoc enim spectant leges, hoc volunt, incolumem esse civium conjunctionem: &, si qui eam dirimunt, eos morte, exilio, vinculis, damno coercent.

## C A P U T V.

*Ipsa peccandi voluntas peccatum est.*

1. **M**æ quidem iudice, non is solus malus est, qui injuriam fecit, sed & qui facere in animo habuit.

Potest aliquis nocens fieri, quamvis non nocuerit. Omnia scelera perfecta sunt, quantum satis est culpæ, etiam ante effectum operis. Lâtro antequam manus inquinet, lâtro est: quia, ut ait P. Syrus.



Exeritur opere nequitia, non incipit.

Vir probus, aut improbus, non ex operibus tantum, sed etiam ex voluntate spectatur.

Bonus est, non qui non injuriam facit, sed qui ne vult quidem.

2. Fuit Lacedæmone civis nomine Glaucus, cujus justitia maximè celebrabatur. Itaque grandem per cunctarum summam ejus fidei credere non dubitavit civis quidam Milesius. Eam pecuniam repetentibus postea mortui Milesii liberis, retinere in a. imo habuit Glaucus; & oraculum Apollinis consuluit, an interposito jurejurando abnegare posset depositum apud se auri pondus Respondit Pythia, ipsum daturum pœnas graves, propter hanc retinendi depositi voluntatem. Ille pœnarum metu deterritus à scelere, non justitiæ studio inductus, depositam apud se pecuniam restituit. Verum in cogitari sceleris poenam cum tota prole & domo interit ipsam quippe peccandi voluntatem superi plectunt: quia quis scelus pectore deliberatum concepit, perinæ nocens est ac si illud admisisset.

Has patitur pœnas peccandi sola voluntas:

Nam scelus intra se tacitum qui cogitat ullum,  
Facti crimen habet.

3. Aristides ille justus, interrogatus quid justum esset, *Aliena non concupiscere*, respondit.

Naturæ, quæ lex est divina & humana, parere qui volet, nunquam committere ut alienum appetat.

Inimicus est non solum qui injuriam infert, sed etiam qui de inferenda cogitat.

Vestalis incesta est etiam sine stupro, quæ cupit stuprum.

Potest-ne fieri, ut, qui Jovi amicus fuerit, rem aliquam iniquam concupiscat, aut turpe aliquid cogitet?

Vir bonus non modò facere, sed ne cogitare quidem quidquam audebit, quod non possit prædicare.

4. Bene præcipiunt qui vetant quidquam agere, quod dubites æquum sit an iniquum.

Turpissimum est non modò pluris putare quod utile videatur, quàm quod honestum: sed hæc etiam inter se comparare, & in his addubitare.

Est totum sceleratum & impium genus eorum hominum qui deliberant, utrum id sequantur quod honestum esse videant, an se scelere contaminent: in ipsa enim dubitatione & deliberatione facinus inest, etiam si ad scelus non pervenerint. Ergo ea omnino deliberanda non sunt, in quibus est turpis ipsa deliberatio.

5. Actio recta non erit, nisi recta fuerit voluntas: ab hac enim est actio. Rursus voluntas non erit recta, nisi habitus animi rectus fuerit: ab hoc enim est voluntas.

## C A P U T V I.

*Qui solo metu à peccato abstinet, non est innocens.*

1. **N**ON dicendus est justus, quisquis non infert injuriam: sed qui inferre impune cumposcit, libenter abstinet.

Non metu, sed officii causâ, peccatis abstinendum.

Quidam parum curant, sponte-ne, an metu, legibus pareant. Verùm non minùs fur est, qui metu à furto abstinet, furtum ipsum non perosus nec damnans quàm ii qui furantur. Et illi homines non sunt bellis meliores: nam illæ quoque, si timeant homines aut canes gregem custodientes, à rapina abstincent.

Non dicam pudicam mulierem eam, quæ aut legem aut virum timuit, cum à flagitio abstineret. Et non immeritò refertur in numerem peccantium, quæ retinuit pudicitiam metu poenæ, non amore honesti.

Si qua metu dempto casta est, ea denique casta est.

Non possumus pudicos dicere eos, qui à flagitio arcentur infamiæ aut legum ac judiciorum metu. Nam quid faciet is homo in tenebris, qui nihil timet nisi testem vel judicem?

Non est diuturnus magister officii timor.

2. Et si infamiæ ac suppliciorum metus hominem, qui à peccato abstinere, non præstat innocentem; sæpe tamen non nihil confert, ut ille tandem vir bonus fiat. Nam dum illum à scelere advocat, paulatim assuefacit parere divinis humanisque legibus, quibus docemur domitas habere libidines, coercere omnes cupiditates, nostra tueri, ab alienis mentes, oculos, manus abstinere. Itaque sapienter admodum antiqui legum conditores, ut effratos agresti vitâ, aut militiâ, populorum animos mitigarent, & ad mansuetudinem ac justitiam traducerent. Deorum primum metum iis injiciendum esse rati sunt: deinde ad terrorem impietatis, audaciæ, flagitii, carceres, vincula, variaque supplicia instituerunt: ut quos amor honesti in officio non retineret, ii gravitate poenæ à scelere deterrentur.

## C A P U T V I I.

*Oderunt peccare boni virtutis amore.*

1. **N**OBIS persuasum esse debet, etiamsi omnes Deos hominesque celare possimus, nihil tamen avarè, nihil injustè, nihil libidinosè esse faciendum.

Philosophum nomine Peregrinum, virum gravem, vidimus, inquit A. Gellius, cum Athenis essemus, diversantem in tugurio extra urbem. Cumque ad eum frequenter iremus, multa herclè diuina et utilia & honesta audivimus; in quibus hoc præcipuum auditum meminimus: *Virgini*

*sapientem non peccaturum esse, etiamsi peccasse eum Dii atque homines ignoraturi forent. Non enim pœnæ aut infamiæ metu non esse peccandum, sed iusti honestique studio & officio.*

2. Cùm olim in Lydia, ut ferunt fabulæ, terra discessisset magnis quibusdam imbribus; in illum hiatam descendit Candaulis regis pastor Gyges, æneumque equum animadvertit, cujus in lateribus fores erant, quibus apertis, mortui hominis vidit corpus magnitudine inusitata, anulumque aureum in digito, quem ut detraxit, suo ipso digito inseruit & in cœtum Pastorum se recepit. Ibi cùm palam ejus annuli ad palmam converterat, à nullo videbatur, ipse autem omnia videbat; idem rursus videbatur, cùm in locum suum anulum inverterat. Itaque hac opportunitate, annuli usus, regem dominum interemit, ac sustulit quos obstare sibi arbitrabatur: nec in his eum quisquam facinoribus potuit videre. Sic repente annuli beneficio rex exortus est Lydiæ.

Ficta quidem & commentitia hæc fabula est, prolata à Platone. Sed hunc ipsum anulum si habeat sapiens, non magis sibi licere putet peccare, quàm si non habeat. Honesti enim bonis viris, non occulta, quæruntur: atque, si nemo sciturus, nemo ne suspicaturus quidem sit, eos aliquid mali fecisse, non faciant.

## C A P U T V I I I.

*Ea sola utilia sunt, quæ iusta & honesta.*

1. **H**omo iustus, isque quem sentimus virum bonum, nihil cuiquam detrahet quod in se transferat; intelligitque nihil nec expedire nec utile esse, quod sit iniustum. Qui hoc non didicerit, nec persuasum habuerit, bonus vir esse non poterit; & ab eo nulla fraus aberit, nullum fa-



cinus. Sic enim cogitans : *Est istud quidem honestum, verum hoc expedit* : is utile atque honestum, rex à natura copulatas, audebit divellere. Qui fons est fraudum, malefactorum, scelerum omnium.

2. C. Marium consulatûs ingens cupido exagitabat. A quo adipiscendo cum longè abesse se cerneret, Q. Metellum, summum virum & civem, cujus legatus erat, criminari statuit, ut, ereptâ ei gloriâ confecti belli Jugurthini, ipse mitteretur in Numidiam cum imperio Consulari. Itaque nec factio ullo, nec dicto abstinuit, quo consiliare sibi militum animos posset. Multa criminose de Metello est locutus, multa de se magnificè. Dixit : *Bellum ab imperatore trahi consultò, quod homo inanis, & superbiæ regiæ, imperio nimis gauderet : se paucis diebus habiturum Jugurtham in catenis, si dimidia pars exercitûs sibi permetteretur.* Deinde à Metello Romam missus, cum ad populum eadem dixisset, quæ prius in castris, & de se ingentia esset pollicitus, voti tandem compos fuit. Factus est ergo ille quidem Consul : sed à fide justitiâque discessit, qui imperatorem suum in invidiam falso crimine adduxerit.

3. Alter quoque Marius, cognomento Gracchianus, boni viri officio functus non est. Cum Prætor esset, & Tribuni plebis collegium Prætorum adhibuissent, ut res nummaria communi sententiâ constitueretur, conscripserunt communiter edictum, constitueruntque, ut omnes simul Prætores ac Tribuni post meridiem ad populum accederent, renunciaturi edictum illud quod videbatur futurum gratissimum omnibus civibus. Cæteri quidem, alius alio, discessere : Marius à subsellis in Rostra rectè ivit, idque, quod communiter compositum fuerat, solus edixit. Ea res ei apud populum magno honori fuit : omnibus vicis statuæ erectæ, ad eas thus, & cerei incensi : qui multa ? Nemo unquam multitudini fuit carior.

4. Conturbantur nonnunquam homines in deliberatione, cum id, in quo violatur æquitas, videtur non ita magnum; illud autem commodum, quod ex eo paritur, permagnum videtur. Sic Gratidiano videbatur non ita turpe, præripere collegis & Tribunis plebis popularem gratiam; valde verò utile videbatur, Consulem hac ratione fieri: quod sibi tunc proposuerat. At honestate dirigenda est utilitas; & quod turpe est, nunquam utile debet videri. Quid igitur? Possuimusne Gratidianum virum bonum judicare? Nihil perfecto minus cadit in virum bonum, quam præripere aliis gloriam aut gratiam fallere. Nulla res tanti est, nec commodum ullum tam expectandum, ut propterea vir bonus ab officio discedat, & fidem ac justitiam violet. Numquam enim est utile peccare, quia semper est turpe: & quia semper est honestum virum bonum esse, semper est utile.

Dammum appellandum est, cum malâ famâ lucrum.

5. Themistocles, victis navali prælio Persis, dixit Athenis in concione, se habere consilium reipublicæ salutare, sed illud vulgari non oportere; postulavitque ut populus daret aliquem quicum communicaret. Datus est Aristides. Hunc ille monuit, classem Lacedæmoniorum, quæ subducta erat ad Gytheum portum, clam incendi posse: docuitque hac ratione frangi quoque posse opes Lacedæmoniorum, cum quibus de Græciæ principatu contendebant Athenienses. Quod Aristides cum audivisset; ad concionem expectatione suspensam rediit dixitque: *Perutile videri consilium quod Themistocles afferret; sed minimè honestum esse.* Athenienses, quod honestum non esset, id quoque non esse utile judicarunt: & auctore Aristide repudiaverunt eam rem, quam ne audierant quidem. Ubi nunc in uno inveneris eum amorem honesti, qui tunc populi universi fuit?

## CAPUT IX.

*Qui adipisci veram gloriam volet, justitiæ fungatur officiis.*

1. **F**ACILLIME ad res injustas impellitur quisquis est animo principatus & gloriæ nimis cupidus. Nihil verò honestum & gloriosum esse potest quod justitiâ vacat: & nemo gloriam injustitiâ & immanitate est consecutus.

An eos aliquid veræ laudis adeptos putas, qui exitio multarum gentium clari, non minores fuere pestes mortalium, quam inundatio & conflagratio? Agebat infelicem Alexandrum furor aliena devestandi. Non contentus paterno regno, arma toto orbe circumferebat, & nihil intactum relinquebat: immanium ferarum modo, quæ plus quàm ex git fames, mordent. Cùm ei civitas quædam offerret partem agrorum, & dimidium rerum omnium: *Eo*, inquit, *proposito veni in Asiam*, non ut id acciperem quod dedissetis: sed ut id habereris quod reliquisssem.

2. Ubi ad fines Scytharum vincendo pervenit, unus ex eorum legatis hæc ei inter alia multa dixit, quibus ejus injustitiam & ambitionem argueret: *Quid nobis tecum est? Nunquam terram tuam attigimus. An non licet nobis, qui in vastis sylvis vivimus, ignorare quis sis, & unde venia? Nec servire ulli possumus, nec imperare desideramus. Major fortiorque es fortasse, quam quisquam; tamen alienigenum dominum pati nemo vult. Gloriaris te ad persequendas latrones venire, ipse omnium gentium latro. Lydiam cepisti, Syriam occupasti, Persidem tenes, Bactrianos habes in potestate, Indos peristi: jam etiam ad pecora nostro avaras manus porrigis. Quid tibi divitiis opus est, quæ te esurire cogunt, ita ut quo plura habes, eo acrius*

*cupias quæ non habes? Denique si Deus es, tribuere mortalibus beneficia debes, non sua eripere: si autem homo es, id quod es, semper esse te cogita.*

Eleganter & veraciter Alexandro illi magno quidam comprehensus pirata respondit. Nam cum rex hominem interrogasset quo jure mare infestaret? Ille liberâ contumaciâ. *Eodem*, inquit, *quo tu orbem terrarum: sed quia id ego exiguo navigio facio, latro vocor; tu quia magnâ classe, impera or.*

---

CAPUT X.

*Quid tibi fieri non vis, alteri ne feceris.*

1. **A**LEXANDER Severus in expeditionibus bellicis aperto tabernaculo prandebat & cœnabat, militarem cibum, cunctis videntibus atque gaudentibus, sumens. Circumibat propè cuncta tentoria, & neminem abesse à signis partiebatur. Si quis de via in agros cujusquam deflexisset, aut fustibus subiciebatur in conspectu ejus, aut virgis, aut multæ pecuniariæ, aut saltem verbis castigato ipse dicebat: *Visne hoc in agro tuo fieri, quod facis in alieno?* Usurpabatque sæpius quod à quibusdam sive Judæis sive Christianis audierat, aut per præconem inclamari jubebat, cum aliquem puniret: *Quod tibi fieri non vis, alteri ne feceris.* Quam sententiam usque adeo dilexit, ut & in Palatio & in publicis operibus præscribi juberet.

2. Ab alio expectes, alteri quod feceris.

Syraculis pulsus à Dionysio tyranno Dion, petierat Megaram. Ubi cum Theodorum principem hujus urbis domi convenire vellet, neque admitteretur, diu ante fores retentus, dixit comiti suo: *Patienter hoc ferendum est, forsitan enim & nos cum in gradu dignitatis nostræ essemus, aliquid tale fecimus.* Quâ tranquillitate animi ipse



sibi conditionem exilii placidiorem reddidit.

3. Vulpes ad cœnam dicitur Ciconiam  
Prior invitasse, & illi in patina liquidam  
Posuisse sorbitionem, quam nullo modo  
Gustare esuriens potuerit Ciconia :  
Quæ vulpem cum revocasset, intrito cibo,  
Plenam lagenam posuit; huic rostrum inferens  
Satiatur ipsa, & torquet convivam fame :  
Quæ cum lagenæ frustra collum lamberet ;  
Peregrinam sic locutam volucrem accepimus ;  
*Sua quisque exempla debet æquo animo pati.*

## C A P U T X I.

*Injuriam pati satius est quàm facere.*

**A**GIS Lacedæmoniorum rex ultimus, ex insidiis captus, & indictâ causâ ab Ephoris damnatus, cum ad laqueum abduceretur, conspiceretque quemdam ex ministris flentem: *Desine*, inquit, *ô homo, meam vicem flere. Nam sic iniquè & contra leges morient, superior feliciorque sum iis qui mihi vitam eripi jubent.* Hæc locutus, ultro collum laqueo induit.

Athenienses, quos multis beneficiis affecerat, ingratos expertus Phocion, in concionem prodiit, & sapientissimè dixit: *Molo à vobis, Athenienses, malum accipere, quàm ipse vobis malum inferre.*

## C A P U T X I I.

*Quod meum non est, reseat ad dominum.*

**P**YTHAGORICUS quidam emerat à sutore calceos, rem magnam non presentibus nummis. Post aliquot dies venit ad tabernam pretium soluturus. Quam cum clausam invenisset, & ostium

diu pulsaret, fuit qui diceret: Quid perdis operam tuam? Sutor ille, quem quæris elatus & combustus est. Quod nobis molestum esse potest, qui in æternum nostros amittimus: tibi minimè, qui scis futurum, ut ille renascatur. Quibus verbis jocabatur in Pythagoricum, qui metempsychosim, hoc est migrationem animarum in alia corpora, fieri credebatur. At philosophus noster tres aut quatuor denarios, quod pretium calceorum attulerat, non invitus domum retulit, sub inde manu concutens. Deinde cum intellexisset arrisisse sibi illud lucellum, reprehendens hanc suam non reddendi tacitam voluptatem, ait ipse sibi: Sutor ille tibi vivit. Tu redde quod debes. Red it ergo ad eandem tabernam: & per claustrum, quâ parte rimam invenit, quatuor denarios inseruit ac misit, pœnas se exigens improbæ cupiditatis, ne alieno assuesceret.

### CAPUT XIII.

*Verbis non minùs, quàm factis fit injuria.*

2. **M**ALEDICUS à malefico non distat, nisi occasione.

Famæ damna majora sunt, quàm quæ æstimari possint.

Nihil est tam volucre quàm maledictum: nihil facilius emittitur, nihil citius excipitur, nihil latius dissipatur.

Providendum est imprimis, ne sermo noster indicet vitium aliquot inesse in moribus nostris. Quod maximè solet evenire, cum joco, aut serio, de absentibus, detrahendi causâ maledicè contumeliosèque dicitur.

. . . Absentem qui rodit amicum,

Qui non defendit alio culpante, solutos

Qui captat risus hominum, famamque dicacis,

Fingere qui non visa potest, commissâ tacere  
Qui nequit; hic niger est: hunc tu, Roma-  
ne, caveto.

Lingua est maliloquax mentis indicium malæ.  
Difficilem oportet aurem habere ad crimina.  
In judicando criminosa est celeritas.

Cæca invidia est, nec quidquam aliud scit,  
quàm detractare virtutes.

2. Cùm Mardonius Xerxem ad bellum Græcis  
inferendum excitaret, deprimendo eorum in ar-  
mis virtutem, hisque detrahendo; Artabanus ei  
respondit longâ oratione, in quâ hæc dixit de  
alienæ famæ detractatione seu calumniâ. Res est  
teterrima alienæ famæ detractio: in qua duo  
sunt qui injuriam faciunt: unus cui injuria fit Qui  
enim detrahit. injurius est, quod accusat non  
præsentem. Injurius quoque est qui credit detra-  
henti, antequam rem compertam habeat. Sic  
absenti fit duplex in uria: ab altero enim insimu-  
latur ut malus, ab altero talis temerè putatur.

## C A P U T X I V.

*Ex omni vita simulatio dissimulatioque tollenda est.*

1. **C**UM duobus modis, vi aut fraude, fiat in-  
juria; fraus quasi vulpeculæ videtur, vis  
leonis: sed fraus odio digna majore. Injuria au-  
tem nulla capitalior est quàm eorum, qui cùm  
maximè fallunt, dant operam, ut viri boni vi-  
deantur.

Bonitatis verba imitari, major malitia.

Malus bonus ubi se simulat, tunc est pessimus.

C. Canius, eques Romanus, homo nec infa-  
cetus, & satis litteratus, cum se contulisset Sy-  
racusas, oriandi causâ; discitabat se emere velle  
hortulos aliquos, quò invitare amicos, & ubi  
oblectare se sine interpellatoribus, posset. Quod

cum percrebisset: Pythius quidam, qui argentariam faciebat Syracusis, dixit ei, hortos quidem suos non esse venales, sed licere illi uti iis, si vellet, ut suis. Et simul invitavit eum in hortos ad cœnam in posterum diem. Cum ille promississet: tum Pythius, qui, ut argentarius, erat apud omnes ordines graciosus, piscatores ad se vocavit, & ab his petivit, ut ante hortulos suos postridie piscarentur.

Ad cœnam tempore venit Canius. Opiparè paratum erat convivium: cymbarum autem oculos multitudo piscatorum quæque, quod ceperat, afferebat: autem pedes Pythii pisces adiciebantur. Tum Canius: *Quæso*, inquit, *quid est hoc, Pythi? tantumne piscium, tantumne cymbarum*; Et ille: *Quid mirum*, inquit, *quidquid est piscium Syracusis, in hoc loco est: hic aquatio: hæc vilæ illi carere non possint*. Incensus Canius cupiditate, contendit à Pythio ut hortos venderet. Gravate ille primò rem accipere est visus. Impetrat tandem Canius. Emit hortos homo cupidus & locuplex, tanti quanti voluit Pythius, & emit instructos: negotium conficit.

Invitat in hortos Canius prostridie familiares suos: venit ipse maturè; cymbam nullam videt. Quærit ex proximo vicino, num feriæ quædam piscatorum essent quod nullos videret? Nullæ, quod sciam, inquit ille, *hodie piscatorum feriæ sunt: sed hinc piscari nulli solent*. Itaque heri mirabar quid accidisset. Stomachari Canius. Sed quid faceret? Nondum enim erant lætæ leges adversus eos qui dolo malo agerent.

2. Omnes aliud agentes, aliud simulantes ut Pythius, perfidi, improbi, malitiosi sunt. Nam ex omni vita simulatio, dissimulatioque tollenda est. Et ratio postulat ne quid insidiosè, ne quid simulatè, ne quid fallaciter fiat. Itaque vir bonus, nec ut emat melius, nec ut vendat, quidquam simulabit aut dissimulabit. Si verò vir bo-



nas est is qui prodest quibus potest, nocet nemini; certe virum bonum non facillè reperiemus.

Q ædam video, propter depravationem consuetudinis, neque more turpia haberi: neque jure civili facinri: et naturæ lege sancta sunt.

## C A P U T X V.

*Improbi hominis est mendacio fallere.*

1. **V**IRA dicere, justum est; mentiri verò, injustum.

In virum bonum non cadit mentiri emolumentum sui causâ.

Qui mentitur, fallit quantum in se est. Vir bonus præstare debet ne mentiatur.

Volumus viros fortes & magnanimos eosdem esse bonos, & simplices, veritatis amicos, minimèque fallaces. Quæ virtutes ad justitiam pertinent. Itaque Aristides apud Athenienses, & Epaminondas apud Thebanos, tam alieni à mendacio & tam veritatis diligentes fuisse traduntur, ut ne joco quidem unquam mentirentur. Et Atticus ille, qui cum Cicero vixit conjunctissimè, mendacium neque dicebat, neque pati poterat. *Illum od, aieba Achilles, æquè ac portas Plutonis, qui aliud quidem recondit in mente, aliud verò dicit.*

2. Quid est in quo maximè elaborare debemus? Ut mens sit justa. oratio mendacii expers. Hoc viri boni proprium est, nihil à veritate alienum loqui, ut & nihil à justitia alienum exsequi.

Qui injustè agit, impiè agit. Cùm enim natura homines ediderit, ut sibi invicem prosint, nec ullâ ratione obsint; qui hoc naturæ placitum violat, adversus eam est impius. Eadem natura veritas quoque nuncupatur; estque prima omnium, quæ vera sunt, causa. Itaque qui sciens volensque mentitur, impiè agit: quia fallendo injustè agit.

Quod verum, simplex, sincerumque est, id naturæ hominis est aptissimum.

Assuesce dicere verum & audire.

Assuescendi maximè sunt pueri, ut vera dicant; mentiri enim servile est, & omnium hominum odio dignum vitium. Eâdem sententiâ dixit Apollonius: *Illiberale est mentiri: ingenuum veritas decet.*

Illiberalis & sordidus vulgo putatur quæstus eorum, qui emunt à mercatoribus quod statim divendant: quia nihil solent proficere, nisi admodum mentiantur. Nec verò quidquam est turpius vacitate, id est mendacio.

Persæ liberos suos à quinto anno ad vigesimum tria edocebant, equitare, sagittas arcum mittere, vera loqui. Turpissimum apud eos habebatur mentiri. Secundùm mendacium, in proximo turpitudinis loco ponebant æs alienum: maximè quòd qui ære alieno obstringitur, mendacio obnoxius esse soleat, & plerùmque verba pro re dare.

Justitiam quoque liberi Persarum edocebantur à pueritia. Ac quemadmodum pueri in Græciâ in scholas itabant, litterarum liberaliumve artium discendarum causâ: sic apud Persas pueri scholas frequentabant, ad accipiendam justitiæ disciplinam. Quam quidem ut citius, & certius discerent, non solum eorum auribus præcepta justitiæ inculcabantur, sed etiam docebantur justas ferre sententias de iis, quæ inter ipsos exoriebantur, controversiis, & legitimas pro cuiusque delicti modo pœnas irrogare. Itaque bonam dici partem impendebant publici justitiæ præceptores in audiendis dijudicandisque puero- rum disceptationibus.

4. *Hæc consequuntur mendaces*, inquit Aristoteles, *ut cum vera dixerint, non illis credatur.* Similiter Cicero dixit: *mendaci homini, ne verum quidem dicenti, credere solemus.*

Iis, qui peccarunt, non facile delicti venia conceditur, si interrogati deprehendantur mendaces.

Quid interest inter perjurum & mendacem? Qui mentiri solet, non longè abest à perjurio. Quem ego, ut mentiatur, inducere possum, eum facile exorare potero, ut pejeret. Ut pœna à Diis immortalibus perjuro constituta est, sic & mendaci.

Veritatis sermo est simplex.

Veritas vel mendacio corrumpitur, vel silentio.

## C A P U T X V I.

*In vitio est qui non obsistit, si potest, injuriæ.*

1. **I**NJUSTITIÆ genera duo sunt: unum eorum qui inferunt injuriam: alterum eorum, qui non propulsant, si possunt, ab iis quibus inferitur. Neque enim is tantum in vitio est, qui injustè facit impetum in quempiam, aliqua animi perturbatione incitatus: sed etiam qui non obsistit, si potest, injuriæ.

2. Hominibus plures solent esse causæ prætermittendæ defensionis aliorum, deferendique officii. Nam inimicitias, aut laborem, aut sumtus suscipere nolunt non nulli quidam negligentia, pigritia, inertia præpediuntur: alii suis quibusdam studiis occupationibusve sic impediuntur, ut deserto esse patiantur eos, quos tutari debeant. Hi omnes dum altero genere injustitiæ vacant, in alterum incidunt. Communi enim utilitati non servant, & in vitæ societatem nihil conferunt studii, nihil operæ, nihil facultatum.

3. Apud Ægyptios legibus cautum erat ut si quis iter faciens videret quempiam à latronibus circumveneri, aut aliquid injuriæ perpeti, nec ei auxilium feret cum posset, morte damnetur. Si opem dare non posset, rem deterre ad judices & injuriæ auctorem accusatione persequi jube-

batur. Quod facere si neglexisset, plagis multabatur, & triduum carebat cibo.

Si is qui injuriam non propulsat ab aliis, cum potest: injustè facit: qualis habendus est is, qui non modò non repellit, sed etiam adjuvat injuriam? quidam è Cræcia Romam attulerunt falsum testamentum L. Minutii Basilii locupletis hominis. Quod ut facilius pro vero accipi posset, scripserant heredes secum M. Crassum & Q. Hortensium, homines ejusdem ætatis potentissimos: qui cum illud falsum esse suspicarentur, sibi autem nullius culpæ in conscribendo testamento conscii essent; alieni fascinatoris munusculum non repud'averunt. Graviter deliquisse mihi quidem videntur, qui etiam veras hereditates honestas non puto, si sint blanditiis & simulatâ amicitia quæsitæ.

---

## C A P U T X V I I.

*Inhumanum verbum est ultio.*

**N**ON ulcisci decet, ut vulgus putat, neque malè facere cuiquam hominum, quodcumque ab aliis ipse passus fueris. Nullo enim modo injuria facienda est.

Sunt quædam officia adversus eos servanda à quibus injuriam acceperis. Est enim ulcisciendi & puniendi modus. Atque haud scio an non satis sit eum, qui te laceraverit, injuriæ suæ poenitere, ut & ipse nequid tale post h. c. committat & cæteri sint ad injuriam tardiores.

Ignoscere hominum est, ubi eum pudet, cui ignoscitur.

Veteres Romani, acceptâ injuriâ, malebant ignoscere, quàm persequi. Et plus penè auxerunt imperium parcendo victis quàm vincendo.

Omni bus noxis veniam dare se dicebat Cato major, præterquam suis.



Ignoscito sæpe alteri, nunquam tibi.

2. Beneficia beneficiis repensare honestum est, non autem injurias. Illic, vinci turpe est: hic vincere Ultio inhumanum verbum est, licet mala consuetudine pro justo receptum. Quàm pulchrum est, hominem, velut nulli penetrabilem toto nullis injuriis, nullis contumeliis perfringi! Ultio, doloris confessio est. Catoni minori in balneo quidam os percussit, ignorans: quis enim illi sciens fecisset injuriam? Homini deinde satisfaciendi Cato, *non nemini*, inquit, *me percussam*. Non excanduit, non vindicavit injuriam. Melius esse putavit non agnoscere, quàm vindicare. Nihilne, inquires, mali ex impunita hominis petulantia ortum est, imò multum boni. Cœpit ille Catonem nosse & mirari. Magni animi est injurias despiciere.

... Quippe mihi

Semper & infirmi est animi exiguique voluptas Ultio.

Ille magnus & nobilis est qui, more magnæ feræ, lairatos minutorum canum securus exodit. Sæpe satius fuit dissimulare, quam ulcisci.

Comestores quidam cum in uxorem Pisistrati incidissent, multaque protervè & fecissent & dixissent; postero die facti veniam à Pisistrato postulaverunt. Quibus ille respondit: *Vos deinceps magis operam date modestiæ. Mea verò uxor heri nusquam prodit.*

3. Cum Cumani Pittaco victum tradidissent hominem à quo filius ejus fuerat interfectus, illum impunitum dimisit hæc præfatus: *Venia ultione melior est, illa namque mitis est ingenii, hæc ferina.* Simili sensu dixit Musonius Philosophus: *Fere non homini, est quærere quomodo morsum pro morso, malum pro malo, reddat.*

Non oblitus erat Aristides, Themistoclem sibi diu clam aut apertè fuisse adversatum in administranda republica. Noverat quoque se ejus maxime

me operâ pulsum fuisse in exilium. At ostendit quàm alieno ab ultione animo esset, cum deliberaretur de ipso Themistocle è civitate ejiciendo testarum suffragiis. Opportuna certè oblata erat expetendæ vindictæ occasio. Nihil tamen ab eo aut dictum, aut factum est, quod nocere posset inimico. Et ut prius ei non inviderat florenti opibus & rerum gestarum gloria, sic tùm noluit premere periclitantem, & eo dejecto exultare.

T. Pomponius Atticus nullas inimicitias gessit. quod & lædebat ipse neminem; &, si quam injuriam acceperat, malebat oblivisci, quàm ulcisci.

Magnanimo injuriæ remedium oblivio est.

Adrianus multos in privata vita inimicos expertus erat, quorum injurias ubi imperator factus est, adeò neglexit, ut uni, quem capitalem habuerat, diceret: *Evagisti.*

Vulgatum illud, quia verum erat, in proverbium venit: *Amicitias immortales, inimicitias mortales esse debere.*

4. Cùm Dion expugnasset Syracusas, quas ab importenti tyrannorum dominatu liberare cupiebat; Heraclides & Theodotes, infensi ejus hostes, se ultro deditere, culpam fatentes, orantesque, ut benignior in ipsos esset, quàm ipsi in eum fuerant. Admonuerunt quoque decere Dionem, qui multis aliis virtutibus ornatus esset, iræ imperare, & ultionis cupidum non esse. Hæc illis precantibus & monentibus, hortabantur amici Dionem, ne improbis hominibus, funestiarum turbarum auctoribus, parceret, sed eos militum furori permitteret. Tum Dion: *Cæteris, inquit, ducibus atque imperatoribus plerùmque sola belli & armorum exercitia cordi sunt. Mihi verò, qui plurimum temporis in Academia consumpsi, cura fuit id discere, ut iram, ultionem, invidiam, pertinaciam, & alias ejusmodi pestes possem vincere: cujus victoriæ argumentum certum est, non in amicos & viros bonos benignitas, sed erga ini-*

quos & inferfos inimicos placabilitas & lenitas. Heraclidem superare mihi animus est ; non potentia & prudentia , at humanitate & iustitia : in his enim virtutibus vera fortitudo , magnitudo , gloria posita est : cum miles , aut saltem fortuna sibi vindicet partem gloriæ bello quaesita. Quod si Heraclides & invidus , & infidus , & malus est ; ideone Dionem oportet virtuti suæ labem inurere iræ impotentia ? Lege quidem humana definitum est eum minùs peccare adversùs iustitiam qui acceptam injuriam ulciscitur , quam qui prior infert : at naturâ utrumque ab eadem animi infirmitate proficiscitur. Nullius porro hominis tam aspera tamque effera est improbitas , quæ non possit frequentibus beneficiis mansuescere & expugnari. His usus rationibus Dion , Heraclidem & Theodotem missos fecit.

## C A P U T   X V I I I .

*Injuriae beneficiis vincuntur speciosius , quàm mutuo odio pensantur.*

1. **U**SQUE ad ultimum vitæ finem non desinamus communi bono operam dare , adjuvare singulos , opem ferre etiam inimicis.

Optimus injuriam ulciscendi modus est , ne similis sis eam inferenti. Contemnit me quisquam , ipse viderit. Ego mihi cavebo , ne quid contemptu dignum vel egisse vel dixisse deprehendar. Odit me quisquam ? Ipse viderit. At ego mitis esse & benevolus cuique pergam ; & huic etiam ipsi , qui me odit , errorem ostendere paratus ero , non contumeliosè , neque ut patientiam meam ostentem : sed benignè , & ingenuè : interiùs enim me ita affectum esse oportet , ut ipsi Dii videant me eum esse qui nihil indignè ægreve feram.

*Amico noli maledicere , ac ne inimico quidem , inquebat Pittacus.*

Laudante quodam Cleomenis dictum , cui interrogatus quodnam esse boni regis officium ,

responderat : *Amicis bene , inimicis male facere . Quanto rectius erat , inquit Socrates , amicis benefacere , ex inimicis autem ami os facere !*

Sic invicem vivendum esse dicebat Pythagoras , ut non ex amicis inimicos , verum ex inimicis amicos faciamus .

2. M. Marcellus , cum de eo Consulatum tunc gerente Siculi quæstum Romam venissent , ultro de illis in Senatum admittendis retulit , quærentesque de se patienter sustinuit . Improbatis à Patribus querelis eorum , clementer excepit orantes ut ab eo in clientelam reciperentur : nullas adversus illos inimicitias exercuit , & per reliquam vitam illis benefacere non destitit .

Cum è carcere atque ipsa urbe Atheniensium profugisset orator Demosthenes , respexit aliquos ex inimicis citato cursu vestigia sua subsequentes , & latebras pavidus quæsit . At illi eum sæpius nomine compellatum tandem assecuti , oraverunt ut , positâ formidine , pecuniam acciperet , quam domo ei attulerant in viaticum & subsidium ; adhortatique sunt ne casum ferret acerbius . Quibus Demosthenes : *Quomodo , inquit , possum non graviter ferre , me eâ urbe carere , ubi tales inimicos habeam , quales aibi amici inveniri vix queant .*

3. Magni animi est , injurias in summa potentia pati : nec quicquam est gloriosius Principe impune læso .

Cicero hanc laudem eximiam Cæsari tribuit , quod nihil oblivisci soleret , nisi injurias . Omnium victor regressus in urbem omnibus , qui contra se arma tulerant , ignovit . Simultates omnes , occasione oblatâ , libens deponebat . Ultro ac prior scripsit C. Calvo post famosa ejus adversum se epigrammata Valerium Catullum , cujus versiculis famam suam laceratam non ignorabat , adhibuit cœnæ . C. Memmii suffragator in petitione Consulatus fuit , licet asperrimæ fuissent ejus contra se orationes .



Vespasiani, inter cætera bona, illud singulare fuit, inimicitias oblivisci: adeo ut Vitellii hostis sui filiam locupletissimè dotaverit, & viro splendidissimo in matrimonium dederit. Ferebat quoque patienter contumelias, iis, ut erat facetissimus, dictis jocularibus respondens.

## C A P U T   X I X.

### *Justitia victrix odii.*

1. **C**N. Domitius, Tribunus plebis, M. Scaurum principem civitatis in judicium populi Romani, vocaverat: iratus quòd ab eo in Augurum collegium non fuisset cooptatus. Cum opprimendi inimici summo studio flagraret, servus Scauri ad eum noctu pervenit, promittens se instructurum ejus accusationem multis & gravibus domini criminibus. At Domitius nefario indicio servi perfidi uti noluit. Continud enim & suis auribus obduratis, & indicii ore clauso, comprehendendi hominem & ad Scaurum deduci jussit. Sicque in infeste accusatore justitia odium vicit. Hunc Domitium deinde populus, tum hanc ob causam, tum propter alias virtutes, libentius & Consulem & Censorem & Pontificem maximum fecit.

2. Non minus insignæ justitiæ specimen dedit L. Crassus in nobili illa accusatione, quam adversus Carbonem instituit, annos natus unum & viginti. Nam cum scrinium rei, plura continens quibus facile opprimi posset, allatum ei fuisset ab illius servo; signatum, ut erat, remisit ad illum cum servo catenato, nolens causam obtinere alienâ fraude ac perfidiâ.

Quo pacto viguisse tunc inter amicos justitiam credimus, cum inter accusatores quoque & reos eam tantum virium obtinuisse videamus?

## CAPUT XX.

*Utilitas ex inimicis capienda.*

2. **V**ULGUS hominum satis habet nullo malo ab inimicis affici: at viri prudentes, etiam utilitatem ex iis capiunt. Inimicus dicta factaque nostra observare infenso animo non cessat, captans nocendi occasionem; quam ne præbeamus, cavemus. Hæc autem cautio sensim affert studium & consuetudinem rectam & inculpatam vitam agendi.

Vis inimicum molestiâ afficere? Noli eum illiberalem, libidinosum, scelestum nominare: ipse esto humanus, castus, probus. Hinc Diogenes, cum eum interrogasset quidam, quâ ratione ulcisceretur inimicum: Si ipse, inquit, quàm optimus fiat.

Cum accepisse Philipus Macedoniæ rex, se ab oratoribus Atheniensibus proscindi conviciis in concione: *Magnam, inquit, ejusmodi hominibus gratiam habeo. Dabo enim operam deinceps & verbis & factis, ut illos mendacii coarguam.*

2. Verè dictum est ab Anthistene, eum, qui probitatem suam salvam esse velit, opus habere vel veris amicis, vel inimicis vehementissimis; quòd illi admonendo, hi criminando à vitis avertant. Sed quoniam nostrâ ætate amicitia voce valde exili ad liberas reprehensiones est prædita, loquax in adulando muta in castigando, audienda est nobis ex inimicis veritas. Quemadmodum enim Thelephus, ut ferunt fabulæ, domestico medico destitutus, vulnus hostili hastæ sanandum præbuit: ita necesse est, ut ii, quos deficit benevolus castigator, sermonem audiant infensi inimici peccata eorum insectantis, non considerantes animum maledicentis, sed reprehensionis veritatem atque utilitatem.

3. Sicut qui volebat Jasonem Thessalum interficere, gladio vomerem ejus aperuit, eâque ruptâ salutem illi attulit: sic sæpe convicium ab irato homine aut inimico jactum in nos aperuit, & sanavit morbum animi latentem aut neglectum. At plerique maledictis impetiti, non dispiciunt, an verè aliquid ipsis objiciantur; sed quid vicissim possint arguere in maledicentibus.

Ab inimico tuo notatus aliquo crimine; illud, si verum sit, majore studio expurgare debes, quàm commostratam aliquam vestis tuæ maculam. Si falsum, quærenda tamen est causa quæ criminationi occasionem dedit, cavendumque ne deinceps committas aliquid aut affine aut simile ejus quod objectum fuit.

4. Multa sunt quæ inimicus magis deprehendit in nobis quàm amicus: quoniam, ut ait Plato, cæcus amor est. Hiero cùm ei quidam inimicus oris foetorem exprobrasset, domum se ad uxorem recipiens: *Quid hoc, inquit, rei est? Cur tu mihi oris vitium non indicavisti?* Illa verò ut erat pudica & simplex: *Existimabam, ait, omnes viros sic olere.* Adeo non animi tantum, sed etiam corporis vitia, sæpe nobis nota fiunt ab inimicis prius, quàm ab amicis.

## C A P U T X X I.

*A litibus est abhorrendum.*

1. **C**ONVENIT hominem in dando munificum esse, & in exigendo non acerbum; in omni re contrahendâ, vendendo, emendo, conducendo, locando. Æquum & facilem se præbere, multa multis de jure suo cedentem, à litibus verò abhorrentem.

Est autem non modò liberale, sed interdum etiam fructuosum, paulum de jure suo decedere: &

Pecuniam in loco negligere , maximum interdum est lucrum.

Habenda quidem est ratio rei familiaris , quam dilabi sinere , flagitiosum est : sed ita ut illiberitatis avaritiæque absit suspicio. Et ut res familiaris quæri debet iis rebus , à quibus abest turpitudine : sic conservari diligentia & parcimonia.

2. Isocrates vocatus in jus anno ætatis octogesimo secundo , orationem habuit in quâ his verbis ostendit quàm alieno à litibus animo semper fuisset : Sic vixi hætenus , ut nemo unquam me ullius injuriæ , aut contumeliæ accusaverit ; neque judex , neque arbiter fuerit , qui de meis adversus quemquam factis aut dictis pronunciarit. Etenim cavi ne quid ipse erga quemquam delinquerem. Mihi verò si qua facta fuit injuria : non judicio quæsi vindiçtam de inimicis , sed eorum amicis controversiam dirimendam permisi.

3. Parum liberale & nimis litigiosum esse existimo , vocare aliquem in jus propter maledicta.

Negabat Musonius se vocaturum quemquam in jus. Se enim neque injuriâ , neque contumeliâ affectum putabat , si maledictis laceffi , conspuï , verberari contigisset : *Qui ignorant , inquiebat , quid honestum aut turpe re verâ sit , injuriam se pati censent , si quis aut torvis oculis ipsos intueatur , aut irrideat , aut percutiat , aut conviciis laceffat. At vir sapiens his omnibus non perturbatur : non illa pati , sed facere turpe ducent. Itaque nemo mente præditus propterea ad accusationem & forum convertetur : ut pote qui sibi nullam accepisse injuriam videatur.*

## C A P U T X X I I.

*Paci consulendum , nec bella accerbè gerenda.*

1. **C**UM sint duo genera decertandi , unum per disceptationem , alterum per vim ; illud



proprium hominis est; hoc belluarum: nec confugiendum est ad posterius, nisi ubi uti non licet superiore, semperque paci est consulendum. Quare ideò tantum suspicienda bella sunt, ut sine injuria in pace vivatur. Partâ autem victoriâ, conservandi sunt ii qui non crudeles in bello, non immanes fuerunt. Sic Romani Sabinos, Æquos, Volscos, etiam in civitatem acceperunt: at Carthaginem & Numantiam funditus sustulerunt.

2. Cum de imperandi gloriâ decertatur & armis fama quæritur, causas tamen omninò subesse oportet justas bellandi: ejusmodi bella minus acerbè gerenda sunt. Quod egregiè præstiterunt Ptolomæus rex Ægypti & Demetrius Antigoni filius. Cum à Ptolemæo Demetrius victus esset; major ad Ptolemæum gloria venit ex moderatione, quam ex ipsa victoria. Si quidem & dimisit amicos Demetrii, non solum cum suis rebus, verum etiam additis insuper muneribus; & ipsius Demetrii privatum omne instrumentum ac familiam reddidit, dicens: *senon propter prædam bellum iniisse*. Non multo post Ptolemæus iterum congressus cum Demetrio navalit prælio, ipse, amisâ classe, hostique concessâ victoriâ in Ægyptum refugit. Tum Demetrius Ptolemæo benignitatis vices rependens, filium ejus, & fratrem & amicos in Ægyptum remisit cum privato cujusque instrumento: ut appareret, eos, non odio, sed laudis studio accensos, donis muneribusque inter ipsa bella contendere. Certè honestius tunc bella gerebantur, quàm nunc amicitiae coluntur.

---

## CAPUT XXIII.

*Justitiâ hostes vincere gloriosius est, quàm armis.*

1. **F**ACTIS honestis atque justitiâ hostes vincere, non minor, imò etiam utilior, res est vic-

toriâ armis parâ. Hic enim necessitate compulsi hostes cedunt, illic sponte. Hæc victoriâ magnis cum damnis, revocat ad officium malefanos: illa verò sine detrimento in viam rectam reducit aberrantes. Præterea ubi armis res geritur, pars potissima victoriæ opus est militis, ubi verò iustitiâ, totum decus eorum est qui præstant.

2. Romani Camillo duce obsidebant jamdudum Falerios, Faliscorum urbem. Mos erat tunc apud Faliscos, ut plures simul pueri unius magistri curæ demandarentur. Qui scientiâ videbatur præcellere, erudiebat principum liberos. Is cum in pace solitus esset pueros lusus exercitationisque causâ, extra urbem producere, eo more per belli tempus non intermisso, die quodam eos trahens longius à porta, quam solebat, in castra Romana perduxit, & Camillo tradidit, præfatus, se tradere Falerios in manus Romanorum cum daret eos pueros, quorum parentes in ea civitate principes essent. Quæ ubi Camillus audivit: *Non ad similem tui, inquit, populum & imperatorem venisti cum scelesto munere scelestus ipse. Nobis non est cum Faliscis societas, quæ pacto fit humano: sed ea utrique populo est, quam natura omnibus hominibus ingenerabit. Sunt belli sicut pacis, jura; justèque non minùs quàm fortiter, bella gerere didicimus. Arma habemus, non adversus eam civitatem cui etiam captis urbibus parcitur: sed adversus armatos qui nec læsi, nec lacerati à nobis, castra Romana oppugnarunt. Eos tu novo scelere vicisti, quantum in te fuit: ego Romanis artibus, virtute opere, armis, vincam.*

Denudari deinde ludi magistrum iussit, eumque pueris tradidit reducendum Falerios, manibus post tergum illigatis: virgas quoque eis dedit, quibus proditorem agerent in urbem, verberantes. Ad quod spectaculum concursu populi primùm factò, deinde vocato à magistratibus senatu, tanta mutatio animis est injecta, ut ii,

qui modò efferrati odio irâque erant, statim pacem poscerent. Itaque Romanorum justitiam admirantes, ultro se iis dediderunt, rati se melius sub imperio eorum, quàm legibus suis, victuros. Camillo & ab hostibus & à Romanis gratiæ actæ sunt. Pace Faliscis datâ, exercitus Romam reductus.

3. Pyrrhi bello maximum exemplum justitiæ in hostem est à Romanis datum. Cùm Pyrrhus Epiri rex bellum populo Romano intulisset. & de imperio certamen esset cum rege generoso ac potente, perfuga venit ab eo in castra Fabricii Consulis, & pollicitus est se Pyrrhum veneno necaturum, si sibi præmium proponeretur. Hunc Fabricius reducendum ad Pyrrhum curavit. Si specie utilitatis decipi se passus esset Fabricius, sustulisset unius perfugæ operâ magnum bellum & gravem populi Romani adversarium. Sed magnum dedecus fuisset & flagitium venenis certasse cum hoste, non armis; & eum non virtute, sed scelere, fuisse superatum, cum quo laudis certamen erat Romanis.

Hanc Fabricii magnitudinem animi admirans Pyrrhus, exclamasse fertur: *Hic est ille Fabricius qui difficilius ab honestate quàm sol à cursu suo averti potest.* Gracias & Fabricio & populo Romano egit; & ne ipso beneficio victus videretur, quoscumque tum habebat captivos Romanos dimisit sine pretio, & bene vestitos. Quin etiam ad pacem & amicitiam impetrandam misit Romam Cineam legatum cum muneribus pretiosis, tam fæminarum quàm virorum aptis usui. Quæ munera cum aspernati essent ii quibus primum oblata fuerant, & ad alios ostiatim deferrentur, tantâ Romani omnes abstinentiâ fuere, ut nullus vir, nulla mulier, patere januam suam regiis donis recipiendis voluerit. Et ne captivi, quos rex remiserat, gratis reciperentur, totidem pro his Tarentinorum Samnitumque remissi sunt ad Pyrrhum.

Iisdem ferme temporibus , ut refert Justinus , simile huic totius populi continentis exemplum fuit quorundam legatorum Romanorum. Nam missi à Senatu in Ægyptum legari , cum ingentia sibi à Ptolomæo rege missa munera sprevisset ; paucos post dies ad cœnam invitatis aureæ coronæ datæ sunt , quas illi receptas postero die statuis regis imposuerunt.

---

## CAPUT XXIV.

*Etiam hosti fides servanda.*

I. **S**i temporibus adductus aliquid hosti cum iurarejurando promiseris , est fides servanda. Est enim iusjurandum affirmatio religiosa , & id tenendum est , quod affirmatè , quasi Deo teste , promiseris.

Primo Punico bello , M. Atilius Regulus , cum Consul iterum in Africa captus esset à Pœnis ; Romam ad Senatum missus est , juratus se Carthaginem rediturum , nisi impetrasset ut Pœnis redderentur captivi nobiles quidem. In Senatum venit , mandata exposuit , & primum ne sententiam ferret recusavit , dicens , se , quoniam in hostium potestatem venerat , jam non esse Senatorum. Deinde jussus expromere quæ patriæ conducere arbitrabatur non modò non censuit captivos Pœnos esse remittendos , verùm etiam dissuasit ; negavitque utile esse eos reddi , quia adolescentes essent & boni duces , ipse verò jam confectus senectute. Cujus cum valuisset auctoritas , captivi retenti sunt , ipse Carthaginem rediit , nec eum Romæ retinuit charitas patriæ & suorum.

Neque verò tum ignorabat Regulus , se ad crudelissimum hostem & ad exquisita supplicia proficisci : sed iusjurandum conservandum putabat. Itaque tum cum vigilando aliisque cruciatibus ne-



cabatur, erat in meliore causa, quam si domi remansisset senex captivus, perjurus Consularis. Nisi Senatui auctor fuisset retinendorum Romæ captivorum Pœnorum, essent profectò redditi, & ita incolumis in patria restitisset: sed quia id patriæ non utile putavit, idcirco sibi honestum esse crededit & sentire illa & pati.

Ex tota hac laude Reguli, inquit Cicero, unum illud est admiratione dignum, quod captivos Pœnos retinendos censuerit. Nam quòd rediit, nobis nunc mirabile videtur: illis quidem temporibus aliter facere non poterat. Itaque ista laus non est hominis, sed temporum. Nullum enim vinculum ad astringendam fidem jurejurando arctius majores nostri esse voluerunt.

2. Oçto Romanorum millia post Cannensem pugnam in Pœnorum manus venerant. Cùm Annibal illis redimendi se copiam fecisset; decem elegerunt, qui Romam ad Senatum irent. Nec Pœni pignus aliud fidei ab eis postularunt, quàm ut jurarent se in castra redituros, nisi à Senatu impetrassent captivos redemi. Cum egressi è castris essent, unus ex iis, minimè Romani ingenii homo, in castra paulo post reversus, quasi aliquid esset oblitus, ante noctem comites affecutus est. Hac a te se jurejurando solutum putabat. Et erat verbis, re non erat.

Legatis captivorum in Senatum introductis, eorum princeps M. Junius multa dixit cur captivi redimendi essent, & ad movendam Patrum misericordiam nihil omisit. Ubi finem dicendi fecit, extemplo clamor flebilis est sublatus ab eâ virorum & mulierum turbâ quæ ad fores Curiae stabat, manusque ad curiam tendebant, orantes ut sibi patres, liberi, conjuges, fratres, cognati, rederentur. Consulti ex ordine Senatores decreverunt captivos non esse redimendos, cùm id parvâ pecuniâ fieri posset, ut esset insitum militibus Romanis aut vincere aut mori. Cum triste  
responsum

responsum redditum esset ; mixta cujusvis generis hominum turba cum magnis fletibus questibusque legatos ad portam profecta est. Unus è legatis , qui propter fallacem reditum in castra se jurejurando exsolutum putabat , domum abiit. Quod ubi innotuit , relatum ad Senatum est. Omnes decreverunt , ut ille veterator & callidus comprehenderetur , & custodibus publicè datis , ad Annibalem reduceretur.

3. Existunt sæpe injuriæ calumniâ quâdam , & malitiosâ passionum interpretatione. Quo in genere multa peccantur. Ut ille peccavit , qui , cum triginta dierum induciæ essent pactæ cum hoste , nocte populabatur ejus agros : quod , inquebat , dierum induciæ pactæ essent non noctium.

Cum Q. Labeo pactus esset cum rege Anthiocho , quem bello superaverat , ut ab eo dimidiam classis partem acciperet ; ferunt omnes ejus naves medias secuisse ut regem tota classe privaret.

Idem Labeo à Senatu Romano datus arbiter Nolanis & Neapolitanis de finibus agrorum terminandis , cum ad locum venisset , separatim cum utrisque est locutus monuitque ne cupidè agerent , sed ut regredi , quàm progredi , malent. Id cum utrique fecissent , aliquantum agri in medio relictum est , quod Populo Romano adjudicavit. Decipere hoc quidem , non dijudicare , est. Quocirca in omni refugienda est talis solertia.

---

## C A P U T X X V.

### *Jusjurandum colito.*

1. **J**USJURANDUM optimè coles , si eo nec frequenter utaris , nec temere , sed in rebus tantum necessariis aut gravissimis adhibeas. Invenient autem juramenta tua fidem apud eos qui audient , si ita vixeris , ut his persuasum sit , ni-

hil tibi sivo jurato, sive injurato videri veritate sanctius in rebus mortalium.

Jurandi consuetudine in perjurium facile prolabimur. Contrà cum parè juratur, sanctè juratur.

Jurare, nisi ubi necesse est, gravi viro parum convenit.

Jusjurandum refuze, si possis prorsus: si minus, cum licet. Cum enim jusjurandum Deum citet testem eorum quæ dicantur; parum pium & religiosum videtur esse, divinum numen advocare ob res humanas, quarum plurimæ parvæ vilesque sunt.

2. Jusjurandum si postulabitur, duabus de causis dabis: vel ut temetipsum turpi crimine liberes, vel ut amicos à periculis eripias. Pecuniæ verò causâ per nullum Deum jurabis, etiam si id verè facere possis.

Pythagoras discipulis præcipiebat, ut ad jurandum rarò & tardè accederent, se verò dignos præberent, quibus non jurantibus fides haberetur, propter viræ integritatem. Itaque Clinias Pythagoricus, cum trium talentorum multam jurejurando effugere posset, maluit tantæ pecuniæ damnum facere, quàm jurare, cum tamen non esset falsò juraturus.

Quantum honoris ab Atheniensibus tributum est Xenocrati viro sapientiâ pariter ac sanctitate claro! Qui cum testimonium publicè dixisset, & ut mos Græcorum erat ad aras accederet, jurandi causâ se omnia verè retulisse; unâ voce omnes judices, ne his juraret, reclamaverunt, & existimaverunt concedendam esse integritati illius viri, quod non erant sibi postmodum concessuri in dicenda sententia; juramentum enim præstititunt.

3. Olim, cum hominibus Deorum cura & reverentia esset jurejurando in singulis causis à litigantibus requisito; res citò simul & tuto dijudicabantur: nunc verò, quoniam pessimi homines,

quorum magna multitudo est, Deos res humanas curare non credunt, aut eos hostiis & blanditiis ita sibi consiliari posse putant, ut licet impune vel grandem pecuniam aliis eripere, vel impositam sibi gravem multam effugere: commutandæ leges sunt. Itaque prudens legum lator in iudiciorum disceptatione prohibebit jusjurandum litigantium, ne, si jurandi licentia cuique datur, plures perjuri fiant.

Phryges aâ omni abstinebant juramento: ita ut nec ipsi jurarent, nec alios ad jusjurandum adigerent.

Rarus fuit priscis Romanis usus jusjurandi, imò & testium & signorum, in privatis pactionibus: quia vix inveniebatur qui datam fidem falleret.

4. Apud Ægyptios perjuri capite mulctabantur, ut qui pietatem in Deos violarent, & fidem inter homines tollerent, maximum vinculum societatis humanæ.

Si quis perjeret, à Diis pœnam, ab hominibus dedecus expectet. Latere quidem homines potest: at Deos non potest.

Perjurii pœna divina, exitium: humana, dedecus.

Qui juramento hostem circumvenit, fatetur se hominem timere, Deum verò contemnere.

Si quis Deorum, ut fingunt Poëtæ, per Stygem jurando perjurasset, per annum totum nihil ambrosiæ & nectaris degustabat: jacebat lecto affixus, vocis & spiritus expers, gravi veterno oppressus; novem quoque annos agebat procul à cæteris Diis, non eorum consiliis intererat, non epulis.

## C A P U T X X V I.

*Servis imperare moderatè, laus est.*

1. **M**EMINERIMUS & adversus infimos justitiam esse servandam. Est autem infima condi-



tio & fortuna servorum quibus uti debemus, ut mercenariis, ita ut opera exigatur, iusta solvantur.

Servis imperare moderatè laus est: & in mancipio tibi cogitandum est, non quantum illud impune pati possit, sed quantum tibi permittat æquitas: quæ jubet parcere etiam captivis, & pretio paratis. Cum omnia licere videantur in servum, quia eum emitti; est tamen aliquid quod commune jus hominum vetet licere in illum. Nam ejusdem naturæ est cujus tu.

2. Quis non oderat Vedium Pollionem, quod murænas sanguine humano saginaret; & servos, si quid deliquerant, in vivarium adjici juberet? O hominem mille mortibus dignum! Cum aliquando apud eum cœnaret Augustus, fregit unus ex servis vas crystallinum. Rapi illum protinus Vedius jussit, & ne vulgari morte periret, obijci murænis quas ingens piscina continebat. Evasisse manibus puer & confugit ad Cæsaris pedes, ne esca piscium fieret. Motus est novitate crudelitatis Cæsar, imperavitque servum dimitti: crystallina autem vasa omnia coram se frangi, & compleri piscinam. Fuit Cæsari sic castigandus amicus: bene usus est potestate suâ.

3. Superbissima consuetudo circumdedit cœnanti domino stantium servorum turbam. Comedit ille plus quàm capit, & ingenti aviditate onerat distentum ventrem: at infelicibus servis non licet movere labra, ne ut loquantur quidem. Nocte tota jejuni mutique perstant. Sic fit ut illi de domino loquantur, quibus coram domino loqui non licet.

Proverbium jactatur: *Nobis totidem esse hostes, quot servos.* Ipsi eos hostes facimus, cum obliti homines esse, tanquam jumentis abutimur. Cogitemus illum, quem servum nostrum vocamus, eodem modo ortum esse ac nos, eodem frui cœlo, æquè spirare, æquè vivere, æquè mori.

4. Sic cum inferiore vivas , quemadmodum tecum superiorem velles vivere. Vive cum servo clementer. Comiter quoque & in sermonem & in consilium admittit. Amicum in foro aut in curia tantum ne quæras : si diligenter attenderis , & domi invenies. Virtus nulli præclusa est , omnes admittit , ingenuos , servos , reges , exules. Non censum eligit , nudo homine contenta est. Potest servus iustus esse , fortis , magnanimus. Dicitur Nicolaus Damascenus , scriptor celeberrimus , maximam in erudiendis famulis curam posuisse , & eos ad morum suorum similitudinem formasse quotidianâ cum illis vivendi consuetudine. Itaque eos expertus est non deteriores amicis suis.

5. Ego non ministeriis servos æstimabo ; sed moribus. Quemadmodum stultus est , qui , equum empturus , non ipsum inspicit , sed stratum ejus ac frænos : sic stultissimus est , qui hominem æstimat aut ex veste , aut ex conditione. Servus est , sed fortasse liber animo. Servus est , vide , quis nostrum non sit ? Alius libidini servit , alius avaritiæ , alius ambitioni , ferè omnes timori. Nulla servitus turpior est , quàm voluntaria.

Ne te fastidiosi isti superbiq; domini deterreant , quominus servis tuis hilarem te præbeas. Colant potius te , quàm timeant. Id non debet dominis parum esse , quod Deo satis est , qui colitur & amatur. Non potest amor cum timore misceri. Rectissimè ergo te facere judico , quòd timeri à servis tuis non vis , quòd verborum tantum castigatione uteris. Verberibus muta animalia admonenda sunt.

Lacedæmonio cuidam flagris sævienti in servum , *desine* , inquit Demonax , *te servo tuo similem ostendere.*

Apud Ægyptios si quis servum sponte occiderat , eum morte damnari æquè ac si liberum occidisset , jubebant leges , non respicientes hominis occisi fortunam , sed facinoris atrocitatem.

6. Cùm Adrianus Imperator stylo oculum servi cujusdam sui vulnerasset, ac postea eum vidisset factum ex illo vulnere in oculum, vocavit ad se, fecitque ei potestatem petendi munus pro amisso oculo. Cùm autem ille miser taceret; rursus hortatus est Adrianus, ut quidquid vellet peteret. Tum ille negavit *se quidquam petere, desiderare autem atque optare oculum quem amississet.* Enim verò quod tandem munus inveniri possit, quò oculus amissus rependatur?

7. Româ redeunti mihi, inquit Galenus, itineris comes factus est quidam patriâ Cretensis, vir bonis moribus, in amicos benevolus, & liberalis, sed sic iracundus, ut suis ipsius manibus adversus servos uteretur. Is furore percitus, quòd servi duo de supellectili sua interrogati, nihil respondissent; eos in caput ita percussit, ut sanguis multus efflueret. Cùm ipsum deinde facti pœnituisse; me manu arreptum introducit in ædes quasdam: deinde eorum porrigens, ubi se ipsum exiit, jubet verberare, pro iis quæ furore nefario, ut ipse vocabat, correptus patra- verat. Cùm autem ego, ut pœr erat, in risum prorumperem; ille mihi ad genua procumbens, instabat, obsecrabatque, ut ejus precibus annuerem. Ego contrâ eo majores risus edebam, quo diutius illum perseverantem videbam in proposito ut cæderetur. Tandem promisi me facturum quod petebat, hoc est ei verbera illaturum, si ipse quoque valde exiguum quiddam, quod ego eram petiturus, mihi vicissim præstaret. Ubi illi conditio placuit: rogavi hominem, ut me quædam dicentem audire vellet. Quod ille se facturum æquo animo dixit. Tum ego longiori sermone illum docui, quem admodum ratioe emendari & coerceri oporteat quidquid est in nobis iracundiæ ac furoris. Et multa attuli ut probarem non verberibus, sed alio modo peccata corrigenda. Cùm ille interea ad seipsum rediisset, ongè postea seipso melior effectus est.

## CAPUT XXVII.

*Dominorum benignitas in servos.*

1. **A**NTIQUISSIMUS Italiæ rex Saturnus tantæ justitiæ fuisse traditur, ut neque servierit sub illo quisquam, neque aliquid privatæ rei habuerit, sed omnia communia indivisa fuerint, veluti unum cunctis patrimonium esset. Hæc ætas aurea vocata est. Ad servandam tam felicitis temporis memoriam, instituta sunt apud Græcos & Romanos Saturnalia, in quibus dominorum ac servorum jus æquabatur. Imò per eos dies servi habitum herilem sumentes, sedebant ad mensam, dominis ministrantibus; aut unâ sedentibus honores in ædibus gerebant: jus dicebant. Causidici Romæ non veniebant in forum. Clausæ erant scholæ. Gestabantur pilei. Nefas erat poenas à nocentibus exigere, & bellum suscipere.

2. Nonnulli Romanorum servos, quorum fidei operâ usi erant, donabant libertatem, numerabant inter amicos, heredes scribebant. Patet ex Plinii epistolis, quæ fuerit ejus benignitas in manumittendis servis & in concedenda testamenti conficiendi licentia: qui dolor de eorum infirmitatibus aut mortibus: quæ cura & sollicitudo, ut ægris nihil deesset ad convalescendum ex morbo.

3. Extant quoque plurimæ Ciceronis epistolæ quæ declarant ejus sollicitudinem de valetudine Tironis servi, quem Patris in Achaïa ægrum reliquerat; simulque quam parum propterea sumptui pepercerit, & quam studiosè eum amicis suis commendaverit. Hæc autem est summa illarum epistolarum.

Paulò faciliùs posse me ferre desiderium tui putavi: sed planè non fero. Et quamquam magis



interest ad honorem meum quamprimum ad urbem me venire; tamen peccasse mihi videor, qui à te discesserim. Tu hoc tibi persuade, nihil me malle quàm te esse mecum: at si intelliges opus esse te patris, convalescendi causâ, paulum commorari, existima nihil me malle, quàm te valere. Quod maximè conducit valetudini tuæ si feceris, maximè obtemperabis voluntati meæ. Hoc pro tuo ingenio considera. Innumerabilia sunt tua in me officia, domestica forentia, urbana, provinciatia. Omnia viceris, si ut spero, te validum videro. Illud, mi Tiro, te rogo, sumptui ne parcas ulla in re, quâ ad valetudinem opus sit. Scripsi ad Curium dare medico quod dixisses, ut sit studiosior. Ego omnem spem tui diligenter curandi in Curio habeo, nihil potest fieri illo humanius, nihil nostri amantius. Ei te totum trade. A quoque Varroni, quem tum amantissimum mei cognovi, tum etiam valde tui studiosum diligentissimè te commendavi: quem omnia facturum confido: recepit enim. Festinare te nolo. Nihil laboro, nisi ut salvus sis. Tuam prudentiam, tuum erga me animum novi. Scio te omnia facturum, ut nobiscum quamprimum sis. Sed tamen ita velim, ut nihil properes. Quamquam te videre toto animo cupio, tamen te penitus rogo, ne te nisi bene firmum committas per hyemen tam longe navigationi & viæ. Cura igitur te, & confirma: & cum commode, & per valetudinem, & per anni tempus navigari poteris, ad nos amantissimus tui veni. Nemo nos amat, qui te non diligit; carus omnibus expectatusque venies. Vale, mi Tiro, vale, vale, & salve.

Hunc Tironem, quem postea manu misit, verè amabat Cicero, ut ipse his verbis scribit ad Atticum: De Tirone video tibi curæ esse. Qui etsi mirabiles utilitates mihi præbet, cum valet, in omni genere negotiorum vel studiorum meorum: sum ego tamen propter humanitatem & modest-

tiam malo saluum , quàm propter usum meum.

4. Quàm jucunda res est servi , bonos dominos nancisci ; & dominis , servos benevolos!

Cùm stipendia faceret Cato major , in agmine ferebat ipse arma sua. Servus eum unus sequebatur , qui cibaria portabat , cui quidem prandium aut cœnam quamlibet apponenti numquam succensuisse dicitur , turpissimum esse existimans cum servis ventris causâ rixari : imò eum ipse , expletis militaribus muneribus , sæpius adjuvit ad coquendos & parandos cibos. In pace reversus ad villam , iisdem , quibus servi , operibus vacabat , eidem cum illis mensæ accumbebatur , eodem vescabatur pane , atque idem bibebat vinum. In multis aliis rebus tam benignum in servos herum agebat , ut illi abique prædicarent magnam ejus moderationem , assiduos labores , tacetè aut graviter dicta.

Unum tamen fuit in quo Catonis desiderabatur humanitas. Nempe servos , ubi consensissent , venundandos putabat , neque alendos inutiles. Quod quidem quid aliud erat , quam servis , sicut jumentis , abuti ? Atque existimare nullam homini cum homine intercedere societatem , nisi quæstus causâ. Ego vero , inquit Plutarchus , ne bovem quidem operarium velim domo abigere ob senium , & pecuniolâ aliquâ venundare , nedum hominem. Exercendâ enim mansuetudine erga bruta animantia assuefacere nos debemus benignitati in homines , quæ latius certè patet quàm constituta legibus iustitia.

---

## C A P U T X X V I I I.

### *Servorum in dominos fides.*

- I. **S**ERVI qui domino clementi & benigno usi fuerant , pro domino parati erant porri-

gere cervicem , & periculum ei imminens in se ipsos avertere. Illi quorum nos non consuebatur , sed quibus sermo erat non solum coram dominis , verum etiam cum ipsis , in tormentis tacebant

C. Plotius Pancerus à Triumviris Antonio , Lepido , & Octavio proscriptus , latebat. Ab iis , qui latentem quærebant , comprehensi serviejus , multum ac diu torti negabant se scire ubi dominus esset. Non sustinuit Plotius tam fideles tamque boni exempli servos ulterius cruciari , sed processit in medium , jugulumque gladiis militum objecit. Hoc mutuae benevolentiae inter servos & dominum certamen facit , ut dignus videatur fuisset dominus , qui tam constantem servorum fidem experiretur ; & digni servi , qui tam iusti domini misericordiae quaestionis sævitiâ liberarentur.

2. M. Antonius , orator clarissimus , turpis flagitii accusabatur ab inimicis , qui postulabant ad quaestionem ejus servum quem testem & confcium flagitii fuisse contendebant. Dominum vehementer propterea sollicitum ultro hortatus est servus , ut se iudicibus torquendum traderet : affirmans nullum ore suo verbum exiturum , quo causa ejus læderetur. At promissi fidem mirâ patientiâ præstitit. Plurimus enim laceratus verberibus , equuleoque impositus , cadentibus etiam laminis uestus , à domino periculum silentio suo avertit.

3. Quam admirabilis fidei servus Panopionis fuit ! Qui cum cognovisset advolare milites ad occidendum dominum suum , qui fuerat proscriptus ; commutatâ cum eo veste , illum post se clam emisit , se autem in cubiculum aclectum domini recepit , & ut Panopionem occidi passus est.

Servus barbarus dominum suum ab Asdrubale occisum fuisse graviter ferens ; eum subito aggressus , interemit. Cum comprehensus omnimodo cruciaretur , lætitiâ tamen , quam ex vindictâ ceperat , in ore constantissimè retinuit.

## CAPUT XXIX.

*Omnes omnium charitates patria complectitur.*

1. **IUSTITIA**, ut ante dictum est, versatur in communi societate tuenda, tribuendoque suum cuique. Quoniam verò varii sunt necessitudinum gradus in ea, quæ latissimè patet, omnium hominum inter se societate, suntque officia quæ aliis magis, quàm aliis, debeantur: si quæretur, quibus plurimum tribuendum sit officii; principes sint Patria, & parentes, quorum beneficiis maximis obligati sumus: proximi, liberi, totaque domus quæ spectat in nos solos, neque aliud ullum potest habere perfugium: deinceps, propinqui, amici.

Omnium societatum nulla carior, quam ea quæ cum republica est unicuique nostrum. Cari sunt parentes, cari liberi, propinqui, familiares, sed omnes omnium charitates patria una complexa est, pro qua quis bonus dubitet mortem ppetere si ei sit profuturus?

2. Vitæ brevis est cursus, gloriæ sempiternus. Cum sit omnibus definita mors optandum est, ut vita potius patriæ donata, quàm reservata naturæ, videatur.

Ego ne immortalitatem quidem accipiendam putarem contra patriam: & eos qui pro republicâ vitam reddiderunt, nunquam mortem potius, quàm immortalitatem, affecturos putavi.

Quò sis, Africane, alacrior ad tutandam rempublicam, sic habeto: omnibus, qui patriam conservaverint, adjuverint, auxerint, certum esse in cælo & definitum locum, ubi beati ævo sempiterno fruantur.

3. Sic nos patria nostra delectat, ut sapientissimus vir Ulysses immortalitati anteponeret Ithacæ.



eam illam, in asperrimis saxulis tanquam nidulum affixam.

Nescio quâ natale solum dulcedine cunctos  
Ducit, & immemores non finit esse sui.

## C A P U T   X X X.

*Dulce & decorum est pro patria mori.*

1. **C**um Attica regio ferro ignique vastaretur à Doriensium exercitu, rex Atheniensium Codrus, suis sociorumque viribus disfidens, ad Apollonis Delphici oraculum confugit, perque legatos sciscitatus est, quonam modo tam grave bellum averti posset. Respondisse Deus fertur, ita finem ei fore, si rex ipse hostili manu caderet. Quod cum percubisset, edicere Dorienses, ne quis Codri corpus vulneraret. At ille, depositis imperii insignibus, gregarii militis cultum induit, tum pabulantium hostium globo sese obiciens, unum ex his, quem falce percusserat, in cædem suam compulsi. Cognito regis corpore, Dorienses sine prælio discessere. Atque ita Athenienses virtute ducis, pro salute patriæ se morti offerentis, bello liberati sunt. Quis Codrum non miretur, qui iisdem artibus mortem quælierit, quibus vita ab ignavis quæri solet?

2. Apud Romanos sanguinem liberorum ac suum patriæ impendit L. Junius Brutus, cujus historia videtur altius repetenda. Hic cum fratrem suum & Primores urbis à Tarquinio superbo avunculo suo interfectos audisset, statuit nihil in fortuna sua concupiscendum. Itaque stultitiam simulans, & bona sua prædæ esse regi finens, haud abnuitt cognomen Bruti. Ab duobus Tarquinii filiis proficiscentibus Delphos ascitus, ut ludibrium potius esset, quàm comes, fertur tulisse donum Deo Apollini baculum aureum  
lignæ

Ægæo cavato inclusum, quæ erat effigies ingenii sui. Cum regii juvenes peregissent mandata Tarquinii, consulto oraculo de prodigio quod in regia nuper acciderat; cupido incessit eos sciscitandi Apollinem, ad quem regnum Romanum esset venturum postea. Hanc ex imo specu redditam esse vocem ferunt: *Qui primus vestrum, ô juvenes, tulerit osculum matri: is imperium summum Romæ habebit.* Duo Tarquinii permiscere forti, uter eorum prior matri osculum daret, cum Romam redissent Brutus ratus oraculis responsum alio spectare, terram osculo contigit, quod ea communis mater omnium mortalium esset.

Tarquinio Superbo cum omni familia postea ejecto ex urbe maximè operâ L. Junii Bruti, primi Romæ Consules creati sunt ipse L. Junius Brutus, & I. Tarquinius Collatinus. Ceterum ut Romanis auctor libertatis fuerat Brutus, ita custos fuit. Erant in Romana juventute adolescentes aliquot, nec ii tenui loco orti, quorum libido solutior fuerat regnante Tarquinio, æquales & sodales adolescentium Tarquiniolorum: assueti & ipse regio more vivere. Hi pristinam vitæ licentiam quærentes, nefarium iniere consilium de accipiendis clam nocte in urbem Tarquiniiis: & assumpsere in societatem sceleris ipsos Bruti liberos Titum Tiberiumque.

Cum conjurati de inito consilio inter se agerent, remotis, ut putabant, arbitris, sermonem eorum unus ex servis excepit, & præterea litteræ, quas ad Tarquinos scripserant, deprehensæ, rem coarguunt. Proditores extemplo in vincula conjecti sunt, deinde damnati. Consules in sedem processere suam: missique lictores ad sumendum supplicium, nudatos juvenes virgis cæciderunt, securique percusserunt; cum interea omnium oculi conjecti essent in vultum Bruti patris, qui ejus supplicii exactor erat, cujus spectatorem esse eum ingentia liberorum caritas

minimè pati videbatur. At ille patris personam exiit, ut Consulis retineret: maluit orbus vivere, quam publicæ vindictæ deesse: &

Vicit amor patriæ, laudumque immensa cupido.

Ubi Tarquinius viam dolo obseptam vidit ad regnum repetendum bello apperto rem aggressus est. Obviam hosti Consules eunt, Valerius Consul peditem ducit. Brutus cum equitatu antecedit. Præerat hostium equitibus filius regis Aruns Tarquinius; qui ut Brutum agnovit, inflammatus irâ: *ille est vir*, inquit, *qui nos expulit patria. Ipse in illa nostris decoratus insignibus magnificè incedit. Dii regnum ultores ades!* Concitât calcaribus equum, atque in ipsum Consullem dirigit. Sensit in se iri Brutus; & avidè se certamini obtulit. Adeo infectis animis concurrunt, ut uterque lanceâ transfixus ex equo lapsus sit. Valerius Bruto collegæ funus, quanto potuit apparatu, fecit. Sed majus mortî Bruti decus fuit publica mœstitia, maximè matronarum, quæ cum, ut parentem, per annum integrum luxerunt, quod tam acer ultor fuisset violatæ in Lucretia pudicitia.

## C A P U T X X X I.

*Deciorum pro patria devotiones.*

CONSULIBUS Decio & Manlio Româ profectis, C ad bellum adversus Latinos gerendum, dicitur visa esse utrique per noctem species humana, major angustiorque viri, dicentis: *Ex una acie imperatorem Diis inferis deberi, ex altera exercitum: & victoriam fore ejus exercitûs & populi, cujus imperator devovisset legiones hostium, & se super eas.* Ubi Consules contulerunt inter se hos visus nocturnos, placuit primum victimas cædi, avertendæ Deorum iræ causâ: deinde statuerunt, ut ille Consul se pro populo Romano de-

voveret, ab cuius cornu cedere Romanus exercitus cœpisset. Manlius dextro, Decius lævo, cornu præerat. Primò utrimque æquis viribus, & eodem ardore animorum res gerebatur. Deinde ab lævo cornu Romani non ferentes impressionem Latinorum, pedem referre cœperunt. In hac trepidatione, Decius Consul solemnia devotionis verba pronunciavit, præeunte M. Valerio Pontifice, armatus in equum insiluit, ac se in medios hostes immisit, patriæ salutem, sibi vero mortem, petens. Quacumque equo investus est, eò secum pavorem ac terrorem tulit. Postquam verò corruit obrutus telis, tum Latini latè fugam fecere. Sic ille voluntariâ morte magnam Romanis victoriam peperit. Manlius lacrimis & laudibus debitis profecutus est tam memorabilem collegæ interitum. Decii corpus postero die inventum est inter maximam hostium stragem, coopertum telis: funusque ei par morti est factum.

Tam egregium exemplum æmulatus est bello adversus Gallos Decii filius. Nam in quarto consulatu, paternis vestigiis insitens, erexit ac restituit labentes ac propè perditas urbis Romanæ vires simili devotione & pari exitu.

Denique bello contra Pyrrhum regem, tertius P. Decius se tertiam victimam reipublicæ præbuit, à patrio avitoque in patriam amore non degener.

---

## C A P U T X X X I I.

*Divitiæ in patriam impensæ.*

**D**ONI quidem magnitudo facit ut gratum sit; gratius tamen est, licet parvum, si opportunè detur. Hinc oportunitas liberalitatis Q. Fabii Maximi fecit eum ad hoc usque tempus laudabilem, ob parvam pecuniæ summam tot ante sæcula erogatam patriæ causâ. Captivos Romanos ab Annibale Carthaginensium duce rece-



perat, interpositâ pacione nummorum. Qui cum à Senatu non solverentur, missio in urbem filio, fundum, quem unicum possidebat, vendidit: ejusque pretium Annibali protinus numeravit, parvum quidem, ut pote è septem agelli jugeribus redactum, sed omni pecuniâ majus, si æstimeretur animo erogantis. Se enim carere patrimonio, quam patriam fide, maluit.

Ejusdem temporis scœmina Appuliæ ditissima, Busa nomine, Romanos, qui è Cannensî clade supererant, benignissimè alimentis sustentavit. Salvo tamen statu fortunarum suarum, munificam se populo Romano præstitit: Fabius in honorem patriæ ex paupere inops factus est.

## C A P U T   X X X I I I .

### *Inimicitie publicæ utilitatis causâ depositæ.*

1. **M**. ÆMILIUS Lepidus bis Consul, Pontifex maximus, gravitateque vitæ par splendori honorum, gessit diutinas ac vehementes inimicitias cum Fulvio Flacco ejusdem amplitudinis viro: quas, statim atque Censores simul renunciati sunt, deposuit: existimans non oportere eos, qui publicæ juncti essent potestati, privatis odiis dissidere. Id judicium Lepidi & præsens ætas comprobavit, & veteres annalium scriptores nobis laudandum tradiderunt.

2. Noluerunt quoque ignotum esse posteritati Livii Salinatoris illustre consiliam finiendarum, patriæ causâ, similitatum. Is namque, etsi Neronis odio ardebat, cujus præcipuè operâ in exilium ierat, tamen ubi ei collega in Consulatu est datus, sibi imperavit oblivisci & ingenii sui, quod erat acerrimum, & injuriæ, quam gravissimam acceperat: ne, pertinacem se exhibendo inimicum, malum Consulem ageret. Hæc mentis inclinatio ad tranquilliores habitum, plurimum

profuit ad salutem urbis atque Italiæ in difficili temporum articulo: quia pari virtutis impetu connisi duo Consules terribiles Pænorum vires contuderunt.

3. Cùm P. Scipioni Africano duo Q. Petillii diem dixissent; Tribunus plebis eo tempore Tib. Sempronius Gracchus erat: cui inimicitæ cum P. Scipione intercedebant. Tristem omnes ab eo sententiam expectabant. At ille dixit: *Se non passurum P. Scipionem absentem accusari: & cùm rediisset, auxilio ei futurum, ne causam diceret.* Multa deinde addidit de insignibus inimici sui meritis in patriam. Movit oratio Gracchi, non ceteros modò Tribunos, sed ipsos etiam accusatores: & Senatu habito, gratiæ ingentes ab uni-  
ve so ordine Tib. Graccho actæ sunt, quòd rem-  
publicam privatis simultatibus potio-rem habuisset: Petillii verò vexati sunt probris, quòd splendere alienâ invidiâ voluissent. Silentium deinde de Africano fuit.

---

#### C A P U T X X X I V.

*Patriæ irasci nefas est.*

**U**T parentum, sic patriæ sævitia, patiendæ ac ferendo lenienda est.

Suorum injurias civium patienter ferebat Epaminondæ, quod se patriæ irasci nefas esse duceret. Cùm aliquando eum propter invidiam Thebani noluis-  
sent præficere exercitui, delectus erat dux alius imperitus belli, cujus errore res ed deducta fuerat, ut omnes de salute exercitûs per-  
timescerent, quod locorum angustiis clausus, ab hostibus obsidebatur. Tum desiderari cœpta est Epaminondæ diligentia, qui tunc miles sine ullo imperio erat. Cùm ab illo opem petissent sui, nullam retinuit memoriam acceptæ contumeliæ, & exercitum obsidione liberatum domum reduxit.

incolumen. Neque verò hoc semel fecit, sed sæpius.

Aristides Athenis, Camillus Româ, ejecti in exilium, longè alio animo patriæ injuriam tulere. Ille enim urbe egrediens, Deos oravit ne unquam Athenienses opera sua indigerent. Hic contra dicitur ab Diis precatus esse, ut, si sibi innoxio injuria fieret, desiderium sui facerent ingratae patriæ quamprimum. Idem tamen non multo antè tempore digniora bono cœve vota fecerat. Nam captus Veiiis, urbe opulentissimâ, manus ad cœlum tollens, precatus erat, ut, si cui Deorum nimia sua populique Romani fortuna videretur, liceret eam invidiam lenire suo privato incommodo potius, quàm publico populi Romani. Et cum deinde, Roma à Gallis obsessâ, missus ad Camillum exulem Cædicius, eum dicti rorem creatum esse nunciasset, cohortarique cœpisset, ne injuriæ à patria illatæ reminisceretur; ille, interrupto sermone Cædicii; *Numquam*, inquit, *à Diis precatus essem, ut mei desiderium Romanis facerent, si ejusmodi illorum desiderium futurum esse existimassetem. At nunc æquiora à Diis postulo: mea ut opera tantam patriæ utilitatem afferant, quanta est ea, quâ nunc premitur, calamitas.*

Vide infra Coriolani iram in patriam, cap. 37; & Q. Fabii Maximi patientiam, l. 4.

## C A P U T X X X V.

*Fundamentum est omnium virtutum pietas in parentes.*

1. **P**RIMA & optima pietatis in parentes magistra est natura. Hæc nullo vocis ministerio, nullo usu litterarum indigens, propriis viribus caritatem parentum pectoribus liberorum tacitè infundit.

Parentes carissimos habere debemus, quòd ab iis nobis vita, patrimonium, libertas, civitas tradita est.

Beneficiorum maxima sunt ea quæ à parentibus accipimus, dum aut nescimus aut nolumus. Parentes cogunt teneros infantes ad salubrium rerum patientiam. Flentium ac repugnantium corpora diligenti curâ tovent, & ne membra in prævum detorqueantur, constringunt. Mox liberalia studia inculquant, adhibito timore nolentibus. Juventam frugalitati, pudori, moribus bonis applicant coactam, si non obsequantur libenter. Adolescentibus quoque vis adhibetur & servitus, si remedia per intemperantiam rejiciunt.

2. Quisquis in vita sua parentes colit, hic & vivus & defunctus Diis carus est. Contra contemptus parentum, ejus generis peccatum est, quod & ab hominibus odio habetur, & in viventibus ac mortuis à Diis damnatur ac punitur.

Ea caritas quæ est inter natos & parentes, dirimi, nisi detestabili scelere, non potest.

Facile intelligo liberos non modò reticere parentum injurias, sed etiam æquo animo ferre, oportere.

Adolescentulus quidam Zenonis scholam diu frequentaverat. Reversum in paternas ædes interrogavit pater, quid tandem sapientiæ didicisset? Ille rebus ipsis se offensurum respondit. Indignante autem patre, & verbera ipsi ingerente; ille quietus permanens, & patienter ferens: *Hoc*, inquit, *didici iram patris æquo animo ferre.*

3. Quæri solitum est in Philosophorum scholis, an semper atque in omnibus patri parendum sit. Certè in plurimi parendum est, in quibusdam non obsequendum. Omnia enim quæ in rebus humanis fiunt, sicut docti sensuerunt, aut honesta sunt, aut turpia. Quæ suâ vi recta honestaque sunt, ut fidem colere, ut patriam defendere, ea fieri oportet, siue imperet pater, siue non imperet. Sed quæ his contraria, quæque turpia, & omnino iniqua sunt; ea, ne si imperet quidem, facienda sunt. Illa tamen ipsa in



quibus obsequi patri imperanti non oportet, leniter & verecundè declinanda, sensimque relinquenda sunt, potiùs quàm respuenda.

Agésilæus, patre iubente ut in quodam iudicio sententiam legibus adversam ferret: *A te, inquit, mi pater, jam inde à pueritia edoctus sum legibus parere. Itaque etiam nunc tibi obtemperabo, nihil in leges peccando.*

4. Talem erga parentes te præsta, quales optares se tibi tuos liberos exhibere.

Si liberi parentibus nati sint humilibus, si propinquos habeant imbecilliores vel animo vel fortuna, eorum, cum poterunt, augeant opes, eisque honori sint. Fructus enim ingenii, fortunæ, omnisque præstantiæ maximè tum capitur, cum in proximum quemque confertur.

Omnes homines palàm prædicant primùm Diis, deinde parentibus, honorem deberi natura & legibus: neque liberos quicquam gratius Diis facere posse, quàm si benigne & alacriter cum fœnore gratias referant iis à quibus geniti educatique sunt. Contrà verò nullum esse majus imperatis argumentum, quam contemptum & neglectiorem parentum. Itaque interdictum est nobis, ne quid mali aliis faciamus: injustum autem & impium habetur non semper patri ac matri ea dicere & facere quibus latentur.

## C A P U T   X X X V I.

*Patres à liberis periculo liberati.*

1. **C**UM captum atque incensum est Ilium; Græci Trojanorum fortunas miserati, hoc maximè dignum gentis suæ humanitate pronunciari per prælonem iusserunt: *Ut singuli è liberis civibus secum auferrent in humeros sublatum id unum quod putarent inter res suas præcipuè servare.*

*2um.* Statim Æneas Deos patrios humeris imposuit, cætera negligens. Hac pietate capti Græci, permiscere ipsi etiam alteram rem asportare. Tum ille Diis alterum onus addidit patrem suum Anchisem senio confectum. Quo facto mirum in modum obstupefacti Græci, Æneæ sua omnia restitui voluerunt: ita declarantes, illos etiam qui hostes sunt, & jure belli in victos uti possunt, mansuescere & misericordiâ moveri in eos qui Deos & parentes reverenter colunt.

*2.* Cræso Lydiorum regi opulentissimo filius fuit, formâ quidem & ingenio præstans, sed naturâ mutus diu existimatus, quoniam cum jam multum adolevisset, nihil tamen fari poterat. Ad emendandum hoc linguæ vitium cuncta expertus est pater, dum secundæ ejus res erant: at nihil omnino medicorum artes profuere. Cum vero Sardes, urbem regiam, expugnasset Persarum exercitus, & in Cræsum districto gladio irruens quidam miles, eum sibi ignotum jamjam occisurus videretur: vitæ patris timens pius adulescens, & oblitus quid sibi nascenti natura denegasset, os diduxit, & clamare nitens, solvit linguæ vincula, atque in has voces erupit: *Ne occidas Cræsum, miles.* Sic à patris capite depulsa mors fuit beneficio filii, qui & ipse suo in patrem amore consecutus est, ut per reliquum vitæ tempus vocalis esse posset, ac planè articulatèque loqui.

*3.* Cum, seditione inter Macedonas milites & Græcos mercenarios ortâ, rex Philippus gravi vulnere percussus esset, & ex equo dejectus, profuit ante omnes Alexander, annum tunc septimum decimum agens, jacentem clypeo suo protexit, ruentesque in eum multos sua manu occidit. Cum graviter postea ferret Philippus, quod propter vulnus, quo tum femur transossus fuerat, claudicare cogeretur; verè & scitè dixit ei Alexander: *Non debere eum irasci vulnere, quo*

*virtutis bellicæ memoria revocaretur , quoties pedem moveret.*

4. Eadem pietas virili robore armavit P. Scipionem, qui deinde Africanus est dictus, ad opem patri in acie ferendam, cum vix puerilitatis annos egressus esset. Nam eum Consulem pugnante cum Annibale apud Ticinum fluvium, & graviter saucium, servavit intercurfu suo. Neque illum aut ætatis infirmitas aut militiæ tirocinium interpellavit, quominus laudem sequeretur rapti ex ipsa morte patris & imperatoris.

5. L. Manlium plebi Romanæ invisum multa fecerant: acerbitas in habendo militum delectu ad bellum, ingenium atrox, cognomen imperiosi ab ipso ascitum ad ostentationem sævitæ. Itaque ubi primum Dictaturâ abiit, diem ei dixit ad populum M. Pomponius, Tribunus plebis. Crimini inter cetera dabat, quod ab hominibus relegasset, & ruri inter servos ac pecudes habitare cogeret Titum filium, (cui postea Torquati cognomen fuit) adolescentem nullius probri compertum, sed tantum linguâ impromptum.

Ægrè passus Titus se causam esse hujus adversus parentem criminationis, capit consilium rudis quidem atque agrestis animi, sed pietate in patrem laudabile. Nescientibus cunctis, gladio succinctus noctu Romam acurit, & prima luce Pomponii domum venit: janitori, opus sibi esse domino ejus extenplò convento, ait, eique nunciari jubet Titum Manlium Lucii filium adesse. Tribunus, cui spes erat juvenem irâ percutum in patrem aliquid novi criminis afferre, eum statim, remotis arbitris, admittit. At ille, ut est ingressus, gladium distringit, & super lectum jacentis Pomponii stans ferro intento, se eum transfixurum minatur, nisi jurejurando confirmet, se ab instituta adversus L. Manlium accusatione recessurum. Tribunus gladium ante oculos micantem cernens, seque solum atque

inermem cum juvene prævalido & feroce, juravit iis verbis, id quæ adactus est à Tito: rem ad populum detulit, docuit, cur sibi ab incepto desistere necesse esset, Manlium patrem missum fecit. Tantùm temporibus illis jusjurandum valebat.

Maluisset quidem Romana plebs sibi potestatem fieri ferendi suffragii de tam crudeli & superbo reo, quem oderat: verum tamen non ægrè tulit filium id pro patre autum esse: & ejus factum usum est eo laudabilius, quod aulescentis animum a erbitas patria nihil à pietate averrisset. Itaque ut laus virtuti honos suum præmium, esset; eo anno secundum inter sex Tribunos militares locum consecutus est T. Manlius, licet nullis præclarè factis cognitus, ut qui rure, & procul à cœtu hominum juventam egisset.

---

## CAPUT XXXVII.

### *Pietas liberorum in matris.*

1. **C.** Martius, cui capta urbs Corioli fecit cognomen Cariolani, patre orbatu adhuc puer, sub matris tutelâ adolevit. Sortitus erat à natura nobiles ad laudem impetus: sed quia doctrina non accessit iræ impotens, obstinataque pervicaciæ, fuit: & exemplo suo confirmavit, generosam indolem, si liberali institutione careat, edere multa simul cum virtutibus vitia, sicut secundum naturâ agrum, qui excultus non fit. Quoniam invictum voluptate? pecuniâ, labore animum gerebat, ejus continentia, justitia, fortitudo prædicabantur: at præservida ira, asperi mores, & parum civilis congressus, graviter ferebantur. Hunc autem mortales maximum fructum ferunt è Musarum disciplinâ, ut molliatur mansuescatque eorum ingenium, & si quid ferum natura indidit, exuat.



Scilicet ingenuas didicisse fideliter artes  
Emollit mores , nec finit esse feros.

Nemo adeo ferus est, ut non mirefcere possit,  
Si modò culturæ patientem cominodet aurem.

Cum prima stipendia facere cœpisset adoles-  
cens ; è multis præliis , quibus interfuit , nun-  
quam rediit , nisi donatus coronâ aliove militari  
præmio. Commilitonibus ejus bellicæ virtutis  
finis erat gloria ; illi verò finis gloriæ gaudium  
matris. Nam ubi illa audivisset ipsum laudari ,  
& donari vidisset coronâ , & præ lætitiâ lacry-  
mans esset complexa : id sibi summo honori feli-  
citatique ducebat esse. Sic Epaminondas dicebat  
nihil sibi unquam jucundius feliciusque conti-  
gisse , quàm quòd patrem & matrem habuisset  
testes ac participes partæ Leuctricâ pugnâ gloriæ.  
Coriolanus , ut uni matri rependeret gratiam  
quàm utrique parenti debebat , eâ oblectandâ &  
colendâ satiari non poterat. Illâ cupiente atque  
orante , uxorem duxit : illius in ædibus , natis  
jam liberis , cum uxore habitavit.

Post multa in patriam merita iudicio populi  
damnatus Coriolanus , in Volscos exulatum abiit,  
militans patriæ , hostilesque jam tum spiritus  
gerens. Venientem Volsci benignè excepere , &  
usus est hospitio Attii Tulli , qui princeps Vols-  
corum erat , Romanisque fuerat semper infectus.  
Itaque cum alternum vetus odium alterum re-  
cens ira stimularet ; brevi effecerunt , ut lege-  
rentur Imperatores ad bellum adversus Romanos  
gerendum.

Coriolanus expugnatis non paucis Romano-  
rum oppidis , castra posuit quinque milla pas-  
suum ab urbe , agrumque Romanum est popula-  
tus. Milli Româ ad eum Oratores de pace , atrox  
respensum retulerunt. Iterum deinde missi , ne  
in castra quidem admissi sunt. Sacerdotes quoque  
suis infulis velatos , isse ad eum supplices tra-  
ditur , & nihil magis flexisse animum , quàm  
legati

legati flexerant. Tum Matronæ coeuntes pervicerunt, ut Veturia Coriolani mater, exactâ ætate mulier, & Volumnia uxor, duos parvos ex Marcio filios ferens secum, in castra hostium irent cum frequenti mulierum comitatu, & eam urbem precibus lacrymisque defenderent, quam viri armis non poterant. Ubi ad castra ventum est, nunciatumque Coriolano, adesse ingens mulierum agmen; qui motus non fuerat nec publica majestate in legatis, nec religione in sacerdotibus, multo obstinatioer erat adversus muliebres lacrymas. At ut matrem aspexit: *Expugnasti,* inquit, *& vicisti iram meam, & Patria admotis matris meæ precibus cui tuam in me injuriam condono!*

Continuòque Romanum agrum hostilibus armis liberavit.

2. Prætor tradidit Triumviro necandam in carcere mulierem sanguinis ingenui, capitali crimine damnatam. Is qui custodiæ præerat, misericordia motus, non eam protinus strangulavit. Dedit quoque aditum ad eam filiæ, sed diligenter excusæ, ne quid cibi inferret. Existimabat enim futurum, ut inediâ consumeretur. Cum autem jam dies plures effluxissent, miratus quòd tandiù viveret, curiosius observatâ filiâ, animadvertit illam exerto ubere lenire famem matris lactis sui subsidio. Quæ res tam admirabilis ad Judices perlata, impetravit matri remissionem pœnæ. Nec tantum matris salus donata est filiæ pietati, sed ambæ perpetuis alimentis sustentatæ sunt, publico sumptu, & carcer ille consecratus est, extructo ibi pietatis templo. Quò non penetrat, aut quid non cogitat pietas? Quæ novam rationem invenit genitricis servandæ in carcere. Quid tam inusitatum atque inauditum, quàm matrem natæ uberibus alitam fuisse? Putaret aliquis hoc contra naturam factum esse, nisi prima naturæ lex esset diligere parentes.

Filia alia, cui nomen Pero, admovit velut in-

fantem pectori suo, atque aluit patrem suum, grandi ætate senem, qui in custodiam traditus fuerat.

## C A P U T X X X V I I I.

*Parricidium scelerum omnium maximum est.*

1. **P**ARRICIDIUM, nefarium facinus est, atque ejusmodi ut eo uno maleficio scelera omnia comprehensa esse videatur. Enim si ( id quod præclare à sapientibus dicitur ) vultu sæpè læditur pietas; quod supplicium satis acre reperietur in eum, qui mortem attulerit parenti, pro quo mori ipsum jura divina atque humana cogebant, si res postularet?

Portentum atque monstrum est, esse aliquem humana specie & figura, qui tantum vicerit bestias immanitate, ut eos indignissimè luce privaret, per quos hanc suavissimam lucem aspexerat: cum partus atque educatio etiam feras inter sese conciliet.

2. Aiunt Clœlium quemdam Terracinensem, cum cœnatus isset cubitum in idem conclave cum duobus adolescentibus filiis, inventum esse manè jugulatum. Quoniam nec servus quisquam, nec liber reperiebatur, in quem facinoris suspicio caderet; ea autem ætate filii propè patrem cubantes ne sensisse quidem se dicebant: nomina filiorum de parricidio delata sunt. Parum enim verisimile videbatur, quemquam ausum esse committere se in id conclave, eo potissimum tempore cum ibidem essent duo adolescentes filii, qui facillè possent & sentire & defendere. Tamen cum Judicibus planum esset factum, aperto ostio repositos esse eos dormientes; iudicio absoluti sunt, & omni suspicione liberati. Nemo enim putabat, quemquam esse, qui somnum statim capere posset post perpetratum parricidium; propterea

quòd qui tantum facinus commiserunt , non modò non possunt quiescere sine curâ , sed ne spirare quidem sine metu.

3. Civitas Atheniensium prudentissima fuisse traditur. Ejus porrò civitatis sapientissimum Solonem ferunt fuisse , qui leges illis scripsit. Is cùm interrogaretur , cur nullum supplicium constituisset in eum qui parentem necasset ; respondit : *Se id neminem facturum putasse*. Sapienter fecisse dicitur , cùm nihil sanxerit de illo scelere , quod antea commissum non erat ; ne non tam prohibere videretur , quàm ostendere committi posse. Quanto sapientius majores nostri fecere ? Qui cum intelligerent nihil esse tam sanctum , quod non aliquando violaret audacia ; supplicium in parricidas singulare excogitaverunt , ut ii , quos natura ipsa non potuisset in officio retinere , magnitudine pœnæ submoverentur à maleficio. Insui voluerunt in culeum vivos , atque ita in flumen dejici. O singularem sapientiam ! Nonne videntur hunc hominem ex rerum naturâ abstulisse & eripuisse cui repente cœlum , solem , aquam terramque ademerunt , ut , qui eum necasset , unde ipse natus esset , careret iis omnibus rebus , ex quibus omnia nata esse dicuntur.

Persæ , si quis patrem necasset , eum non genuinum filium existimabant , sed subditum. Quia alienum à naturâ videbatur , & parum credibile , ut certus parens à justis liberis interimeretur.

## C A P U T   X X X I X.

*Nihil dulcius hominum generi , quàm liberi.*

1. **P**ERSPICUUM est à natura ipsa impellinos , ut eos , quos genuerimus , amemus.

Nonne bestię pro suo partu ita propugnant , ut vulnera excipiant , & nullos hominum impetus , nullos ictus reformident ? Si feræ partus



suos diligunt , quâ nos in liberos nostros indulgentia esse debemus ?

Quid dulcius hominum generi à naturâ datum est , quàm sui cuique liberi ? Incertum est quam longa cuiusque nostrum vita futura sit. Consulere itaque & prospicere vivi debemus , ut illorum solitudo & pueritia quam firmissimo præsidio munita sit.

2. Pater nullum clarius potest relinquere monumentum sui , quàm si filium relinquat effigiem morum suorum , virtutis , constantiæ , pietatis ingenii.

Ad filium hereditas paternæ gloriæ & factorum imitatio pertinet.

Optima hereditas omnique patrimonio præstantior à patribus traditur liberis gloria virtutis rerumque gestarum : cui dedecori esse , nefas & impium judicandum est.

3. Nemo liberorum gratiâ pecuniis cumulandis incumbat , ut ditissimos eos relinquat. Id enim nec ipsis nec patriæ condacit. Census juvenum optimus is est qui eos non reddit obnoxios adulatoribus , & sufficit rebus necessariis. Liberis ergo non multum auri , sed pudoris , oportet relinquere.

Parentes liberis plerumque bono animo male precantur. Si vis esse felix , Deos ora ne quid tibi eveniat ex his quæ optantur tibi. Ea non sunt bona , quæ isti in te volunt congeri , divitiæ , honores , imperia. Unum bonum est , quod beatæ vitæ causa & firmamentum est , virtus. Fac ipse te felicem. Facies autem , si virtutem colueris.

## C A P U T X L.

*Liberi patriæ causâ bene instituendi.*

1. **V**ERREM graviter objurgat Cicero , quòd Prætor in Sicilia filium flagitiis suis inte-

resse passus erat. Tunc, cum te ac tuam vitam nosset in Siciliam tecum grandem filium ducebas? Ut etiam si natura puerum à paternis vitiis abduceret, consuetudo tamen & disciplina dissimilem tui esse non sineret. Fac enim fuisse in isto C. Lælii & M. Catonis indolem: quid ex eo boni sperari atque effici potest, qui nullum unquam patris pudicum neque sobrium convivium videret? Qui adultâ ætate per triennium inter impudicas mulieres & intemperantes viros in epulis quotidianis versatus sit: nihil unquam à patre audierit, quo pudentior aut melior esset. Quibus in rebus non solum filio, sed etiam reipublicæ, fecisti injuriam. Susceperas enim filios non solum tibi, sed etiam patriæ: qui non modò tibi voluptati, sed etiam qui aliquando usui reipublicæ, esse possent. Eos instituere atque erudire debuisti ad majorum instituta & ad civitatis nostræ disciplinam, non ad tua flagitia atque ad tuas turpitudines. Effet ex inerti atque impuro & improbo parente natus & pudens & probus filius. Nunc pro te Verrem alterum substituiisti civitati.

2. Pelopidas, qui filium habebat infamem, Epaminondam reprehendebat, quòd uxorem non duxicet: illumque malè reipublicæ consulere dicebat, qui liberos non relinqueret. *Vide, inquit Epaminondas, ne tu patriæ pejus consulas, qui talem ex te natum relicturus sis. Mihi verò stirps deesse non potest: namque ex me natam relinquo pugnam Leuctricam quæ non modò mihi superstet, sed etiam immortalis, futura est.*

Gratum est, quod patriæ civem populoque dedisti,

Si facis ut patriæ sit idoneus, utilis agris, Utilis & bellorum & pacis rebus agendis.

Plurimum enim intererit quibus artibus & quibus hunc tu

Moribus instituas.

## CAPUT XLI.

*Maxima debetur puero reverentia.*

**P**LURIMA sunt. . . . famâ digna sinistrâ ;  
Quæ monstrant ipsi pueris traduntque parentes.

Sic natura jubet : velocius & citius nos  
Corrumpunt vitiorum exempla domestica.  
Nil dictu fœdum visuque hæc limina tangat.  
Intra quæ puer est.

Maxima debetur puero reverentia. Si quid  
Turpe paras, ne tu pueri contempseris annos :  
Sed peccaturo obstitat tibi filius infans.

Utinam liberorum nostrorum mores non ipsi  
perderemus. Infantiam statim deliciis solvimus.  
Mollis illa educatio , quam indulgentiam vocamus ,  
nervos omnes & mentis & corporis frangit.  
• Quid non concupiscet cum adoleverit , qui in  
cunis purpureis vagierit ! In lecticis crescunt : si  
terram pedibus attigerint è manibus utrinque  
sustinentium pendent. Gaudemus, si quid licentius  
dixerint , risu & osculo excipimus verba ingenuis  
indigna. Nec mirum videri debet : nos docuimus ,  
ex nobis audierunt. Omne convivium obscenis  
canticis strepit : pudenda spectantur. Fit ex his  
consuetudo , deinde natura. Discunt hæc miseri ,  
antequam sciant vitia esse.

Adolescentium indolem non tam juvant quæ  
benedicta sunt , quam inficiunt quæ pessimè : multo  
que magis , si plura sint quæ deteriora sunt.

## CAPUT XLII.

*Salubriter institui plurimum prodest in reliquam  
vitam.*

1. **P**HILIPPUS, cujus virtute atque industriâ  
Macedones locupletissimo imperio aucti

sunt, nunquam inter negotia bellica alienus fuit à Musis & litteris. Erat ei plena acuminis & solertię oratio quā non minores res quā præliis, confecit: ipseque pluris æstimabat victorias, verbis partas, quā armis. Extant libri epistolarum ejus plenarum & venustatis & prudentiæ: è quibus una brevis è Græco in Latinum convertenda visa est, inquit A. Gellius, quæ possit esse parentibus hortamentum curæ diligentięque in liberorum institutione. *Philippus Aristoteli salutem. Filium mihi genitum scito. Nec Diis gratiam perinde habeo, quia natus est, quā quod illum nasci temporibus vitæ tuæ contigit. Spero enim fore, ut educatus eruditusque à te, dignus nobis existat, & non sit impar tanto imperio.*

Non fefellit Philipum sua de Aristotele opinio. Quippe Alexander eo doctore diu usus, accepit ab illo tam utilia agendi & loquendi præcepta, ut non dubitaverit prædicare: *Non minus Aristoteli debere se, quā Philippo: hujus enim munus esse quod viveret; illius, quod honestè viveret.* Voluit verò Philippus prima litterarum elementa filio suo tradi ab Aristotele summo ætatis Philosopho, & ille suscepit hoc officium, quia magni momenti est ad studia, eorum initia à perfectissimo præceptore tradi.

2. Plurimum in reliquam vitam proderit, pueros statim salubriter institui. Facile est enim animos adhuc teneros componere: difficulter reciduntur vitia, quæ nobiscum creverunt. Altius descendunt præcepta, quæ primis imprimuntur ætatibus: & naturā tenacissimi sumus eorum, quæ pueri percipimus: ut sapor, quo nova vasa imbuuntur, durat.

Quo semel est imbuta recens, servabit odorem Testa diu.

Nulla ætas videtur tam infirma, quæ non protinus discat quid rectum pravumque sit: est enim maximè tum formanda cum facillimè cedit præ-



cupientibus. Monendus ergo puer, ne quid cupidè, ne quid improbè, ne quid impotenter faciat. Habendumque est in animo semper illud Virgilianum:

Adeo in teneris consuescere multum est.

3. In pueris modò frenis utamur, modò stimulis; est enim in illis aliquid quod coercendum sit, est quod excitandum. Hinc Isocrates, doctor singularis, dicebat se calcaribus in Ephoro, contrà autem in Theopompo frenis uti solere: alter enim reprimendus erat, alter incitandus. Et Themistocles, qui in adolescentia fuerat feroci admodum ingenio, respondebat mirantibus mutatos ipsius mores: *Asperos & ferociores pullos fieri equos optimos si domitoribus peritis tradantur.*

4. Dabimus aliquod laxamentum: desides verò esse non sinemus, & procul à contactu deliciarum retinebimus. Nihil enim magis voluptarios & iracundos facit, quàm educatio mollis & blanda. Ideo quo plus indulgetur filiis unicus, & quo plus licet pupillis, eo corruptior illis animus est. Offensas patienter ille non feret, cui nihil unquam negatum est, cui lacrymas sollicita semper mater absterfit, cui satisfactum est de pædagogo.

5. Longè quoque ab assentatione pueritia removenda est. Audiat verum, exprobrentur illi perperam facta, timeat aliquando parentes & magistros, vereatur semper. Nihil per iracundiam & lacrymas exoret: quod irato & flenti negatum fuerit, offeratur quieto.

6. Omnibus hominibus prodest animum subindereluxare. Excitatur enim otio vigor; & omnis tristitia, quæ continuatione pertinacis studii adducitur, feriarum hilaritate discutitur.

Lusus pueris proderunt: quia pueri post lusus plus virium & acriorem animum afferunt ad discendum. Modus tamen sit remissionibus: ne aut negatæ odium studiorum faciant, aut nimis otii consuetudinem afferant.

7. Omnes ferè legum latores, neglecta puerorum & adolescentum educatione, parentum arbitrio liberorum institutionem reliquerunt: idque unum videntur studuisse, ut iis, qui adversus legum præcepta peccassent, pœnæ constituerentur & irrogarentur. At Persæ & Lacedæmonii aliâ ratione caverunt, ne admitterentur quæ leges vetabant: & civium peccatis obviam ierunt, formandis publicâ severâque institutione puerorum & adolescentum moribus. Sic enim fiebat, ut à teneris annis virtutem colere, vitia verò averfari assuefierent. Quæ verò fuerit illa pauperum & divitum confimilis sub publicis magistris educatio, non inutile erit legere apud Plutarchum & Xenophontem.

---

## CAPUT XLIII.

*Veterum Romanorum in educandis pueris disciplina.*

1. **N**ON assuescat infans ei sermoni qui dediscendus deinde sit. Magni interest quos quisque audiat quotidie domi, quibuscum loquatur à pueritia, quemadmodum patres, pædagogi, matres etiam loquantur. Legimus epistolas Cornelix matris Gracchorum: apparet ejus filios, qui eloquentiâ floruerunt, non solum in gremio matris educatos fuisse, sed etiam ab ea sermonis elegantiam hausisse. Maximum autem Matronis ornamentum esse liberos bene institutos meritò putabat sapientissima illa mulier. Cùm Campana Matrona apud illam hospita, ornamenta sua, quæ erant illo sæculo pretiosissima, ostentaret ei muliebriter: traxit eam sermone, quousque à schola redirent liberi. Quos reversos hospitæ exhibens; *Et hæc*, inquit, *ornamenta mea sunt.*

2. Operæ pretium est cognoscere veterum Romanorum severitatem ac disciplinam circa edu-

candos formandosque liberos. Jam primum filius ex casta parente natus, non in cella emptæ nutriticis educabatur, sed in gremio ac sinu matris, cujus præcipua laus erat, tueri domum, & inservire liberis. Eligebatur autem aliqua major natu propinqua, cui propter probatos mores soboles omnis cujuscumque familiæ committeretur: coram quâ neque dicere fas erat quod turpe dictu videretur, neque facere quod inhonestum factu. Hæc, non studia modò, sed remissiones etiam lususque puerorum, quâdam verecundiâ temperabat. Sic Corneliam Gracchorum, sic Aureliam Julii Cæsaris, sic Attiam Augusti matrem, præfuisse educationibus liberorum accepimus.

Hæc disciplina ac severitas id præstabat, ut pueri toto pectore arriperent artes honestas. At nunc natus infans delegatur Græculæ alicui ancillæ, cui adjungitur unus aut alter servus nulli serio ministerio accomodatus. Horum fabulis & erroribus teneri & rudes animi statim imbuuntur: nec quisquam in tota domo curat, quid coram infante domino aut dicat, aut faciat: quoniam etiam ipsi parentes nec probati nec modestiæ parvulos assuefaciunt, sed lasciviæ & audaciæ. Per quæ paulatim irrepit impudentia, & sui alienique contemptus.

3. Nuntiatum quondam est Phavorino Philosopho, nobis præsentibus, uxorem auditoris secratorisque sui paululum antè peperisse, eumque esse auctum filio. *Eamus*, inquit tum Phavorinus, & *visum puerperam*, & *gratulatum patri*. Is enim erat loci senatorii, ex familia nobiliore. Ivimus unâ qui tunc aderamus, & cum eo simul domum introgressi sumus. Phavorinus complexus hominem, congratulatusque ei, assedit: atque ubi percontatus est, quàm diutinum puerperium fuisset; & cognovit puellam defessam labore & vigiliâ somnum capere; fabulari instituit prolixius: &, *nihil*, inquit, *dubito: quin*

lium lacte suo nutritura sit. Sed cum mater puellæ parcendum ei esse diceret, adhibendasque puero nutrices, ne ad dolores, quos in pariendo tulisset, munus quoque nutritionis grave ac difficile accederet: *Oro te*, inquit, *mulier, sine eam totam ac integram esse matrem filii sui. Hoc enim est contra naturam imperfectum & dimidiatum matris genus, parere & statim abs se abjicere partum: alere in utero sanguine suo nescio quid quod non videat; non alere suo lacte quod videat, jam hominem, jam viventem, jam matris officia implorantem.*

Cum Catoni majori natus esset ex uxore filius nullis negotiis, nisi publicis, impediabatur, quominus adesset matris infantem abluenti & fasciis involventi. Illa proprio lacte filium alebat, sæpeque etiam liberos servorum suis uberibus admovebat, ut nutrimenti consortium eos puero domino magis benevolos redderet. Ubi aliquid intelligere potuit, puer, eum pater ipse in litteris instituit, licet idoneum & eruditum domi servum haberet Chilonem, à quo pueri multi erudiebantur. Sed nolebat ut ipse scriptum reliquit, servum filio suo vel maledicere, vel orem vellicare, si tardior in discendo esset: neque etiam filium tanti muneris hoc est doctrinæ, debitorem esse servo. Ipse itaque ejus ludi magister, ipse legum doctor, ipse lanista fuit. neque modò docuit jaculari, armis depugnare, equitare: sed etiam pugilatu decertare, calorem & frigus tolerare, fluminum vortices nando superare. Conscripsit illi manu sua, grandibus litteris, historias, ut etiam in paterna domo nota haberet veterum instituta atque exempla. Quidquam turpe loqui cavit non minùs filio præsentem, quàm sacris virginibus Vestalibus: & nunquam se ei in balneo videndum dedit.

5. L. Æmilio Paulo multi anni fuere vacui à rerum publicarum curâ inter primum & alterum Consulatam. Eos totos impendit rebus sacris, &



maximè liberorum institutioni, quos erudiri voluit non tantum Romanâ veteri disciplinâ, sed etiam Græcis litteris. Illis cum Grammaticæ, Rhetoricæ, Dialecticæque artis magistros dedit, tum pingendi quoque, equitandi, venandi. Et, ut erat liberorum amantissimus inter Romanos, eorum exercitiis omnibus intererat, nisi respublica aliò vocaret.

6. Augustus etiam puer animum optimis artibus excolebat, corpus laboriosos militaribusque exercitationibus durabat. Eum sollicitè observabant mater Attia & Philippus vitricus; quotidie à magistris & custodibus, quos puero apposuerant, inquirentes studiosè quid rei egisset, quò esset profectus, quâ ratione diem transegisset, quibuscum denique esset versatus. Hac Attiæ matris sollicitudine factum est ut Augustus evaserit è multis ipsius pudori oblati periculis.

Augustus summum imperium Romæ adeptus, nebotas suos litteras aliaque rudimenta per se plerùmque docuit.

#### C A P U T X L I V.

*Publicæ utilitati plurimum profunt qui juventutem erudiunt.*

1. **Q**UIA utile est juventuti regi, imposuimus illi quasi domesticos magistratus sub quorum custodia contineretur.

Non is solus reipublicæ prodest qui tuetur reos, & de pace belloque censet: sed qui juventutem exhortatur, qui, in tanta bonorum præceptorum inopia, virtute instruit animos qui ad pecuniam luxuriamque ruentes prensat ac retrahit, & si nihil aliud potest, certè moratur. An ille plus præstat, qui inter cives jus dicit, quàm qui docet juventutem quid sit justitia, quid pietas, quid patientia, quid fortitudo, quàm pretiosum bonum sit bona conscientia?

2. Quærenti mihi quânam re possem prodesse quam plurimis, nulla major visa est, quàm si traderem civibus meis vias optimarum artium. Quod enim munus reipublicæ majus meliusve afferre possumus, quàm si docemus atque erudimus juventutem? His præsertim temporibus quibus ita prolapsa est, ut omnium operâ refrenanda atque coercenda sit.

Si senibus satis virium sit, ut adolescentulos doceant, instituant, ad omne officium instruant; hoc opere quid potest esse præclarius?

## CAPUT XLV.

*Et præceptores & studia amet adolescens.*

I. **D**ISCIPULI, si modò sunt bene instituti; Præceptorem amant & verentur.  
 Id præcipue monendi sunt adolescentes, ut ament præceptores suos non minus quàm ipsa studia; & existiment eos parentes esse, non quidem corporum, sed mentium. Multum hæc pietas conferat ad felicem exitum studiorum ita enim & libenter audient, & dictis credent, & esse magistrorum similes concupiscunt in ipsos denique coetus scholarum læti & alacres conveniant; emendati non irascuntur, laudari gaudebunt, ut sint carissimi, mereri conabuntur. Nam ut præceptorum officium est docere, sic discipulorum præbere se dociles: alioqui neutrum sine altero sufficiet.

2. Ea maximè cura habenda est, ut præceptor omnino fiat nobis familiariter amicus; nec sequatur officium tantum in docendo, sed etiam affectum.

Epaminondas Philosophiæ præceptorem habuit Lysim Tarentinum, Pythagorum; cui quidem sic fuit deditus, adolescens tristem & seve-

rum senem anteposuerit in familiaritate omnibus suis æqualibus. Neque eum à se dimisit, priusquam ita doctrinâ antecessit condiscipulos, ut facile intelligi posset pari modo superaturum omnes in ceteris artibus.

Ciceronis filius declaravit ipse hac epistola ad Tironem, quo amore Cratippum præceptorem dilexerit. Scito me Cratippo esse conjunctissimum, non ut discipulum, sed ut filium. Nam cum audio illum libenter publicè, tum etiam privatim ejus suavitatem vehementer amo. Sum totos dies cum eo, noctisque sæpe-numero partem: exoro enim ut mecum quam sæpissime cœnet. Hac introducta consuetudine, sæpe inscipientibus nobis & cœnantibus obrepit, sublatâque severitate Philosophiæ, humanissimè nobiscum jocatur. Quare da operam, ut hunc talem, tam jucundum, tam excellentem virum videas quamprimùm.

3. Patet autem ex Trebonii epistola ad Ciceronem patrem, quâ curâ, quâque modestiæ famâ filius ejus litteris operam dederit. Athenas veni, atque ibi, quod maximè optabam, vidi filium tuum deditum optimis studiis, cum summâ modestiæ famâ. Quâ ex re quantam voluptatem ceperim, scire potes etiam me tacente. Non enim nescis quanti te faciam; & quam omnibus tuis bonis gaudeam, pro nostro veterrimo verissimoque amore. Noli putare, mi Cicero, me hoc auribus tuis dare: nihil adolescente tuo, aut potius nostro, amabilius est, ex omnibus iis qui Athenis sunt, aut studiosius earum artium, quas tu maximè amas, hoc est optimarum. Itaque tibi, quod verè facere possum, libenter gratulor. Eum, licet ingressum pleno gradu in ea studia, ad quæ cohortatione incitatur, cohortari non intermitteremus, ut discendo exercendoque se, in dies ionigsa prodceat.

## CAPUT XLVI.

*Sit gratus erga Magistrum discipulus.*

1. **P**RÆCEPTORES suos adolescens veneretur ac suspiciat, quorum beneficio se vitiis exuit, & sub quorum tutelâ positus exercet artes bonas.

Quis est nostrum liberaliter educatus, cui non educator, cui non magister suus atque doctor, cui non locus ille mutus, ubi ipse altus aut doctus est, cum grata recordatione in mente versetur?

Vespasianus natus est, in vico modico Sabinorum, & educatus sub paterna avia in prædiis. Quare Princeps quoque locum incunabulorum assiduè frequentavit, manente villâ qualis fuerat olim, ne quid scilicet mutaretur ex iis quibus oculi assueverant. Avia quoque memoriam tantopere dilexit: ut solemnibus ac festis diebus pocillo ejus argenteo bibere perseveravit.

2. Cùm Cicero natus, vivente avo, in parvâ villa, dixisset Attico, se eo loco maximè delectari; his verbis respondit ei Atticus: Ego vero tibi istam justam causam puto, cur huc libentius venias, atque hunc locum diligas. Quin ipse, verè dicam, sum ipsi villæ amior factus, atque huic omni solo in quo tu ortus procreatusque es. Movemur enim nescio quo pacto locis ipsis in quibus eorum, quos diligimus aut admiramur, adsunt vestigia. Me quidem ipsæ illæ nostræ Athenæ non tam delectant operibus magnificis, quàm recordatione summorum virorum, ubi quisque habitare, ubi sedere, ubi disputare sit solitus: studiosèque eorum etiam sepulcra contemplor. Quare istum, ubi tu es natus, plus amabo posthac locum.

3. Præceptorem & medicorum magna caritas, magna reverentia sit. Ne dicas nihil quidquam



his debere te , nisi mercedulam. Nam primò quædam pluris sunt , quam emuntur. Emis à medico rem inæstimabilem , vitam ac valetudinem bonam , à bonarum artium præceptore , studia liberalia & animi cultum. Itaque his non rei præteritum solvitur , sed laboris , quod à rebus suis advocati nobis vacant. Deinde & medicus & præceptor sæpe in amicum transeunt , & nos non tam arte , quam vendunt , obligant ; quam benignâ & familiari voluntate. Hoc cum factum est , tam medico quàm præceptori præteritum operæ solvitur , animi semper debetur.

In optimis artibus quæ vitam conservant aut excolunt , qui nihil se plus existimat debere ; quàm pepigit , ingratus est.

Cum Pythagoras accepisset Pherecydem quæ ejus præceptor fuerat , in insula Delo gravissimè ægrotare ; confestim ex Italia in insulam navigavit , ubi cum aliquandiu seni fomenta abhibuisset studiosè , nihilque omisisset , quod ad pristinam valetudinem eum revocaret ; tandem senectute & morbi vi superatum sedulò sepeliit : & postquam ei , tanquam patri filius , iusta persolvit , rursus in Italiam reversus est.

6. Alexander magnus eloquentiæ magistro usus erat Anaximene Lampfaceno Quæ res postmodum Lampfaci salutis fuit. Eam urbem diruere statuerat Alexander quòd à partibus Darii adversum se stetisset. Itaque conspicatus Anaximene à muris prodeuntem obviam sibi , nec dubitans , quin veniret deprecatum pro patria , per Deos juravit se non facturum quod ille petisset. Quo audito , callidus orator Regem rogavit , ut Lampfacum dirueret. Jurisjurandi religione tactus Alexander , & captus piâ præceptoris quendam sui solertiâ ad servandam patriam , Lampfacenis delicti gratiam fecit.

Stagiram quoque urbem , Philippo patre dirutam , restituisse dicitur , exoratus precibus

Aristotelis ejus urbis civis , quem fere semper secum habuit , donec post mortem patris rerum positus in Asiam trajiceret. Postea quoque inter belli curas non omisit magistrum venerari , crebroque per litteras compellavit , ut ab eo & disciplinarum sublimium arcana & morum præcepta acciperet.

Cum Tyri obsidio non pro spe Alexandri procederet : ne segniter addidere uni urbi videretur , operi Perdiccam Craterumque præfecit : ipse cum expedita manu Arabiam petiit. Ibi magnum in periculum venit propter pedagogum suum Lyfimachum , qui comitari eum voluerat , jactans se neque animo inferiorem esse , neque ætate graviores Phœnice , olim Achillis primum educatore , deinde ad bella comite. Nam ubi ad montana ventum est , & , relictis equis , iter pedibus faciendum fuit ; Alexander , nocte ingruente & hostibus circa vagantibus , fatiscentem ac desessum senem deferere haud sustinuit : sed & verbis excitavit , & adminiculo corporis sui adjuvit , ita ut ab exercitu suo , qui longius processerat , distractus , noctem egerit in tenebris , & acri gelu , locisque asperis.

6. Anaxagoras Clazomenius non modò generis nobilitate & opibus , verum etiam animi magnitudine , clarus fuit. Is ut rerum naturalium , maxime verò cœlestium , contemplationi totum se traderet , universum patrimonium suis sponte concessit , & tam publicæ quàm privatæ rei negligens , Athenas omnium doctrinarum inventrices ac cultrices petiit. Quidam autem querenti quod nulla esset ei cura patriæ , quàm relinquebat ; *Mihi verò* , inquit , *digitum in cœlum intendens , patriæ cura , & quidem summa est.* Imbutus ab eo Atheniensium dux Pericles rerum cœlestium scientia , magno animo elatoque fuit , sublimi usus est dicendi genere , & divitiis pauperes multos juvit. Contigit tamen ut multis dis-

tristius negotiis Anaxagoram negligere videretur; unde senex jacebat in lecto capite obvoluto, vitamque inediâ finire statuerat. Eâ re ac se delatâ perculsus Pericles, advolavit confestim; & jacentem enixè oravit cum lacrymis, ut vivere vellet, & sibi conservare fidelem sapientemque in republica gerenda consiliarium. Ibi Anaxagoram rejecto ab ore velamento ferunt respondisse: *O Pericle, lucernæ infundunt oleum ii quibus lucerna est opus.* Anaxagoram deinde semper coluit magnâ curâ Pericles; & cùm impietatis accusatus esset, atque in judicium vocatus, quod unum tantum Deum videretur agnoscere; Periclis operâ judicibus erectus & incolumis ex urbe est dimissus.

Cùm M. Aurelius qui postea imperavit, mortuum educatorem suum fleret, cumque, aulici ministri revocarent ab illa pietatis declaratione: *Permitte illi, inquit imperator Antonius Pius, ut homo sit: neque enim vel Philosophia vel imperium tollit affectus.*

*Diis acceptum refero, inquebat M. Aurelius imperator, quod bonos præceptores habuerim; quod illos maturè evexerim ad honores, quos expectere videbantur; quod mihi quoque copia fuerit magistrorum qui ad educandos liberos meos essent idonei.* Imo tantum honoris magistris suis detulit, ut imagines eorum aureas domi inter Lares Deos haberet, ac sepulchra eorum hostiis & floribus semper honoraret.

## CAPUT XLVII.

*Præceptor nec habeat vitia, nec ferat.*

1. **O**PTIMUM erit pueris dari præceptores Pædagogosque vitiorum expertes; eorum enim, sicut & nutricum, mores, pueri plerumque

que referunt. Apud Platonem educatus puer, cum ad parentes reversus vociferantem videret patrem; *nunquam*, inquit, *hoc apud Platonem audiui*. Leonidas Alexandri pædagogus imbuunt alumnum quibusdam vitiis, quæ illum ab institutione puerili profecuta sunt usque in regale solium.

Cum puer publicis magistris erit tradendus, eorum imprimis inspicere mores oportebit. Hoc enim in omnibus tum domesticis tum publicis doctoribus examinandum quam diligentissime puto. Itaque parentes, si non cæca & sopita eorum socordia est, magistrum eligent sanctissimum quemque (sanctitatis enim præcipuo prudentibus viris cura est) & disciplinam quæ optima fuerit.

Corelliam Hispullam admonet Plinius, qualem filio Rhetorem querere debeat. Cum dubitem utrum patrem tuum, virum sanctissimum, suspexerim magis, an amaverim, & te unice diligam; cupiam necesse est, atque etiam enitar, ut filius tuus & avo & majoribus similis existat. Iis autem ita demum similis adolesceret, si imbutus bonis artibus fuerit, quas plurimum refert à quo potissimum accipiat. Adhuc illum pueritia intra contubernium tuum tenuit, & domi præceptores habuit. Jam studia ejus extra limen proferenda sunt: jam circumspectendus Rhetor Latinus, cujus scholæ severitas, pudor in primis, & castitas, constet. Videor ego demonstrare tibi posse Julium Genitorem. Vir est emendatus & gravis: paulo etiam horridior & durior in hac licentia temporum. Nihil ex hoc viro filius tuus audiet, nisi profuturum: nihil discet, quod nescisse rectius fuerit. Nec minus sæpè ab illo quam à te meque admonebitur, quam majorum gloriam ac famam sustinendam habeat. Proinde, faventibus Diis, trade eum præceptor, à quo mores primum, mox eloquentiam



discat , quæ malè sine moribus discitur.

2. Sumat præceptor parentis erga discipulos suos animum : atque existimet succedere se in locum eorum , à quibus sibi liberi traduntur. Ipse nec habeat vitia , nec ferat. Non austeritas ejus tristis sit , non dissoluta comitas ; ne inde odium , hinc contemptus oriatur. Plurimus ei de honesto & bono sit sermo ; nam quò sæpius monuerit , hoc rariùs castigabit. Minimè iracundus sit , nec tamen eorum , quæ emendanda erunt , dissimulatur.

Orbilius Pupillus Beneventanus litteras diù professus in patria , quinquagesimo demum anno Romam , Consule Cicerone , transit ; docuitque majore famâ , quàm emolumento : nam senex & pauper habitabat sub tegulis. Fuit naturæ acerbæ in discipulos , unde Horatius , qui puer eo magistro usus erat , illum plagosum appellat.

3. Pessimus pater videbitur , qui assiduis plagis liberos etiam ex levissimis causis compescet. Uter autem præceptor liberalibus artibus , quas docet , dignior est , qui excarnificat discipulos , si memoria illis non constiterit , aut si parum agilis in legendo oculus hæreat : an qui monitionibus & verecundia mavult emendare. Numquid equum est , graviùs & duriùs homini imperari , quàm imperatur animalibus mutis ? Atqui domandi peritus artifex non equum crebris verberibus exterrere ; fiet enim formidolosus & contumax , nisi eum tactu blandiente permulserit.

Nullum animal morosius est , nullum majore arte tractandum , quam homo : nulli magis parcendum. Quid enim stultius , quàm adversus jumenta & canes erubescere , iram exercere , hominem autem pessima conditione esse sub homine ? Morbis corporis medemur , nec irascimur : sui animo morbi sunt , qui desiderant medentem minimè infestum ægro. Ille cui aliorum credita salus & cura est , cum eorum vitiis luctetur , &

resistat. Quibusdam morbum suum exprobet quosdam mollius curet, ad graviora remedia, ubi tantum necesse fuerit, confugiat.

Pudore & liberalitate liberos retinere satius esse credo, quàm metu, dicit pater quidam apud Terentium.

4. Docendi peritus, tradito sibi puero; ingenium ejus naturamque perspiciat, ut quomodo tractandus sit discantis animus intelligat. Sunt enim quidam, nisi institeris, remissi; quidam imperia indignantur; quosdam continet metus, quosdam debilitat: ab aliis continuus labor aliquid extundit; in aliis plus animi impetus facit. Mihi ille detur puer, quem laus excitet, quem gloria juvet, qui victus flectat: hunc mordebit objurgatio, in hoc desidiâ nunquam verebor.

Diligentissimè videndum est iis qui instituunt aliquos atque erudiunt, quò sua quemque natura maximè ferre videatur. Est enim ad cuiusque naturam accommodanda quantum licet, doctoris institutio.

---

## CAPUT XLVIII.

### *Parentum adversus filios severitas.*

1. **T**ITUS Manlius Torquatus, qui perindulgens in patrem fuerat, idem acerbè severus in filium fuit.

Cum Romanis adversus Latinos Tusculanosque pugnandum esset, placuit Consulibus T. Manlio Torquato, & P. Decio, ut bellum severo administraretur imperio, & disciplina militaris ad priscos ridigeretur mores: edixeruntque ne quis extra ordinem in hostes pugnaret. Fortè inter ceteros turmarum Præfectos, qui in diversas partes missi erant exploratum, T. Manlius Consulis filius cum suis turmalibus accessit propè

stationem Tusculanorum equitum, quibus præerat Geminus Metius, vir tum genere tum factis clarus. Is ubi Romanos equites cognovit, insignemque inter eos præcedentem Consulis filium paululum ab suis equo provectus: *Vis ne*, inquit, *dum illa dies venit, quâ Consulares exercitus cum Latinis decertabunt, interea ut ipse congredi mecum, ut utriusque nostrum eventu cernatur, quantum eques Latinus Romano præstet?* Movit ferocem animum juvenis seu ira, seu detrectandi certaminis pudor, seu inexsuperabilis vis fati. Oblitus itaque imperii patris, Consulumque edicti, ruit in id certamen, in quo haud multum intererat vinceret ne, an vinceretur.

Equitibus ceteris, velut ad spectaculum, utrimque summotis, Metius & Manlius adversos concitarunt equos, & cum infestis cuspidibus concurrissent, Romanus Tusculanum ex equo excussum transfixit, spoliisque lectis ad turmam suam revectus, in castra ad patrem venit. Tum: *Ut me*, inquit, *omnes tuo sanguine verè ortum prædicarent, provocatus ab hoste, hæc arma ex eo caeso capta attuli.* Quod ubi audivit Consul, extemplo filium averſatus, & patrio amoris præferens rempublicam, cujus intererat exercitum in gravissimo bello animadversionis metu contineri, milites classico advocari jussit. Qui postquam frequentes convenere: *Quandoquidem*, inquit, *tu, Tite Manli, neque isperium consulare neque majestatem patriam veritus, in hostem pugnaſti, & solviſti, quantum in te fuit, disciplinam militarem, quâ Romanâ res ſtetit ad hanc diem. Nos potiùs pro nostro delicto plecti oportet quàm rempublicam luere peccata nostra magno suo damno.* I, licitor, deliga ad palum.

Exanimati omnes tam atroci imperio, & quasi districtam in se cernentes securim, metu magis, quàm modestiâ, quieverunt. Postquam cervice cæsâ susus est cruor, cum libero conquestu coor-

æ voces sunt : ita ut neque lamenti neque execrationibus parceretur. Deinde spoliis contestum juvenis corpus, à militibus crematum est, structo extra vallum rogo.

Fecit atrocitas pœnæ de Manlio sumptæ obedientiorem duci militem, & ea severitas ad felicem belli exitum profuit. Cùm T. Manlius Consul Romam victor rediit, ei venienti seniores tantùm obviam exierunt : juvenus & tunc & omni deinde vitâ averfata cum execrataque est.

Viguit quoque plurimùm apud Lacedæmonios disciplina militaris. Itaque cùm in acie quidam Lacon strictum ensẽ jam esset in hostem infixurus, audito signo quod canebat recepturi, non infixit. Interrogatus deinde, cur hostem, quem in potestate habebat, non occidisset : *Quoniam, inquit, melius est parere imperatori, quàm hostem occidere.*

2. Cum Macedonum legati Romam venissent conquestum de Silano Manlii Torquati filio, quod Prætor provinciam expilasset; pater, avitæ severitatis heres, petiit à Patribus Conscriptis, ne quid de ea re statuerent, antequam ipse inspexisset Macedonum & filii sui causam. Id à Senatu libenter concessum est viro summæ dignitatis, utpote Consulari, & juris civilis peritissimo. Itaque institutâ domi cognitione causæ, solus per totum biduum vacavit utrique parti audiendæ, ac tertio die pronunciavit : *Filium suum videri non talem fuisse in Provincia, quales ejus majores fuissent.* Et in conspectum suum deinceps venire vetuit. Tam tristi patris judicio perculsus Silanus, lucem ulteriùs intueri non sustinuit, & proxima nocte vitam suspendio finivit. Peregerat Torquatus severi & religiosi judicis partes, satisfactum erat reipublicæ, habebat ultionem Macedonia : at nondum erat inflexus patris rigor. Igitur neque filii exequiis interfuit, ut patribus mos erat apud Romanos; & eo ipso die,



quo funus ejus ducebatur, aures, ut solebat, volentibus consulere se de jure accommodavit.

3. Ut Torquatus fuerat severus in coercenda filii avaritia, sic fuit Scaurus in punienda filii sui ignaviâ Nam cum apud Athesim fluvium à Cimbris Romani equites pulsi, Romam pavidam repeterent, deserto Proconsule, Q. Catulo; misit Scaurus qui filio illius consternationis participi dicerent: *Se libentius occursurum ejus in acie interfecti ossibus, quam visurum reducem reum tam deformis fugo: itaque conspectum irati patris degeneri filio vitandum esse si quid verecundiæ superesset.* Quo nuncio accepto, juvenis adversus semetipsum convertit gladium, quo in hostes usus non fuerat, & sibi mortem conscivit.

4. Non intra verborum castigationem hæsit A. Fulvius vir Senatorii ordinis. Nam cum filius ejus pravo consilio in castra Catilinæ rueret; illum è medio itinere retractum supplicio mortis affecit, præfatus: *Non se genuisse eum Catilinæ, adversus patriam, sed patriæ adversus Catilinam.*

5. Rhacoces quidam, genere Mardus, septem habebat filios, quorum minimus nomine Cartomes, adolescens supra ætatem audax, multa suis fratribus mala quotidie inferebat. Cum cum pater non destitisset clementer admonere & verbis castigare, neque ille auscultaret utilia suadenti: venerat fortè in eam regionem judices illi, qui jussu regis Persarum singulas provincias peragrare soliti erant, ad jus dicendum, & propterea aliquando Oculi Regis vocabantur. Tum verò Rhacoces filium comprehendit, & manibus post tergum ligatis ad judices traxit: quibus cum enumerasset quæ fuerant ab illo audacter & improbè perpetrata, postulavit ut contumaciæ & improbitatis pœnas morte lueret. Tam inusitatâ parentis adversus filium postulatione obstupesci judices, à sententia ferenda obstinuerunt, & utrumque ad regem Persarum Artaxerxem deduxerunt.

Ut stetit in conspectu Artaxerxis Rhacoces, & eadem, quæ prius, adversus filium conquestus est, ac postulavit: *Ergone*, inquit Rex, tu oculis tuis videre morientem filium sustinebis pater? Maximè, respondit ille: quoniam in horto quoque cum lactucarum amaros surculos defringo & amputo, nihil omnino mali ex eo mater ipsorum, ipsa lactuca sentit, sed efflorescit magis majorque & dulcior evadit. Pariter & ego, ô Rex, cum videro prohiberi ab injuria facienda & perire eum, qui & domui meæ res melius se habebunt, & cum reliquis filiis unâ prosperè agentibus vivam. Quibus auditis, Artaxerxes collaudatum quidem Rhacocem inter regios judices sedere jussit, ita allocutus eos qui præsentés aderant: Qui tam justè de suis ipsius liberis sententiam pronunciat, omnino etiam adversus alios diligens erit & incorruptus judex. Adolescentem verò præsentî pœna liberavit, gravissimum mortis genus interminatus ei si deinceps deprehensus esset patrare similia præteritis.

6. Pausanias Lacedæmoniorum dux, elatus victoriâ partâ de Mardonio apud Plateas, nefaria adversus patriam consilia inierat. Eum propterea comprehendi cùm jussissent Ephori, in ædem Minervæ confugit: unde ne exire posset, statim Ephori valvas ejus ædis obstruxerunt, tectumque sunt demoliti, ut facilius sub dio interiret. Dicitur eo tempore matrem Pausaniæ vivisse, eamque, postquam cognovit scelus filii, lapidem ad introitum ædis attulisse, ad claudendum filium. Cùm deinde Pausanias semianimis è templo elatus esset, confestim animam efflavit. Sic magnam belli gloriam turpi morte maculavit.

## CAPUT XLIX.

*Parentum amor in liberos.*

7. ERAT Murgentii quod est oppidum Siciliæ; vir opibus & gloriâ princeps civitatis suæ.

M

cui cognomen Cambalus. Hic venatum egressus, cum in latronum manus penè incidisset: pedibus in oppidum cœpit contendere. Ei tum fortè Gorgus pater equo vectus occurrens, statim equo defiliit, filiumque hortatus est, ut equo incenso protinus se in urbem reciperet. At filius salutem suam patris incolumitati præferri non est passus: neque pater vicissim voluit periculum effugere, projecto ad certam mortem filio. Itaque cum alter alterum flens oraret, & ambo inter se certarent, paterno amore in filium contendente cum filii pietate in patrem, interim latrones utrumque affecti confoderunt.

2. Zaleucus apud Locrenses legem tulerat, ut adultero oculi effoderentur. Cujus flagitii cum paulo post convictus fuisset ipse filius, pœnam ex paterna lege daturus erat. Tota civitas necessitatem pœnæ remitti adolescenti volebat in gratiam & honorem patris, à quo saluberrimis legibus fuerat munita, postulabatque à Zaleuco, ut filio suo indulgeri pateretur. Ille tandem precibus populi victus se inter misericordem patrem & justum legislatorem est partitus: &, ne quod semel sancitum fuerat, irritum fieret per impunitatem admissi flagitii, unum sibi, alterum filio, oculum eruit.

3. Diagoras Rhodius tres filios adolescentes habuit, unum pugilem, alterum pancratiastem, tertium luctatorem: eosque omnes vidit vincere coronarique Olympiæ eodem die. Et cum ibi eum tres adolescentes amplexi, coronis suis in caput patris impositis, suaviarentur, populusque gratulabundus jaceret undique in eum flores; ibidem in stadio, inspectante populo, in osculis atque in manibus filiorum animam efflavit.

4. Ubi accepta ad Trasimenum lacum clades Romæ audita est, varias in curas dispersi eorum animi fuere, quorum propinqui pugnae interfuerant: quia ignorabant quæ cujusque suo-

rum fortuna esset, & quid sperare aut timere deberent. Postero die, ac deinceps aliquot sequentibus, ad portas major mulierum, quam virorum, multitudo stetit, operiens aut suorum aliquem, aut nuncium de his, circumfundebanturque obviis multa sciscitantes, neque avelli ab illis poterant, priusquam ordine omnia inquisivissent. Inde varios vultus cerneret, ut cuique aut læta aut tristitia nunciabantur. Feminarum præcipuè gaudia insignia erant, & luctus. Ferunt unam, sospite filio repentinè in ipsa urbis porta oblato præter spem, in conspectu ejus expirasse: alteram, cui mors filii falsò nunciata fuerat, mœstam sedentem domi, nimio gaudio exanimatam fuisse ad primum conspectum redeuntis filii. Sic quas dolor non extinxerat, lætitia consumpsit.

## CAPUT L.

*Sua sunt conjugibus munia assignata à natura.*

**G**RADUS plures sunt societatis humanæ. Prima societas est in conjugio.

Maritale conjugium à natura comparatum est, ut non solum jucundissima, sed etiam utilissima, vitæ societas iniretur. Ex ea plurima mortalibus adjutoria & propugnacula præparata sunt. Cum victus & cultus humanus accurandus esset, non in sylvestribus locis & in propatulo, sicut feris, sed domi sub tecto; necessarium fuit, alterum è conjugibus esse foris & sub dio, qui labore & industriâ compararet quæ necessaria essent: alterum intus, qui comparata custodiret, & cetera conficeret opera quæ domi deberent administrari. Natura distribuit viro calores & frigora perpetienda, itinera & navigationes, labores pacis ac belli, id est rusticationis & militarium exercitationum: mulieri verò, quam omnibus his rebus fecerat inhabilem, domestica negotia



curanda tradidit. Et quoniam hunc sexum affig-  
naverat custodiæ rei familiaris, idcirco timidio-  
rem reddidit, quàm virilem: nam metus pluri-  
mum confert ad diligentiam custodiendi. Quòd  
autem necesse erat quærenti victum foris & in  
aperto nonnumquam injuriam propulsare, ideo  
virum audaciorem fecit, quàm mulierem. Me-  
moriâ non minorem feminae, quàm viro, tri-  
buit; qua utrique æquè opus fuit.

## C A P U T L I.

### *Maritorum amor in uxores.*

I. **T**IBERIUS Gracchus, Romæ Censor, & bis  
Consul, geminos reportavit triumphos:  
majorem tamen ex virtute & sapientia gloriam  
invenit. Itaque dignus est habitus qui in matri-  
monium acciperet Corneliam, filiam P. Scipio-  
nis, à quo devictus fuerat Annibal. Hic, quem-  
madmodum C. Gracchus filius ejus scriptum re-  
liquit, duobus anguibus diversi sexûs in thalamo  
comprehensis, rem prodigii loco habuit, quia  
augur erat, & convocatos haruspices consuluit.  
Qui cùm respondissent: *Non esse occidendos am-  
bos angues, non esse etiam dimittendos: sed occiso  
uno alterum dimittendum: si marem emisisset uxor i-  
celerem mortem instare: si feminam, ipsi.* Æquius  
esse censuit se jam æt te proædum maturam  
mortem oppetere, quam Corneliam, quæ juve-  
nis esset, & adhuc patriæ dare cives posset ex  
alio marito. Itaque & uxori parcens, & reipubli-  
cæ consulens, feminam serpentem emisit: ipse  
paucis post diebus est mortuus. Marito superstes  
conjux, sic rei familiaris curam gessit, sic libe-  
ros instituit, tantam vitæ sanctitatem & animi  
magnitudinem ostendit, ut non malè visus sit  
consuluisse Tiberius, qui pro tali muliere vo-  
luisset emori.

Ab hoc mariti in uxorem amore longe absuit Admetus Pheræorum rex, si poëtis fides habeatur. Nam cum à diis monitus esset, fore ut præsentem mortem effugeret, si quis reperiretur qui ejus vice mori vellet; passus est conjugem suam Alcestim, adhuc integra ætate florentem, voluntario obitu pro se defungi.

2. C. Plautius morte uxoris auditâ, doloris impotens, cum pectus suum gladio percussisset, incæptum perficere est prohibitus interventu suorum, qui & vulnus obligarunt. Et ubi primum occasio data est, scissis fasciis & vulnere divulso, ex imis visceribus animum dolore opressum extraxit.

Ejusdem ut nominis, ita amoris quoque (seu potius furoris) M. Plantius, cum Tarentum classe apulisset, atque ibi uxor ejus, quæ maritum illuc profecuta fuerat, morbo decessisset; funeratâ eâ atque in rogam impositâ, stricto ferro incubuit.

3. Dicebat Cato major, majorem laudem esse boni mariti, quàm magni Senatoris: & Socratem illum veterem sibi propterea maximâ admirationi esse, quod perpetuò placidè comiterque vixisset cum uxore morosa.

## C A P U T L I I.

*Uxorum constans amor in maritos.*

1. **P**ORCIA M. Catonis Uticensis filia, cum apud Philippos victum & interemtum maritum cognosceret; quia ferrum, quod poscebat ad mortem sibi inferendam, non dabatur, ardentes ore carbones haurire non dubitavit, virilem patris exitum mulier imitata novo mortis genere.

Conjugis audisset fatum cum Portia Bruti,

Et subtracta sibi quæreret arma dolor.

*Nodum scitis, ait, mortem non posse negari!  
Credideram satis hoc vos docuisse patrem.*

*Dixit; & ardentes avido bibit ore favillas.*

*I nunc, & ferrum, turba molesta, nega.*

Ad mortem fortiter ferendam sese antea erudierat Porcia. Pridie quam Cæsar à Bruto cæterisque consociis est occisus, cultellum tonsorium, quasi unguium refecandorum causâ, poposcit, eoque velut forte è manibus elapso se ipse vulneravit. Clamore ancillarum in cubiculum uxoris vocatus Brutus, objurgare eam cæpit, quòd tonsoris officium præripere voluisset. At Porcia ei secreto dixit: *Non casu, sed de industria, hoc mihi vulnus feci: certissimum amoris erga te mei indicium. Experiri enim volui, an satis mihi animi futurum esset ad mortem ferro quærendam; si tibi generosum propositum ex sententia parum cessisset.* Dicitur Brutus, his auditis, manus & oculos ad cælum sustulisse, Deosque orasse, ut dignus conjuge Porciæ maritus posset videri.

2. Ægrotabat Cæcinnæ Pœtus maritus Arriæ, ægrotabat & filius uterque mortiferè, ut videbatur. Filius decessit, eximiâ pulchritudine, pari verecundiâ & parentibus non minus ob alia carus, quàm quòd filius erat. Huic illa ita funus paravit, ita duxit exequias, ut ignoraret maritus. Quin imò quoties cubiculum ejus intraret, vivere filium atque etiam melius habere se simulabat. Ac persæpe interroganti quid ageret puer, respondebat: *bone quievit, libenter cibum sumpsit.* Deindè cum diu prohibitæ lacrimæ vincerent prorumperentque, egrediebatur. Tunc se dolori dabat. Satiata flendo, siccis oculis, composito vultu, redibat, quasi oblita orbitatis.

Scribonianus in Illyrico bellum moverat contra Claudium: fuerat Pœtus in partibus ejus, & occiso Scriboniano, ipse Romam trahebatur. Cum esset navem ascensurus, oravit Arria milites, ut simul imponeretur. *Nempe*, inquiebat,

*daturi estis Consulari viro servulos aliquos, quorum  
 è manu cibum capiat, à quibus vestiatur, à quibus  
 calceatur; omnia vel sola præstabo. Non impetra-  
 vit. Conduxit piscatoriam naviculam, ingensque  
 navigium minimo secuta est. Postquam Romam  
 venit, &, desperatâ mariti salute, ipsa mori  
 statuisse visa est; attentius custodiebatur à suis.  
 Sensit, &, nihil agitis, inquit, potestis enim effi-  
 cere ut malè moriar; ne moriar non potestis. Simul-  
 que è cathedra exiliens, adverso parieti caput  
 ingenti impetu impexit, & corruit. Refocillatâ,  
 dixeram, inquit, vobis inventuram me duram ad  
 mortem viam, si vos facilem negassetis. Poterat  
 sanè marito perempto vivere, atque etiam in ali-  
 quo honore esse, quia Messalinæ Claudii uxori  
 erat conjunctissima: at ei mortis comes esse vo-  
 luit; quin etiam ut illum excitaret ad mortem  
 virili animo oppetendam, ipsa prior pectus suum  
 perfodit, & extractum è vulnere pugionem ma-  
 rito porrigens, immortalem nanc vocem edidit:  
*Pæte non dolet.**

Castâ suo gladium cùm traderet Arria Pæto,  
 Quem de visceribus traxerat ipsa suis:

*Si qua fides vulnus quod feci non dolet,*  
 inquit,

*Sed quod tu facies, hoc mihi, Pæte, dolet.*

3. Gentis Cariæ regina Artemisia virum suum  
 Mausolum maximè dilexit vivum, quantopere  
 verò desideraverit mortuum, judicare facile est  
 ex habitis ejus funeri honoribus, & ex structo  
 illi sepulcro tam magnifico, ut inter septam  
 mundi miracula numeraretur. Præmiis quoque  
 excitavit præstantissimæ ætatis suæ ingenia ad lau-  
 des mortui celebrandas. Sed his magni amoris in-  
 diciis non contenta, ipsa Mausoli vivum ac spi-  
 rans sepulcrum fieri concupivit, & cùm ejus ci-  
 nerem atque ossa mixta odoribus contusaque in-  
 didisset aquæ, ebibit. Aut saltem, ut Ciceroni  
 placet, quemadmodum vixit, vixit in luctu, eodemque  
 etiam confecta contabuit.



4. Marcia Catonis Uticensis filia cùm diutiùs Iugeret maritum, interrogata quem diem luctùs ultimum esset habitura? Respondit, sibi futurum eundem luctùs finem, & vitæ. Et Valeria, Messalarum soror, rogata, cur, amisso Servio viro, nulli vellet nubere? *Quoniam, inquit, mihi semper vivit maritus Servius.*

Phocionis uxor mulieri cuidam aureas & gemmis distinctas vestes ostendenti, dixit: *At mihi satis splendidum ornamentum est Phocion meus, pauper quidem, sed vicesimo jam anno Atheniensium dux.*

### C A P U T L I I I.

*Conjugis delectus ex moribus fiat.*

1. **L**YCURGUM quodam percontante cur virgines indotatas nubere lege præcepisset: *Ut, inquit, neque propter egestatem aliquæ reliquantur innuptæ, neque aliæ propter divitias expetantur: sed juvenum quisque mores puellæ spectans, ex virtute eligat.*

Virgo, dummodo morata rectè veniat, dotata est satis.

Dos est magna parentium virtus.

Dicebat Cleobulus, filias nuptum dari oportere ætate virgines, at prudentiâ mulieres.

Unicæ filiæ pater Themistoclem consulebat, utrum eam pauperi, sed bono viro, collocaret, an locupleti parum probato. Cui is, *mola, inquit, virum qui pecunia egeat, quàm pecuniam, quæ viro.* Quo dicto stultum patrem monuit, ut generum potius, quàm divitias generi, legeret.

2. Adolescens Pittacum rogavit, ut doceret, utra sibi è duabus puellis ducenda esset uxor: duas enim offerri dixit, alteram genere atque opibus parem sibi, alteram utrâque re sibi præstantem. Ille sublato baculo quo propter ætatem

adminiculo utebatur, trivium ostendit, quò lūdendi causâ pueri solerent convenire, eoque iussit illum pergere, ut audiret, à pueris, quid ipsi facere optimum esset. Paruit adolescens, & pueros in trivio audivit invicem dicentes: *tu tibi sume parem.*

3. Thales à ducenda uxore alieno animo erat. Urgenti aliquando matri ut se matrimonii vinculis astringeret. *Nondum tempestivum esse*, respondit. Multos post annos cùm eadem acrius instaret, *non amplius tempestivum esse*, dixit.

Cùm Solon Miletum venisset ad Thaletem; mirum sibi videri dixit, quod nuptiarum & sobolis omnino negligens esset. Nihil tum Thales respondi. : Sed paulo post peregrinum quemdam subornavit, qui se nuper Athenis advenisse simularet. Quærente Solone, num quid in ea urbe novi? Homo quæ diceret edoctus à Thalete, nihil aliud contigisse respondit, nisi quod adolescentem quemdam effierri vidisset, cujus funus tota civitas prosequeretur. *Erat quippe*, inquit, *ut ferebant*, *filius viri inter cives virtute præcellentis & jamdudum ab urbe absentis. O infortunatum parentem!* exclamat Solon. *Ceterum dic*, inquit, *quodnam ejus nomen ferebant?* *Audi* equidem, respondit ille, *sed excidit mihi. Hoc tantum memini multum habitum esse sermonem de illius viri sapientiâ ac justitiâ.* Solon, cujus metus ad singulas peregrini responsiones magis ac magis crescebat, turbatus animo atque anxius, quæsit, numquid ille fato sanctus adolescens, Solonis esse filius diceretur? Quod ita esse respondente illo, cœpit Solon caput cedere, aliaque & facere & dicere quæ solent magno mœrore oppressi. Tum ridens Thales, qui aderat: *Hæc me*, inquit, *ô Solon!* à ducenda uxore & tollendis liberis absteruerunt, quæ te etiam fortissimi animi virum nunc frangunt. *Te verò nihil hic nuncius moveat: hæc enim omnia facta sunt.*

## CAPUT LIV.

*Magna sit inter fratres concordia & benevolentia.*

1. **A**MICITIÆ eorum hominum quos familiaritas conjunxit, nihil aliud sunt, quam umbræ & imagines illius primæ, quam natura fratribus erga fratres indidit, caritatis. Hanc qui non colit studiosè ac veneratur, an fidem facere cuiquam potest, se aliis esse benevolum?

Sanguinis conjunctio devincit caritate homines. Magnum est enim eadem habere monumenta majorum, iisdem uti sacris, sepulcra habere communia.

Quis amicior est, quàm frater fratri? Aut quem alienum fidum invenies, si tuis hostis fueris.

Silurus, Scytharum rex, morti proximus, afferri fasciculum hastilium jussit, eumque, ut erat colligatus, dedit confrigendum filiis octoginta. Cum id quisque se posse facere negasset; ipse, soluto fasciculo, singula hastilia faciliè confregit: ita docens illos, si concordessent, insuperabiles fore: si dissiderent, infirmos futuros.

2. Ego nostra ætate non minus raram fratrum amicitiam video esse, quàm fuere quondam fratrum inimicitia: quæ quia naturæ legi adversabantur, in tragædiis & theatris publicè sunt exagitatae.

L. Paulus Æmilius filiarum alteram Catonis filio in matrimonium dedit, alteram Ælio Tuberoni, viro optimo, & qui fortissimè paupertatem tulit. Sexdecim erant Ælii, qui omnes cum numerosa sobole & uxoribus in ædibus perangustis concordī animo habitabant. At hujus nostræ ætatis fratres & cognati, inquit Plutarchus, nisi multum inter se spatii interjecerint, nisi muris, fluminibus, regionibus distinxerint patrimonia & rem familiarem, non cessant à mutuis contentionibus.

3. Cum mortuus est pater, rectum est fratres magis etiam quam prius studiosos esse retinendæ mutuæ benevolentiæ, neque ad paternam hereditatem accedere, quasi ad spolia ex hoste diripienda, imitantes pessimum exemplum Chariclis & Antiochi, qui relictum è patre poculum argenteum ac vestimentum in duas partes discissum abstulerunt. Diligent ergò observent illum herciscendæ hereditatis diem, qui, aut discordiæ inimicitiaque implacabilis, aut concordiæ amicitiaque principium esse solet.

Mortuo L. Paulo Æmilio, P. Scipio Æmilianus cum fratre Fabio, heres relictus, animum verè fraternum in eum ostendit. Nam cum illum videret re familiari minus, quam se instructum esse, universam hereditatem, quæ sexaginta talentis & pluris æstimabatur, ei concessit. Sic enim demum Fabius opibus æqualis ipsi erat futurus. Quod factum cum ab omnibus celebraretur, aliud quoque clarius animi sui specimen dedit. Nam cum Fabius in funere patris gladiatores dare constituisset, neque cum sumptum facile posset sustinere; Scipio dimidiam impensæ partem de suo est largitus. Hujusmodi vero impensa non minor triginta talentis tum solebat esse, si quis magnificè munus gladiatorum edere vellet. Cum Scipionis quoque mater Papiria paulo post de vitâ decessisset, universam hereditatem concessit sororibus, tametsi nulla pars bonorum legibus ad eas rediret.

Æternam sibi apud posteros famam paravit Proculeius paterno in fratres animo. Eques Romanus fuit, Augusti amicus. Patre mortuo, patrimonium cum fratribus Murena & Scipione æquis partibus diviserat: at illi bello civili bonis omnibus spoliati sunt. Quam calamitatem ut leniret Proculeius, facultates omnes suas cum fratribus iterum est partitus. Unde Horatius dixit;



Vivet extento Proculeius ævo ,  
Notus in fratres animi paterni.

4. Operæ prætium est disceptationem audire fratrum barbarorum , non de agelli particula , non de mancipiis , non de pecore , sed de ipso Persidis regno. Cùm Darius Persarum rex obiisset , certamen de regno ejus ortum est inter Artamenem maximum natu filiorum ejus , & Xerxem : quod quidem concordi animo detulerunt ad patrum suum Artaphernem , velut ad domesticum judicem. Ille , domi cognitâ causâ , Xerxem præposuit. Porro adeo fraterna contentio fuit , ut ne victor insultaverit , nec victus doluerit , ipsoque litis tempore invicem dona miserint. Jucunda quoque inter se & fida convivia habuerunt : & judicium sine ullo convicio fuit. Adeo tum fratres moderatiùs inter se maxima imperia dividebant , quàm nunc exigua patrimonia partiantur.

5. Antiochus , cognomento Accipiter , adversus Seleucum fratrem de regno bellum gerebat. Cùm tamen Seleucus à Galatis victus , nusquam appareret & interfectus putaretur ; Antiochus purpuram deposuit , pallâque veste sumptâ , & clausâ regiâ , fratrem luxit. Paulo post cùm audivisset illum vivere , & alium exercitum colligere , in publicum progressus , Diis sacra propter salutem fratris fecit , & subditas sibi gentes in signum lætitiæ coronas gestare jussit.

6. Darius Histaspis filius Persarum rex , custodiam tradi jusserat Intaphernem unum è purpuratis , cùm liberis atque omni familia necandum. Exanimata Intaphernis uxor ad regias fores statim advolavit : & cùm nec lacrymis , nec precibus modum faceret ; hoc illi rex concedere se dixit , ut si quem ex omnibus morti additis saluum præ ceteris cuperet , is ei condonaretur. Quos quia omnes ex æquo amabat mulier , diu inops consilii permansit. Tandem fratrem sibi postulavit.

tulavit condonari. Quod miratus rex, quæsit cur maritum uxor, filios mater negligens, fratrem elegisset, qui videbatur minus jucundus ac carus futurus esse. Tum illa: *Rex, inquit, maritus mihi alius, atque alii liberi possunt contingere, his amicis, si Dii voluerint: aliis vero frater minime, utpote extinctis jam parentibus meis.* Hoc responso delectatus rex, fratrem, quem optaverat, dimisit, & filium natu maximum: ceteros iussit ad mortem rapi.

7. Bello Anthiochi magno & gravi, cum Lucio Scipioni obvenisset Asiæ provincia; quia parum in eo putabatur esse animi, parum roboris, Senatus belli gerendi curam mandari volebat collegæ ejus Cæso Lælio, Lælii sapientis patri. Surrexit tunc P. Africanus, frater major L. Scipionis, & illam ignominiam familiæ deprecatus est: dixit, in fratre suo summam virtutem esse, summumque consilium: Seque ea ætate, iis rebus gestis, ei legatum futurum promisit. Quod cum ab eo esset dictum, nihil est de L. Scipionis provincia commutatum. Itaque frater natu major, minori legatus in Asiam profectus, tandiu eum concilio operaque adjuvit, donec ei triumphum & cognomen Asiatici peperisset.

8. Cum admodum puer esset Cato Uticensis, querentibus ex eo quibusdam, quem omnium maximè diligeret, respondit, fratrem. Iisdem rursus quærentibus, quem secundum maximè diligeret, fratrem quoque respondit. Interrogatus de tertio, idem responsum dedit: donec illi à percontatione desisterent. Crevit cum ætate illa in fratrem benevolentia & reverentia: ad ejus latere non discedebat, ei se in cunctis obedientem præbebat, & annos natus viginti sine fratre Cæpione numquam cœnaverat, non in forum progressus, non peregrè profectus fuerat. Utriusque probi erant mores: at Catonis vita severior. Itaque Cæpio, cum ipsius frugalitas & tempe-

rantia laudabatur, fatebatur se virum frugì videri posse, si cùm multis Romanorum compararetur: *Et ubi, inquit, cùm Caronis vitâ comparo meam, nihil mihi videor à Sippio differre.* Erat autem ille Sippius vir nequam & luxu perditus.

Bello adversus Spartacum voluntaria stipendia fecit Catò fratris causâ, qui tùm Tribunus militum erat. Cùm deindè accepissent eum Asiam petentem incidisse in morbum Æni in Thracia; licet tùm gravis tempestas sæviret, neque ad manum esset magna navis, solvit è portu Thessalonice exiguâ navi onerariâ cum duobus tantum amicis & tribus servis: & penè haustus fluctibus, tandem præter spem incolumis evasit. At fratrem modò defunctum reperit. Tum verò & questibus, & lacrymis, & iis omnibus quæ dolor suadet, totum se tradidit, tam pius & lenis in suos, quàm asper & invictus adversus voluptates, minas & iniquas postulationes. Mortui corpus quàm magnificentissimo potuit funere extulit, & conspicuum è pretioso marmore tumulum ei in Æni foro extrui curavit suis impensis. Vela postea factatus, cùm suaderent amici ut Cæpionis reliquias in alio navigio poneret, animam se priusquam illas relicturum respondit, atque ita solvit.

9. Appolonis mater Eumenis regis, ac trium præterea filiorum, nempe Attali, Philetæri, & Athenæi, sæpissimè se beatam prædicabat, & Diis gratias agebat, non propter divitias atque imperium, sed quòd tres è filiis suis videret esse fratris natu-maximi quasi satellites, ita ut ille sine ullo metu versaretur in medio ipsorum gladios & hastas ferentium. Contra Xerxes, Ochum filium infidias fratribus itruxisse cùm comperisset, mœrore est extinctus.

10. Si qua fortè inter fratres controversia exorta est, ea statim aut ab ipsis aut arbitrorum judicio dirimatur: imitandique sunt Pythagorei, qui

non cognatione, sed doctrinæ duntaxat societate, conjuncti, si quando per iram ad maledicta prorupissent, ante solis occasum dextris mutuo datis, & factâ invicem salutatione, in gratiam redibant.

Frustra & nullius rei causâ nobis natura largita est mansuetudinem, & patientiam moderationis animi filiam; aut his utendum est maximè erga cognatos & affines.

Est hominis suos, ut jubet natura, ex animo amantis, petere gratiam delicti sui ubi adversum eos peccavit; & ubi ipse ab illis læsus est, veniam illis ultro dare, antequam petant. Verum nescio an nemo ad dandam veniam difficilior sit, quam qui illam postulare sæpius meruit.

Celebris est in Scholis fama Euclidis Socratici, quod auditâ iniquâ & belluinâ voce fratris, qui dixerat: *Peream, nisi te ulciscar*; respondit: *ego verò peream, nisi tibi persuasero, ut positâ irâ, nos ames, ut olim.*

## CAPUT LV.

*Nisi in bonis amicitia esse non potest.*

I. **E**ST amicitia nihil aliud nisi summa consensio rerum divinarum atque humanarum inter aliquos cum benevolentia & caritate. Quam quidem haud scio an quicquam, exceptâ sapientia, melius homini sit à Diis immortalibus datum.

Omnium societatum nulla præstantior est, nulla firmior, quàm cum viri boni, moribus similes, sunt familiaritate conjuncti. Hoc enim sentio, nisi in bonis amicitiam esse non posse. Ipsa virtus amicitiam gignit & continet, nec sine virtute esse amicitia ullo pacto potest. Virtus, virtus, inquam, conciliat amicitias & conservat. Homines malos aliquando videmus eadem cupere, eadem odisse, eadem metuere: sed quæ inter



bonos amicitia dicitur, hæc inter malos factio est.

## CAPUT LVI.

*Amicitia sublata, omnis est è vitâ sublata jucunditas.*

1. **E**go vos hortor, ut amicitiam omnibus humanis rebus anteponatis. Nihil quippe est tam naturæ aptum, tam conveniens ad res vel secundas vel adversas. Nam ut secundas res facit amicitia splendidiore, sic adversas facit leviores. Quis esset tantus fructus in prosperis, nisi haberet, qui illis æque ac tu ipse gauderet? Adversas vero ferre difficile esset, sine eo qui gravius etiam illas, quàm tu, ferret.

Quid dulcius, quàm habere aliquem quicum omnia audeas sic loqui, ut tecum?

Quoniam res humanæ fragiles caducæque sunt, semper aliqui acquirendi sunt, quos diligamus, & à quibus diligamur. Charitate enim benevolentiaque sublata, omnis est è vitâ sublata jucunditas.

1. Una est amicitia in rebus humanis, de cujus utilitate omnes uno ore consentiunt. Divitias despiciunt ii, quos tenuis victus cultusque delectat, honores, quorum cupiditate multi inflammantur: quidam ita contemnunt, ut nihil inanius, nihil levius esse existiment: itemque cetera, quæ aliis admirabilia videntur, alii sunt qui pro nihilo putent. De amicitia omnes ad unum sentiunt, *sine amicitia vitam esse nullam*. Quin etiam si quis est eâ asperitate & immanitate naturæ, ut congressus hominum fugiat atque oderit, qualem fuisse Athenis Timonem nescio accepimus; tamen is pati non possit, ut non anquirat aliquem, apud quem evomat virus acerbitalis suæ.

3. Timon, de quo hic Cicero, licet *Misanthropus*, id est humani generis osor, appellaretur, amico utebatur uno, cui nomen Apemantus, quem ob morum similitudinem admittebat. Is tamen cum fortè apud Timonem cœnasset, exclamassetque: *Quam dulce est, ô Timon, hoc convivium ! Ita sanè*, inquit ille, *si tu non adesses.* Eidem Apemanto interroganti cur Alicibiadem juvenem ferocem atque audacem diligere videretur, respondit Timon, ideo sibi carum esse adolescentem, quòd illum prævideret fore populo Atheniensi magnorum malorum causam.

Prodiit aliquando Athenis in concionem. Quod cum præter consuetudinem faceret; magna omnium expectatio fuit, quidnam afferret. Tum ille è suggestu, in quem ascenderat: *Athenienses*, inquit, *est mihi area quædam in qua crevit ficus, unde multi voluntario suspendio vitam finire. Quoniam autem in area illa ædes extruere mihi in animo est, antequàm ficum excindam, vos monitos volo, ut, si qui de suspendio cogitant, maturent quàm maximè.*

## CAPUT LVII.

*In eligendis amicis cautio est adhibenda.*

1. **I**N amicis eligendis negligentes ne simus.

Augustus amicitias non facile admisit, & constantissimè retinuit.

Ne nimis citò deligere incipiamus: neve non dignos. Digni autem amicitia sunt ii, in quibus ob virtutem ineest causa cur diligantur. Rarum eorum genus; & quidem omnia præclara, rara, nec quicquam est difficilior, quàm reperire quod sit omni ex parte in suo genere perfectum. Sed plerique in rebus humanis nihil bonum norunt, nisi quod fructuosum sit: & amicos, tanquam pecudes, eos potissimum eligunt, ex quibus spe-

rant se maximum fructum esse capturos. Ita carent pulcherrimâ illâ & maximè naturali amicitia per se & propter se expetendâ.

2. Nihil æque oblectare potest animum, quàm amicitia fidelis ac dulcis. Quantum bonum est, ubi nactus es ejusmodi amicos, in quorum pectora tutò secretum omne descendat, quorum sermo sollicitudinem tuam leniat, hilaritas tristitiam dissipet, prudentia bona consilia afferat, conspectus ipse delectet.

Amicos, quantum fieri poterit, vacuos à cupiditatibus eligemus. Serpunt enim vitia, & in proximum quemque transfiliunt, & contactu nocent. Itaque ut in pestilentia curandum est, ne affideamus corporibus jam corruptis & morbo flagrantibus, quia in afflatu ipso periculum est: ita in legendis amicis dabimus operam, ut, quàm minimè vitiis inquinatos assumamus. Neque hoc præcipio tibi, ut neminem nisi omnino sapientem velis admittere. Ubi enim istum invenies, quem tot sæculis quærimus? Pro optimo est minimè malus. In tanta bonorum egestate, ne minimè studiosa fiat electio.

## CAPUT LVIII.

*Amicus amicum non minùs diligit, quàm seipsum.*

**S**I quis sapiens amicitiam tueri velit, eodem modo, erit affectus erga amicum, quo in seipsum; & eosdem labores ejus causâ suscipiet, quos propter se susceperit. Lætabitur amici lætitiâ æquè ac suâ, & pariter dolebit ejus angoribus. Est enim, ut dicunt, sœdus quoddam sapientum, ut non minùs amicos quàm seipsos diligant. Quod & fieri posse intelligimus, & aliquando videmus: perspicuumque est nihil ad jucundè vivendum reperiri posse tali conjunctione aptius.

Damon & Pythias Pythagorei tam fidelem in-

ter se amicitiam junxerant, ut mori parati essent alter pro altero. Cum eorum alter à Dionisio tyranno nece damnatus, impetrasset tempus, quo profectus domum, res suas ordinaret, alter vadem se dare tyranno pro reditu ejus non dubitavit, ita ut, si ille non revertisset ad diem, moriendum esset sibi ipsi. Igitur omnes, & in primis Dionysius, cupidè expectabant navæ atque ancipitis rei exitum. Appropinquante deinde definita die, nec illo redeunte, unusquisque stultitiæ damnabat tam temerarium sponforem. At is nihil se de amici fide metuere prædicabat. Et verò ille ad diem dictam supervenit. Admiratus eorum fidem tyrannus, petivit ut se in amicitiam tertium reciperent, & supplicio liberavit eum qui morte erat plectendus.

---

## CAPUT LIX.

*Amicitia unus fit ex pluribus.*

1. **Q**UISQUE eorum, in quibus eadem studia sunt, eademque voluntates, æque altero delectatur ac se ipso: efficiturque id quod Pythagoras vult in amicitia, ut unus fiat ex pluribus.

Homo se ipse naturâ diligit & alterum anquirit cujus animum ita cum suo misceat, ut efficiat penè unum ex duobus. Estque verus amicus tanquam alter idem.

Alexander, victo apud Issum Dario, ad captivas matrem conjugemque ejus præmisit quosdam è suis, qui nunciarent ipsum venire ad eas invisendas: moxque, inhibita commitantium turbâ, earum tabernaculum intravit cum Hephæstione. Is longè omnium amicorum carissimus erat regi, cum ipso pariter educatus secretorum omnium arbiter: libereque admonendi eum, jus non alius habebat, quod tamen admo-



dum prudenter usurpabat. Ætate erat par regi : sed corporis habitu præstabat. Ergo reginæ illum regem esse ratæ , Persarum more veneratæ sunt. Inde erroris admonita Syfigambis Darii mater , advoluta est pedibus Alexandri , ignorantem numquam antea nisi regis excusans, Quam ille manu allevans : *Non Errasti* , inquit , *mater : nam & hic Alexander est.* Utri prius gratulemur ? Alexandro , qui hoc dicere voluit , an Hephæstioni , cui audire contigit ?

3. Erat Alexandro præter Hephæstionem amicus alter Craterus. Diverſum utrique ingenium , diverſi mores. Hephæstion ad Alexandri voluntatem sese accommodans , plaudebat ei peregrina instituta æmulanti & amplectenti. Craterus morum patriorum retinens , consulebat Alexandri gloriæ , & quæ essent maximè utilia suadebat. Alexander Hephæstionem diligebat magis : at Craterum pluris faciebat. Per illum Barbaris responsa dabat : per hunc Macedonibus & Græcis.

## C A P U T L X.

*Amico omnia credenda.*

**D**iu cogita an tibi in amicitiam aliquis recipiendus sit. Cum placuit recipi , toto illum pectore admittite : tam audacter cum illo loquere , quàm tecum. Tu quidem ita vive ut nihil dicas aut facias nisi quòd committere etiam inimico possis : sed quia quædam sunt quæ arcana dici solent , hæc cum amico communica : Fidelem si putaveris ; facies.

Quidam narrant obviis quæ tantum amicis committenda sunt , & in quolibet aures exonerant quidquid illos urit. Quidam contrà etiam carissimis diffidunt , & interius premunt omne secretum. Neutrum faciendum est : utrumque enim vitium est , & omnibus credere , & nulli. Sed alterum honestius dico vitium , alterum tutius.

## CAPUT LXI.

*Res turpes amicum non rogemus, nec faciamus rogati.*

**Q**UÆ videntur utilia, honores, divitiæ, voluptates, & cetera generis ejusdem, hæc numquam amicitiae anteponenda sunt. At vir bonus neque contra rempublicam, neque contra jusjurandum ac fidem quidquam faciet, amici causâ. Nam si omnia facienda sint quæ amici velint, ejusmodi amicitiae conjurationes putandæ sunt.

Nulla est excusatio peccati, si amici causâ peccaveris. Nam æquè nefas est malum aliquod & facere rogatum, & rogare.

Hæc prima lex in amicitia sanciat, ut neque rogemus res turpes, nec faciamus rogati; sed ab amicis honesta petamus, amicorum causâ faciamus: nec expectemus quidem dum rogemur. Studium semper adsit, cunctatio absit.

2. Pericles ille Atheniensis, egregius vir ingenio, bonisque omnibus disciplinis ornatus, professus est quatenus amici causa progredi fas esse existimaret. Nam cum amicus eum rogaret, ut pro re causâque ejus falsum dejuraret; his ad eum verbis est usus: *Me amicis opitulari oportet, sed usque ad Deos.*

3. Simonides poëta, fretus eâ, quæ ipsi cum Themistocle erat, familiaritate, petiit ab eo aliquid injusti: quod negans Themistocles, dixit ei: *Neque tu, ô Simonide, bonus poëta fueris si carmina contra poeticæ artis leges condideris: neque ego bonus Magistratus, si quid contra patriæ leges causâ tuâ fecerim.*

4. Cum Pub. Rutilius Rufus amici cujusdam injustæ rogationi resisteret, atque is per summam indignationem dixisset: *Quid ergo mihi*

*opus est amicitia tuâ , quod rogo non facis ? Imò , respondit Rutulius , quid mihi tuâ , si propter te aliquid inhonestè facerem oporteat ?* Sciebat quippe vir sanctus tam contra officium esse tribuere amico quod non sit æquum , quam non tribuere id quod rectè , possimus : atque , si forte amici à nobis postulent quæ honesta non sunt , religionem & fidem esse amicitiae anteponendam.

## CAPUT LXII.

*Veritas & fides in amicitia retineantur.*

1. **V**ETUS est illa lex justæ veræque amicitiae ut idem amici semper velint : neque est ullum certius amicitiae vinculum , quam consensus & societas consiliorum & voluntatum. Nam idem velle , atque idem nolle , ea demum firma amicitia est. Itaque inter amicos , quorum emendati mores fuerint , sit omnium rerum , consiliorum , voluntatum , sine ulla exceptione , communitas.

2. Monendi tamen amici sæpè sunt & objurgandi : & hæc accipienda amicè , cum benevolè fiunt. Adhibenda autem diligentia est , ut monitio asperitate , objurgatio contumeliâ , careat. Verum quidem est Terentianum illud : *Obsequium amicos , veritas odium parit.* At in obsequio comitas tantum adsit : assentatio vitiorum adjutrix procul removeatur , quæ non modo amico , sed ne libero quidem , digna est. Aliter enim cum tyranno , aliter cum amico , vivitur. Hujus autem salus desperanda est , cujus aures veritati clausæ sunt , ita ut ab amico verum audire nequeat. Ut igitur proprium est veræ amicitiae & monere & moneri ; & qui monet , debet liberè facere , non asperè ; qui monetur , debet patienter ferre , non repugnanter : sic habendum est , nullam in amicitiiis pestem esse majorem ,

quàm adulationem, blanditiâ, assentationem. Scitum est illud Catonis, ut multa: *Acerbos inimicos melius de quibusdam mereri, quàm eos amicos, qui dulces videantur, illos verum sæpè dicere, hos nunquam.* Nulla porro amicitia est, cùm alter verum audire non vult, alter ad mentiendum paratus est.

Secretò amicos admone, lauda palam.

3. Quemcunque potuero, peccare prohibebo, multo magis amicum. Aliquando utar verbis durioribus, si hac ratione emendari illum spera-  
vero posse. An patiemur amicos sanabiles, & qui fieri boni possunt, si quid illos momorderit pe-  
rire, sublata admonitione, quâ & pater filium aliquando correxit, & uxor maritum aberran-  
tem ad se reduxit?

Qui non vetat peccare, cùm possit, jubet.  
Amici vitia si feras, facis tua.

Bis peccas, cùm peccanti obsequium ac-  
commodas.

Bonus animus nunquam erranti obsequium  
accommodat.

Consilium verum dare gaudeamus liberè. Plu-  
rimùm in amicitia valeat amicorum benè suaden-  
tium auctoritas: eaque adhibeatur ad monendum  
non modò apertè, sed etiam acriter, si res pos-  
tulabit, & adhibitæ pareatur.

Cùm Mœcenas Augusto Cæsari per quàm fa-  
miliaris esset & magnâ apud eum gratiâ valeret;  
eo animo fuit, ut proderet, quibus posset, no-  
ceret verbò nemini. Amicorum suorum nonnullos  
ad magistratus & imperia curavit promoveri, in  
Equestri ordine ipse permanens. Mira quoque  
ejus & ars & libertas fuit in Augusti animo flect-  
tendo ad mitiora, cum irâ incitatus esset. Exem-  
plum hoc unum erit instar omnium. Jus aliquando  
dicebat Augustus, & multos morte damnaturus vi-  
debatur. Aderat tum Mœcenas, qui per cir-  
cumstantium turbam perrumpere, & ad tribu-



nal propius accedere conatus est. Quod cum frustra tentasset; hæc verba in tabella scripsit: *Surge tandem carnifex*. Eamque tabellam ad Augustum projecit. Quâ lectâ, eis statim surrexit, & nemo est morte multatus.

4 In Socrate iræ signum erat vocem submittere, loqui partiùs. Deprehendebatur itaque à familiaribus, & coarguebatur. Nec erat illi exprobratio latitantis iræ ingrata. Sic iram ejus multi intelligebat, nemo sentiebat. Sensissent autem, nisi amicis objurgandi se jus idem dedisset quòd ipse sibi in amicos sumpserat. Quanto magis hoc nobis faciendum est? Rogemus ergo amicissimum quemque, ut adversus nos libertate utatur tunc maximè; cum minimè illam pati videbimur posse; nec assentiatur iræ nostræ aut cupiditati. Optimum est prospicere impedimenta notis vitiis.

5. Admoneri bonus gaudet: pessimus quisque correptorem asperrimè patitur. Xenocratem Chalcedonium Plato Magister & amicus, rusticitatis arguebat, eique sæpius dicebat: *Xenocrates, Gratiis sacra facito*. Quam reprehensionem admonitionemque ille semper æquo & grato animo accepit: & aliquando cuidam ipsum incitanti ad repellendam Platonis objurgationem, sapienter prorsus respondit: *At illud mihi utile est*.

## CAPUT LXIII.

*Omnia possidentibus sæpè amicus deest.*

I. **N**EMINEM tam altè supra cæteros fortuna extulit, ut non illi aliquid desit. Si cætera adsint, abest plerùmque res omnium præstantissima, amicus qui verum dicat, & ab errore vindicet hominem deceptum consuetudine audiendi blanda pro rectis. Regibus ac potentibus viris vix quisquam ex animi sui sententiâ suadet dissua-

derque

detque: sed adulandi certamen est, & una contentio, quis blandissimè fallat. Ignorant itaque vires suas, & se tam magnos rati, quam audiunt iræ obsequuntur, quàm nemo revocat, bella temerè suscipiunt, & in summum rerum omnium suarum discrimen veniunt.

2. Cum bellum Græcis indiceret Xerxes, nemo non impulit animum ejus timentem, oblitumque quàm caduca essent ea quibus confideret. Alius aiebat Græcos non lauros nuncium belli, & ad primam adventatis exercitus famam terga versos. Alius, nihil dubii esse, quin Græcia non vinci solum, sed etiam obrui, posset, illâ, quam secum trahebat, innumerabili militum multitudine. Cùm in hunc modum multa jactarentur, quæ concitarent Regem nimiâ ætimatione sui furentem; Demaratus Lacedæmonius solus dixit: *Ipsam illam, quâ placeret sibi, militum turbam indigestam & gravem non facile regi posse: & periculum esse, ne pauci Lacones obstinentes corporibus suis committis sibi Græciæ angustias atque aditus, morarentur tot illa gentium milia.* Acciderunt quæ Demaratus prædixerat. Victus Xerxes, & regnum suum trepidâ fugâ repetere coactus, Demarato gratias egit, quod solus sibi verum dixisset.

3. Antiochus cum in venatione feram persequendi studio ab amicis & servis aberrasset, in casam pauperum hominum intravit, ignotus. Cùm iis cœnans, sermonem de Rege iniecit, ut sciret quæ esset hospitum de se opinio, audivitque, *Regem in cæcis videm bonum & laude dignum esse; sed amicis utentem malis purina negligere: & sæpè quæ necessaria essent nihil curare, quod venationi plus æquo indulgeret.* Tacuit tum quidem Antiochus: Sed postquam orto sole ad casam illam venere regii satellites, & purpuream vestem cum diademate attulere; converso sermone ad regia illa insignia: *Certe, inquit, ex*

quo die vos sumpsi, hari primum veros de me sermones audivi.

4. Perfectus hand dubiè princeps enituiſſet Valentinianus, ſi ei contigſſet, aut carere infidis hominibus, quibus ſe ſe quaſi fidiffimis prudentiffimis ne dederat, aut uti probatis eruditiffique monitoribus.

## C A P U T L X I V.

*Veros amicos reparare difficile eſt.*

1. **C**UM Augustus audiviſſet tandem Juliæ filiæ ſuæ flagitia, quæ tam diu nescierat; parum potens iræ, patefecerat, eam relegando. Deinde, ubi interpoſito tempore, in locum iræ ſubit verecundia; gemens quòd non illa ſilentio preſſiſſet (quia quarumdam rerum turpitudò, aliquando etiam ad eum redit qui eas vindicat) sæpè exclamavit: *Horum mihi nihil accidiſſet, ſi aut Agrippa aut Mæcenus vixiſſet.* Intelligebat ſcilicet quàm utile ſit Regi aut principi viro fidum amicum habere, quàm damnoſum carere. Imrante Auguſto cæſæ ſunt legiones Romanæ, aliæ protinus ſcriptæ. Fracta claffis, & intrà paucos dies natavit nova. Savitum eſt in opera publica ignibus; surrexerunt meliora conſumptis. Totâ reliquâ Auguſti vitâ Agrippæ, & Mæcenatis vacavit locus. Adeo Imperatori, tot millia hominum habenti, duos reparare difficilè fuit.

Amicum perdere, eſt damnorum maximum.

2. CUM Darius Xerxis pater malum granatum aperuiſſet, & quidam ab eo fiſcitaretur, quarum rerum tantum numerum habere optaret, quantus illic ineſſet granorum numerus? Reſpondit: *Zopyrorum.* Fuerat enim Zopyrus Dario amiciffimus, ſicque illi deditus, ut ultro ſe verberibus toto corpore lacerari, naſum, aures & labia ſibi præcidi voluerit, ad revocandam in ejus poteſtatem Babiloniam.

## CAPUT LXV.

*Amici thesauri Regum sunt.*

1. **N**ON exercitus, neque thesauri præsidia regni sunt: verum amici quos neque armis cogere, neque auro parare queas; officio & fide pariuntur. Interrogatus Alexander ubi thesauros haberet? *Apud amicos*, respondit Idem cum ad Achillis tumulum venisset; *felicem eum sibi videri*, dixit, *quod dum viveret, fidum amicum (Patroclum) natus esset, & post fata magnum præconem (Homerum.)*

Cum plurimis amicitiiis fortuna Principum indigeat; præcipuum est Principis opus, amicos parare.

Nullum majus boni imperii instrumentum est, quam boni amici.

2. Cum à Pisistrato, qui principatum Athenis invaserat, amici quidam descivissent, atque in arcem Phylam secessissent; accessit ad eos, vestem stragulam colligatam ferens secum, ac mirantibus illis, quærentibusque quid vellet? *Aut*, inquit, *persuadere ut mecum redeatis; aut, si minus id persuasero, manere vobiscum: ideoque instructus veni.*

3. Trajanum Imperatorem laudat Plinius quod & amicos diligit, & ipse diligatur. In animis hominum exoleverat, priscum mortalium bonum, amicitia: cuius in locum migraverant assentationes, blanditiæ, &, pejor odio, amoris simulatio. In principum domo nomen tantum amicitiae inane manebat. Nam quæ poterat esse inter eos amicitia, quorum alii sibi domini, alii servi, videbantur? Tu hanc pulsam & errantem reduxisti. Habes amicos, quia amicus ipse es. Neque enim amor, ut alia, subjectis imperatur; neque est ullus affectus tam erectus & liber, & dominationis impatiens, nec qui magis vices



exigat. Dilligis ergo, & diligeris: atque in eo tota gloria tua est qui superior factus, descendis in omnia familiaritatis officia, & in amicum ex Imperatore submitteris: imò tunc maxime Imperatores, cum ab eis ex imperatore agis. Iucundissimum est in rebus humanis amari: sed non minus amare, quorum utroque ita frueris, ut, cum ipse ardentissime diligas, ardentius tamen diligaris.

## CAPUT LXVI.

*Amicus certus in re incerta cernitur.*

I. **I** PSE amicos res optimæ pariunt, adversæ probant.

Pescunt fidem secunda, at adversa exigunt.

Cum Catoni Uticensi obvenisset morte patruelis sui Catonis hereditas centum talentorum; omnia in pecuniam redegit, quam amicis, ubi cuiquam opus erat, commodabat. Quin etiam & prædia sua & servitia eorum causâ aliquando oppugnerabat.

Sinceræ fidei amici, præcipue in rebus adversis cognoscuntur: quidquid enim tunc præstat, totum à constanti benevolentia proficiscitur. At qui fortunatum amicum colit, ille magis causâ suâ adulari, quam vere diligere, potest videri. Libentius igitur & diutius servavit posteritas nomina eorum, qui amicos in adversis casibus non deseruerunt, quam illorum, qui amicos opibus florentes coluerunt. Nemo de Sardanapali familiaribus loquitur: Orestes potius notior est propter Pyladem amicum, quam propter Agamemnonem patrem. Illorum amicitia, si qua tamen fuit, in deliciis & luxuria turpiter extincta est: horum verò enituit communi calamitate, & immortalem apud posteros famam esse adepti. Quid enim celebratum magis, quam illa Pyladis atque

Orestis coram rege Thoante plena amoris contentio, ut rueretur? Dum alter nititur ab altero depellere crimen & criminis poenam, atque in se transferre; dum, ignorante rege uter eorum sit Orestes, Pylades Orestem se esse dicit, ut pro illo necetur: Orestes autem, ita ut est, Orestem se esse asseverat. Qui clamores Romæ totâ caveâ excitati sunt in M. Pacuvii de Oreste & Pylade fabulâ; Spectantes plauderant in re ficta: quid arbitramur in verâ fuisse facturos? Facile indicabat ipsa natura vim suam, cum homines, id quod facere ipsi non possent, rectè fieri in altero judicarent.

2. Mutinâ fugiens D. Brutus, ut cognovit missos ab Antonio equites ad se interficiendum advenisse, in loco quodam cum paucis suorum delituit, morti se substracturus. Eò factâ ab equitibus irruptione, Servius Terentius fidei mendacio Brutum se esse simulavit, obsecrat ipsâ loci suffragante, & corpus suum objecit trucidandum. Verùm cognitus à Furio, cui Brutiana cædes mandata fuerat, non potuit nece suâ amici supplicium avertere: sic invitus fortuna cogente, vixit. Incepto egregio, non autem irrito eventu, æstimari debet Servii Terentii fides in amicum. Quamquam enim ei, sicut cupierat, pro amico suo perire non contigit; ipse extinctus est, quantum in illo fuit, & D. Brutus periculum mortis evasit.

3. Laudatur alterius Romani in amicum extinctum constans caritas. T. Volumnius Equestriloco natus, M. Lucillum familiariter coluebat. Eum à M. Antonio interemptum cum vidisset, & liceret fugâ vitæ consulere; exanimi amico adhæsit, sic in lacrymas & gemitus profusus, ut nimîâ pietate causam sibi mortis accerferet. Namque propter præcipuam, & perseverantem lamentationem ad Antonium pertractus est. Cujus postquam in conspectu stetit: *Jube me,*

inquit, protinus ad Luculli corpus perducì & occidì. Neque enim absumpto illo superesse debeo, cum ei infelcis adversum te mihi iuræ auctor fuerim. Facile impetravi ab Antonio: ductusque quò voluerat, Luculli dextram avidè osculatus est, caputque ejus, quod abscissum jacebat, pectori suo applicuit: deinde cervicem suam interfectoris gladio præbuit.

## CAPUT LXVII.

*Vulgare amici nomen, sed rara est fides.*

Cum parvas ædes sibi fundasset Socrates, E populo sic nescio quis, ut fieri solet: *Quæso, tam angustam talis vir ponis domum? Utinam, inquit, vris hanc amicis impleam!*

Amicus, res rara, quæ non alibi magis deest, quàm ubi creditur abundare. Non sunt isti amici, qui agmine magno pulsant januam regum, aut Reges simulantium. Atria hominibus plena sunt, amicis vacua.

I lud amicitia sanctum ac venerabile nomen, Re jam pro vili sub pedibusque jacet.

Turpe quidem dictu, sed si modo vera fatemur. Vagus amicitias utilitate probat.

Cura quid expediat prior est, quàm quid sit honorem:

Et cum fortuna statque caditque fides.

Cum fortuna manet, vultum servatis amici;

Cum cecidit, turpi vertitis ora fuga.

Donec eris felix, multos numerabis amicos:

Tempora si fuerint nubila, solus eris.

Harundines æstivo tempore præsto sunt, frigore pulsæ recedunt. Ita falsi amici sereno vitæ tempore præsto sunt: simulatque adversam fortunam viderint, omnes avolant.

## CAPUT LXVIII.

*Nihil est naturæ hominis accommodatius beneficentia.*

1. **I**USTITIÆ pars est beneficentia, quam eandem vel benignitatem vel liberalitatem appellare licet. Eâ nihil est naturæ hominis accommodatius: & in hominum genere nulla melior est natura, quàm eorum, qui se natos ad homines juvandos, tutandos, conservandos arbitrantur.

Gratissima est liberalitas: eamque eo studiosius plerique laudant, quod potentium ac divitum hominum bonitas commune perfugium est omnium. Itaque nihil est tam popolare, quàm bonitas.

2. Cimon Atheniensis & pietate in patrem, & in cives benevolentia insignis fuit. Cum nihil haberet quod dare, præter seipsum, posset, ad redimendum sepulturæ jus parenti suo Milniadi, qui in carcere coniectus ibique mortuus fuerat; ejus vincula in se transtulit. Aliquot post annos è custodiâ emissus; magnâ jure civilis & rei militaris præsentia celeriter ad Principatum pervenit. In quo tantâ fuit liberalitate, ut, cum parvis locis hortos prædiaque haberet, nunquam in eis custodem imposuerit fructus servandi gratiâ: ne quis impediretur exominis rebus ejus frueretur. Semper eum pedissequi cum nummis sunt secuti, ut, si quis opis ejus indigeret, haberet quod statim daret, ne differendo videretur negare. Sæpè cum aliquem videret minus bene vestitum, suum amiculum dedit. Nulla opera ejus, nulli res familiaris defuit. Multos locupletavit. Complures pauperes mortuos, qui non reliquerant unde esserentur, suo sumptu extulit. In mè itaque mirandum est, vitam ejus, qui se sic gessit, ab infamia tuam fuisse, & mortem civibus acerbam.



3. Pisistratus summâ æquitate gessit Athenis Principatum, quem iniquè invaserat : &, p̄arter dominandi studium, nullus eo melior civis fuit. Si quos otiosos cerneret in foro obambulantē, ad se vocatos interrogabat cur sic otiosi essent? Si verò illi se aut frumenta aut jumenta non habere respondissent; jubebat, his à se acceptis, abire & laborare. Quando in publicum prodibat, comitabatur eum pueri duo tresve, qui minutos nummos ferrent errogandos egenis, maxime in mortuorum sepulturam. Præterea liberum in hortos ac prædia introitum omnibus permittebat, & ea capiendi, quibus opus esset, facultatem.

4. Gillias Agrigentinus, vir opibus excellens, sed animo, quàm divitiis locupletior, semper in errogandâ potius, quàm in contrahendâ pecuniâ fuit occupatus: adeo ut domus ejus quasi quædam munificentiae officina crederetur. Illinc enim apta publicis usibus ædificia extruebantur, illinc grata populi oculis spectacula edebantur, illinc deficienti annonæ subsidiaoriebantur: privatim verò alimenta inopiâ laborantibus, doctes virginibus paupertate præstis erogabantur: hospites quoque tum urbanis tum rusticis testis benignissimè excepti variis muneribus ornatis dimittebantur. Quodam verò tempore compulsos vi tempestatis in prædia sua quingentos equites Galentium aluit ac vestivit. Quid multa? Eum prope modum ipsius liberalitatis præcordia habuisse constat. Ergo quod Gillias possidebat, omnium quasi communè patrimonium erat. Colloca ex contraria parte arces clausas seris, ad nullas preces & miseras aperiendis; nonne longe præstantiorem existimabis nobilem illam Gilliæ impensam, quàm tristem & duram hanc custodiam?

5, Multitudinis benevolentia beneficiis capitur maxime: secundo autem loco benefica voluntate, etiamsi res fortè non suppetit. Ipsa quippe

fama & opinio liberalitatis, beneficentiæ, justitiæ, fidem, nos eis amicos facit, in quibus illas in se remur. Hinc Titus, quia natura erat benevolentissimus, amor ac dilectio generis humani appellatus est. Hoc illi propositum & solemne fuit, ne quem accedentium ad se sine spe dimitteret. Admonentibus vero amicis, quasi plura polliceretur quam præstare posset: *Non oportere, ait, quemquam a sermone Principis tristem discedere.* Atque etiam recordatus quondam super cœnam, quod nihil ei quam toto die præstitisset, memorabilem illam meritoque iactantem vocem edidit: *Amici, diem perdidit.* Quæ iam sub eo fortuita ac tristicia acciderunt, ut incendium Romæ per triiduum, & pestilentia quanta rarò aliàs. In his ac talibus advertis non modò Principis sollicitudinem, sed & parentis affectum singularem præstitit, nunc consolando, nunc opitulando quatenus suppeteret facultas. Extincto tam benigno Imperatore, maiore civium damno, quam suo, omnes tanquam in propria orbitate doluerunt, & Senatus tantas mortuo gratias egit, laudesque congefuit, quantas ne vivo quidem unquam & præsentem.

Alexander Severus memoriâ complectebatur & descriptum habebat, quid cuique præstisset. Et si quos sciret vel nihil petisse, vel non multum, vocabat eos, & dicebat singulis: *Quid est cur nihil petis? An me tibi vis fieri debitorem?*

His & horum similibus exemplis beneficentia generis humani nutritur atque augetur; hæ sunt ejus faces, hi stimuli.

6. Versabatur in regia Ptolomæi Regis adolescens nomine Galetes, facie quidem pulcherri-  
mus, at morum suavitate & animi in omnes benignitate magis insignis: ita ut rex cui erat carissimus sæpe exclamaret: *O benignum caput! nulli tu unquam ullius mali causa fuisti; sed contra multis multa bona præstitisti.* Cum aliquando hic

adolescens , regi comes in equo sedens , vidisset procul aliquos ad supplicium trahi ; oblatam benè faciendi occasionem non prætermisit : sed statim : *O rex* , inquit , *quandoquidem prosperâ quâdam horumce hominum qui morte damnati sunt , fortunâ , equis nunc vehimur , age , si tibi videtur cursum intendamus , ut illis in tali temporis articulo quasi servatores Dii appareamus.* Plurimum voluptatis ex Galetis consilio , cepit rex , & animum ejus ad miseri ordiam propensum deamans , cùm morti adductos servavit , tum amor in illum suum multum addidit.

---

## CAPUT LXIX.

*Multas cautiones habeat beneficentia.*

1. **I**N exercenda beneficentia multæ sunt cautiones adhibendæ. Videndum est primum ne oblit benignitas & iis ipsis quibus prodesse volumus , & cæteris. Deinde ne major sit , quam facultates. Denique ut cuique pro dignitate tribuatur. Nam ad justitiam referenda sunt omnia , & nihil est liberale , nisi quod idem sit justum. Uramur igitur eâ liberalitate quæ profit amicis , noceat nemini : quæ fontem ipsum benignitatis non exhauriat : quæ delectum faciat eorum , in quos beneficium conferetur. Verum multi beneficia conferunt sine judicio , vel modo , in omnes , impetu animi , repentino quasi vento incitati. Quæ beneficia æquè magna non sunt habenda , atque ea quæ judicio consideratèque delata sunt

2. Si vir bonus divitias habeat sine cujusquam injuriâ partas ; nec sordidè custodiet , nec prodigè sparget : partim ipse utetur , partim donabit. Donabit autem aut bonis , aut iis quos facere poterit bonos. Donabit cum summo consilio dignissimos eligens : nam inter turpes jacturas inconsultum munus ponitur. Errat , si quis exilti-

mat facilem rem esse, donare. Plurimum habet hæc res difficultatis, si modò consilio tribuitur, non casu spargitur. Aliis succurram, dignis quos non premat pauperas. Alis non dabo, quamvis desit: quia, etiam si dederò, est defuturum. Quibusdam offeram, quibusdam etiam inculcabo. Quid refert, servi liberi ne sint qui indignant? Ubi cumque homo est, ibi beneficio locus est. Pauperi viro bono donabo. Non lacrum ex beneficio captabo, non voluptatem, non gloriam. Ideo dabo, ut quod oportet faciam. Licet fortuna ei, qui à me beneficium accepit, nihil tribuat quo referre mihi gratiam possit, ex sententiâ meâ res gesta est.

In deligendis idoneis in quos beneficia conferamus, iudicium & diligentiam adhibere debemus. Nam præclare Ennius: *Benefacta male locata, malè facta arbitror.*

Beneficium dignis ubi des, omnes obliges.

3. Laudas mihi & præsens & per epistolas Notum tuum, quòd sit sit liberalis in quosdam. Et ipse laudo, si tamen non in nos solos. Volo enim eum qui sit verè liberalis, tribuere patriæ, propinquis, affinibus, amicis; sed amicis dico pauperibus. Quod non isti faciunt, qui iis potissimum donant, qui donare maximè possunt. Hos ego non sua donare puto, sed viscatis hamatisque muneribus aliena corripere. Alii sunt qui, quod huic donant, auferunt illi, famamque liberalitatis avaritiâ petunt. Primum autem hominis officium est, suo esse contentum, deinde quos præcipuè sciat indigere, sustentare ac fovere.

## CAPUT LXX.

*Beneficia alia alios decet.*

1. **U**RBEM cuidam Alexander donabat. Cùm ille, cui donabatur, se ipse mensus, tan-



tum munus recusaret, diceretque non convenire fortunæ suæ: *Non quero*, inquit, *quid te accipere deceat, sed quid me dare.*

2. Ab Antigono Cynicus quidam petiit talentum. Respondit, *plus esse quàm quod Cynicus petere deberet.* Repulsus, petiit denarium. Respondit rex, *minus esse quàm quod regem deceret, dare.* Turpissima est ejusmodi cavillatio. Invenit Antigonus quomodo neutrum dare.

3. Alexandro Orientis victori Corinthii per legatos gratulati sunt, & civitate illum suâ donaverunt. Cùm risisset Alexander hoc munus; unus ex legatis, *Nulli*, inquit, *civitatem unquam dedimus alii, quàm Herculi.* Tum verò Alexander luhens accepit honorem non vulgare: neque tam eos respexit, qui sibi civitatem donarent, quàm illum, cui uni, antequam sibi, dedissent.

## C A P U T L X X I.

*Beneficia quædam palam danda, quædam clàm.*

1. **P**RÆCIPUUNT omnes sapientiæ magistri quædam beneficia palam danda esse, quædam secretò palam. quæ consequi gloriosum est, ut militaria dona, honores & quidquid notitiâ pulchrius sit: contrà, quæ succurrunt infirmitati, egestati, ignominia, tantò danda sunt, ut nota sint solis quibus profunt. Interdum & ipse qui juvatur, fallendus est; ut habeat, nec à quo acceperit, sciat.

Arcefilaüs, ut aiunt, Cresibio amico ægro, pauperi, & propertatem suam dissimulanti, cùm clàm succurrendum esse judicasset; pulvino ejus ignorantis sacculum nummis plenum subjecit, ut homo inutiliter verecundus id quo carebat inveniret potius quàm acciperet. Invenit sacculo Cresibius: *Hic*, inquit, *Arcefilai ludus est.*

2. Nihil æquè beneficio dando vitandum est, quàm superbia, quæ quidquid dat corrumpit. Non tantum ingratum, sed invitum est beneficium superbe datum. Jucunda sunt quæ humanâ, leni, placidâque fronte tribuantur: quæ cum daret mihi superior, detraxit muneri suo pompam, & observavit idoneum tempus succurrendi, se uno teste contentus. Alioquin non benefacere delectat, sed videri benefecisse.

Idem Arcesilaus, de quo supra, cum viro probò pauperi opitulari vellet, ei vasa aurea ad amicos convivio excipiendos commodavit de industria: quæ cum ille redderet, redipere noluit.

3. Aliquando viro bono non petenti dandum est, quod improbo postulanti negaveris. Archelais Macedonum rex, in cœna aureum poculum poscente quodam, cui nihil pulchrum videbatur, nisi accipere: puerum id Euripidi dare jussit: & in alterum illum intuens: *Tu quidem, inquit, dignus eras, qui peteres, nec acciperes: at hic dignus erat qui acciperes vel non petens.*

Attende cur negare cupidis debeas:

Modestis etiam offerre quod non petierint.

Super juvenum stabat dejectum leo.

Prædator intervenit, partem postulans:

*Darem, inquit, nisi soleres per te sumere.*

Et improbum rejecit. Fortè innoxius

Viator est deductus in eundem locum,

Feroque viso retulit retro pedem.

Cui placidas ille: *non est quod timeas*, ait.

*Et quæ debetur pars tuæ modestiæ,*

*Audacter tolle.* Tunc diviso tergore,

Sylvas petivit, homini ut accessum daret.

Exemplum egregium prorsus, & laudabile.

Verùm est aviditas dives, & pauper pudor.

## CAPUT LXXII.

*Tardè benefacere , nolle est.*

**O**MNIS benignitas properat , & proprium est libenter facientis , cito facere. Qui tardè profecit , non ex animo fecit. Tardè velle , nolentis est.

Bis est gratam , quod opus est , ultrò si offeras.

Sex sestertia si statim dedisses ,

Cùm dixti mihi ; sume , tolle , dono :

Deberem tibi , Pæte , pro ducenti.

At nunc cùm dederis diu moratus ,

Post septem puto vel novem Kalendas :

Vis dicam tibi veriora veris ?

Sex sestertia , Pæte , perdidisti.

Inopi beneficium bis dat , qui dat celeriter.

## CAPUT LXXIII.

*Quas dederis , solas semper habebis opes.*

I. **C**UM M. Antonius fortunam suam aliò translata videret , & sibi nihil relictum ; egregiè mihi videtur exclamasse : *Hoc habeo quodcumque dedi.* Hæ enim sunt divitiæ certæ , in quacumque sortis humanæ levitate permanentes , & quæ quo majores fuerint , hòc minorem habebunt invidiam. Quid tanquam tuo parcis ? Procurator es. Omnia ista quæ te tam tumidum faciunt , quæ ferreis claustris custodis , propter quæ omnia affinitatis & amicitiae fœdera rumpis , non sunt tua. Depositi loco sunt , jamjamque ad alium dominum spectantia. Quæris quomodo illa tua facias ? dando. Hac ratione certam tibi & inexpugnabilem eorum possessionem parabis.

2. Callidus effractâ nummos fur auferet arcâ:  
 Profternet patrios impia flamma Lares.  
 Debitor ufuram pariter sortemque negabit:  
 Non reddet ſterilis ſemina jacta ſeges.  
 Depaſcentur oves diri contagia morbi:  
 Mercibus extructas obruet unda rates.  
 Extra fortunam eſt quidquid donatur amicis.  
 Quas dederis, ſolas ſemper habebis, opes.

C A P U T L X X I V.

*Non quid detur refert, ſed quâ mente.*

1. **B**ENEFICIUM non in eo, quod fit aut datur, conſiſtit, ſed in ipſo facientis aut dantis animo. Animus eſt enim qui beneficiis dat pretium. Itaque nonnunquam magis nos obligat qui dedit parva magnificè, & exiguum tribuit, ſed libenter. Socrati cùm multa multi, pro ſuis quique facultatibus, offerrent: Æſchines pauper auditor: Nihil, inquit, dignum te, quod dare tibi poſſim, invenio: & hoc tantum me pauperem eſſe ſentio. Itaque dono tibi quod unum habeo me ipſum. Hoc munus, rogo, qualecumque eſt, non dedigneris; cogiteſque alios, cùm multum tibi darent, plus ſibi reliquiſſe. Cui Socrates: Iſtud quidem, inquit, magnum mihi munus videtur: niſi fortè parvi te æſtimas. Habebo itaque curæ, ut te meliorem tibi reddam, quàm accipio. Vicit Æſchines hoc munere omnem juvenum opulentorum munificentiâ.

2. Regi Perſarum intra regni ſui fines iter facienti munera ab omnibus Perſis offerri mos & lex erat. Qui in terra colenda operam ponebant, alii boves aut oves, alii frumentum aut vinum dabant: qui verò pauperiores, lac, caſeum, palmas, alioſque arborum fructus, qui in cujuſque agro naſcerentur. Quæ omnia, non tributi,



sed doni, nomine, à singulis afferebantur regi prætereunti ac præterequenti. Cùm Persa quidam, cui nomen Sinætas, procul à tugurio suo in Artaxerxem, qui Mnemon cognominabatur, incidisset, ac nihil præ manibus haberet, quod regi posset offerre; noluit tamen eum à se idonatum videri. Itaque ad proximè præterfluentem fluvium cursu contendit, & aquam utraque manu haustam regi obtulit, munus exornans, quantum potuit, faustis bonisque verbis. Et dono & dantis animo atque oratione mirè delectatus Artaxerxes, neque minùs regium esse existimans parva grato animo accipere, quàm magna tribuere, dixit: *Se aquam illam libenter accipere, & pretiosissimi muneris loco habere.* Deinde homini misit non parvam pecuniæ summam cum veste Persica, & phialâ aureâ, quâ iussit eum deinceps haustam è fluvio aquam bibere.

3. Eidem Artaxerxi per Persidem equitanti ingens malum punicum à quodam Omaso oblatum ferunt. Quod ille benignè comiterque accipiens, purpuratis comitibus dixit: *Qui cura & labore agellum suum talium pomorum feracem effecit, ne ille parvam civitatem sibi creditam poterit ex parva magnam reddere.* Et hominem ingenti præmio est renumeratus.

Fuit hic Artaxerxes regni sui initio aditu facilis, in largiendis honoribus & beneficiis effusus. Omnem supplicis detrahebat contumeliam, læto hilarique animo beneficia & accipiebat & dabat. Nullum donum erat adeo exiguum quod non libentissimè acciperet: & maiorem in dando beneficio voluptatem percipere videbatur, quàm alii in accipiendo solent.

## CAPUT LXXV.

*Sint gratuita Deorum exemplo beneficia.*

1. **B**ENEFICIUM per se expectandum est, & una in eo spectanda accipientis utilitas, sepositis commodis nostris. Si enim ipse tacitus dicas: *Hoc dabo, hoc recipiam*, sordida negotiatio est. Qui beneficium, ut reciperet, dedit, non dedit. Humile est, prodesse, quia expedit.

Si utilitas & turpis computatio me liberalem faciat: si nulli prosum, nisi ut invicem ille mihi profit: non dabo beneficium proficiscenti in diversas longinquasque regiones; non dabo abfuturo semper; non dabo sic ægrotanti, ut spes ei nulla sit convalescendi. Atqui ut scias rem esse per se expectandam benefacere, advenæ in nostrum modo delato portum, & statim abituro, succurrimus. Discedit ille, vix satis noto salutis auctore, & nunquam amplius in conspectum nostrum reversurus, debitores nobis delegat Deos precaturque ut illi pro se gratiam referant. Interim nos juvat sterilibus beneficii conscientia.

2. Magna fuit apud veteres Græcos ac Romanos cura & reverentia hospitalitatis, eique Jovem, Deorum atque hominum parentem, quasi præsidem præfecerant, Jovem hospitalem eum appellantes & invocantes. Peregrinos & pauperes hospitio non excipere, nefas esse existimabant; cum sub tutela Jovis essent, & ab eo mitterentur. Imò Dii ipsi putabantur aliquando sub peregrinorum habitu terras lustrare, & ad mortaliū tecta accedere, explorandæ eorum humanitatis causâ. Hinc omnibus hospitio indigentibus ultro offerebantur privatim aut publice quæ opus essent. Lucanorum hæc lex fuit: si occidente jam sole venerit peregrinus, volueritque

Pilij

sub tectum alicujus civis divertere, is verò hominem non receperit: qui hospitium præbere recusaverit, pœnas luat inhospitalitatis & injuriæ tum peregrino, tum Jovi hospitali, factæ. Nulla gens, Tacito teste, magis indulgebat hospitibus, quàm Germanica. Notum ignotumque, quantum ad jus hospitii nemo discernebat, & quemcumque mortalium arcere tecto nefas habebatur. Pro fortuna quisque advenam apparatis epulis excipiebat. Cum illæ defecerant, advena & ejus hospes proximam domum non invitati adibant, ubi uterque pari humanitate excipiebatur.

3. Propositum nobis esse debet Deorum exemplum sequi. Vide quanta illi quotidie nostri causâ faciant, quanta distribuunt, quantis imbribus repente dejectis solum molliant, quantis terras fructibus impleant. Omnia hæc sine mercede, sine ullo ad ipsos perveniente commodo faciunt. Nisi fortè existimes illos fructum operum suorum percipere ex fumo extorum & odore thuris. Hæc quoque homo, si ab exemplari suo aberrare nolit, servet; nec ad res honestas privato commodo ductus veniat. Pudeat ullum esse venale beneficium: cum gratuitos habeamus Deos.

4. Pythagorici, si quis sodalium facultatibus exciderat, bona sua cum eo, veluti cum fratre, dividebant. Neque verò id erga eos solum præstabant, quorum in convivio quotidie versabatur, sed erga omnes qui eandem disciplinam sectabantur. Itaque Clinias quidam Tarentinus Pythagoricus, cum accepisset Prorum Cyrenæum facultatibus suis spoliatum in summa rerum omnium penuria esse; ex Italia Cyrenas profectus est cum grandi pecunia, & patrimonii jacturam restituit ei homini quem tamen nunquam antea viderat. Plures quoque alii idem fecisse memorantur.

## CAPUT LXXVI.

*Nullum officium referendâ gratiâ magis necessarium est.*

1. **S**I Hesiodus jubet ea reddere majore mensurâ, si possis, quæ acceperis utenda, quidnam beneficio provocati facere debemus? An non imitari agros fertiles, qui multò plus afferunt quàm acceperunt? Etenim si non dubitamus beneficia conferre in eos à quibus nihil expectamus aut quos tantum speramus nobis aliquando profuturos; quales in eos esse debemus qui jam profuerunt!

Cùm duo genera liberalitatis sint, unum dandi beneficii, alterum reddendi; demus, necne, in nostra potestate est: non reddere, viro bono non licet, modo id facere possit sine cujusquam injuriâ.

In referendâ gratiâ hoc maximè officii est, ei potissimum opitulari, qui maximè opis indigeat.

Cùm referri gratia tanta non potest, quanta debetur; habenda tanta est, quantam maximam animi nostri capere possunt.

2. Cùm omnibus virtutibus me affectum esse cupiam; tamen nihil est quod malim, quàm me & gratum esse & videri. Hæc est enim virtus non solum maxima, sed etiam mater virtutum omnium reliquarum. Quid est liberorum pietas, nisi voluntas grata in parentes? Qui sunt boni cives, qui de patria bene merentes, nisi qui patriæ beneficia meminerunt? Qui sancti, qui religionem colentes, nisi qui meritam Diis immortalibus gratiam justis honoribus & memori mente persolvunt? Quæ potest esse jucunditas vitæ, sublati amicitiiis? Quæ porro amicitia potest esse inter ingratos?

3. Quo tempore Thebis obses fuerat Philip-



pus, cum Philo Thebanus hospitio exceperat, & multis beneficiis affecerat. Is cum postea à Philippo rerum posito nihil vicissim muneris vellet accipere: *Oro*, inquit Philippus, *ne me hâc gloriâ privari, velis, quàm maximè quero, ut à nemine beneficiis & gratiâ victus sim.* Idem Hipparchi Eubœensis mortem graviter tulit: at cuidam ad consolandum ejus dolorem dicenti, Hipparchum maturâ morte decessisse: *Sibi quidem*, inquit, *fortasse, sed mihi præmatura.* Nam antè mori properavit, quàm dignam nostrâ amicitîâ gratiam à me reciperet.

Bocchus Maurorum rex pacem cum Romanis factururus operâ L. Syllæ, sic eum est allocutus. Nunquam ego ratus sum fore, ut Rex maximus in hac terra, & omnium, quos novi opulentissimus, privato homini gratiam deberem. Et Hercule, Sylla, antequam mihi cognitus esses, multis orantibus, aliis ultro, egomet opem tuli, nullius indigui. Id mutatum esse, ego lætor, & eguisse me amicitîâ tuâ, quâ mihi nunc nihil carius est: id te experiri licet. Arma, viros, pecuniam postremò quidquid animo lubet, sume, utere: &, quoad vives, nunquam tibi redditam gratiam puta; semper apud me integra erit. Denique nihil à me frustra voles. Nam, *ut ego existimo, Regem armis quàm munificentîâ, vinci, minus flagitiosum est.*

4. Hoc maximè optabat Cæsar Augustus, ut gratus in omnes videretur. Eum aliquando adiit veteranus miles, qui, vocatus in jus, periclitabatur; rogavitque ut sibi adesset. Statim Cæsar ei è comitatu suo unum elegit advocatum, cui commendavit litigatorem. Exclamavit ingenti voce veteranus: *At non ego, Cæsar, periclitante te Aëtiaco bello vicarium quæsivi; sed pro te ipse pugnavi.* Simulque detexit cicatrices. Erubuit Cæsar, atque ipse venit in advocationem.

5. Tiberii jussu Prætoriani milites Agrippam

Judæum vinctum trahebant in custodiam: & , quia æstus erat vehementior , eum urebat sitis. Conspicatus tunc quemdam è Cæli Caligulæ servis nomine Thaumastum , aquam in hydria ferentem , potum poposcit , quem ille dedit humaniter. Regnum postea adeptus Agrippa amplo munere leve acceptæ aquæ beneficium remuneratus est. Nam Thaumastum libertate donavit , suorumque bonorum dispensatorem constituit : quin & moriens providit , ut apud liberos suos eodem ministerio fungeretur : inter quos concessit , in prætio usque ad extremum diem habitus.

6. Erant Ægyptii præter alias gentes grati erga bene meritos de ipsis , existimabantque magnum esse omnibus hominibus subsidium ad vitam , gratam acceptorum beneficiorum memoriam. Et merito quidem : Nam movetur quisque ad beneficia eis impendenda , apud quos senserit ea optimo collocari.

---

## C A P U T L X X V I I .

### *Officia etiam feræ sentiunt.*

**O**FFICIA ipsæ feræ sentiunt : nec ullum tam immanis animal est quod non curâ mitiget , & in amorem tui vertat. Leonum ora à magistris impunè tractantur ; elephantorum feritas cibo mitescit usque ad præstandum homini servile obsequium. Adeo etiam quæ intelligere beneficia non possunt , pertinaci merito evincuntur.

Apion , litteris homo multis præditus , hoc libro quinto refert , quod neque audisse , neque legisse , sed ipsum sese in urbe Romanâ oculis suis vidisse , confirmat. In circo maximo amplissimum spectaculum bestiarum cum hominibus decertantium populo dabatur. Multæ ibi feræ ,

quarum inusitata forma erat & ferocia : Sed leonum immanitas præcipuè admirationi fuit , & præter cæteros unius , qui vastâ corporis mole , terrifico rugitu , jubis fluctuantibus , animos oculosque omnium in se convertebat. Introductus erat inter complures alios ad pugnandum cum belluis servus , cui nomen Androclus fuit. Hunc ille leo ubi vidit procul , repentè quasi admirans stetit : ac deinde sensim atque placidè tanquam noscicans ad hominem accedit : tum caudam more adulantium canum blandè movet , cruraque & manus propè jam exanimati metu leniter linguâ demulcet. Inter illa tam atrocis feræ blandimenta animum colligit Androclus , & oculos , quos præ timore averterat , paulatim ad contuendum leonem refert. Tum verò quasi mutua recognitione factâ gratulabundos videres hominem & leonem. Re tam admirabili maximî clamores populi excitantur , arcessitur à Cæsare Androclus , & interrogatus cur ipsi uni ille atrocissimus leonum pepercisset , rem mirificam narrat , his verbis.

Cùm provinciam Africam dominus meus proconsulari imperio obtineret ; ego iniquis ejus & quotidianis verberibus ad fugam sum coactus ; & , ut mihi à domino tutiores latebræ forent , in arenarum solitudines concessi. Consilium autem erat mortem aliquo pacto quærere , si defuisset cibus. Sole medio specum quamdam nactus remotam latebrosamque , in eam penetro , ac me recondo. Neque multo post ad eandem speluncam venit hic leo , debili & cruento uno pede , gemitus edens dolorem cruciatumque vulneris significantes. Primo advenientis feræ conspectu territus & pavefactus hæsi : sed postquam introgressus leo in habitaculum illud , ut reipsa patuit , suum , vidit me procul desitescentem ; mitis & mansuetus accessit , ac sublatum pedem ostendere ac porigere , quasi opis petendæ gratiâ , visus

est. Ibi ego spinam ingentem vestigio pedis ejus hærentem revulsi, conceptamque saniem vulnere intimo expressi. Ille mea operâ ac medicâ levatus, pede in manibus meis posito recubuit ac quievit. Ex eo die triennium totum ego & leo in illa specu eodem victu viximus. Nam mihi suggerebat earum, quas venando ceperat, forarum membra opimiora: quæ ego, quia ignis copia non erat, sole meridiano torrens, edebam. Sed ubi me vitæ illius finæ pertæsum est, leone venatum profecto, reliqui specum: & viam ferme tridui permenfus, à militibus visus apprehensusque sum, & ad dominum ex Africa Romanam deductus. Is me statim curavit rei capitalis damnandum, dandumque ad bestias. Intellego autem hunc quoque leonem, postquam ab eo discessi, captum, & huc adductum, gratiam nunc mihi beneficii & medicinæ referre.

Hæc ubi dixit Androclus, cunctis petentibus, pœna solutus ac dimissus est: Leo quoque ei suffragilis populi est donatus. Postea Androclus, & leo tenui loro revinctus, urbe totâ circum tabernas ibant. Donabatur ære Androclus: floribus spargebatur leo: omnes ferè obvii dicebant: *Hic est leo hospes hominis, hic est homo medicus leonis.*

2. Cæsare Augusto imperante, cum pauperis cujusdam filius puer Delphinum sæpius fragmentis panis allexisset; eum Delphinus miro amore dilexit. Quocumque diei tempore inclamatus à puero, quamvis oculus atque abditus, ex imo adnatabat, passusque è manu, præbebat dorsum ascensuro, pinnae aculeos cohibens, ne delectum corpus laceraret: receptumque ferebat per stadia ducenta è Baiano littore Puteolos ad ludum litterarium, & simili modo revehebat. Quod officium, per annos plures præstitit: donec puero mortuo ex morbo, Delphinus subinde ad locum consuetum ventitans, tristi & mœrenti similis, desiderio pueri extinctus est, & in ejus sepulcro



humatus. Quæ omnia se ipsum multosque alios vidisse refert Apion.

3. Puer nomine Thoas parvulum draconem magnâ curâ aluit, loquens cum eo quasi cum intelligente, ludensque unâ & dormiens: donec draconis, qui admiram magnitudinem excreverat, conspectu territi urbis cives, cum in solitudinem emitti, invito & flente puero, voluerunt. Postea cum puer ille, jam adolescens factus, è spectaculo quodam rediens, aut, ut alii tradunt, ad venationem egressus, in latrones incidisset, opemque inclamasset; ad notam ejus vocem draco statim adfuit, &, latronibus aut occisis aut fugatis, adolescentem, educatorem quondam suum, periculo creptum servavit.

## C A P U T L X X V I I I.

*Ingratus animus omnium odio damnatus.*

1. **E**go ingrati animi crimen horreo in quo vitio nihil mali non inest.

Omne dixeris maledictum, cum ingratum hominem dixeris.

Omnes immemorem benefici oderunt, & eum communem omnium, maximè vero tenuiorum, hostem putant, quia ipsam liberalitatem deterret.

Ingratus unus miseris omnibus nocet.

Malignos fieri maximè ingrati docent.

Quæritur, utrum hoc tam invisum vitium, impunitum esse debeat, an contrà lex in civitatibus ponenda sit, quâ ingratis pœna constituatur? Nostri majores maximi scilicet viri, beneficia magno animo dabant, magno perdebant. Non est in ulla gente data adversus in gratum actio. Hoc frequentissimum crimen nusquam punitur, ubique improbatur. Neque illud absolvimus: sed cum difficilè esset incertæ rei judicium, tantum

odio

odio damnavimus, & inter ea reliquimus quæ ad iudices Deos mittimus.

2. Apud Persas tamen, ut refert Xenophon, iudicium instituebatur de eo crimine, unde gravissima inter homines odia solent existere, cum nemo propterea in ius vocari soleat; nimirum de ingrato animo. Itaque si quem intellexerant gratiam non retulisse, cum posset, in eum graviter animadvertabant. Ingratos enim nullâ, Deorum reverentiâ, nullâ parentum, patriæ, amicorum curâ tangi putabant.

## C A P U T L X X I X.

*Quos experimur ingratos, ipsi facimus.*

1. **N**ON referre beneficiis gratiam, & est turpe, & apud omnes habetur: nullum tamen inter plurima maximaque omnium vitia frequentius quàm ingrati animi. Id evenire ex pluribus causis video. Primò, quod in collocandis beneficiis non eligimus dignos quibus tribuamus. Secundò, si quos experimur ingratos, ipsi facimus; quia aliàs diù & enixè rogati beneficia conferimus, aliàs collatorum graves exprobratores exactoresque sumus. Quis enim nostrum contentus fuit aut leviter rogari, aut semel? Nemo autem libenter debet quod non tam accipit, quàm expressit. Gratus esse qui potest erga eum, qui beneficium aut iratus, aut precibus fatigatus, dedit? Cùm in omni officio magni æstimetur voluntas.

Eodem animo beneficium debetur, quo datur.

2. Generosi & magnifici animi est, juvare & prodesse. Qui dat beneficia, Deos imitatur; qui reperit, foeneratores.

Cùm Sylla in Africam atque in castra Marii venisset; aliis rogantibus, aliis ultro beneficia dabat, invitatus accipiebat, & properantiùs quàm

æus mutuuum reddebat, ipse à nullo repetebat; magis id laborabat, ut illi quam plurimi deberent.

Odiosum sanè genus hominum officia exprobrantium, quæ meminisse debet is in quem collata sunt; non commemorare, qui contulit.

Extat, in hanc sententiam elegantissimum Martialis Epigramma.

Quæ mihi præstiteris meminì, semperque tenebo.

Cur igitur taceo, Postume? Tu loqueris.

Incipio quoties alicui tua dona referre.

Protinus exclamat, dixerat ipse mihi.

Non bellè quædam faciunt duo: sufficit unus

Huic operi: si vis ut loquar, ipse tace.

Crede mihi, quamvis ingentia, Postume, dona.

Auctoris pereunt garrulitate sui.

Beneficium qui dedisse se dicit, petit.

## C A P U T L X X X.

*Ingrati ingratos æquo animo feramus.*

1. **G**RAVE est ingrati animi vitium, intolerabile, & concordiam, quâ humana imbecillitas fulcitur, scindit ac dissipat. Sed usque eò vulgare est, ut illud, nec qui queritur quidem, effugerit. Cogita tecum, an quibuscumque debuisti, gratiam retuleris, an omnium te beneficiorum memoria comitetur. Videbis quæ tibi puero data sunt, ante adolescentiam ex animo elapsa esse: quæ in juventutem collata sunt, non perdurasse in senectutem. Si te diligenter excusseris; vitium, de quo quereris, in sinu invenies. Iniquè publico irasceris crimini: ut absolvaris, ignosce.

2. Ferendi ingrati placido animo, mansueto, magno. Nunquam te beneficii immemor tam offendant ut non tamen ei dedisse delectet. Nunquam

te in has voces ejus injuriâ impellat : Vellem non dedisse.


Ingratum meliorem facies ferendo , pejorem exprobrando. Quid opus est querilis ? Quid insectatione ? Ut corporum , ita animorum , vitia molliter tractanda sunt. Vincit malos pertinax bonitas , nec quisquam tam duri animi est , ut tandem bonos non amet.

Si nobis non est relata gratia , quid faciemus ? Demus : etiamsi multa in irritum data sint. Demus nihilominus aliis , demus ipsis apud quos iactura facta est. In hoc homine videor beneficium perdidisse : huic ipsi beneficium dabo iterum , & , tanquam bonus agricola , curâ cultuque sterilitatem soli vincam. Beneficium sæpe dare , docere est reddere.

3. Non est quod turba ingratorum nos faciat ad bene merendum tardiores : cum ne Deos quidem immortales sacrilegi negligentisque eorum ab effusa benignitate deterreant. Hos sequamur duces , quantum humana imbecillitas patitur. In dandis beneficiis permaneamus , etiamsi spes præcidatur gratos reperiendi. Ne cessaveris : opus tuum perage , & partes boni viri exsequere. Alium re , alium fide , alium gratiâ , alium consilio , alium præceptis salubribus adjuva.

*Finis primæ partis.*





# I N D E X

Selectarum è profanis Scriptoribus  
Historiarum.

P A R S P R I M A.

L I B E R P R I M U S.

D E D E O.

CAPUT I. <b>C</b> O N S E N S U S populorum omnium probat Deum esse , pag.	3
II. Agnoscimus Deum ex operibus ejus.	4
III. Natura Dei est optima & præstantissima.	5
IV. Deus regit ac videt cuncta ,	6.
V. Deus colitur, & placatur pietate ,	7.
VI. Deus est cõtendus magis piè , quàm magnificè ,	8.
VII. Impii non placant Deum donis ,	9.
VIII. Mens bona, & inventio artium , veniunt à Deo ,	10.
IX. Templà ad augendam pietatem extructa sunt ,	12.
X. Tuta & honorata inter hostes pietas ,	13.
XI. Publica religio privatis affectibus prælata ,	14.
XII. Impii serius ociùs dant pœnas ,	15.
XIII. Quæ vota faciendà sint Deo ,	17.
XIV. Homo præcipuum opus Dei ,	18.
XV. Virtus proprium atque unicum hominis bonum ,	20.

## LIBER SECUNDUS.

## DE

## PRUDENTIA.

- CAPUT I. **I**N EST mentibus insatiabilis cupiditas  
veri videndi , 30.
- II. Scientia pabulum animi , 21.
- III. Pertinax labor & disciplina naturam vincunt ,  
22.
- IV. Quæsitæ vitæ periculo scientia , 24.
- V. Doctus indocto multum præstat , 25.
- VI. Vir doctus potius non vult ditescere , quàm non  
potest , 26.
- VII. Ea viatica paranda sunt , quæ cum naufrago  
enantent , 27.
- VIII. Litteræ ornamenta hominum sunt & solatia ,  
28.
- IX. Quæ in scientiæ studio vitandæ , 30.
- X. Qui rectè vivit , is scientiam utilem & necessa-  
riam est adeptus , 31.
- XI. Naturâ tam docere cupimus , quàm discere , 33.
- XII. Stultum est ea docere cæteros quæ ipse expertus  
non es , 36.
- XIII. Etiam senî discere decorum est , 36.
- XIV. Honos doctis habitus , 38.
- XV. Modestia conjuncta cum doctrina , 41.
- XVI. Non refert quàm multos , sed quàm bonos ,  
libros habeas ac legas , 42.
- XVII. Bibliotheca ad publicum et privatum usum  
comparatur , non ad ostentationem , 44.
- XVIII. Memoria augetur curâ , negligentia inter-  
cidit , 47.

## LIBER TERTIUS.

## DE

## JUSTICIA.

- CAPUT I. **J**USTICIA omnium regina virtutum, 49.
- II. Hominem justum esse gratis oportet, 50.
- III. Omni ratione colenda & retinenda justitia est, 51.
- IV. Communi utilitati consulere debemus, 53.
- V. Ipsa peccandi voluntas peccatum est, 55.
- VI. Qui solo metu à peccato abstinet, non est innocens, 55.
- VII. Oderunt peccare boni virtutis amore, 58.
- VIII. Ea sola utilia sunt, quæ justa & honesta, 59.
- IX. Qui adipisci veram gloriam volet, justitiæ fungatur officiis, 62.
- X. Quid tibi fieri non vis, alteri ne feceris, 63.
- XI. Injuriam pati satius est, quàm facere, 64.
- XII. Quod meum non est, redeat ad dominum, 64.
- XIII. Verbis non minùs, quàm factis, fit injuria, 65.
- XIV. Ex omni vita simulatio dissimulatioque tollenda est, 66.
- XV. Improbi hominis est mendatio fallere, 68.
- XVI. In vitio est, qui non obsistit, si potest, injuriæ, 70.
- XVII. Inhumanum verbum est ultio, 71.
- XVIII. Injuriae beneficiis vincuntur speciosius, quàm mutuo odio pensantur, 74.
- XIX. Justitia victrix odii, 76.
- XX. Utilitas ex inimicis capienda, 77.
- XXI. A litibus est abhorrendum, 78.
- XXII. Paci consulendum, nec bella acerbè gerenda. 79.
- XXIII. Justitiâ hostes vincere gloriosius est, quàm armis, 80.

XXIV. Etiam hosti fides servenda ,	83.
XXV. Jusjurandum colito ,	85.
XXVI. Servis imperare moderatè , laus est ,	87.
XXVII. Dominorum benignitas in servos ,	91.
XXVIII. Servorum in dominos fides ,	93.
XXIX. Omnes omnium caritates patria complecti- tur. ,	95.
XXX. Dulce et decorum est pro patria mori ,	96.
XXXI. Deciorum pro patria devotiones ,	98.
XXXII. Divitiæ in patriam impensæ ,	99.
XXXIII. Inimicitiae publicæ utilitatis causâ depo- sitæ ,	100.
XXXIV. Patriæ irasci nefas est ,	101.
XXXV. Fundamentum est omnium virtutum pietas in parentes ,	102.
XXXVI. Patres à liberis periculo liberati ,	104.
XXXVII. Pietas liberorum in matres ,	107.
XXXVIII. Parricidium scelerum omnium maximum est ;	110.
XXXIX. Nihil dulcius hominum generi , quàm liberi ,	111.
XL. Liberi patriæ causâ bene instituendi ,	112.
XLI. Maxima debetur puero reverentia ,	114.
XLII. Salubriter institui plurimum prodest in reli- quam vitam ,	114.
XLIII. Veterum Romanorum in educandis pueris disciplina ,	107.
XLIV. Publica utilitati plurimum profunt qui ju- ventutem erudiunt ,	120.
XLV. Et Præceptores et studia amet adolescens ,	121.
XLVI. Sit gratus erga magistrum discipulus ,	123.
XLLII. Præceptor nec habeat vitia , nec ferat ,	126.
XLLIII. Parentum adversus filios severitas ,	229.
XLIX. Parentum amor in liberos ,	133.
L. Sua sunt conjugibus munia assignata à naturâ ,	135.
LI. Maritorum amor in uxores ,	136.
LII. Uxorum constans amor in maritos ,	137.
LIII. Conjugis delectus ex moribus fiat ,	140.
LIV. Magna sit inter fratres concordia & benevo- lencia ,	142.



- LV. *Nisi in bonis amicitia esse non potest.* 147.  
 LVI. *Amicitia sublata omnis est è vita sublata jucunditas,* 148.  
 LVII. *In eligendis amicis cautio est adhibenda,* 149.  
 LVIII. *Amicus amicum non minus diligit, quam seipsum,* 150.  
 LIX. *Amicitia unus fit ex pluribus,* 151.  
 LX. *Amico omnia credenda,* 152.  
 LXI. *Res turpes amicum non rogemus, nec faciamus rogari,* 153.  
 LXII. *Veritas & fides in amicitia retineantur,* 154.  
 LXIII. *Omnia possidentibus sæpe amicus deest,* 156.  
 LXIV. *Veros amicos reparare difficile est,* 158.  
 LXV. *Amici thesauri Regum sunt,* 159.  
 LXVI. *Amicus certus in re incerta cernitur,* 160.  
 LXVII. *Vulgare amici nomen, sed rara est fides,* 162.  
 LXVIII. *Nihil est naturæ hominis accommodatius beneficentia,* 163.  
 LXIX. *Multas rationes habeat beneficentia,* 166.  
 LXX. *Beneficia alios decent,* 167.  
 LXXI. *Beneficia quædam palam danda, quædam clam,* 168.  
 LXXII. *Tardè benefacere, nolle est,* 170.  
 LXXIII. *Quas dederis, solas semper habebis, opes,* 170.  
 LXXIV. *Non quid detur refert, sed quâ mente,* 171.  
 LXXV. *Sint gratuita Deorum exemplo beneficia* 173.  
 LXXVI. *Nullum officium referendâ gratiâ magis necessarium est,* 175.  
 LXXVII. *Officia etiam feræ sentiunt,* 177.  
 LXXVIII. *Ingratus animus omnium odio damnatus,* 180.  
 LXXIX. *Quos experimur ingratos, ipsi facimus,* 181.  
 LXXX. *Ingrati ingratos æquo animo feramus,* 182.

Finis primæ Partis.



SELECTÆ  
E PROFANIS  
SCRIPTORIBUS  
HISTORIÆ.

---

PARS ALTERA.

---

LIBER QUARTUS.

DE FORTITUDINE.

CAPUT I.

*Animi fortitudo duplex.*

**D**UPLEX est animi fortitudo. Una in rerum externarum despicientiâ ponitur : cùm persuasum nobis est , hominem nihil , nisi quod honestum decorumque sit , aut admirari aut expectere oportere ; nullique neque perturbationi animi , neque fortunæ , succumbere. Altera animi fortitudo est , ut res geras magnas illas quidem & maximè utiles sed vehementer arduas , plenasque laborum ac periculorum.

*II. Part.*

A

Ea animi elatio, quæ cernitur in adeundis periculis, & laboribus suis natis, si iustitiâ vacat, pugnatque non pro salute communi, sed pro suis commodis, in vitio est. Imque probè defigitur à Stoicis fortitudo, cum cum virtutem esse dicunt pugnantes pro æquitate.

Dicitur Augustus adeo furultates, turbas, bella execratus esse, ut nisi iussis de causis nunquam genti cuiquam bellum intulerit.

## C A P U T I I.

### *Bellicæ fortitudinis exempla.*

1. **N**UNQUAM periculi fugâ committendum est, ut imbelles timidique videamur. Sed fugiendum etiam illud, ne offeramus nos periculis sine causa: quo nihil potest esse stultius. In tranquillo tempestatem adversam optare, dementis est: subvenire autem tempestatì quâvis ratione, sapientis.

Temerè in acie versari, & manu cum hoste configere, immane quoddam & belluarum simile est. Sed cum tempus necessitasque postulat, decertandum manu est, & mors servituti turpitudinique anteponenda.

2. Tarquinii Româ pulsi perfrugerunt ad Por-sennam Etruscorum regem: qui eorum precibus motus, bellum Romanis intulit, ut ejectos in urbem reduceret. Cum Etruscorum exercitus adesset, duce Por-sennâ; Romani ex agris in urbem demigrant, eamque septant præsiidiis. Aliæ urbis partes muris, aliæ Tiberi amne ob-jecto, vicebantur tutæ. Sed pons sublicius iter hosti dedisset, nisi illo die Roma virum unum Horatium Coclitem, munimentum habuisset. Hic ubi hostem è capro Janiculo decurrere in urbem vidit, socios autem suos, deserto pontis præsi-vidit, socios autem suos, deserto pontis præsi-

ferro ignique interruperant, dum ipse impetum Etruscorum exciperet. Vadit inde primum aditum pontis, armis in hostem obversis ad prælium inueundum.

Cum Horatio Romanos duos pudor teruit, Lartium & Tolumnium, ambos claros genere facisque. Cum his primam periculi & pugnae procellam parumper sustinuit. Deinde eos cedere in tutum coegit. Circumferens inde truces minaciter oculos ad procures Etruscorum, nunc singulos provocabat, nunc increpabat omnes, *servos regum superbiorum vocans, qui suæ libertatis immemores, alienam oppugnatum venient*. Cunctati aliquandiu illi sunt: deinde pudor commovit eorum aciem, & clamore sublato undique in unum Horatium tela coniecere. Quæ cum in objecto scuto hæssissent, neque ille minus obstinatus pontis aditum obstrueret; virum imperu facto parabant detrudere, cum simul fragor rupti pontis, simul clamor Romanorum sublatus, eorum impetum sustinuit. Tum Cocles, *Tiberine pater*, inquit, *te, sancte, precor, hæc arma & hunc militem propitio flumine accipias*. Inde armatus in Tiberim desiluit, multisque superincidentibus telis incolumis ad suos transiit, rem ausus famæ habituram ad posteros quàm fidei.

Grata erga tantam virtutem civitas fuit, statua in comitio posita: tantum agri quæ antem uno die arare potuit, datum. Privata quoque inter publicos honores studia eminebant: nam in magnâ annonæ inopiâ quisque pro domesticis copiis aliquid ei contulit, fraudans se ipse victu suo.

3. Bello primo Punico cum Imperator Pœnorum colles quosdam opportunos in Sicilia prior occupasset; exercitus verò Romanus se temerè demisisset in subiectos, collibus illis saltus; accessit ad Consulem Tribunus militum, de cujus nomine non convenit inter antiquos Scriptores: nam alii Q. Cædicium, alii Laberium, plures



Calpurnium Flammam vocant. Is, ubi ostendit quantum periculi ex loci iniquitate instaret: *Censeo*, inquit, *si rem Romanam servare vis, id faciendum, ut milites quadringentos ire jubeas ad hanc quam cernis petram, inter medios hostes asperam atque editam, eamque ut capiant imperes horterisque. Futurum enim profectò est, ut hostium fortissimus quisque & promptissimus properet ad occursandum illis, & pugnandum; atque ita circa eam petram atrox pugna fiat: in qua omnes illi, quos dico, quadringenti milites nostri obtruncabuntur. At tu interea, alligatis illo uno negotio hostibus, & in ea cæde occupatis, tempus habebis exercitûs, ex loco infesto educendi. Alia nisi hæc, salutis via nulla est. Fidum quidem & providum hoc consilium videtur, respondit Consul: Sed quisnam erit qui ducat quadringentos illos milites ad eum locum inter cuneos hostium? Si alium, inquit Tribunus, neminem reperis, me licet ad hoc periculum utare. Ego hanc tibi & Reipublicæ animam do. Consul Tribuno gratias egit, & meritis laudes tribuit.*

Ille traditos, sibi quadringentos milites admonens quem in locum deduceret, & quo consilio: *Ire*, inquit, *commilitones illò necesse est: unde redire non est necesse. Moriamur, & morte nostrâ eripiamus ex obsidione circumventas legiones. Tum omnes nulla spe evadendi, sed amore laudis & servandi exercitûs cupiditate accensi, proficiscuntur. Hostes eam hominum manum venire ad se demirati, in incerto primùm sunt quò ire pergant. Sed ubi apparuit eos ad illam petram occupandam iter intendere: mittit adversum illos Carthaginensium imperator strenuissimum quemque ex peditatu & equitatu suo militem. Romani circumveniuntur, circumventi repugnant. Fit prælium diu anceps. Tandem superat multitudo. Quadringenti omnes perfoffi gladiis, aut missilibus operti, cadunt. Consul interim*

dum

dum ea pugna fit, se in loca edita & tuta subducit. Dii immortales Tribuno militum fortunam ex virtute ejus dedere. Nam ita evenit, ut, cum multifariam saucius factus esset, nullum in capite vulnus acciperet. Inter mortuos multis confossus vulneribus, sed adhuc spirans, inventus, convaluit, sæpeque postea operam reipublicæ strenuam perhibuit.

4. Leonidas quoque Lacedæmonius cum trecentis civibus apud Thermopylas objectus Xerxi in Græciam irrumpenti, cum innumerabili militum copiâ, maluit occumbere dimicando, quàm assignatam sibi à patria stationem deserrere. Ideoque tam alacri animo cohortatus est suos ad id prælium, quo perituri erant, ut diceret: *Sic prandete, commilitones, tanquam apud inferos cœnaturi.* Mors erat denunciata trecentis illis Lacedæmoniis: nec victoriam sperabant, nec reditum: ille locus iis sepulcrum futurus erat. Perinde tamen ac si victoria esset promissa, ductori intrepidè paruerunt.

Lacedæmonii Leonidam & socios ejus pro patria cæsos decoravere sepulcris, statuis, elogiis. Tribuno militum Romano egregii facinoris merces data est corona graminea, quâ nulla nobilior corona fuit in præmium virtutis bellicæ apud populum terrarum principem, & quæ ab universo exercitu servato decerni solebat.

Populi Romani honores quondam fuerunt rari & tenues, ob eamque causam gloriosi: postea verò effusi fuere & ideo viles. Sic olim apud Athenienses fuisse reperimus. Thrasybulo enim, pro magnis in patriam meritis, honoris ergo corona à populo data est, facta è duabus virgulis oleaginis, quæ magnæ ei gloriæ fuit, quaque ille contentus, nihil amplius requisivit.

5. Epaminondas non Thebanorum modò, sed omnium ætatis suæ Græcorum, controversia princeps extitit. Antequam eo duce uterentur

Thebani, nullum memorabile bellum gesserunt, & eo extincto, suis tantum cladibus insignes fuere: ut manifestum sit, patriæ gloriam & natam & extinctam cum eo fuisse. Quàm fortiter verò & libenter vitam pro patria profuderit, hæc declarant quæ de ejus morte narrantur. Cùm Thebanorum imperator adversus Lacedæmonios acie instructâ constitisset prope urbem Mantineam; Lacedæmonii, qui in ejus unius perniciem sitam putabant salutem suam, universi impetum fecerunt in eum, neque prius abscesserunt, quàm hastili eminus percussum, dum fortissimè pugnaret, concidere conspexerunt Epaminondam expiranti similem cùm in castra detulissent sui: paulatim redeunte animo circumstantes amicos agnovit, & animadvertit mortiferum se vulnus accepisse, simulque animam statim amissurum, si extraheretur ferrum quod in corpore remanserat. Tunc quæsit, *salvusne esset clypeus?* Cùm salvum esse fletus sui respondissent, & allatum osculatus esset, velut laborum gloriæque socium, rogavit, *essentne fugi hostes?* Cùmque id quoque, ut cupiebat, audivisset: *Bene se res habet*, inquit, & satis vixi. Tum evelli jussit eam, quâ transfixus erat, hastam, & multo sanguine profuso, in lætitia & in victoria est mortuus.

Quòd verò de clypeo suo sollicitus fuerit Epaminondas, mirum non debet videri. Nihil enim apud Græcos, atque imprimis Lacedæmonios, magis dedecori erat militi, quàm è pugna reverti amisso clypeo: quemadmodum summæ laudi ducatur militem vulneribus adverso corpore acceptis, occisum & clypeo impositum, in patriam reportari. Unde mulier Lacæna filio ad bellum, proficiscenti scutum tradens dixisse fertur: *Aut hoc, aut in hoc.* Id est, aut scutum domum refer è pugna, aut ipse in hoc scuto jaceas domum reporteris.

6. Magnis veterum scriptorum laudibus celebrata est Cynegyri militis Atheniensis gloria: qui cum in campis Marathonis duce Miltiade, magnam Persarum cædem fecisset, hostesque fugientes in naves egisset: onustam navem dextrâ manu tenuit, nec prius dimisit, quàm manum amitteret. Amputatâ dextrâ, navem sinistrâ comprehendit. Quam & ipsam cum amisisset, ad postremum morsu navem detenuit. Mirum est tantam in Cynegiro virtutem fuisse, ut non cæde hostium fatigatus, non duabus manibus amissis victus, ad postremum, veluti fera, dentibus dimicaverit.

### C A P U T I I I.

*Fortitudo domestica non est inferior militari.*

I. **S**UNT domesticæ fortitudines non inferiores militaribus: nec plus Scipio Æmilianus, singularis & vir & imperator, in excindendâ Numantiâ reipublicæ Romanæ profuit, quàm eodem tempore P. Scipio Nasica, cum Tiberium Gracchum interemir.

Cum Tiberius, Gracchus Tribunus plebis, occupato profusis largitionibus favore populi, rempublicam oppressam teneret, palàmque dictitaret omnia per plebem agi debere, Senatu interemto; in ædem Fidei convocati Patres Conscripti à consule Mucio Scævola, deliberabant quidnam faciendum esset in tali tempestate: cunctisque consentibus, ut Consul armis rempublicam tueretur, Scævola negavit se quidquam vi acturum. Tum Scipio Nasica, qui consobrinus Tiberii Gracchi erat, patriam cognationi præferens: *Quoniam*, inquit, *Consul, dum consensus juris ordinem servat, res nostras in hoc periculum adducit, ut cum omnibus legibus imperium Romanum corruat, egomet privatus voluntati ves-*



*træ*, *Patres Conscripti*, *me ducem offero*. At deinde sublatâ dexterâ, quasi signum extolleret, proclamavit: *Qui rempublicam salvam esse volunt, me sequantur*. Hisque verbis cunctatione bonorum omnium discussâ, Gracchum cum scelerata factione, quas merebatur, pœnas persolvere coegit, eumque manu suâ interfecit. Quod factum cum plebs graviter ferret, Tribuneque singulos Senatores, in concionem productos interrogarent, quis auctor cædis fuisset: cæteri quidem omnes veriti concitatæ multitudinis furorem, à se id factum negabant, variisque & obliquis responsionibus utebantur. Solus Scipio Nasica suâ manu cædem esse factam professus est. Tum verò constantia & autoritate viri mota plebs conticuit.

2. Q. Metelli cognomento Numidici, præclarum imperium in re militari fuit, egregia Censura, omnis vita plena gravitis. Cùm ab inimicis accusatus causam de pecuniis repetundis diceret, & ipsius tabulæ circumferrentur iudicibus inspicendæ; nemo ex illis fuit, quin removeret oculos, & se totum averteret, ne quisquam dubitasse videretur verum an falsum esset quod ille retulerat in tabulas. Hujus viri laudem magnitudo animi & calamitas propagavit ad memoriam sempiternam. De civitate decedere, quàm de sententia, maluit; eique salus patriæ dulcior, quàm conspectus, fuit.

Legem tulerat Saturninus Tribunus plebis, ut Senatus in concione juraret, se quidquid populus jussisset comprobaturum, neque ullo modo impugnaturum. Hanc legem quia Metellus censebat & Senatûs majestati adversam, & Reipublicæ perniciosam, palàm dixit se nunquam in eam juraturum: & tanti viri auctoritate motus Senatus, è foro domum discessit. Post paucos dies cùm Saturninus vocatos ad Rostra Patres minando compelleret ad præstandum jusjurandum; Marius sextum Consul juravit primus;

eumque populus plausu & lætis acclamationibus excepit. Senatores deinde omnes, suo quisque ordine, metu jurarunt, donec ad Metellum ventum est: qui, orantibus licet & obsecrantibus amicis ut juraret, ne gravissimas pœnas subiret, quæ erant à Saturnino propositæ, nihil ex animi fortitudine remisit: sed moribus suis serviens, & acerbissima quæque potius perpeti paratus, quam quidquam turpe facere, discessit è concione: tumque deducentibus eum domum amicis dixit: *Aliquid sceleris admittere, improbum esse: bene agere, ubi nullum periculum esset, vulgare; proprium verò viri boni, etiam cum periculo sequi quod rectum esset.*

Metello aqua & igni interdictum est, & lata rogatio Saturnino, ne quis eum tecto reciperet: videbatur quoque plebecula etiam ad cædem ejus parata. Quidquid virorum bonorum Romæ fuit, ad illius ædes confluit, ejus vicem dolens, & operam pollicens. At ille eos suâ causâ seditio-rem in urbe movere vetuit, cum contentione & armis superior posset esse, & urbe discessit, hæc secum reputans: *Si rerum melior status fiat, & populo sana mens redeat, magnâ cum laude in patriam revocabor. Si contrâ nulla rebus & animis mutatio accedet; optimum erit abesse.* Honestum Rhodi secessum invenit, ibique litteris ac philosophiæ operam dedit, donec Senatûs auctoritate populique jussu revocatus est in patriam, tanto quidem omnium gaudio, ut dies totus non sufficeret gratulationibus illum ad portam urbis excipientium. Sic Q. Metellus nec triumphis, nec honoribus clarior fuit, quam aut causâ, exilii, aut exilio, aut reditu.

Opprimi in bonâ causâ melius est, quam malè cedere.

3. Cum Tribuni plebis auctore Cæsare consule legem Agrariam tulissent, addidissentque ut Senatus in eam juraret, multâ gravi sancti-  
 in

eum qui non jurasset; juraverunt Senatores omnes, non Metelli fortitudinem imitati, sed exilium metuentes. Catonem nec muliebres lacrymæ, nec propinquorum atque amicorum verba infringere potuerant. Tandem ejus constantiam expugnavit Cicero, inter cætera admonens; *si Cato Româ opus non haberet, at Romam Catone opus habere.* Accessit ergo ad jurandum novissimus, si unum amicum ejus Favonium excipias.

Hâc victoriâ elatus Cæsar aliam legem ferendam curavit. Cui cum nemo præter Catonem obstitisset; hunc à rostris in vincula rapi jussit, nihil delibertate linguæ remittentem, sed in ipsâ ad carcerem viâ de lege differentem, atque commonentem cives, ut talia molientibus adversarentur. Sequebatur Catonem mœstus Senatus, & optimus quisque è populo, tacitè indignantes. Id non latebat Cæsarem; sed expectabat dum aut ad humiles preces Cato sese dimitteret, aut ad populum provocaret. Quod ubi frustra à se sperari animadvertit, pudore victus è Tribunis unum summisit qui Catonem dimitteret.

4. C. Piso mirificè & constanter Consulem egit, turbulento reipublicæ statu: ut narratione insequenti patebit. M. Palicani seditiosissimi hominis pestiferis blanditiis captus populus Romanus, summum dedecus admittere parabat, mandato amplissimo imperio homini ei cujus factis supplicium potius, quam honos debebatur: & Tribuni satis per se concitatae multitudinis temeritatem suis concionibus inflammabant. In hoc miserando pariter & erubescendo statu civitatis, cum Rostra conscendisset Piso, & interrogaretur an Palicanum renunciaturus esset Consulem, si populi suffragia in eo creando consensissent, primo respondit: *Non existimare se tantis tenebris offusam esse rempublicam, ut eò indignitatis veniretur.* Deinde cum perseveranter instarent, ac dicerent: *Age, si ventum fuerit quid facies? Non*

*renunciabo*, inquit. Quo quidem tam brevi & forti responso Piso Consulatum Palicano, priusquam illum adispisceretur, eripuit.

5. Cùm Eurybiades baculum sustulisset in Themistoclem sententiæ suæ adversantem: *Percute*, inquit Themistocles, *sed audi*. Eam animi moderationem simul et magnitudinem miratus Eurybiades, Themistoclem loqui, quantum vellet, iussit, ab eo ad meliora consilia revocatus est.

#### C A P U T I V.

*Imperare sibi, maximum imperium est.*

1. **V**ERA & sapiens animi magnitudo in duobus cernitur, si et id solum, quod honestum sit, bonum iudices & omni perturbatione liber sis. Nam fortis animi magnique est, & ea, quæ plerisque eximia et præclara videntur, parva ducere ac contemnere; & ea, quæ videntur acerba, ita ferre, ut nihil discedat à dignitate sapientis. Non est autem consentaneum, qui metu non frangatur, eum frangi cupiditate: nec qui invictum se à labore præstiterit, vinci à voluptate.

O quàm magnis homines erroribus tenentur, qui jus dominandi trans maria cupiunt extendere, felicissimosque se judicant, si multas armis provincias obtinent, et novas veteribus adjungunt, ignari, imperare sibi, maximum imperium esse, sicut servire cupiditatibus, gravissima servitus est.

Quid præcipium in rebus humanis est? Vitia domuisse. Hâc nulla est major victoria. Multi sunt, qui urbes, qui populos habuere in potestate: paucissimi, qui se.

Stultum est imperare cæteris, qui nescit sibi.

2. Gentes barbaras et alieni imperii impatientes regere facilius est, quàm animum suum continere. Satis instructi contra hostes, sæpè contra fortunam et cupiditates inermes sunt. Alexander



quidem Persas, Hircanos, Indos, & cæteras usque ad Oceanum gentes vastavit fugavitque: at tot regum & populorum victor, iræ, tristitiæ, voluptati succubuit: id enim studuerat, ut omnia potius haberet potestate, quàm affectus. Quem arma Persarum non fregerant, vitia vicerunt. Visto, ad Arbela Dario, palàm cupidates suas solvit, & pristinam moderationem ac continentiam in superbiam ac lasciviam vertit. Purpureum diadema, quale Darius habuerat, capiti circumdedit, vestemque Persicam sumpsit. Et ille quidem se Persarum spolia gestare dicebat; sed cum illis quoque eorum mores induerat, et superbiam habitûs animi insolentia sequebatur.

3. Hanc Cæsari laudem eximiam tribuit Cicero, quòd iram suam non minùs fortiter vicisset, quàm hostes vicerat. Domuisti, Cæsar, gentes immanitate barbaras, multitudine innumerabiles, locis infinitas, omni copiarum genere abundantes. Sed tamen ea vicisti, quæ et naturam et conditionem, ut vinci possent, habebant. Nulla est enim tanta vis, tantæque copia, quæ non ferro ac viribus delolari frangique possit. Verùm animum vincere, iracundiam cohibere, victoriam temperare, si quis sciat; non ego euniusumis viris comparo, sed simillimum Deo iudico.

Bis vincit, qui se vincit in victoria.

Iracundiam qui vincit, hostem superat maximum.

Cùm Scipio, post partam de Syphace rege victoriam, vidisset Masinissiam intempestivo Sophonisbæ captivæ amore captum; ei abducto in secretum dixit: *Non est, mihi crede, tantum ab hostibus armatis ætati nostræ periculum, quantum ab circumfusus undique voluptatibus. Qui eas sua temperantiâ frenavit ac domuit, ne ille multo majus decus majoremque victoriam sibi peperit, quàm nos Syphace victo habemus.*

## CAPUT V.

*Vitiorum irritamenta sunt fugienda.*

1. **C**APUA, Campaniæ urbs, prona semper in luxuriam fuit non modò ingeniorum vitio, sed etiam affluenti copiâ voluptatum, quas longa indulgentia fortunæ & loci amænitas subministrabant. Cùm illuc iter flexisset Annibal, victis ad Cannas Romanis, ibi majorem partem hiemis sub tectis habuit exercitum, duratum prius adversus mala, et nondum expertum bona. Itaque quos nulla vis mali vicerat, perdidere nimia bona & voluptates immodicæ. Somnus enim, vinum, & epulæ, & otium consuetudine in dies blandius, ita enervaverunt corpora animosque, ut vires ad deinceps vincendum ademerint; & Marcellus verè dixisse videatur, *Capuam Annibali Cannas fuisse.*

2. Non tantum corpori, sed etiam moribus, salubrem locum eligere debemus. Inter popinas habitare nolim, videre ebrios per littore errantes, & symphoniarum cantibus perstreperentes lacus. Id agere debemus, ut irritamenta vitiorum quàm longissimè profugiamus. Indurandus est animus, & à blandimentis voluptatum procul abstrahendus. Una Annibalem hiberna solverunt: & Campania enervavit virum illum nivibus atque Alpibus indomitum. Armis vicit, vitiis est. Persequenda sunt vitia sine modo, sine fine. Debellendæ sunt imprimis voluptates, quæ sæva etiam ingenia ad se rapuerunt. Nihil delicate, nihil molliter est faciendum: non emolliendus animus. Itaque loca seria sanctaque ad habitandum eligere oportet. Effeminat animos amænitas nimia: nec dubiè ad corrumpendum vigorem aliquid potest regio. Severior loci disciplina firmat ingenium, aptumque magnis conatibus reddit.

3. Diutius Babylone, quàm usquam, constitit Alexander : nec ullus locus disciplinæ militari magis nocuit. Nihil urbis ejus moribus corruptius, nihil ad irritandas illiciendasque voluptates aptius fuit. Babylonii quippè maxime in vinum, & quæ ebrietatem sequuntur, effusi erant. Inter has delicias & flagitia exercitus ille domitor Asiæ per triginta quatuor dies saginatus, haud dubiè debiliior fuisse ad ea quæ sequebantur bella, si cum orti hoste decertasset.

## C A P U T I V.

*Angusti animi est amare divitias, magni contemnere.*

1. **P**ECUNIÆ fugienda cupiditas. Nihil enim est tam angusti animi tamque parvi, quàm amare divitias.

Nihil honestius magnificentiusque, quàm pecuniam contemnere, si non habeas; si habeas, ad beneficentiam liberalitatemque conferre.

Homines maxime adadurantur eum qui pecuniâ non metuit, & illum quasi igni probatum arbutantur.

2. Cum est concupita pecunia, nec adhibita continuo Ratio, quasi quedam medicina, quæ sanaret eam cupiditatem: permanet in venas, & inhaeret in viceribus illud malum, existitque agrotatio, cui nomen est Avaritia: quæ evelli inveterata non potest. Itaque:

Principiis obsta. Serò medicina paratur,

Cum mala per longas convaluere moras.

Avaritia pecuniæ studium habet, quàm nemo sapiens concupivit. Ea semper infinita, & insatiabilis est, neque copiâ neque inopiâ minuitur. Etenim:

Avarum irritat, non satiat, pecunia.

Avarus animus nullo satiatur lucro.

Tam deest avaro quod habet , quàm quod non habet.

Is minimo eget mortalis , qui minimum cupit.

3. Provideas oportet , ut juvenus probitati & industriæ , non sumptibus neque divitiis , studeat. Id ita eveniet , si pecuniæ quæ maxima omnium pernicies est , decus demiseris.

Ex quo pecunia in honore esse cœpit , non quæritur quale sit aliquid , sed quanti pretii. Hæc ipsa , quæ magistratus & iudices facit , tot magistratus , tot iudices detinet , pecunia.

Curia pauperibus clausa est : dat sensus honores.

Admirationem nobis parentes auri argentique fecerunt , & teneris animis infusa cupiditas , altius incedit , crevitque nobiscum. Deinde totus populus in cæteris discors , in hoc convenit. Hoc suspiciunt , hoc suis optant , hoc Diis consecrant velut rerum humanarum maximum , cum grati videri volunt. Denique cò mores sunt redacti , ut paupertas probro sit , contempta divitibus , invisæ pauperibus , & loca cuncta his vocibus personare videantur :

O cives , cives , quærenda pecuniæ primum est ,  
Virtus post nummos.

Aurea nunc verè sunt sæcula : plurimus auro.  
Venit honos.

Tempore crevit amor , qui nunc est summus ,  
habendi ;

Vix ultrà , quò jam progrediatur , habet.

Creverunt & opes , & opum furiosa cupido :

Et cùm possideant plura volunt.

Sic quibus intumit suffusâ venter abundâ ,

Quo plus sunt potæ , plus sitiuntur aquæ.

In pretio pretium nunc est. Dat census honores ,

Census amicitias : pauper ubique jacet.

Tam rarum est liberalitatis exemplar , ea invasit homines habendi cupido , ut possideri magis à divitiis , quàm eas possidere , videantur.



## CAPUT VII.

*Quod satis est cui contingit, nihil amplius optet.*

1. **N**ON possidentem multa vocaveris  
 Rectè beatum. Rectius occupat  
 Nomen beati, qui Deorum  
 Muneribus sapienter uti,  
 Duramque callet pauperiem pati;  
 Pejusque letho flagitium timet:  
 Non ille pro caris amicis,  
 Aut patriâ timidus perire.

Contemplatus Cato major Manii Curii villam, quæ non longè aberat à suâ, admirari satis non poterat, vel hominis ipsius continentiam, vel temporum disciplinam. Huic Curio ad focum sedenti in agresti scamno, et ligneo catillo cœnanti, cùm magnum auri pondus Samnites attulissent, repudiati ab eo sunt, dixitque: *Non, aurum habere, sibi præclarum videri, sed iis, qui haberent aurum, imperare.* Quo responso Curius Samnitibus ostendit, se, ut non acie vinci, sic non pecuniâ corrumpi posse.

Idem cùm ex Italia Pyrrhum expulisset; nihil omnino ex præda regia, quæ exercitum urbemque ditaverat, attingit, præter guttum ligneum, quo deinde ad sacrificia usus est. Cùmque Senatus civibus septena jugera agri ex hostibus capti assignasset, ipsi autem quinquaginta, plus accipere, quàm singulis è plebe datum fuerat, noluit: parum idoneum, imò etiam perniciosum, reipublicæ civem eum existimans, cui septem jugera non essent satis.

2. Non ditior Curio Attilius Regulus fuit. Cùm in Africa Carthaginiis opes crebis præliis contunderet, ac prorogatum sibi ob res bene gestas imperium cognovisset; scripsit Consulibus, vilicum agelli, quem septem jugerum habebat, mortuum esse;

esse ; & servum , quem ille conduxerat , occasionem natum , aufugisse , ablato rustico instrumento : ideoque petere se , ut sibi successor in Africam mitteretur , ne deserto agro , non esset unde uxor & liberi alerentur. Quæ postquam Senatus à Consulibus accepit : res , quæ Regulus amiserat , publicâ impensâ redimi iussit , agellum dari colendum , et alimenta conjugii ac liberis præberi.

3. Legati à Samnitibus ad C. Fabricum imperatorem Romanorum venerunt : & commemoratis quæ ille benevolè in Samnites , post redditam illis pacem , fecerat , dono ei obtulerunt , tum servos multos , tum grandem pecuniam , atque orarunt ut acciperet uterunque. Id verò se facere , dixerunt , quòd viderent multa ei ad splendorem domûs & victus deesse ; neque pro magnitudine ejus ac dignitate lautum illi apparatus esse. Cænebat quippe ad focum illas ipsas radices & herbas , quas in agro repurgando triumphalis senex vulserat : totaque ejus supellex argentea salino constabat , & patella ad usum sacrotum , quæ tamèn ipsa corneo pediculo sustinebatur. Tum Fabricium ferunt respondisse. *Quandiu cupiditibus obsistere atque imperare posset , numquam sibi quidquam defuturum : propterea se pecuniam , quâ nihil sibi opus esset , non acciperet ab iis , quibus sciret eam usui esse.* Erat certè Fabricius continentiae suæ beneficio sine pecunia prædives : quia locupletem illum faciebat non multarum rerum possessio , sed paucarum desiderium. Ergo domus ejus , quemadmodum argento & mancipiis Samnitum vacua fuit , ita gloria ex his contemptis parta referta fuisse dici potest.

Vivitur parvo , bene cui paternum  
Splendet in mensa tenui salinum ;  
Nec leves somnos timor aut cupido  
Sordidus aufert.

Qui domum intraverit , nos potius miretur ,  
Pars II. C

quàm supelleſilem noſtram. Magnus ille eſt , qui fiſtilibus ſic utitur , quemadmodum argento : nec ille minor eſt , qui ſic argento utitur , quemadmodum fiſtilibus. Infirmi enim animi eſt pati non poſſe divitias.

4. Cùm Caius Cæſar , cui cogomen Caligula , Demetrio Philoſopho ducenta ſeſtertia donaret ; ridens hic rejecit , ne dignam quidem ſummam judicans , quâ non accepta gloriari poſſet : miratusque Caii dementiam , quòd ſe putaret hac pecuniâ poſſe mutari : *Si tentare* , inquit , *me conſtituerat , toto illi fui experiendus imperio.*

Sunt quidem exempla hæc præclara : ſed mores noſtri corrupti depravatique ſunt amore divitiarum : quarum magnitudo illum fortasſe adjuvat , qui habet ; quemquam ne id quidem ſemper : ſe ſac juvare : an propterea honeſtior eſt.

Delectant multos magnifici apparatus , vitæque cultus cum elegantiâ & copiâ quibus rebus effectum eſt , ut infinita pæcuniæ cupiditas eſſet.

## C A P U T V I I I.

*Optimus quiſque Græcorum pauperrimus.*

1. **V**IRI inter Græcos præſtantiffimi , per vitam omnem in ſumma paupertate verſati ſunt , nec eorum virtus pecuniâ potuit expugnari.

Ephialtes Sophonidæ filius pauperrimus fuit. Cùm verò amici ducenta talenta ei dono darent ; ipſe non accepit , dixitque : *Hæc non accipio propter quæ , ſi gratus videri velim , cogar fortasſe aliquid præter jus concedere ; ſi vero nihil gratificer , habear ingratus.* Adeo autem eum inopiæ non puduit , ut , homine nescio quo , eam illi exprobrante , reſponderit : *Cur non etiam alterum exprobras , quod juſtitiam colam ?*

2. Epaminondas , dux clarissimus Thebanorum , unam solum habebat vestem. Itaque quoties eam mittebat ad fullonem , ipse interea cogebatur se continere domi , quòd vestis altera deesset. In hoc statu rerum , cùm ei Persarum rex magnam auri copiam misisset , noluit accipere. Si rectè judico , celsiore animo fuit is qui aurum recusavit , quàm qui obtulit.

Diomedon Cyzicenus rogatu Artaxexis Epaminondam pecuniâ corrumpendum suscepit. Venit ergo Thebas cum magno auri pondere , & per Micythum adolescentulum Epaminondæ carissimum , quem quinque talentis corruperat , causam adventus sui ostendit. At ille Diomedonti : *Nihil , inquit , opus pecuniâ est. Nam si ea rex vult , quæ Thebanis sint utilia , gratis facere sum paratus ; sin autem contraria non habet auri neque argenti satis. Namque orbis terrarum divitias accipere nolim pro abjicienda patriæ caritate. Te , qui me incognitum tentasti , tuique similem existimasti , non miror : tibi que ignosco. Sed egredere properè , ne alios corrumpas , cùm me non poteris. Tu , Micythe , argentum huic redde. Quod nisi confestim facias , ego te tradam magistratui.*

Pauperatem verò adeo facile perpersus est Epaminondas , ut de republicâ nihil præter gloriam ceperit ; & amicorum facultatibus , non ad suam , sed aliorum paupertatem sublevandam , usus sit. Nam cùm aut civium suorum aliquis ab hostibus esset captus , aut viri probi virgo nubilus propter pauperatem collocari non posset ; amicorum consilium habebat , ab iisque postulabat atque impetrabat , ut pro suis quisque facultatibus conferret ad conficiendam pecuniæ summam quâ opus esset.

3. Et si sæpè exercitibus præfuit , summosque magistratus gessit , Phocion Atheniensis , fuit tamen perpetuò pauper , nec ditior fieri voluit , cùm facile posset. Attulerant ei legati Philippi



Macedonum regis magnam pecuniæ vim. Quàm quia magno animo repudiabat, eum admonuerunt, ut si ipse pecuniâ facilè careret, liberis tamen suis prospiceret, quibus difficile futurum esset in summa paupertate paternam gloriam tueri. His ille : *Si mei similes*, inquit, *erunt filii, idem hic agellus eos alet, qui me ad hanc dignitatem perduxit: Sin dissimiles sunt futuri, nolo meis impensis illorum cli augerique luxuriam.*

Eidem Phocioni Alexander Philippi filius centum talenta dono misit. Oblati muneris magnitudine nihil motus Phocion, eos qui pecuniam attulerant percontatus est, *cur sibi uni inter tot Athenienses dona mitteret Alexander?* Quibus respondentibus, *eum unum Alexandro videri virum honestum & bonum. Ergo sinat, inquit ille, me talem & haberi & esse.* Institerunt tamen legati, ut allatum auri pondus acciperet, maximè ubi domum ejus ingressi, vilem ubique supellectilem, & uxorem ejus pinsentem viderunt; ipseque, hausta in eorum conspectu aquâ è puteo, pedes lavavit. At ille non mutatâ sententiâ : *Si eam*, inquit, *quam offerri's obtruditisque mihi pecuniam accipero, neque ed utar, frustra tantus thesaurus in manus meas venerit; si verò utar, & mihi & Alexandro malam apud Athenienses famam comparabo.* Sic in Asiam ad Alexandrum reportata fuit illa pecunia, & ditior est visus qui eâ æquo animo carere potuit, quàm qui obtulit.

Munera sua fuisse à Phocione repudiata molestè ferens Alexander, scripsit ad eum : *Non habere se pro amicis eos, qui nihil à se vellent accipere.* Eandem pecuniam denuo offerri jussit & quatuor Asiæ urbes nominari, quarum unam pro arbitrio eligeret, cujus redditibus frueretur. Phocion ne sic quidem quicquam accepit. Ne tamen planè Alexandrum contemnere videretur, hoc regiæ majestati dedit, ut liberòs dimitti rogaret viros quatuor, qui in arce Sardinum vincti tenebantur,

quod extemplo præstitit Alexander.

Antipater dicebat duos se Athenis habere amicos, Phocionem & Demadem: quorum alteri persuadere non posse, ut quicquam acciperet; alterum, multa dando, explere nequiret.

## C A P U T I X.

*Parvo contentus sapiens, paupertatem non timet.*

1. **Q**UAM parvo contentus est sapiens! quam parum paupertatem timet! Etenim quæ res pecuniæ cupiditatem afferunt, gula, ambitio, libido, cum procul ab iis omnibus rebus absit; cur pecuniam magnopere desideret, vel potius curet omnino? Ducebat certè pro nihilo pecuniam Anacharxis Scythes, cujus extat epistola, his verbis: *Anacharxis Hannoni salutem. Mihi amictus est, ut Scythis, feræ pellis: calceamentum, pedum callum: cubile, terra: obsonium, fames: lacte, caseo, carne vescor. Quare ut ad quietum me licet venias. Munera autem ista tua, vel civibus tuis vel Diis immortalibus dona.*

Socrates, qui eum Diis proximum dicebat, cui quam paucissima satis essent, cum aliquando in pompa magham vim auri atque argenti ferri videret: *Quam multa non desidero*, inquit.

2. Xenocrates, cum legati ab Alexandro quinquaginta ei talenta attulissent, quæ erat pecunia temporibus illis, Athenis præsertim, maxima; abduxit legatos ad cœnam in Academiam, iisque apposuit tantum quod satis esset, nullo apparatu. Cum postridie rogarent eum, cui numerari pecuniam juberet? *Quid? vos hesternâ*, inquit *cœnula non intellexistis me pecuniâ non egere?* Quo responso factos illos tristiores ut vidit, triginta minas accepit, ne aspernari regis liberalitatem videretur.

3. Diogenes Alexandro roganti ut diceret, si quid sibi opus esset, liberè, ut cynicus respondit: *Nunc quidem paulum à sole absis.* Offecerat videlicet apricanti. His auditis Alexandrum dixisse ferunt: *Nisi Alexander essem, libenter essem Diogenes.* Multo potentior multoque locupletior tunc erat Diogenes omnia possidente Alexandro. Etenim aliquid majus erat, illum nolle accipere quod offerretur, quàm hunc posse dare. Et qui gloriari solebat à nullo se beneficiis victum, eo die victus est, quo vidit aliquem, cui nec dare quicquam posset nec eripere.

Diogenes quidem prædicare solebat quanto ipsum Regem Persarum felicitate superaret: *Sibi nihil deesse, illi nihil satis unquam fore: se ejus voluptates non desiderare, quibus numquam satiarì ille posset; suas enim consequi nullo modo posse.* Hæc verè Diogenes. Nam Xerxes refertur omnibus præmiis bonisque fortunæ, non peditatu, non equestribus copiis, non navium multitudine, non infinito pondere auri contentus, præmium proposuit ei qui invenisset novam voluptatem. Quâ inventâ ipso non fuit contentus. Neque enim unquam finem invenit libido.

## C A P U T X.

*Divitiæ atque otium pestes virtutis.*

1. **U**T Lacedæmonii nihil superesset quod magnopere quærerent, præter laudem virtutis: auri argentique usum, velut omnium scelerum materiam sustulit Lycurgus. Hocque adeo severe ab illo interdictum scribunt, ut inquireretur de auri possessione, tanquam de gravi scelere: & qui hac in re contra leges peccasse deprehensus esset, morte pœnas daret. Solo ferro nummo uti permisit, qui ita gravis pondere, & mols amplius erat, ut ad transferendum no-

ita magnum ejusmodi nummorum numerum, plaustro opus esset. Emi autem pleraque non pecuniâ, sed mutatione mercium jussit. Fundos æqualiter inter omnes divisit, ut æquata patrimonialia neminem altero potentiores redderent.

Cum Lacedæmonius solitum esset non solum in acie adversus hostem, sed etiam domi adversus divitias, invictum animum gerere; Lacedæmonius adolefcens, qui vilissimo pretio fundum emerat, in judicium vocatus est apud magistratus, & damnatus. Mali quippe exempli visum est, juvenem lucri studio teneri.

Alter Lacedæmonius nomine Timandridas, peregre abiens, domus suæ ac rei familiaris curam filio reliquit. Reversus postea, ab eo rem suam multo ampliorem factam cum comperisset, dixit: *Magnam ab illo Diis, propinquis, amicis, hospitibus ac pauperibus factam esse injuriam: quæ enim in facultatibus, præter necessaria ad vitam, abundarent, ea in illos esse eroganda.*

2. Tandem gloriâ & potentiâ floruit Lacedæmoniorum respublica, quandiu apud eam paupertatis amor viguit. Invictam per quingentos annos præstitit vera Lycurgi disciplina intra annos haud multos de vitæ pessum dedere. Prius Lyfander iis, quibus carebat ipse, vitiis patriam infecit; & pecuniæ abstinens, ejus cupiditatem iniecit civibus. Quidquid auri & argenti ex præda hostili redegerat, non sibi vindicavit, sed Lacedæmonem deferendum curavit, quæ antea ferreis tantum nummis utebatur. Tum verò exortum est inter privatos studium habendi, & sic interlit pristina eorum virtus: suæque ipsi dāmo intellexere, quā verum esset quod olim Lycurgo interroganti Pythia responderat: *Auro & argento inaccessiblei esse Spartam oportere.*

3. Quomodo priscorum quoque Romanorum virtus labefacta fuerit, narrant his verbis Sallustius & Paterculus, » Ubi labore atque justitiâ



respublica crevit, reges magni bello domiti, populi ingentes vi subacti, & Carthago æmula imperii Romani interiit; tum iis, qui labores, pericula, dubias atque asperas res facillè toleraverant, otium & divitiarum oneri miseriarumque fuere. Non lento gradu, sed præcipiti cursu à virtute descitum est, & ad vitia transcursum: vetus disciplina deserta, nova inducta: à vigiliis ad somnum, ab armis ad voluptates, à negotiis in otium conversa civitas. Primò pecuniarum, dein imperii cupido crevit.» Ea quasi materies omnium malorum fuere. Postquam divitiarum honori esse cœperunt, & eas magistratus atque imperia sequebantur, hebescere virtus, paupertas probro haberi cœpit: juventutem luxuria atque avaritia cum superbiâ invasere.

Vidit P. Scipio posterior quantum periculi patriarum immineret ab nimis opibus. Nam cum Censor lustrum conderet, & in solito fieri sacrificio scriba solemne precationis carmen ei præiret, quo Dii rogabantur, ut populi romani res meliores amplioresque facerent: *Satis, inquit, bonæ ac magnæ sunt: Itaque precor ut eas perpetuò incolumes servant.* Ac protinus ad hunc modum carmen emendari iussit. Quâ votorum verecundiâ deinceps Censores in condendis lustris usi sunt.

## C A P U T X I.

### *Vera bona virtus & doctrina.*

1. **U**RBEM Megara ceperat Demetrius, cui cognomen Poliorcetes fuit. Ab hoc Stilpon Philosophus interrogatus, numquid perdidisset? *Nihil, inquit, omnia namque mea mecum sunt.* Atqui & patrimonium ejus in prædam cesserat, & filias rapuerat hostis, & patriam expugnaverat. Ille tamen nihil se damni passum fuisse tes-

tatus est. Habebat enim secum vera bona, doctrinam scilicet & virtutem, in quæ hostis manum injicere non poterat: & ea, quæ à militibus diripiebantur, non judicabat sua. Omnium scilicet bonorum, quæ extrinsecus adveniunt, incerta possessio est ita inter micantes ubique gladios & ruentium tectorum fragorem uni homini pax fuit.

2. Numquam vir sapiens existimavit in bonis rebus ponenda esse atque expetenda imperia, recta magnifica, pecunias, & eas quibus plerique hominum maxime adstricti sunt, voluptates: quoniam ea qui habent, non solum augendi libidine cruciantur, sed etiam amittendi metu: & illa omnia esse raria videmus, ut etiam improbi habeant, & obtineant probis. Plus apud sapientem vera ratio valet, quam vulgi opinio: neque unquam illum bona perdidisse dicer, qui pecus aut suppellectilem amiserit. Hæc erat sententia Briantis, qui inter septem illos Græciæ sapientes numeratur. Cum patriam ejus Prienem cepisset hostis, cæterique cives multa è suis rebus secum asportarent; admonitus à quodam ut idem ipse faceret: *Ego verò, inquit, facio, nam omnia mea porto mecum.* Ille hæc munera, vel potius ludibria fortunæ, non putavit sua. Ea verò tantum esse sua existimavit, quæ pectore gestabat, virtutem scilicet & doctrinam.

3. Quidquid auri supra & infra terram est, nullius prælii est, si cum virtute comparetur, inquit Plato. Et viris probis illud Solonis in mente semper habendum, & verbis usurpandum: *Alii sibi divitias habeant, nos virtutem.*

## CAPUT XII.

*Cavenda est gloriæ cupiditas, neque imperia expetenda.*

I. **C**AVENDA est gloriæ cupiditas : eripit enim libertatem, pro qua magnanimis viris omnis debet esse contentio. Nec vero imperia expetenda; ac potius aut non accipienda interdum, aut deponenda nonnumquam.

Timoleon Corinthius magnus omnium judicio vir extitit. Namque huic contigit quod nescio an ulli, ut, & patriam oppressam à tyranno liberaret, & depulsâ à Syracusis, quibus auxilio erat missus, inveterata servitute, totam Siciliam in pristinum statum restitueret. Cùm frater ejus Timophanes tyrannidem Corinthi occupasset, ipseque particeps regni cum illo posset esse: tantum abfuit societate, ut antetulerit civium suorum libertatem salutem fratris, & patriæ legibus obtemperare satius duxerit, quam imperare. Itaque fratrem tyrannum, sæpius frustra oratum ut civibus libertatem restitueret, interficiendum curavit. Quæ cædes aliis præclarissimum facinus visa est, alii læsam à Timoleonte pietatem fraternam putavere.

Missus à Corinthiis ad ferendam opem Syracusanis, Dionysium tyrannum totâ Siciliâ depulit: civitatibus leges libertatemque reddidit: & ex maximo bello tantum otium toti insulæ conciliavit, ut urbium conditor videretur. Cùm jam tantis esset opibus, ut Siculis etiam invitis imperare posset; tantum autem haberet amorem omnium, ut, nullo recusante, summam potentiam obtineret: cùm primum potuit, imperium deposuit, & privatus Syracusis, quod reliquum vitæ fuit, vixit. Nullus tamen ei honos,

qui haberi virtuti solet, defuit, neque postea res ulla gesta est publica, de qua prius sit decretum, quam Timoleontis sententia cognita fuisset. Acceptius præstantiusque nihil est tyrannorum depulsoribus, maximè si modesti ipsi abstinentesque sint.

2. Cùm Romæ fama exorta esset Etruscos Samnitesque conscribere ingentes exercitus, & illustres viri Consulatum peterent; omnium animi atque oculi conversi sunt in Q. Fabium Maximum, primò non petentem, deinde etiam recusantem. Acuebat hac moderatione tam iusta civium studia: quæ verecundiâ legum restringenda ratus, legem recitari iussit, quâ intra decem annos eundem Consulem refici non liceret: tot verò anni non effluxerant ab ultimo ejus consulatu. Vix præ strepitu audita lex est: Tribuni plebis nihil id impedimenti futurum aiebant: se enim laturos ad populum, ut legibus solveretur. Ille in recusando perstabat, rogitans: *Quid ergo attineret leges ferri quibus per eosdem, qui tulissent, fraus fieret?* Et quærens, jam regi leges, non regere. Populus nihilominus suffragia inibat, & singulæ centuriæ Consulem haud dubiè Fabium jubebant. Tum demum consensu civitatis victus Consulatum accepit, eique is collega est datus, quem petierat.

Idem Fabius, cùm à se quinquies, à patre, avo, pro-avo majoribusque suis consulatum gestum animadverteret; in comitiis, quibus filius ejus summo consensu Consul creabatur, flagitavit à populo, sed frustra, ut vacationem hujus honoris Fabiæ genti daret. Non quod filii virtutibus dissideret: sed ne maximum imperium in una familia continuaretur. Quid hac moderatione valentius & mirabilius inveniri potest, quæ etiam patrios affectus, qui potentissimi habentur, superavit?

3. Comitia Consulibus creandis habente Ful-



vio, centuria juniorum, quæ prima sententiam rogata fuerat, declaravit Consules. T. Manlium Torquatum, & T. Otaciliū. Cū dubius non esset consensus totius populi, Manlius qui præsens erat, ad Tribunal Fulvii venit, magna circumfusus turbâ quæ gratulandi causâ venerat, petiitque ab eo, ut pauca sua verba audiret. Erectis omnibus expectatione quidnam postulaturus esset; oculorum valetudinem excusavit. Dixit: *Impudentem & gubernatorem & imperatorem futurum esse, qui cū alienis oculis ei omnia agenda essent, aut postularet, aut pateretur sibi aliorum capita & fortunas committi.* Oravitque ut centuria juniorum in suffragium rediret, & in Consulibus creandis meminisset belli, quod in Italia esset, gravissimi: Succlamavit centuria frequens nihil se mutare sententiæ, seque eisdem Consules dicturam esse. Tum Torquatus: *Neque ego vestros inquit, mores Consul ferre poterō, neque vos imperium meum. Redite in suffragium, & cogitate bellum Punicum in Italia, & ducem Annibalem, esse.* Tandem centuria auctoritate viri mota, post petītum atque habitum cum Senioribus colloquium, ex eorum consilio alios Consules dixit jam præclarè gestis cognitos: Ejusque sententiam omnes centuriæ secutæ sunt.

4. Maxima superiores Africani merita in patriam paribus ornamentis decorare conati sunt Romani. Voluerunt illi statuas in comitio, in rostris, in curia, in ipsa denique Jovis Æde ponere. Voluerunt imaginem ejus triumphali ornatu indutam inter Deorum simulacra collocare. Voluerunt ei continuum per omnes vitæ annos Consulatū perpetuamque dictaturam tribuere. Quorum sibi nullum neque plebiscito dari, neque senatusconsulto decerni patiens, penè tantum in recusandis honoribus se gessit, quantum gesserat in emerendis.

5. Diocletianus sponte depositis imperialibus fascibus,

fascibus, in propriis agris consenuit. Cùm aliquando ab Herculio atque Galerio ad recipiendum imperium excitaretur; illud tanquam pestem detestans, hoc quoque respondit: *Utinam Saloniæ possitis visere olera nostris manibus confita & dimensa! Profecto numquam istud tentandum judicaretis.*

6. Fuit incertum vir melior, an dux, esset Epaminondas. Nam & imperium non sibi, sed patriæ, semper quæsit: & pecuniæ adedò negligens fuit, ut sumptus funeri defuerit. Gloriæ quoque non cupidior, quàm pecuniæ: quippe recusanti omnia imperia ingesta sunt: honoresque ita gessit, ut ornamentum non accipere, sed dare ipsa dignitati, videretur.

## CAPUT XIII.

*Hoc est regnare, nolle regnare cùm possis.*

1. **C**UM P. Cornelius Scipio prælio victor; se erga Hispanos gessisset perhumaniter; circumfusa multitudo regem eum ingenti consensu appellavit. Tum Scipio, silentio per præconem facto, dixit: *Nomen Imperatoris, quo se milites sui appellassent, sibi maximum esse: Regium nomen, alibi magnum, Romæ intolerabile esse: Si id amplissimum ducerent quod regale esset; regalem animum in se esse tacite judicare eos posse, ut autem à regis appellatione abstinere, se orare.* Sensus etiam barbari magnitudinem animi id nomen aspernantis, cujus admiratione alii mortales stupeverunt.

2. Inter Romanorum legatos, qui ad Pyrrhum de captivis redimendis aut commutandis venerant, C. Fabricius fuit. Cujus postquam audivit Pyrrhus magnum esse apud Romanos nomen, ut viri boni & bello insignis, sed admo-

dum pauperis, eum præ cæteris benignè habuit, contenditque ut munera atque aurum abs se acciperet, in hospitii tantùm & amicitiae pignus. Cuncta oblata respuit Fabricius. Postero die cum illum exterrere cuperet Pyrrhus, subito conspectu elephantis, cujus speciem nunquam viderat, imperavit suis, ut belluam, quæ cæteras magnitudine præstaret, Fabricio secum colloquenti admoveretur à tergo post aulæum. Quod ubi factum est, signo dato, remotoque aulæo, repente bellua stridorem horrendum emisit & proboscidem super Fabricii caput suspendit minaciter. At ille placidè ad belluam conversus, subrisit, dixitque Pyrrho: *Non me hodie magis commovet tua bellua, quàm heri aurum tuum movit.* Admiratus Pyrrhus Fabricii fortitudinem animi & gravitatem, illum privatim invitavit, ut post factam cum Romanis pacem, secum vellet vivere, primumque ei inter amicos locum atque etiam imperii partem obtulit. Cui summâ voce fertur Fabricius respondisse: *Hoc tibi, ô Rex, non expedit. Nam illi ipsi, qui te nunc tantopore colunt ac mirantur, si me cognoverint ac probaverint, magis à me regi, quàm à te, volunt.*

3. Cum Strato Sidonis rex, urbis deditionem Alexandro fecisset, magis civium voluntate quàm suâ sponte, ei visus est indignus regno, Hephæstionique est permissum, ut regem è Sidoniis constitueret eum, quem illo fastigio dignissimum arbitraretur. Erant Hephæstioni hospites, juvenes inter suos clari: qui factâ ipsis ab Hephæstiono potestate regnandi, negaverunt quemquam patrio more ad hanc dignitatem evehi posse, nisi regia stirpe ortum. Admiratus Hephæstion magnitudinem animi spernentis quod alii per ignes ferrumque peterent: *O fortes! ô felices,* inquit, *juvenes, qui primi intellexistis quanto majus esset regnum fastidire, quàm accipere. Cæterum date aliquem regis stirpis, qui meminerit à vobis accep-*

tum habere se regnum. At illi cum viderent multos avidâ regnandi cupiditate teneri; judicarunt neminem esse tanto honore digniorem, quàm Abdalonimum quemdam, stirpi quidem regiæ annexum, sed quî ob inopiam suburbanum hortum exiguâ mercede coleret. Causa ei paupertatis, sicut plerisque, probitas erat: intentusque operi diurno, strepitum armorum, qui totam Asiam concusserat, non exaudiebat.

Juvenes de quibus antè dictum est, cum regia veste hortum intrant, quem tum fortè, steriles herbas eligens, Abdalonimus repurgabat: & rege eo salutato, alter ex his: *Vestis hæc*, inquit, *quam cernis in meis manibus, cum squalidis istis pannis permutanda tibi est. Cape regis animum, & in eam fortunam, quâ dignus es, istam continentiam profer. Atque cum in regali solio resideas, vitæ nescisque omnium civium dominus, cave obliviscaris hujus status in quo accipis regnum, inò hercule propter quem.*

Somnio similis res Abdalonimo videbatur, & à juvenibus quærebat, an sanæ mentis essent, qui tam proterve sibi illuderent. Sed ut ei cunctanti squalor abiutus est, & injecta vestis purpurea auroque distincta, & jurantibus seriam rem esse credidit; iisdem comitantibus in regiam pervenit. Admitti eum Alexander protinus jussit, diuque contemplatus: *Corporis*, inquit, *tui habitus famæ generis non repugnat. Sed velim scire, inopiam quâ patientiâ tuleris.* Tum ille, *utinam*, inquit, *eodem animo regnum pati possim. Hæc manus suffecere desiderio meo. Nihil habenti, nihil defuit.* Hoc responsum magnæ indolis specimen Alexandro est visum. Itaque non Stratonis modo regiam supellecilem tribui Abdalonimo jussit, sed pleraque etiam ex Persicâ prædâ. Regionem quoque Sidoni vicinam, ditioni ejus adjecit. Nec sanè quidquam ingenium Alexandri solidius & constantius habuit, quàm admirationem veræ laudis & gloriæ.



## CAPUT XIV.

*Gloriæ & famæ jactura facienda est publicæ utilitatis causâ.*

1. **I**NVENTI sunt multi, qui non modo pecuniam, sed etiam vitam, pro patria profunderè parati essent; iidem gloriæ jacturam ne minimam quidem facere vellent etiam republicâ postulante. Ut Callicratidas, qui cùm Lacedæmoniorum dux fuisset Peloponnesiaco bello, multaquæ fecisset egregiè; vertit ad extremum omnia, cùm consilio non paruit eorum, qui classe cum Atheniensibus ne dimicaret suadebant. Quibus ille respondit: *Lacedæmonios, classe illâ amissâ, aliam parare posse: se fugere sine suo dedecore non posse.* Quanto melius fecit Q. Fabius Maximus! de quo Ennius:

Unus homo nobis cunctando restituit rem:

Non ponebat enim rumores ante salutem.

Ergo postque magisque viri nunc gloria claret.

Etenim adversus Annibalem callidum imperatorem, toties victorem, dux à Romanis electus Q. Fabius, novam vincendi artem commentatus est; non pugnare, & hostem mora frangere. Unde cunctator est dictus.

Non ignorabat suam cunctationem Romæ infamem esse, seque timidum pro cauto, imbellem pro perito belli haberi. At maluit ut se hostis metueret, quàm stulti cives laudarent. Obstinatus in id quod videbat patriæ salutis futurum esse, eodem consiliorum tenore semper bellum gessit. Q. Minucium magistrum Equitum jure imperii æquari Fabio Dictatori jussit populus, veræ virtutis malus æstimator. Quam legem omnes qui Romæ aut in castris erant, æqui atque iniqui, præter ipsum Dictatorem, in contumeliam ejus

latam esse judicaverunt. Ipse quâ gravitate criminantes se ad multitudinem inimicos tulerat, eâdem & populi in se sævientis injuriam tulit. Inviictum tam à civibus quàm ab hoste animum retinuit, & patriæ consulere etiam famæ suæ dispendio non destitit.

Ea Caritas patriæ esse debet, ut tam ignominia eam, quàm morte nostra, si opus sit, servemus.

2. Et honores & contumeliæ vulgi in promiscuo habendi sunt: nec his dolendum; nec illis gaudendum. Alioquin multa timore aut tædio contumeliarum necessaria omitemus: & publicis privatique officiis deerimus, dum muliebris non cura anget aliquid contra animum audiendi.

Vera & sapiens animi magnitudo, honestum in factis positum esse, non in gloria, judicat. Qui ex imperitæ multitudinis judicio pender, his in magnis viris non est habendus.

Gloriam qui spreverit veram habebit.

3. Sunt qui, quod sentiunt, etiamsi optimum sit, tamen invidiæ metu non audent dicere. Quod genus peccandi vitandum est in rebus urbanis: & T. Quintius Capitolinus vitavit. Cum Romæ Patrum ac plebis certamina civitatem distraherent; Æqui Volscique sustulere animos, & ad ipsa urbis mœnia populabundi accessere. Unde postquam prædas multi egere, Tribunis delectum militum impredientibus, T. Quintius Capitolinus quartum Consul populum ad concionem vocavit; eumque graviter objurgatum cum liberè monuisset quæ agenda essent, hæc subjunxit: *His ego gratiora alia dictu esse scio, sed me vera pro gratis loqui, etsi meum ingenium non manderet, necessitas cogit. Vellem equidem vobis placere, Quirites: sed malo vos salvos esse, qualcumque erga me animo futuri estis.*

## CAPUT XV.

*Mortem ac dolorem contemnere fortis animi est.*

**F**ORTITUDINIS munus duplex maximum, mortis dolorisque contemptio. Fugendum est utroque, si virtutis compotes; vel potius si viri esse volumus.

Hoc meditatum ab adolescentia debet esse; mortem ut negligamus. Moriendum enim certè est; & id incertum, an eo ipso die. Qui autem id, quod vitari non potest, metuit, is vivere animo quieto nullo modo potest.

Stultum est timere quod vitare non potes.

A morte semper homines tantumdem absumus.

Homo vitæ commodatus, non donatus est.

Non terret sapientem mors, quæ propter incertos casus quotidie imminet, propter brevitatem vitæ nunquam longè potest abesse. Dedit nobis natura usuram vitæ, tanquam pecuniæ, nullâ præstiturâ die. Quid est igitur quod quærere, si repetit cum vult? eâ enim conditione acceperas. Quæ verò ætas longa est? aut quid omnino homini longum? Apud Hypanim fluvium qui in Pontum influit, Aristoteles ait bestiolas quasdam nasci, quæ unum diem vivunt. Ex his igitur quæ horâ diei octavâ mortua est, provectâ ætate mortua est; quæ verò occidente sole, decrepita. Confer nostram longissimam ætatem cum æternitate, in maiore brevitate, quàm illæ bestiolæ, reperiemur.

2. Contemnamus omnes ineptias, beatamque vitam in animi robor, ac magnitudine, & in omnium rerum humanarum despicientia, ac mortis contemptione ponamus. Nunc quidem cogitationibus mollissimè sic effeminamur, ut, si mors celerius opinione nostrâ adveniat, spoliari magis

nis quibusdam bonis nobis videamur, Quòd'ur dum vivimus, expectando: desiderando, metuendo, pendemus animis, cruciamur, angimur: proh Dii immortales! quàm iter illud jucundum esse debet, quo confecto, nulla reliqua cura, nulla sollicitudo futura sit.

Quàm me delectat Theramenes! quàm elato est animo! Etsi enim flemus, cùm ejus exitum legimus, tamen non miserabiliter vir clarus emoritur. Qui cùm, coniectus in carcerem jussu triginta tyrannorum Atheniensium, venenum, ut sitiens, bibisset; reliquum sic è poculo ejecit, ut id resonaret; quo sonitu reddito, ridens, *propino*, inquit, *hoc pulchro Critiæ*: qui in eum fuerat è tyrannis teterrimus. Græci enim in conviviis selebant nominare cui poculum tradituri essent. Tum servo publico qui venenum præbuerat, poculum dedit perferendum Critiæ. Lufit vir egregius extremo spiritu, cùm jam præcordiis conceptam mortem contineret, verèque Critiæ mortem est eam auguratus, quæ brevi consecuta est.

## CAPUT XVI.

*Non quàm diù, sed quàm benè, vixeris, refert.*

1. **N**EMO tam imperitus est, ut nesciat sibi aliquando moriendum. Tamen cùm ad mortem propè accesserit, tergiversatur, timet, plorat. Nonne tibi videretur stultissimus omnium qui fleret quòd ante annos mille non vixisset? Æque stultus est, qui flet quòd post annos mille non vivet. Utrumque tempus alienum nobis est. Non eris, nec fuisti. Quid fles? Eò ibis, quòd omnia eunt.

*Omnia debentur morti; paulumque morati,*



Seriùs aut citiùs sedem properamus ad unam.  
Tendimus hùc omnes : hæc est domus ultima.  
Fata manent omnes , omnes expectat avarus  
Portitor , & turbæ vix satis una ratis.

Tendimus hùc omnes : metam properamus ad  
unam :

Omnia sub leges mors vocat atra sua.

Lex universa est , quæ jubet nasci & mori.

Ad hanc legem natus es : hoc patri tuo acci-  
dit , hoc matri , hoc majoribus , hoc omnibus  
ante te : hoc omnibus post te accidet. Quantus  
te populus moriturorum sequetur ! quantus co-  
mitabitur ! multa millia hominum & animalium  
hoc ipso momento , quo tu mori dubitas , ani-  
mam vario mortis genere emittunt. Quomodò fa-  
bula , sic vita : non quàm diu , sed quam bene ,  
acta sit , refert.

Quod cuique tempus ad vivendum datur , eo  
debet esse contentus. Breve tempus ætatis , satis  
est longum ad bene honestèque vivendum.

Stat sua cuique dies : breve & irreparabile  
tempus.

Omnibus est vitæ : sed famam extendere  
factis.

Hoc virtutis opus

2. Major pars mortalium de natura conquæ-  
ritur quod homini tam breve ad vivendum tem-  
pus detur. Verùm non inopes vitæ sed prodigi-  
sumus : eam nulli bonæ rei impendimus , & per  
luxum & negligentiam defluere sinimus. Sicut  
amplæ opes , ubi ad malum dominum pervene-  
runt , momento dissipantur : at quamvis modi-  
cæ , si bono custodi traditæ sunt , sufficiunt ,  
atque etiam usu crescunt. Ita vita , si scias uti ,  
longa est. Il verò soli uti sciunt , qui sapientiæ  
vacant Vivere , bonum est , sed bene vi-  
vere. Itaque non ut diù vivamus curandum est ,  
sed ut bene. Longa est vita , si plena est. Quid  
hominem juvant octoginta anni per inertiam

exacti ? Sapienter ac fortiter factis metiamur  
cujusque vitam , non tempore. Laudemus & in  
numero felicitium reponamus eum , cui , quan-  
tulumcumque temporis contigit , bene colloca-  
tum est.

Eo tempore quod ad vivendum datur , si bene  
uti velis , etiam parvum amplissimum efficies ,  
numerum annorum multitudine operum supe-  
rando.

Excutienda tibi vitæ cupido est , discendum-  
que , quàm bene vivas referre , non quàm diù.

## C A P U T   X V I I .

*Mortem æquo animo appetit qui bene vixit.*

I. **P**ROFECTO mors tum æquissimo animo  
appetitur , cum suis se rectæ factis vita  
occidens consolari potest. Nemo parum diù vixit ,  
qui virtutis functus est munere. Quare si ipsa ratio  
minùs perficiet ut mortem negligamus ; at vita  
acta perficiat , ut satis superque nobis vixisse vi-  
deamur.

Cùm sapientissimus esset Socrates , sanctissimè-  
que vixisset ; ita in judicio capitis pro se dixit ,  
ut non supplex aut reus , sed magister aut domi-  
nus judicum , esse videretur. Quin etiam cùm et  
scriptam orationem attulisset disertissimus orator  
Lyfias , demissam & supplicem , et præfenti  
procellæ accommodatam , quam edisceret , si ei  
videretur , & quâ pro se apud judices uteretur ;  
non invitus legit , & bene scriptam esse dixit.  
*Sed* , inquit , *quemadmodum si mihi calceos Syrcionios*  
( qui tum erant omnium elegantissimi ) *attulisses* ,  
*non uterer , quamvis essent habiles & apti ad pedem* ,  
*quia non essent viriles : Sc illa oratio tua , diserta*  
*mihi & oratoria videtur , fortis & virilis non videtur.*  
Causam ipse suam sic egit , ut , iudicibus ,  
quid pœnæ se commeruisse existimaret interro-

gantibus, responderit: *Id se meruisse, ut sibi vic-  
tus quotidianus in Prytanæo publicè præberetur*;  
Qui honos apud Græcos maximus habebatur.  
Quo responso sic iudices exarserunt, ut capitis  
hominem innocentissimum condemnarent. Nun-  
cianti quod eum iudices morte damnassent: *Et  
illos, inquit, Natura. Uxorique cum lacrymis  
exclamanti: ergone injustè morieris? An tu, res-  
pondit, justè malles?*

Non patronum ergo quæsit ad iudicium capi-  
tis Socrates, nec iudicibus supplex fuit: adhi-  
buitque liberam contumaciam, à magnitudine  
animi ducam, non à superbia. Cum facile pos-  
set educi è custodia, & essent qui promit-  
terent fugam, noluit; remansitque dies tri-  
ginta in carcere & in expectatione mortis,  
ut duarum rerum gravissimarum hominibus  
metum demeret, mortis & carceris. Supremo  
vitæ die, cum penè in manu jam mortiferum  
teneret poculum, locutus ita est, ut non ad  
mortem trudi, verum in cælum videretur af-  
cendere. Sic enim censebat, dicebatque:  
*Duas esse vias animorum è corpore exceden-  
tium. Nam eos qui se vitiiis contaminavissent de-  
vium quoddam iter ingredi, seclusum à concilio  
Deorum: contra vero facilem ad Deos aditum pa-  
tere illis, qui se integros castosque servavissent, es-  
sentque in corporibus humanis vitam imitati Deorum.*

Interrogatus Aristippus quomodo Socrates  
diem obiisset? *Ut ego, inquit, optarem.*

Numquam magnis viris cara in corpore mora  
est: exire atque erumpere gestiunt, ægrè has  
angustias ferunt.

2. Cùm Athenienses in concione & Phocionem  
& nonnullos alios morte damnassent; hi quidem  
inter amicorum & propinquorum complexus la-  
mentantes ejulantesque trahebantur in carcerem,  
ille vero eodem animo vultuque ibat, quo quon-  
dam publice, accepto exercitus imperio, domum

deducebatur : ita ut gravitatem viri & constantiam mirari nemo satis posset. Emphyletus , quo familiariter fuerat usus ; cum ei obviis dixisset lacrymans : *O quàm indigna perpeteris Phocion !* Huic ille : *At non inopinata* , inquit : *hunc enim exitum plerique clari viri habuerunt Athenienses.* Inimici prætercurrentes incessabant eum conviciis. Unus etiam inspuat in faciem ejus. Ibi fama est Phocionem conversum ad Archontas , id unum dixisse : *An nemo hujus hominis compefceret petulantiam ?* Rogante quodam ex amicis numquid filio suo Phoco mandari vellet ? *Maximè* , inquit , *jubeo enim eum populi Atheniensis injuriarum in me oblivisci.* Quod mandatum qui non admiratur , is nihil egregium sapere videtur , inquit Ælianus.

Postquam in carcerem ventum est , & cicutæ teri cœpta , Phocionem Nicocle amico fidissimo rogante , sibi ut permetteret priori venenum haurire : *Ista quidem* , inquit , *ô Nicocle , molesta mihi valde & gravis est postulatio tua : verum , quia nihil tibi unquam denegavi , hoc quoque largitur.* Ubi cæteri venenum biberunt , defecit ; negavitque carnifex se aliam cicutam tritutum , nisi duodecim drachmæ sibi essent numeratæ. Tum Phocion , accersito quodam amico , petiit ut carnifici illud pecuniæ daret : *quoniam ne gratis quidem mori Athenis licebat.*

3. Cùm Canius Julius , vir imprimis magnus , cum Caiso Cæsare Caligulâ fuisset altercatus : abeunti crudelis ille Imperator dixit : *ne fortè ineptâ spe tibi blandiaris , ad mortem te duci jussi.* Tum Canius magno animo : *Gratias* , inquit , *ago , optime princeps.* Decem medios usque ad supplicium dies sine ulla sollicitudine exegit. Vix credi potest , quæ interea dixerit , quæ fecerit , quàm in tranquillo fuerit. Ludebat satronculis , cùm Centurio trahens ad supplicium agmen hominum morte damnatorum , illum quo-



que accersi jussit. Vocatus, numeravit calculos; & ei quicum ludebat: *Vide, inquit, ne post mortem meam mentiaris te vicisse.* Tum Centurionem compellans, *Testis, inquit, eris, me uno calculo antecedere.* O miram in media tempestate tranquillitatem!

4. Eorum, qui mortem fortiter oppetierunt, exemplis incitati, mortem tandem vel optare incipiamus, vel certe timere desistamus. Nam cum supremus ille dies, non animi extinctionem, sed commutationem tantum afferat loci; quid optabilius? Itaque si quid tale acciderit ut à Deo nobis denunciatum videatur exire è vita; læti & ægantes gratias, parcamus, emittique nos è custodia & levare vinculis arbitremur: ut in æternam & planè in nostram domum remigramus. Mortem portum nobis & perfugium putemus.

Vir sapiens mortem, morbos, & alia quæ in vitam humanam incurrunt, feret, non solum patienter, sed etiam libenter, ut pareat legi naturæ: quemadmodum bonus miles fert vulnere, & transverberatus telis, moriens amat eum, pro quo cadit, imperatorem. Habebit in animo illud vetus præceptum: *Deum sequere.*

## C A P U T   X V I I I.

*Humatio contemnenda in nobis, non negligenda in nostris.*

I. **C**UM Socrates jamjam moriturus esset rogatus à Critone quemadmodum sepeliri vellet, sic respondit, ut se ostenderet hac de re nihil laborare. Diogenes durior, ut Cynicus, projici se jussit inhumatum. Tum amici: *Volucrisne & feris?* Minimè verò, inquit, sed bacillum prope me, quo abigam, ponitote. Qui poteris? illi, non enim senties. Quid igitur mihi ferarum laniatus oberit nihil sentienti?

2. Minabatur Theodoro Philosopho tyrannus mortem, & quidem sine sepultura. Cui Theodorus: *O te ineptum, si putas interesse, supra terram an infra putrescam!* Magnus animus egres-  
surus corpore, nihil ad se judicat pertinere quò illud conferatur, an ignis exurat, an feræ distrahant, an terra contegat.

Præclarè Anaxagoras, qui cum Lampfaci moreretur, queræ nubus amicis, vellet-ne Clazomenas in patriam, si quid ei accidisset, referri? *Nihil necesse est*, inquit: *undique enim ad inferos tantundem viæ est.* Rogantibus quoque civitatis principibus, num quid fieri post mortem mandaret? Jussisse ferunt, ut Pueri quotannis, eo, quo è vivis abiisset, die ludendi copiam haberent. Quod deinde Lampfaci observatum.

3. De humatione unum tenendum est; contemnendam in nobis, non negligendam in nostris: ita tamen ut mortuorum corpora nihil sentire intelligamus. Quantum autem consuetudini famæque dandum sit, id curent vivi.

## CAPUT XIX.

*Tollatur fortunæ discrimen in morte.*

**M**AXIMÈ è natura est tolli fortunæ discrimen in morte: & ut cæterorum luctuum, sic etiam sepulcrorum, modus rectè requiritur. Credo minimam olim hujus rei fuisse cupiditatem; alioquin multa extarent exempla majorum. Nec hoc à sapientissimis legum scriptoribus neglectum. Athenis ille mos, jam à Cecrope ductus, diu permansit, corpora humandi terrâ, quam proximi injiciebant. Sequebantur epulæ, quas inibant coronati: & apud quas de mortui laude, cum quid veri erat, prædicari solitum. Nam mentiri nefas habebatur. Cùm

*Pars II.*

E

i eade sumptuosa fieri funera & lamentabilia cœpissent , Solonis lege sublata sunt.

2. Cyrus morti proximus filiis mandavit , ut , postquam obiisset , corpus suum neque auro , neque argento , neque ullâ aliâ re pretiosâ conderent ! sed terræ quamprimùm redderent.

Alexander Asiæ fines ultimos victor peragrans , Cyri regis sepulchrum iussit aperiri . in quo erat conditum ejus corpus , cui dare volebat inferias. Auro argentoque repletum esse crediderat : quippe Persæ ita vulgaverant. Sed præter clipeum ejus putrem , & arcus duos Scythicos , & acinacem , nihil reperit. Cœterum amiculo suo loculum , in quo jacebat corpus , velavit , coronamque auream imposuit : miratus tanti nominis regem , tantis præditum opibus , haud pretiosius sepultum esse , quàm si fuisset e plebe.

3. Babiloniorum regina Nitocris , supra portam urbis celeberrimam , loco edito & conspicuo , sepulchrum sibi extrui iussit , atque his verbis inscribi : *Si cui regum , qui post me , apud Babilonios imperium obtinebunt , pecuniæ inopia fuerit , aperto sepulcro , sumito , quantum libuerit. Ne tamen aperito , nisi indignerit , non enim proderit aperuisse.* Hoc sepulcrum intactum permansit , donec regnum parvenit ad Darium Histaspis filium : qui , referato monumento , non quidem pecunias , quas speraverat , invenit , sed cadaver , & hæc verba exarata : *Nisi turpis lueri studiosus esses , & te inexplebilis pecuniæ cupiditas teneret , mortuorum sepulcra non violasses.*

4. Refert Diodorus Siculus hunc apud veteres Egyptios morem fuisse , ut mortui Regis corpus non autè sepulcro conderetur , quàm cuncta ejus facta expensa essent. Volenti cuique facultas dabatur defunctum accusandi. Instituebatur iudicium : & si plura malè fecisse rex coargueretur , rebus sepulcro. Cujus dedecoris timore factum multi piè justeque imperaverint.

## CAPUT XX.

*Viro forti fortiter ferendus est dolor.*

1. **I**NTER omnes hoc constat, non doctos homines solum, sed etiam indoctos, virorum esse fortium toleranter dolorem pati. Nec verò quisquam fuit qui eum non laudandum putaret, qui ita pateretur. Itaque dolorem aut extimescere venientem, aut non ferre præsentem, nonne turpe est?

Iu dolore cogitandum nobis est, quid fortitudine, quid magnitudine animi, dignum sit: & maxime providendum, ne quid abjectè, ne quid timidè, ne quid ignavè, ne quid serviliter muliebriterve faciamus. Ingemiscere viro concessum est, idque raro: ejulari, ne mulieri quidem.

2. Dolorem placidè & sedatè feres, si cogites quàm id honestum sit. Sumus enim naturâ studiosissimi appetitissimique honestatis, pro quâ nihil est quod non parati simus & facere & perpeti. Hinc pericula adeuntur in præliis. Non sentiunt viri fortes in acie vulnera: vel sentiunt, sed mori malunt, quàm tantillum modo ab eo, quod eos decet, dimoveri. Fulgentes gladios hostium videbant Decii, cum in aciem eorum irruebant: his levabat omnem vulnerum metum ac dolorem nobilitas mortis & gloria. Num tum ingemuisse Epaminondam putas, cum una cum sanguine viam effluere sentiret? Minimè sanè: patriam enim suam Lacedæmoniiis imperantem relinquebat. Hæc sunt solatia, hæc fomenta summorum dolorum.

3. Acerrimus virtuti adversarius esse videtur dolor: is arduas faces intentat, is fortitudinem animi se debilitaturum minatur. Huic igitur  
E ij



succumbet virtus? quàm turpe, ô Dii boni? futurum esset! Pueri Spartiæ, non ingemiscunt verberibus laniari. Adolescentium greges Lacedæmone vidimus ipsi, inquit Cicero, incredibili contentione certantes pugnis, calcibus, unguibus, morsu denique, ita ut exanimarentur prius quàm se victos faterentur. In India ii, qui sapientes habentur, nudi ætatem agunt, & Caucasi nives perferunt; cùmque ad flammam se applicuerint, sine gemitu aduruntur. Mulieres verò, cùm est cuiusque earum vir mortuus, in certamen iudiciumque veniunt, quàm plurimum ille dilexerit: plures enim uni marito solent esse nuptæ. Quæ est victrix, ea læta, prosequentibus suis, unâ cum viro in rogam imponitur: victæ necessestæ discedunt. Quanto magis dolorem non formidabit sapientis & constantis viri virtus?

## CAPUT XXI.

*Dolorem ferri fortiter posse, multorum exempla docent.*

1. **U**t lubentius dolori obistere possimus, obferrentur animo fortium virorum exempla. Zeno proponatur Eleates, qui perpassus est omnia potius, quàm concios delendæ Nearchi tyrannidis indicaret. De Anaxarcho Democritio cogitetur, qui cùm Cypri in manus Nicocreontis regis incidisset, nullum genus supplicii deprecatus est. Coniectus in mortarium saxeum, ibique ferreis malleis contusus: *Tunde*, inquebat, *Anaxarchi culeum*, (sic corpus vocabat) *tunde*: *Anaxarchum vero ipsum non tundes*. Ad ultimum amputationem linguæ tyranno minitante, protinus eam dentibus abscissam & comminutam in os illius irâ patulum conspuisse dicitur.

2. Romam obsidebat rex Persenna, seque urbem propter frumenti inopiam expugnaturum.

spem habebat : cum C. Mucius adolescens nobilis audaci aliquo facinore patriam esse à periculo liberandam ratus est. Itaque penetrare in hostium castra constituit. Sed metuens ne si Consul in iussu & omnibus ignaris ireret , pro transfuga haberetur , Senatam adiit. *Transire Tiberim* , inquit , *Patres & intrare , si possim , castra hostium volo , non futurus prædo , neque populationem hostium ultor. Majus , si Dii juvant , in animo est facinus.* Approbant Patres. Abdito intra vestem ferro proficiscitur. Ubi in hostium castra venit , in confortissima turba prope regium tribunal constitit. Tum forte stipendium militibus dabatur , qui propterea adibant scribam cum rege pari ferè ornatu sedentem , & multa agentem. Timens Mucius sciscitari uter eorum qui sedebant Porsenna esset , ne talia interrogando se Romanum esse aperiret ; re fortunæ permisâ , scribam pro Rege obtruncavit.

Inde cum viam sibi cruento mucrone per trepidam turbam faceret , comprehensus à regis satellitibus , & ad tribunal adductus est. Tum ille nihil metuens. *Romanus sum* , inquit , *civis : C. Mucium vocant. Hostis hostem occidere volui ; nec ad martyrem ferendam minus animi est , quàm ad cædem patranda fuit. Et facere & pati fortia , Romanum est.* Addidit deinde , non se unum occidendi Porsennæ gloriæ petere : idem periculum , easdemque insidias ei imminere à juventute Romana. Cum Rex irâ percitus , periculoque conterritus , circumdari ignes juberet , nisi properè & clarè expromeret eas , quas minabatur , Romanæ juventutis insidias : *Vide* , inquit Mucius , *quàm vi e sit corpus iis , qui magnam gloriam spectant.* Dextramque accenso ad sacrificium igni iniecit. Quam cum velut sine ullo doloris censu torreret ; attonitus rei miraculo Rex ab sede sua profuit , amorumque ab igne juvenem dimisit inviolatum : simulque Romam missi legati ad pacis conditiones offerendas. E ij

Cum peteret regem decepta satellite dextra,  
Injecit sacris se peritura focis.

Sed tam sæve pius miracula non tulit hostis,  
Et raptum flammis iussit abire virum.

Urere quam potuit contemto Mucius igne,  
Hanc spectare manum Porcenna non potuit.

Major deceptæ fama est & gloria dextræ.

Si non peccasset, fecerat illa minus.

Vetusto Macedonum morè, regi Alexandro  
sacrificanti præsto erant nobilissimi pueri. E quibus unus cum thuribulum tenens ante regem assistisset, in ipsius brachium carbo ardens delapsus est: quo etsi ita adurebatur, ut adustæ carnis odor ad circumstantium nares perveniret: tamen & dolorem silentio preffit, et brachium immobile tenuit, ne sacrificium ullo gemitu impediret.

C. Marius rusticanus, vir, sed planè vir, cum ei varices in crure secarentur, non sine acri doloris morfu, vetuit se alligari. Nos, si pes, si dens condoluit, ferre non possumus.

4. Ex Syria decedens, confecto Mithridatico bello, cum Rhodum venisset Pompeius, nobilissimum Stoicæ disciplinæ Philosophum Posidoniam cupiit audire. Sed cum diceretur graviter tunc æger esse, quod doloribus podagræ cruciabatur maximis; voluit saltem visere, quem audire de rebus philosophicis differentem non licebat. Quem ut vidit, & salutavit, honorificisque verbis est prosecutus; moleste se ferre dixit, quod eum non posset audire. At ille: *Tu verò, inquit, potes: nec committam, ut dolor corporis efficiat, ac frustra tantus vir ad me venerit. Itaque cubans, graviter & copiosè disputavit de hoc Stoicorum dogmate: Nihil esse bonum; nisi quod honestum esset. Cumque quasi faces doloris ei admovebantur; sæpe dixit: Nihil agis, dolor: quamvis sis molestus, numquam te esse confitebor malum. Illud enim Stoici negabant malum dici posse quod turpe non esset.*

Et si Peripatetici dolorem dicebant malum esse, de eo tamen fortiter ferendo eadem præcipiebant quæ Stoici. Er quidem Arcefilas Peripateticus, cum arderet podagræ doloribus, visitassetque hominem Carneades, tristis exiret; *Mane, quæso*, inquit, *Carneade noster: nihil illinc huc pervenit.* Ostenditque pedes & pectus.

5. Consuetudo laborum perpeffionem dolorum efficit faciliorem. Ferre laborem, contemnere vulnus & dolorem consuetudo docet. Est enim consuetudinis magna vis. Pernoctant venatores in montibus et in nivibus. Pugiles cestibus confusi, ne ingemiscunt quidem. Gladiatores perditii homines aut barbari, quas plagas perferunt! Tantum exercitatio & consuetudo valet. Ergone hoc poterit homo vilissimus? Vir natus ad gloriam & honestatem, animum tam mollem habebit, ut eum non meditatione & ratione corroboret adversus dolorem?

6. Dolorum patientia in omni genere se æquabilem præbeat. Sæpe multi, qui aut propter gloriæ cupiditatem, aut ut jus suum & libertatem tuerentur, vulnera exceperunt fortiter & tulerunt. iidem dolorem morbi ferre non possunt: neque enim ratione & sapientiâ vulnerum dolorem tulerant; sed gloriæ & proprii commodi studio. Nihil autem potest esse æquabile, quod non à ratione proficiscitur. Itaque barbari ferro decertare accerrimè possunt: ægrotare viriliter non queunt. Sic Cimbri & Celtiberi in prælio exsultant, lamentantur in morbo.

## CAPUT XXII.

*Quæ dura sunt, sunt leviora patientiâ.*

1. **C**uivis dolori remedium est patientia. Miseriorum potus est patientia.

Nihil tam infestum tranquillitati animi quam



nihil pati posse. Itaque id summopere studendum, ut damna, quàm minimè fieri poterit, sentiamus; etiam adversa benignè interpretemur. Nunciato naufragio, Zeno cum omnia sua audiret submersa: *Jubet, inquit, me fortuna expeditiùs philosophari.*

Lacæna quædam, cùm filium, quem in prælium miserat, interfectum audisset: *Idcirco, inquit, genueram, ut pro patria non dubitaret occumbere.*

Anaxagoram quoque ferunt, auditâ morte filii, id unum dixisse: *Sciebam me genuisse mortalem.* Quotidie præter oculos nostros transeunt notorum ignotorumque funera: multi tamen homines, ut rerum aliarum, sic vitæ insatiabiles, indignantur se suosque inde exire, quò ad tempus tantùm admissi sunt. Quanto ille justior, qui nunciatam filii mortem non tanquam novum nuncium accepit. Quid est enim novi hominem mori, cujus tota vita nihil aliud quàm ad mortem iter est? Itaque id quod necesse est, numquam timeamus; quod incertum est, semper expectemus.

2. Xenophon Socratis discipulus, eique facundiâ proximus, cum solemne sacrum taceret, è duobus filiis majorem natu nomine Gryllum cognovit cecidisse in prælio apud Mantinæam: nec ideo inceptum Deorum cultum omittendum putavit, sed tantummodò coronnam deponere contentus fuit. Percontatus deinde quonam modo occubuisse filius, ut audivit fortissimè pugnantem interiisse, coronam capiti reposuit, numina, quibus sacrificabat, restatus, majorem se ex virtute filii voluptatem, quàm ex morte dolorem, sentire. Alius removisset hostiam, abjecisset altaria, lacrymis ibura resperisset. Xenophon & corpore & animo immobilis permansit. O. lori succumbere ipsâ clade, quæ nunciata erat, tristius duxit.

13. *Æmilius Paulus*, nunc felicissimi, nunc miserrimi patris clarissimum exemplum, ex quatuor filiis insignis formæ & egregiæ indolis, duos in *Corneliam Fabiamque* gentem adoptione transtulit, duos ei fortuna abstulit: quorum alter, quarto die antequam pater triumpharet, funere est elatus; alter in triumphali curru conspectus, post diem tertium expiravit. Itaque qui liberis sic abundaverat, ut duos in alienas familias transmississet, ad orbitatem subito est reductus. Quem casum quo robore animi sustinuerit, nemini dubium esse potest. Nam orationi, quam ad populum de rebus à se gestis habuit, hanc clausulam adjecit: *Cum in tam prospero bellorum successu timerem, Quirites, ne quid mali contra nos fortuna moliretur; Deos precatus sum, ut, si quid adversi Populo Romano immineret, id totum in meam domum converteretur. Quapropter benè se res habet: annuendo enim votis meis, id egerunt, ut vos potius meum casum doleatis, quàm ego vestro ingemiscam.*

## CAPUT XXIII.

*Aliorum respice incommoda, ut mitius feras tua.*

1. **C**UM ex amicis quemdam graviter moerentem videret *Solon*, in arcem Athenarum perduxit, hortatusque est, ut per omnia subiecta ædificia oculos circumferret. Quod ut factum animadvertit: *Cogita nunc tecum*, inquit: *quàm multi-luctus sub his tectis & olim fuerint, hodièque versentur, insequentibusque sæculis sint habitaturi: ac desine ea incommoda tanquam propria deflere, quæ sunt communia mortalium.*

Idem *Solon* aiebat: *Si in unum locum cuncti mala sua contulissent; futurum ut quisque propria domum reportare mallet, quàm ex communi miserationum acervo portionem suam accipere. Unde col-*

ligebat, non oportere nos, quæ fortuito patimur, ea magis intolerabilia judicare, quàm quæ alii patiuntur.

2. Ciceroni mortem Tulliæ filiæ insolabiliter lugenti, cum multa alia, tum hæc scripsit Servius Sulpicius. Quæ res mihi non mediocrem consolationem attulit, volo tibi commemorare, si fortè eadem res tibi minuere dolorem possit. Ex Asiâ rediens cum ab Ægina Megaram versùs navigarem, cœpi regiones circumcirca prospicere. Post me erat Ægina, ante Megara, dextrâ Piræus, sinistrâ Corinthus. Quæ oppida quodam tempore florentissima fuerunt, nunc prostrata & diruta ante oculos jacent. Cœpi egomet mecum sic cogitare: *Hem, nos hominuli indignamur, si quis nostrum interit aut occisus est, quorum vita brevior esse debet; cum uno loco tot oppidorum cadavera projecta jaceant? Visne tu te, servi, cohibere, & meminisse hominem te esse natum.* Crede mihi: cogitatione eâ non mediocriter sum confirmatus. Hoc idem si tibi videtur, fac ante oculos tibi proponas. Modò uno tempore tot clarissimi viri interierunt: de imperio Romano præterea tanta diminutio facta est: omnes provinciæ conquassatæ sunt. In unius mulierculæ animula si jactura facta est, tantopere commoveris? Quæ si hoc tempore non diem suum obisset, paucis post annis tamen ei moriendum fuit, quoniam homo nata fuerat.

Noli te oblivisci Ciceronem esse: & eum qui aliis consueveris præcipere, & dare consilium. Neque imitari malos medicos, qui inalienis morbis profitentur tenere se medicinæ scientiam, ipsi se curare non possunt: sed potius quæ aliis præcipere soles, ea tu te tibi subjice, atque apud animum propone.

Nullus dolor est, quem non longinquitas temporis minuat ac molliat. Hoc te expectare tempus, tibi turpe est, ac non ei rei sapientiâ

tuâ te accurrere. Vidimus aliquoties secundam pulcherrimè te ferre fortunam, magnamque ex ea re te laudem adipisci. Fac aliquando intelligamus, adversam quoque te æquè ferre posse; neque id majus, quàm debeat, tibi onus videri; ne ex omnibus virtutibus hæc una tibi videatur deesse.

## C A P U T X X I V.

*Ira furor brevis est.*

I. **V**ACANDUM est omni perturbatione animi; tum cupidi ate & metu, tum etiam ægritudine & iracundâ: ut tranquillitas & securitas adsit, quæ afferat tum constantiam, tum etiam dignitatem.

Quidam è sapientibus viris dixerunt iram brevem insaniam. Æquè enim impotens su est decoris oblita, necessitudinum immemor, in id, quod caput pertinax, rationi consiliisque præclusa. Ut autem scias non esse sanos, quos ira possedit, ipsum illorum habitum intueri. Nam ut furentium certa indicia sunt, ita & irascentium. Flarant oculi, & multis ore toto rubor. Labia quatuntur, dentes comprimuntur, horrent ac subriguntur capilli, tumescunt venæ, concutitur crebro spiritu pectus, parum explanatæ voces sunt, compleduntur sæpius manus, pulsatur humus pedibus, totum concutitur corpus: ita ut nescias utrum magis detestabile vitium sit, an deformis. Cætera vitia sæpe licet abscondere: ira se profert, & in faciem exit, quantoque major est, effervescit manifestius.

Si iræ effectus maleque intueri velis nulla pestis humano generi pluris fletit. Videbis cædes ac venena, & subjectas testis faces & urbium clades, & totarum exitia gentium. Aspice nobilissimarum civitatum fundamenta vix notabilia: has ira dejecit. Aspice regiones per multa millia



sine habitatione desertas: has ira exhaustit. Aspicere tot duces ac reges, mali exempla fati: ira alium in cubili suo confodit, alium inter sacra aut epulas percussit, alium sub oculis multitudinis lancinavit.

2. Plutarchus vir doctissimus & prudentissimus, servo suo homini nequam & contumaci, sed disputationibus philosophicis aures imbutas habenti, tunicam fletrahi iussit ob aliquod delictum, eumque loro cædi. Ille primum vociferari: *Non meruisse se ut vapularet; nihil mali, nihil sceleris admisisse.* Deinde inter vapulandum querimonias jactare, fletus fundere, ejulatus facere. Postremò ad verba objurgatoria conversus, dixit: *Non esse eo animo Plutarchum, quo illum deceret: Philosophum irasci, turpe esse: sæpe eum, præsentem atque audientem se, de iracundia malis differuisse, librum quoque de cohibenda ira pulcherrimum conscripsisse: iis omnibus, quæ in illo libro scripta & præcepta essent, nequaquam convenire, quod effusus in iram servum plurimis plagis multaret.* Tum Plutarchus placidè & leniter: *Quid, inquit, verbero nunc ego tibi irasci videor? Ex vultu-ne meo, an ex colore, an ex voce, an etiam ex verbis correptum esse me iram intelligis? Mihi quidem neque oculi, opinor, truces sunt, neque in ruborum spumamque effervesco, neque pudenda dico aut pœnitenda. Hæc enim omnia, si ignoras, signa esse irarum solent.* Et simul ad eum qui cælebat converso sermone, interim, inquit, dum ego atque hic disputamus, hoc quod præcepi perage.

## CAPUT XXV.

*Nihil minus, quam irasci, punientem decet.*

1. **P**ROHIBENDA maximè est ira in puniendo: numquam enim iratus qui accedet ad pœnam

nam de aliquo sumendam, mediocritatem illam tenebit quæ est inter nimium & parum.

Ad coercionem errantium sceleratorumque irato castigatore non est opus. Nam cum ira delictum animi sit, non oportet peccata corrigere peccando. Ad emendationem pœna proficit si iudicio lata est. Inde est quod Socrates servo ait : *Cæderem te, nisi irascerer.* Pœnam servi in aliud tempus distulit : illo tempore se ipse admonuit. Cujus erit temperatus in ira affectus, cum Socrates non sit ausus se iræ committere ? Sic Archytas, cum villico factus esset iratior, quod rura sua ejus negligentia corrupta animadvertisset : *Quo te, inquit, modo accepissem, nisi iratus essem ?* Maluit impunitum dimittere, quam propter iram gravius justo punire.

2. Maximum remedium iræ, dilatio est : ut primus ejus servor relanguescat ; & caligo, quæ premit mentem, aut residat, aut minus densa sit. Non tantum dies, sed etiam hora, quædam ex his, quæ te præcipitem ferebant, molliet : quædam evanescent. Iratus aliquando servo suo Plato, ponere illum statim tunicam, & præbere scapulas verberibus jussit, suâ manu ipse cæsusus. Postquam intellexit irasci se, manum, sicut sustulerat, suspensam detinebat, & stabat percussuro similis : oblitus jam servi, quia alium, quem potius castigaret, invenerat. Interrogatus deinde ab amico, qui intervenerat, quid ageret ? *Exigo, inquit, penas ab homine iracundo. Tu, Speusippe, servulum istum verberibus objurga : nam ego irascor.* Ob hoc non cæcidit, propter quod alius cæcidisset. *Irascor, inquit ; plus faciam, quam oportet : libentius faciam.* Non sit iste servus in ejus hominis potestate, qui sui compos non est.

3. Theodosii ira citò flecti solebat : unde modicâ dilatione emolliiebantur aliquando severa ejus jussa : habuitque à natura, quod Augustus & Philosophiæ doctore Athenodoro : qui cum

vidisset eum facillè commoveri, ne asperum aliquid statueret, munuit ut irasci cœpisset, quatuor atque viginti Græcæ litteras memoriâ recenseret: ut iræ impetus parvi temporis interjectu languesceret, mente aliò traductâ.

## CAPUT XXVI.

*Ne inimicis quidem irascendum.*

1. **N**ON audiendi, qui graviter irascendum inimicis putant; idque magnanimi & fortis viri esse censent. Nihil enim laudabilius, nihil magno & præclaro viro dignius placabilitate atque clementiâ.

Zaleuci legibus interdictum erât, ne quis civis diuturnam adversus civem iram & amicitiam gereret. Si qui essent iræ pervicacioris, eos pro indomitis, & feris, & agrestis inhumanique ingenii viris habendos senserat.

2. Titus Imperator nec auctor cujusquam necis, nec conscius fuit, quamvis interdum graviter ulciscendi causa non deesset: sed *periturum se potius, quàm alios peraiturum*, affirmabat. Cùm amplissimi ordinis duo adversus eum conjurassent, neque abnuere cogitatum scelus possent; monuit ut desisterent ab incœpto: si quid desiderarent, promisit se tributurum: cursores suos confestim misit ad matrem alterius, ut ei anxie de vitâ filii nunciarent illum salvum: utrumque epulis secum accumbere voluit, & in eadem familiaritate, quâ antea, habere non destitit.

Cùm Constantini Imperatoris statuam lapidibus impetere ausi essent nonnulli ex ejus inimicis, ipsum amici hortabantur ad supplicium sumentum de contumeliæ auctoribus, à quibus faciem ejus deturpatam & convulneratam dicebant. Verum ille cùm & vultum & caput suum contrec-

tasset : *At ego* , inquit leniter ridens , *nullum in ore ac fronte vulnus invenio , sed omnia illæsa & sana.*

---

## CAPUT XXVII.

*Ira sui impotens est & pertinax.*

I. **I**RA sibi indulget , ex libidine judicat , audire non vult. Frustra oculis ingeritur veritas ; amat & tuetur errorem , coargui non vult , & in malè cœptis honestior illi pertinacia videtur , quàm pœnitentiâ. Cn. Piso fuit vir à multis viciis integer : sed pravus , & cui placebat pro constantia rigor. Is cum iratus ad mortem duci jussisset militem , quasi interfecisset Commilitonem cum quo egressus erat è castris , & sine quo redierat : roganti tempus aliquod ad conquiendum non dedit. Damnatus miles extra vallum castrorum ductus est & jam cervicem porrigebat , cum subito apparuit ille Commilito , qui occisus dicebatur. Tunc Centurio supplicio præpositus , cōdere gladium carnificem jubet. Ambo Commilitones alter alterum complexi , ingenti concursu & magno gaudio exercitûs deducuntur ad Pisonem. Ille conscendit tribunal furens , utrumque ad mortem duci jubet , adjicit & Centurionem qui damnatum militem reduxerat , hæc præfatus : *Te morte plecti jubeo , quia jam damnatus es : te , quia causa damnationis Commilitoni fuisti : te , quia jussus occidere militem imperatori non paruisti.* O quàm solers est iracundia ad fingendas causas furoris.

Fulmen est , ubi cum potestate habitat iracundia.



## CAPUT XXVIII.

*Circumscribenda multis modis ira est.*

1. **N**on expedit omnia videre, omnia audire. Injuriarum plerasque non accipit, qui nescit. Non vis esse iracundus? Ne sis curiosus. Qui inquit quid in se dictum sit, se ipse inquietat. Alia negligenda, alia deridenda, alia donanda. Circumscribenda multis modis ira est. Pleraque in lulum jocumque vertantur. Socratem aiunt colapho percussum nihil amplius dixisse quàm, *melestum esse quod ne scirent homines quanto cum galea prodire deberent.* Alia vice mirantibus amicis quòd à protervo quodam homine calce impetitus, patienter tulisset: *Quid enim, inquit, si me asinus calce impetisset, num illi diem dixissem?* Denique cum ipsum maledictis incessere quidam diceretur; hoc unum repondit: *Bene dicere enim non didicit.*

2. Cato major proscisus conviciis ab homine flagitioso & improbo: *Iniqua, inquit, tecum mihi pugna est. Tu enim probra facile audis, & dicis libenter: mihi verò & dicere, insuave, & audire insolitum.*

Arcefilaum Academicum Antagoras poeta probris lacessebat, malo suo Philosophum aggressus in foro. Nam ille magno animo contumeliam ferens, ubi quamplurimos cives stare videbat, eo ibat, ut ita conviciatos plures protervitatibus testes haberet. Sic alter vir gravis, alter infans omnibus est visus.

Clazomenii quidam Spartam cum venissent, sedes Ephorum, unde jus dicere consueverant, nigro colore inunxerunt insolentius. Ephori recognitâ, non in iram exarserunt: sed tantum vocato præcone publico hoc ei mandarunt ut

publicè proclamaret: *Liceat Clazomenis indecore se gerere.*

Quo rarior in regibus & principibus viris moderatio, hoc laudanda magis est. C. Julius Cæsar, qui victoriâ civili clementissimè usus est, cum ferinia deprehendisset epistolarum ad Pompeium missarum ab iis qui videbantur aut in diversis, aut in neutris fuisse partibus; legere noluit, sed combussit: ne fortè in multos gravius consulendi locum darent. Quamvis moderatè soleret irasci, maluit tamen non posse. Gratifimum putavit genus veniæ, nescire quid quisque peccasset.

Fuit Cotys, Thracum rex, naturâ iracundior, & asper eorum qui in ministeriis deliquissent castigatior. Cum ei aliquando hospes vasa multa fictilia, arte quidem exquisitâ elaborata, sed tenuia admodum & fragilia, donum attulisset; ipse vicissim hospiti dedit munera. At vasa omnia statim confregit, *ne, ut tum dixit, in eos qui illa fregissent, asperius animadverteret.*

3. Non video quare sit difficilis iræ moderatio, cum sciam tyrannos quoque familiaritatem sibi sævitiam repressisse. Certè memoriæ proditur Pisistratum, Atheniensium tyrannum, cum multa in eum ebrius conviva dixisset, nec deessent qui ei faces ad iram & vindictam subderent, placido animo tulisse, & respondisse: *Non magis illi ebrio se succensere, quàm si quis obligatis oculis in se incurisset.*

Tarentini, qui regis Pyrrhi auxilium adversus Romanos imploraverant, se pro socio dominum a cepisse sero intelligentes, sortem suam liberis questibus miserabantur, maximè ubi vino incaluerant. Itaque accersiti ad Pyrrhum non nulli sunt, qui de eo inter convivium parum honorificè locuti fuisse arguebantur. Sed horum quidem periculum simplex & ingeniosa cujusdam ex illis confessio discussit. Nam cum percontare-

tur rex, an quæ ad aures suas pervenerant dixissent? *Et hæc diximus, inquit, Rex: &, nisi vinum nobis defecisset, illa quæ tibi relata sunt, lusus ac jocus fuissent, præ his quæ de te locuturi eramus.* Ibi Pyrrhus qui vini, quàm hominum, culpam hanc esse videri malebat, arridens, dimisit eos.

4. Homini iracundo cum placidissimis & facilissimis & minimè morosis vivendum est, si iræ mederi velit: sumimus enim eorum, quibuscum vivimus, mores. Ut corpus quosdam morbos proximis tradit, sic animus vitia sua. Ebriosus convictores in amorem vini sæpius traxit; impudicorum cœtus fortem quoque virum emollit: avaritia virus suum in vicinos transtulit. Eadem ratio virtutum est: quidquid ad eas accedit, mutatur in melius. Retunditur paulatimque dediscitur inter placidos viros asperitas. Accedit huc, quòd non tantùm exemplo melior sit, qui cum quietis hominibus vivit; sed etiam causas irascendi non invenit, nec vitium suum exercet. Fugere itaque debet iracundus omnes quos irritaturos iram suam sciet. Eliget simplices, faciles, moderatos.

## C A P U T X X I X.

*Imitanda multorum in summa potentia lenitas.*

1. **I**RACUNDIS hominibus ob oculos ponere inutile non erit exempla moderata & lenia eorum, quibus nec ad irascendum causa defuit, nec ad ulciscendum potestas. Quid facilius fuit regi Antigono, quàm duos milites ad supplicium duci jubere, qui proximi regio tabernaculo, de rege suo multa temere effutiebant. Audierat omnia Antigonus, utpotè cum inter dicentes & audientem velum tantùm interesset: quod ille

leviter commovit, & , longius , inquit , *discer dite , ne vos rex audiat.* Idem quadam nocte , cum aliquos è militibus suis audisset omnia mala imprecantes regi , quod ipsos in iter difficile & inextricabile lutum deduxisset : accessit ad eos qui meximè laborabant , & ignorantes à quo æjuvarentur ex illo luto eduxit : illorum verò maledicta miti animo tulit.

Narrant hunc Antigōnum filio suo violentius adversus cives agenti dixisse. *An non novisti , filii , nostrum regnum nobilem esse servitutem ?* Quæ verba maximæ humanitatis sunt & mansuetudinis. Alterum regem ferunt traditum sibi diadema , priusquam capiti imponeret , diu considerasse , ac deinde dixisse : *O nobilem magis , quàm felicem , pannum ! quem ne humi quidem jacentem tollere quis velit , si cognoscat quàm multis sollicitudinibus , & periculis , & miseriis sit refertus.* Hinc P. Syrus.

Fortuna magna , magna domino est servitus.

2. Si qua in Philippo Macedonum rege virtus fuit , maximè contumeliarum patientia , ingens instrumentum ad tutelam regni. Demochares , Parresiaſtes ob nimiam & procacem linguam à Græcis appellatus , ad eum inter alios Athenienſium legatos venerat. Auditâ benignè legatione , Philippus : *Dicite , inquit , mihi , facere quid possim , quod sit Athenienſibus gratum ?* Excepit Demochares ? *Tu suspendere.* Indignatio circumſtantium ad tam in humanum responſum exorta eſt : quos Philippus conticeſcere juſſit , & protervum hominem ſalvum & incolumen dimittere. At vos , inquit , cæteri legati , nunciate Athenienſibus multò ſuperbiores eſſe qui iſta dicunt , quàm qui impure dicta audiunt.

Cum Methonem urbem oppugnaret ; in prætercuntem ſagita jacta de muris , dextrum ejus oculum effodit. Quo vulnere nec ſegniſ in bellum , nec iracundiſ adverſus hoſtes factus eſt ;



adeo ut pacem deprecantibus dederit, & mitis adversus victos fuerit.

3. Multa & Cæsar Augustus digna memoriâ fecit dixitque, quibus appareat iram illi non imperasse. Timagenes historiarum scriptor, quædam in ipsum, quædam in uxorem ejus, & in totam domum dixerat; nec perdiderat dicta: avidè enim excipitur & per ora hominum circumfertur mordax dictum. Sæpe illum monuit Cæsar, ut moderatius linguâ uteretur: perseveranti, domo suâ tantùm interdixit.

4. Dicat quisque sibi, quoties lacescitur: Numquid potentior sum Philippo? Illi tamen impune maledictum est. Numquid in domo mea plus possum, quàm toto orbe terrarum Divus Augustus potuit? Ille tamen contentus fuit conviviatorem à se dimittere. Quid est quare ego flagellis & compedibus puniam servi mei elatius responsum, & contumaciorem vultum, non pervenientem usque ad me murmurationem? Qui sum, cujus aures lædi nefas sit? Ignoverunt multi hostibus; ego non ignoscami pigris, negligentibus, garrulis? Puerum ætas excuset, feminam sexus, extraneum libertas, domesticum familiaritas? Aliquis nos nunc primum offendit? Cogitemus quamdiu placuerit. Sæpe & alias offendit? Feramus quòd diu tulimus.

## C A P U T   X X X.

*Minimis rebus exasperari insania est.*

1. **D**ILIGENTER cavendum est ne minimis rebus exasperamur. Parum agilis est puer, aut mensa negligentius posita? Ad ista irâ concitari, insania est. Æger & infelicitis valetudinis est, quem levis aura ledit: imbecilli oculi sunt, quos candida aut rubra vestis obturbat. Ubi ani-

num simul, & corpus voluptates corrumpere, multa intolerabilia videntur: non quia dura illa sunt, sed quia nos molles. Nulla res magis iracundiam alit, quàm luxuria intemperans & impatiens. Durè tractandus est animus ut idum non sentiat, nisi gravem

2. Infamia quoque est adversus inanima & non sensura irasci.

Cùm Babylonem oppugnaturus festinaret Cyrus, Gindem latè fufum amnem vado transire tentavit; quod vix tutum est, etiam cùm aestatis calorem sensit, & ad minimum deductus est amnis. Ibi unus ex equis albis, qui trahere regium currum solebant, aquis abreptus, vehementer commovit regem. Juravit itaque eo se redacturum amnem illum, ut transiri calcarique etiam à feminis posset: & tamdiu assedit operi, donec alveum in trecentos & sexaginta rivos dispergeret, & siccum relinqueret, in diversum fluentibus aquis. Periit itaque & tempus, magna in rebus magnis jactura: & militum ardor, quem inutilis labor fregit; & occasio aggrediendi imparatos: dum ille bellum indutum hosti gerit cum flumine.

Xerxes ut ex Asia in Europam trajiceret, pontem in Hellesponto fecit. Qui cùm tempestate & fluctibus esset quassatus ac disiectus, jussit trecentos flagellorum ictus ponto infligi, stigmata inuri, compedes dari.

## C A P U T X X X I.

*Lingua diligentissimè continenda.*

1. **R**ECTUM est, etiam in illis contentionibus, quæ cùm inimicissimis fiunt, licet nobis indigna audiamus, tamen gravitatem retinere, iracundiam repellere. Quæ enim, cum aliqua

perturbatione fiunt, ea constantiæ adversantur, nec ab iis, qui adsunt, possunt probari.

Periclem in foro publica negotia tractantem improbus & petulans homo maledictis infectabatur. Quæ cum ille patienter ferret, nec ullum ad ea verbum reponeret; diem totum perseveravit infectatio. Vespero vultu gressuque placido domum reversus est Pericles, insequente eodem nebulone & omnibus contumelis eum impetente. Ædes ingressurus, cum jam nox esset, uni è servis suis mandavit, ut accenso lumine hominem comitaretur ac reduceret domum.

Dionem Academicum è convivio redeuntem maledicus quidam infectabatur, nulla non convicia in eum fundens. Tacebat interea Dion: cui jam domum ingressuro cum conviciator dixisset: *Nihilne ad hæc respondes? Nihil prorsus*, inquit Dion.

Cum Lacedæmoniorum legatus Geloni Syracusanorum regi quædam dixisset quibus offendi posse videbatur; *Spartane hospes*, inquit Gelon, *contumeliæ homini factæ solent ejus iram accendere. Verum tu, contumeliosus licet in me verbis sis invehctus, non tamen induces me ad vicem tibi contra decus reddendam.*

2. Magni animi mansuetique est, moderatè ferre objecta crimina, & contentum non celementer rapi in ultionem, nec faciliè moveri ad iram: sed moribus comem esse mitemque, ingenio quieto & constanti.

Illud te admonéo, dicebat olim Cicero fratri suo viro iracundiori, ut quotidie meditare resistendum esse iracundiæ, cumque ea maxime animum movet, tum tibi esse diligentissime linguam contingendam. Quæ quidem mihi virtus non interdum minor videtur, quam omnino non irasci: Etenim non irasci, non semper gratissimum est, sed aliquando lenitudinis. Moderari

*Scriptoribus Historiæ. 62. 175*  
verò & animo & orationi, cum sumus irati aut  
etiam tacere, et non est perfectæ sapientiæ,  
tamen est non mediocri ingenii.

Cum apud Philippum regem pro vino dormi-  
tantem dixisset causam mulier, fuissetque im-  
merito damnata; se ab ejus judicio provocare  
exclamavit. *Ad quem ergo provocas?* inquit rex  
iratus. *A Philippo*, respondit illa, *bene poto &*  
*dormitante, ad Philippum sobrium & vigilantem.*  
Excussit regi crapulam & somnolentiam tam li-  
berum mulierculæ responsum: & non modò in  
eam non est acerbius invehens, sed etiam, causâ  
ejus diligentius inspectâ, justiore sententiam  
tulit.

## C A P U T X X X I I.

*Quanto superiores sumus, tanto nos summissus  
geramus.*

I. IN rebus prosperis, & ad voluntatem nos-  
tram fluentibus, superbiam, fastidium,  
arrogantiam magnopere fugiamus. Nam ut ad-  
versas res, sic secundas, immoderate ferre,  
levitatis est. Philippum quidem Macedonum re-  
gem rerum gestarum gloria video superatum à  
filio; at facilitate & humanitate video superio-  
rem fuisse. Ingenti clade apud Chæroneam  
Athenienses ac Thebanos effecerat Philippus,  
& magnos propter tam claram victoriam animos  
gerere posse videbatur. Verum ille quo die partæ  
est victoria non in convivio risit, non ludos  
inter epulas adhibuit, non coronas aut unguentâ  
sumit: &, quantum in illo fuit, ita vicit ut  
victorem nemo sentiret. Atheniensibus, quos  
passus infestissimos fuerat, captivos gratis re-  
misit, & bello consumptorum corpora sepul-  
turæ reddidit. Denique adeo nihil superbe, nihil  
insolenter egit, ut voluerit sibi deinceps ab uno



è servis suis singulis diebus in memoriam revocari, se hominem esse. Itaque nec foras ipse prodibat, nec ad eum quiquam manè prius intrabat, quàm famulus ei ter acclamasset: *Philippe, homo es?*

2. Quàm dispar Philippo patri Alexander fuit! Superato Dario Persarum rege, Jovis filium non dici tantum se, sed etiam credi, voluit: tanquam perinde animis imperare posset ac linguis. Itaque Macedonas ipsum salutare, prosterentes humi corpora, iussit. Scripsit quoque Græciæ populis, ut se Deum esse publicis edictis confiterentur. Aliis alia in ejus honorem decernentibus, Lacedæmonii hujusmodi decretum fecerunt: *Quoniam Alexander Deus esse vult, esto Deus.* Laconicâ libertate & brevitate redarguentes vecordiam Alexandri.

3. Cùm solitus esset Epaminondas uncto corpore hilarique vultu prodire in publicum, postridie ejus diei, quo feliciter pugnatum erat in Leuctris, processit squalidus & tristis. Sciscitantibus igitur amicis, ecquid illi molesti accidisset: *Nihil, inquit, sed heri sensi me animo fuisse, quàm par sit, elatiore. Quocirca hesternæ letitiæ intemperantiam hodiernâ tristitiâ castigo.*

4. Postquam victum, & ad pedes suos summittentem se, regem Perseum consolatus est victor Paulus Æmilius; sermone ad circumstantes Romanos converso, dixit: *Exemplum insigne cernitis mutationis rerum humanorum. Vobis hoc præcipuè dico, juvenes. Ideo in secundis rebus nihil in quemquam superbè ac violenter consulere decet, nec præsentì credere fortunæ, cum quid vesper ferat, incertum sit. Is demum vir erit, cujus animum fortuna nec prospera statu suo afferet, nec adversa infringet.*

Modum imponere secundis rebus, nec nimis credere serenitati præsentis fortunæ prudentis hominis & meritò felicitis est.

Mos erat Romanis, in adversis vultum secundæ fortunæ gerere, moderari animos in secundis.

5. Agathocles, qui in Sicilia regnavit ad regiam majestatem ex humili & sordido genere pervenerat. Nam in Sicilia patre figulo natus, ipse figlinam artem primùm exercuit. Postquàm rerum potitus est, solebat in mensa pocula fictilia inter aurea ponere, & palàm fateri sequondam ejusmodi poculorum fuisse artificem.

Longè alio animo fuit Tiberius. Nam inter initia principatus dicenti cuidam: *Menimisti-ne?* Antequam ille plures notas familiaritatis veteris proferet: *Non memini*, inquit, *quid fuerim*. Aversabatur nempe omnium veterum amicorum & æqualium notitiam: & illam solam præsentem fortunam suam aspici. Contrà Vespasianus mediocritatem pristinam neque dissimulavit, & sæpe declaravit: quin & conantes quosdam originem ipsius ad comitem quemdam Herculis referre irrisit.

## CAPUT XXXIII.

*Ne assentatoribus patefaciamus aures.*

1. **I**N secundissimis rebus maximè est utendum consilio amicorum, hisque etiam major, quàm antè, tribuenda est auctoritas. Iisdemque temporibus cavendum est, ne assentatoribus patefaciamus aures, nec adulari nos sinamus. In quo falli facile est: tales enim non esse putamus, ut jure laudemus. Hinc nascuntur innumerabilia peccata.

Citò nobis placemus. Quidquid in nos adulatio sine pudore congeffit, tanquam debitum prandimus: adeoque indulgemus nobis, ut laudari velimus de iis quibus contraria maximè facimus.

Adulatoribus ne aures præbeas. Habent hoc

in se naturale blanditiæ : etiam cùm rejiciuntur , placent ; sæpe exclusæ , novissimè recipiuntur.

Quemadmodum qui audierunt symphoniam , ferunt secum in auribus modulationem illam ac dulcedinem cantûs , quæ mentem ad seria non patitur intendi : sic adulatorum & prava laudantium sermo , diu , postquam auditus est , hæret , nec facile est illum animo excutere. Ideo claudendæ sunt aures blandis vocibus.

2. Alexandro cœlestes honores concupiscenti non deerat adulatio , perpetuum malum regum , quorum opes sæpius assentatio , quàm hostis , evertit. Græci quidam , non ingenii solum , sed etiam nationis vitio , adulatores , veris amicis & maximorum exercituum ducibus à rege preferabantur. Hi tum cœlum illi aperiebant ; Herculemque & Liberum & cum Castore Pollucem novo numini cessuros esse jactabant. Quæ adulationes Alexandro mirè placebant. Etenim ,

. . . . Nihil est quod credere de se

Non possit , cùm laudatur Diis æqua potestas.

Admonebat contra Callisthenes , vir haud quaquam aulæ & assentantium accommodatus ingenio , ne rebus felicissimè gestis invidiam contraheret ascitâ Dei appellatione. At gravitas viri , & loquendi libertas invia erat regi , quasi solus Macedonas paratos ad tale obsequium moraretur : fuitque propterea in eum iræ pervicacis. Cujus explendæ occasionem ubi invenit , virum præditum optimis moribus , indictâ causâ excruciatum necavit. Quam crudelitatem fera poenitentia secuta est. Certè nullius cædes majorem apud Philosophos invidiam Alexandro excitavit. Hinc illa Senecæ : Fuit Callistheni ingenium nobile , & furibondi regis impatiens. Ejus mors crimen Alexandri æternum est , quod nulla virtus , nulla bellorum felicitas redimet. Nam quoties quis dixerit , occidit Persarum

multa millia: opponetur, & Callisthenem. Quoties dictum erit, occidit Darium, penes quem tunc magnum regnum erat: opponetur, & Callisthenem. Quoties dictum erit, omnia Oceano tenuis vicit, ipsum quoque tentavit novis classibus, & imperium è Macedonia usque ad Orientis terminos protulit: dicetur, sed Callisthenem occidit. Denique ex his quæ fortiter feliciterque fecit, nihil tantam ei gloriam afferet, quantum dedecus cædes Callisthenis.

3. Darius adversus Alexandrum in Ciliciæ pugnaturus coëgerat undique pœnè innumerabilem militum multitudinem. Cujus aspectu cum admodum lætus esset, spem quoque ejus inflabat adulatorum turba, certam de Alexandro victoriam pollicitantium. Conversus tum ad Charidemum virum belli peritum, qui Athenis, jubente Alexandro, expulsus, ad Darium confugerat, percontari cœpit: *Satisne ei videretur instructus ad obterendum hostem?* At ille & suæ sortis, & regiæ superbix, oblitus, liberè admonuit: *Illam ex omnibus Orientis partibus extam hominum multitudinem purpurâ, argento, auroque fulgentem, futuram esse imparem Macedonibus, qui paupertatis magistrâ usi militarem disciplinam didicissent, & non decora arma, sed fortitudinem animi ad prælium asserrent.* Itaque suasit, ut argentum atque aurum illud, quo ejus exercitus frustra fulgeret, in conducendis è gente bellicausâ militibus insumeretur.

Erat Dario naturâ mite ac tractabile ingenium: sed naturam plerumque fortuna corrumpit. Itaque veritatis impatiens, hospitem tunc maximè utilia suadentem abstrahi jussit ad capitale supplicium. Ille ne tum quidem libertatis oblitus: *Habeo, inquit, paratum mortis meæ ultorem. Expetet à te pœnas mei consilii sprete, ipse contra quem tibi suasi. Tu quidem licentia regni subito mutatus, documentum eris posteris, homines,*



cum se per misere fortunæ, etiam naturam dediscere. Hæc vociferantem ii, quibus erat imperatum, jugulant. Sera deinde poenitentia subiit regem: & Charidemum vera dixisse confessus, eum sepeliri iussit.

4. Non defuit Caïo Cæsari Caligulæ familiaritas hominum, vitia ejus assentatione alentium. Etenim magnæ fortunæ semper comes est adulatorio.

Ptolomeus Rex Ægypti aliquandiu cum laude imperavit. Postea verò ab adulationibus corruptus, Aristomenem, qui tutor ipsius fuerat, qui cuncta negotia prudenter administraverat, quem instar patris diu coluerat, tandem odio prosequi cœpit, ob illius in loquendo libertatem, ac postremò epoto cicutæ poculo mori coegit. Exinde magis ac magis efferatus, & tyrannicâ sævitia, non regiâ utens potestate, in odium Ægyptiorum venit, parumque absuit quin regno excideret.

5. Duplex exemplum ex ingenti turbâ proferatur, unde discere licet quò prorumpat aliquando præpotentium hominum ira; & quàm turpiter iis assententur adultores.

Somnio quodam & deinde hæriolorum responso territus Medorum rex Astyages, natum è filia sua filium ( qui postea Cyrus est dictus ) Harpago amico necandum tradiderat. Quod cum ille facere neglexisset, & infans inter pastores adolevisset, Astyages filium Harpagi in ultionem servati nepotis, interfecit: & cum ignato patri edendum apposuisset in mensa, identidem quærebat, an placeret conditura? Deinde ubi illum iscelestis epulis saturatum vidit: caput aliasque occisi reliquias misero patri iussit afferri: quas agnoscentem interrogavit, quomodo esset acceptus? Harpagus, dissimulato dolore, creduli regi turpiter adulari non dubitavit, & apud regem, inquit, omnis cæna jucunda est.

Cambysem regem Persarum nimis deditum vino Præxaspes unus ex amicis monebat, ut parcius biberet: *Turpem esse maximè regi ebrietatem*, dicens, *in quem omnium oculi conjicerentur, & cujus nec facta nec dicta obscura essent*. Ad hoc ille: *Scies*, inquit, *quemadmodum semper mentis compos sim*: & probabo jam oculos & manus post vinum etiam solitum officium præstare. Bibi deinde largius, quàm alias, capacioribus icyphis: jam vino gravis, objurgatoris sui filium procedere ultra limen jubet, allevatâque super caput sinistrâ manu stare. Tunc intendit arcum, & ipsum cor adolescentis, quod petere se dixerat, figit, recisoque pectore, hærens in ipso corde spiculum ostendit. Tum rescipiens patrem, an satis certam habeat manum, interrogat. Ille, ejus rei laudator, cujus nimis erat spectatorem fuisse, negavit, *Apollinem potuisse certius sagittam mittere*. O regem cruentem, & dignum in quem omnium suorum arcus tenderetur! O patrem animo magis, quàm conditione, servum!

6. Ad Trajani aures omnis adulatoribus obstructus erat aditus: filebant ergo, & quiescebant. Cum non est cui suadeatur, & qui suadeant non sunt.

Cum Pescennio Nigro imperatori recens facto quidam panegyricum recitare vellet; dixit ei Niger: *Scribe laudes alicujus ducis optimi vitâ functi, & dic quid ille fecerit, ut eum nos imitemur*. Nom viventes laudare, irrisio est; maximè Imperatores, à quibus aliquid sperari aut timeri potest. Ego verò vivus placere volo, mortuus etiam laudari.

Quo tempore Solon ad Cræsum vocatus venit Sardes, erat in regia Æsopus nobilis fabularum scriptor; qui dolens vicem Solonis parum benignè accepti, quod Cræso interroganti liberè respondisset, his verbis eum admonuit: O So;

lon, cum regibus aut quàm minimè, aut quàm blandissimè, agendum est. Imò me hercule, inquit Solon, vel quàm minimè vel quàm optimè.

## C A P U T   X X X I V.

*Fortis & constantis animi est non perturbari in rebus asperis.*

I. **S**APIENTEM nec secunda evehunt, nec adversa demittunt.

Rebus augustis animosus, atque fortis appare.

Quem res plus nimio delectavere secundæ, Mutatæ quatient.

Dicebat Bias eum verè infelicem esse, quia infelicitatem ferre non posset. Interrogatusque, *quidnam difficile esset? Ferre*, inquit, *fortiter mutationem rerum in deterius.*

Qui ea mala, quibus alii opprimuntur magno animo fert, ipsas misérias in gloriam vertit. Quoniam ita affecti sumus, ut nihil æque apud nos admirationem occupet, quàm homo fortiter miser.

2. Pulsus in exilium Seneca, refert ipse quo animo calamitatem exceperit. Viri sapientes, quibus me ab adolescentia dedi, me iusserunt omnes fortunæ impetus prospicere, antequam incurrant. Illis gravis est adversa fortuna, quibus est inexpectata: facillè eam sustinet qui semper expectat. Quemadmodum repentinus hostium impetus imparatos prostrernit; à paratis verò facillè excipitur.

Numquam ego fortunæ credidi, etiam si videretur pacem agere. Dedi operam, ut quæ in me indulgentissimè conferebat, pecuniam & honores, ea posset à me repetere, ita ut nihil propterea mens mea moveretur.

Fortuna jus in hominis mores non habet.

Nihil eripit fortuna, nisi quod & dedit.

Qui munera fortunæ amaverunt, seque propter illa suspici voluerunt; illi jacent & mœrent, cum eos mobilia ista oblectamenta destituunt. At ille qui se lætis rebus non inflavit, non est adjecto animo mutatis: sicque adversus utramque fortunam invictum animum tenet.

Ego in illis, quæ plerique mortalium optant, existimavi semper nihil veri boni inesse, atque ita inveni. In illis quoque, quæ mala vocantur, nihil tam terribile ac durum invenio quàm vulgus opinatur.

## C A P U T X X X V.

*Viri boni nati sunt in exemplar, & eos sibi præparat Deus.*

1. **Q**UÆ verè mala dici possunt, à viris bonis removeret Deus, scelera & flagitia. Quare verò quædam dura patiuntur, paupertatem, exilium, & alia ejusmodi? Ut etiam alios pati doceant. Nati sunt in exemplar. Puta itaque Deum dicere: *Quid habetis quod de me queri possitis, vos quibus recta placuerunt? Aliis bona falsa circumdedi: auro illos & argento & gemmis ornavi: intus boni nihil est. Non est ista solida & solida & sincera felicitas. Vobis dedi bona certa, mansura. Concessi vobis, quæ vulgo videntur metuenda, contemnere; quæ cupienda, fastidire. Non fulgeris extrinsecus; bona vestra intus sunt. Quæ incidunt tristitia, horrenda dura toleratu, istis vos non subduxi, animos vestros adversus omnia armavi.*

Quemcumque fortem videris, miserum neges.

2. Vir bonus non tantum Dei discipulus & emulatus est, sed etiam vera progenies. Eum



parens ille magnificus , sicut severi patres , durius educat , disciplinâ tristi continet , experitur : indurat , sibi præparat. Non vides quanto aliter patres , aliter matres liberos educunt ? Illi excitari eos maturè jubent ad studia obeunda , feriatis quoque diebus non patiuntur esse otiosis , & sudorem illis & interdum lacrimas excutiunt. At matres fovere in sinus continere in umbra , volunt ; numquam flere , numquam tristari , numquam laborare. Patrium habet Deus adversus bonos viros animum , & illos fortiter amat.

---

## C A P U T   X X X V I.

*Præclara est universa vitæ æquabilitas.*

1. **S**I quidquam est decorum , nihil est profectò magis , quàm æquabilitas in omni vita , & idem semper vultus , eademque frons. Ut de Socrate accepimus , quem prædicare solita erat uxor ejus Xantippe se vidisse semper eodem vultu exeuntem domo & revertentem. Nec verò ea frons erat , quæ M. Crassi illius veteris , quem semel ait in omni vita risisse Lucilius , Plinius numquam : sed tranquilla & serena. Jure autem erat semper idem vultus , cum mentis , à qua is fingitur , nulla fieret mutatio.

Ut omnia æquo animo feras , exemplum accipe Socratem per omnia aspera jactatum , invictum tamen & paupertate , & laboribus , tum quos miliciæ pertulit , tum quibus domi est exercitus : cum uxorem haberet moribus feram , linguâ petulantem ; & liberos indociles , matri quàm patri similiores. Novissimè objecta illi est & religionum violatio , & juventutis corruptela , quam immittere in Deos , in parentes , in rem-

publicam dictus est. Post hæc carcer & venenum. Hæc adeo Socratis animum non moverunt, ut ne vultum quidem moverint. Illam mirabilem & singularem laudem usque ad extremum servavit. Non hilariorem quisquam, non tristiores, Socratem vidit: æqualis fuit in magna inæqualitate fortunæ.

2. Q. Metellus Numidicus Româ pulsus, ut suprâ dictum est, in Asiam secessit. In quâ, cum ei fortes ludos Trallibus spectanti litteræ redictæ essent, quibus scriptum erat, maximo senatûs & populi consensu reditum illi in patriam esse datum, nihil moveri visus est: non lætitiâ proximè sedentibus ulla ex parte ostendit: cumque constat pari vultu in exilium abiisse, & fuisse restitutum. Adeo moderationis beneficio & animi firmitate immotus inter secundas & adversas res permanfit.

3. Brutus in eo libro quem de virtute composuit, ait se vidisse M. Marcellum Mitylenis exulantem, & quantum natura hominis pateretur, beatissimè viventem: neque unquam bonarum artium cupidior, quàm illo tempore. Bene ergo exilium tulit: nec quicquam in animo ejus mutavit loci commutatio: quamvis eam & paupertas sequeretur.

4. P. Rutilii Ruffi verbis & factis admirabile ineret robur, quod nullâ unquam re inflecti ac debilitari potuit. Cum esset ille vir exemplum innocentiae, & illo nemo neque integrior Romæ esset, neque sanctior; reus factus nullâ suâ culpâ, apud Equites Romanos, penes quorum judicia erant, nihil splendore actæ vitæ indignum fecit aut dixit: non insignia Senatoris deposuit, non obsoletam vestem induit, & non modo supplex iudicibus esse noluit, sed ne ornatiùs quidem aut liberiùs causam dici suam, quàm simplex veritas ferebat. Damuatus itaque est repetundarum vir inter optimos numerandus, & missus in exilium.

Ex Italia in Asiam venienti legatos obviam miserunt certatim omnes civitates, tutum honoratumque apud se secessum pollicentes, ita ut non iam exulare, quam triumphare videretur, essetque unde ille fortunæ suæ gratias ageret. Cum ei inter Smyrnæos, à quibus fuerat civitate donatus, agenti quidam consolandi causâ dixisset, instare bella civilia Romanorum, brevique futurum ut propterea omnes exules reverterentur: *Quid tibi, inquit Rutilius, mali feci ut mihi pejorem reditum, quam exitum, optares? Male ut patria exilio meo erubescat, quam repitu mereat.* Quod dixerat præstitit: nam cum ei reditum in patriam postea Sy lani victoria facilem faceret; in exilio, ne quid adversus leges peccaret, remansit.

Multos illustrat fortuna, dum vexat. Rutilii innocentia ac virtus lateret, nisi accepisset injuriam. Cum violata est, effulsit.

## LIBER QUINTUS.

### DE

## TEMPERANTIA.

### CAPUT I.

*Ratione duce per totam vitam eundum*

I. **T**EMPERANTIA moderatrix omnium commotionum animi est, à libidine avocat, inani lætitiâ gestire non sinit: hæc pacem animis affert, in rebus expetendis aut fugiendis rationem ut sequamur, monet: in ea verecundia, modestia, omnis sedatio perturbationum animi, & rerum modus cernitur.

2. Est animus in partes distributus duas, quarum una in appetitu posita est, qui hominem huc & illuc rapit: altera in ratione, quæ docet & explanat quid faciendum fugiendumve sit. Efficiendum autem est, ut ratio præsit, appetitus vero obtemperet. Quod temperantiæ munus est.

In animis omnium est natura molle quiddam, demissum, humile. Si nihil esset aliud, quid esset homine deformius? Sed præstò est domina & regina Ratio, cujus magna vis. Hæc ut semper imperet illi parti quæ obedire debet, curandum est: imperet autem, velut servo dominus, imperator militi, parens filio.

Ratione duce per totam vitam eundem est: minima maximaque ex hujus consilio gerenda sunt.

## CAPUT II.

*In sedatione perturbationum animi vita beata.*

1. OMNES animi perturbationes rationem repellentes, nullum beatæ vitæ locum relinquant: hique soli beati dicendi sunt, quos nulli metus terrent, nullæ ægritudines excidunt, nullæ libidines imitant, nullæ fútiles lætitiæ afferunt, nullæ voluptates molliunt. Ut autem maris tranquillitas intelligitur, nullâ ne minimâ quidem aurâ fluctus commovente: sic animi quietus & placatus status cernitur, cum perturbatio nulla est quâ moveri queat.

2. Quemadmodum civitas in seditione beata esse non potest, nec in discordia dominorum, domus: sic animus secum ipse discordans pugnantibus & contrariis studiis consiliisque, nullam gustare partem potest veræ voluptatis.

3. Quod si corporis gravioribus morbis vitæ



jucunditas impeditur : quanto magis animi morbis impediri necesse est? Animi autem morbi sunt cupiditates divitiarum, gloriæ dominationis, libidinosarum etiam voluptatum; ægritudines, molestiæ, mœrores, qui animos exedunt & curis conficiunt.

4. Beatum dicamus hominem eum, cui unum bonum honestas, unum malum turpitudine videatur. Cui vera voluptas erit, voluptatum contemptio. Quem honesti cultorem & virtute contentam nec extollant fortuita nec frangant. Qui fortunæ muneribus utatur, non serviat. Hunc necesse est sequantur gaudium inconcussum & æquabile, perpetua tranquillitas & libertas, pax animi & magnitudo.

Cum ex Socrate quæsitum esset à Polo, nonne beatum putaret Archelaum Perdiccæ filium, qui tum fortunatissimus haberetur? *Haud scio*, inquit Socrates, *numquam enim cum eo locutus sum*. Polus: *An tu aliter id scire non potes?* Soc. *Nulla modo*. Pol. *Tu igitur ne de Persarum quidem rege magno potes dicere beatus ne sit?* Soc. *An ego possum, cum ignorem quàm sit bonus?* Pol. *Quid? tu in eo sitam vitam beatam putas?* Soc. *Ita prorsus existimo, bonos beatos, improbos miseros*. Pol. *Miser ergo Archelaus?* Soc. *Certè, si injustus*.

Nonne hîc videtur Socrates omnem beatam vitam in una virtute ponere?

### CAPUT III.

*Malus beatæ vitæ judex populus.*

1. **V**IVERE omnes beatè volunt: sed quid sit quod beatam vitam efficiat non pervident. Statuendum itaque primum quid appetendum nobis sit, tum circumspiciendum quâ pervenire illò

illò ceteris non possimus. Nihil magis est cavendum, quàm ne pecorum ritu sequamur gregem nos antecedentium, pergentes non quàm eundum est, sed quàm itur. Id nobis maximè nocet, quod non ad rationis lumen, sed ad similitudinem aliorum vivimus: eadem laudamus, eadem probamus, quæ multitudo, & alienis perimus exemplis. Id optimum nobis videtur, quod petitores laudatoresque multos habet.

Una salutis via est, si separemur à cœtu. Hæc quidem pars major est: at ideo peior. Meliora pluribus placere non solent, argumentum pessimi turba est. Quæramus quid optimum factu sit, non quid usitatissimum: quid nos in possessione felicitatis æternæ constituat, non quid vulgo, veritatis pessimo iudici, probatum sit.

2. Quodam die cùm populus è theatro egrediretur, Diogenes adversus populum nitens ingrediebatur. Interrogatus quàm de causâ id faceret: *Hoc*, inquit, *in omni vita facere studeo.*

Dicebat Antisthenes: *Satius esse cum paucis viris bonis dissentire ab omnibus malis, quàm cum multis malis dissentire à paucis bonis.* Idem aliquando laudatus ab improbis hominibus: *Quàm timeo*, inquit, *ne fortè quid mali fecerim!* Et Antimachus poëta, cum convocatis auditoribus legeret magnum volumen suum, & eum legentem omnes, præter Platonem, reliquissent: *Legam*, inquit, *nihilominus; Plato enim mihi unus instar omnium est.*

3. Anaxagoras interroganti cuidam, quisnam esset beatus, non parum prudenter respondit: *Nemo ex his quos tu felices existimas: sed eum in illo numero reperies, qui à te ex miseris constare creditur. Non erit ille divitiis & honoribus abundans: sed aut exigui rursus, aut non ambitiosæ doctrinæ fidelis ac pertinax cultor; in pectore, quàm in fronte, beatior.*

Ubi Cræsus Solonem, quem ad se Sardes vo-

caverat, audivit accedere; ut adveniens oculos perfringeret, eumque aliquâ sui admiratione afficeret, corpus quàm potuit magnificentissimè exornavit, & vestem tum variis coloribus distinctam, tum auro & gemmis fulgentem induit. Quo spectaculo non modò nihil moveri visus est Solon, nullamque emisit vocem quâ regi, pro ejus expectatione, gratularetur: sed etiam satis ostendit se ejusmodi ineptias contemnere, & angusti animi esse ducere. Jussit ergo Cræsus omnes ei pecuniarum suarum thesauros aperiri, & regum omne instrumentum ac supellectilem ante ejus oculos explicari. Quæ cuncta contemplatur Solon, ut ad regem est reductus; quæ sivit ab eo rex, *an quem in terris hominem vidisset se beatior?* Ille Tellum nominavit popularem suum, virum bonum, qui rebus ad vitam degendam necessariis cum non caruisset, egregiè pugnando vitam pro patria profuderat, relictis liberis bene institutis & probatis. Tum verò Cræso & agrestis & infans Solon est visus, qui beatitudinem non auro neque argento metiretur: & privati hominis vitam atque obitum tantæ opulentiae tantoque imperio præferret. Interrogavit tamen eum denuo: *An post Tellum istum cognosceret aliquem alium se ipso beatior?* Beatiores profectò fuisse, respondit Solon. Cleobin & Bitonem, fraternâ inter se amicitia & singulari in matrem pietate insignes viros, qui morantibus bobus, à quibus eorum genitrix ad Junonis delubrum trahi deberet, jugum plaustrum ipsi subierant, & sacris peractis epulati non surrexerant postridie: sed vitam cum morte sine ullo dolore commutaverant. *Quid ergo*, inquit jam irâ incensus Cræsus, *nullone nos numero inter beatos ponis?* Cui Solon, nec adulari sustinens, nec iram ultra movere volens: *Nos quidem Græci*, inquit, *ô Lydorum rex, quàm variis casibus pateat hominum vita, cernentes, nemini licere existimamus propter*

presentia bona animos tollere : neque felicitatem  
aspiscimus ; quæ temporis vici studiis obnoxia  
sit : illam verò solum beatum dicimus ; cui vitam  
feliciter absolvere Dii concesserunt. Viventis enim  
& adhuc fortune telis propositi hominis beatitudo ,  
non minus incerta & dubia est , quàm militis in  
acie decertantis : victoria æq. corona. His dictis , dis-  
cessit Solon à rege offenso magis quàm emendato.

. . . . . Ultima semper

Expectanda dies homini est , dicique beatus  
Ante obitum nemo supremæque funera debet.

## CAPUT IV.

*Corpori indulgendum , non serviendum.*

I. **C**ORPUS , quia nihil fieri sine illo potest ;  
magis necessariam rem crede , quàm mag-  
nam. Vanas suggerit voluptates , breves , ac ,  
nisi magna moderatione temperentur , pœni-  
tendas.

Fateor insitam esse nobis corporis nostri cari-  
tatem. Non nego indulgendum illi , serviendum  
nego. Multis enim serviet , qui pro illo nimium  
timeat , qui ad illud omnia refert. Honestum ei  
vile est , cui corpus nimis carum est. Agatur  
ejus cura : ita tamen , ut cum exiger ratio ,  
dignitas , fides in ignem mittatur.

Major sum , inquiebat Seneca , & ad majora  
genitus , quàm ut mancipium sim mei corporis :  
quod equidem non aliter aspicio , quàm vincu-  
lum , & pondus , & pœnam. Numquàm me caro  
ista compellet ad metum , numquàm ad indig-  
nam bono simulationem ; numquàm in honorem  
hujus corpusculi mentiar. Contemptus corporis  
sui , certa libertas est.

Sapiens corporis , velut oneris necessarii , non  
amator , sed procurator est : nec se illi , cui  
imperare debet , subjecit. Nemo liber est , qui



corpori servit. Nam multos dominos nimia pro corpore sollicitudo nobis imponit.

2. Memento hanc salubrem vitæ formam tenere, ut corpori tantum indulgeas, quantum bonæ valetudini satis est. Durius tractandum est, ne animo malè pareat. Cibus famem sedet, potio sitim extinguat, vestis arceat frigus, domus munimentum sit adversus infesta corpori. Hæc utrum è congesto cespite, an è vario lapide gentis alienæ extructa sit, nihil interest. Scito hominem tam benè culmo, quàm auro, tegi. Imò culmus liberos tegit, sub marmore atque auro servitus habitat.

Tutus in mensa capitur angusta cibus.

Venenum in auro bibitur.

## C A P U T V.

*Cibus & potus desiderio condiuntur.*

1. **M**AGIS juvat bibere sitientem, gratior est esurienti cibus. Fames condat cibos; nihil contemnit esuriens.

Darius in fuga cum aquam turbidam & cadaveribus inquinatam bibisset, negavit unquam se bibisse jucundius: nunquam videlicet sitiens biberat. Nec esuriens Ptolomæus ederat: cui cum peragranti Ægyptum cibarius in casa panis datus esset; nihil visum est illo pane jucundius.

Artaxerxes Mnemon cum ficis aridis & pane hordeaceo vesceretur, in fuga direpto ejus comineatu: *Quali, inquit, voluptate hætenus carui!*

2. Socratem ferunt, cum usque ad vesperrum contentius laboraret, quæsitumque esset ex eo quare id faceret, respondisse: *Se, ut melius cænaret, obsonare famem, ambulando; cibi enim condimentum esse famem, porionis sitim.*

Cum Dionisius tyrannus à Lacedæmoniis con-

vivio exceptus esset, negavit, se jure illo nigro, quod cœnæ caput erat, fuisse delectatum. Tum quidam: *Minimè mirum, inquit, condimenta enim defuerunt. Quæ tandem, inquit ille. Labor in venatu, cursus, fames, sitis.*

Mausoli Carix regis soror Ada, patrio regno ab Alexandro donata, arte multâ parari curavit exquisiti saporis cibos & varia bellaria; quæ cum ipsis coquis & cupediariis regi donum misit, tanquam relatura gratiam bene merenti, si armorum laboribus fatigatum recrearet Asiaticis luxûs deliciis. At ille talia munera aversatus, reginæ quidem in se voluntati comiter gratias egit. Cæterum coquos ad se mitti, nihil opus fuisse, dixit: cum duos longè meliores haberet, quos olim à Leonida pædagogo accepisset, nempe iter antelucanum ad prandium, & prandium frugale ad cœnam. Addiditque, Leonidam solitum fuisse suas vestes, & arculas perscrutari, ne fortè mater Olympias, nimirum filio puero indulgens, aliquid delicatioris cibi clam abscondisset. Puerilis institutionis diu memor fuit Alexander: nam cum Asia pervagaretur, si qui ad eum arborum rari fructus, pisces, aliique cibi exquisiti afferrentur, eos amicis dividebat, vix unquam sibi quicquam ex his servans.

## CAPUT VI.

*Disce parvo esse contentus.*

1. **N**ON præcipio ut naturæ neges quod poscit: sed ut, quidquid naturam excedit, scias non necessarium. Esurio? edendum est. Utrum hic panis sit plebeius, aut filigineus, ad naturam nihil pertinet. Ille ventrem non delectari vult, sed impleri. Sitio? bibendum est. Utrum hæc aqua sit è proximo lacu accepta, an ex

quam nive aut glacie inclusero ac refrigeravero, ad naturam nihil pertinet. Illo hoc unum jubet, sitim extinguere. Utrum aureo poculo utar, an manu concavâ, nihil refert. Finem rerum omnium spectâ, & supervacua dimittes.

2. Civitates quædam universæ, naturam, quæ parvo contenta est, secutæ, parvo victu delectatæ sunt, ut Lacedæmonii. Persas negat Xenophon ad panem quidquam adhibere solitos esse, præter nasturtium. Si quædam etiam suaviora natura desiderare videatur, quàm multa ex terra arboribusque nascuntur suavitate præstanti?

3. Non utile solùm, sed etiam necessarium est, parvo assuescere. Multæ difficultates & locorum & temporum occurrunt etiam locupletibus, & magnâ rerum copiâ instructis. Quidquid vult habere nemo potest: illud potest, carere æquo animo iis quæ non habet, & rebus oblati hilari uti. In villam tuam nocte multâ venis non expectatus: nihil paratum invenis: panem è mensa sua tibi apponit villicus malum. Expecta, bonus fiet, etiam illum tenerum tibi & sili-gineum fames reddet: ideo non est antè edendum, quàm illa imperet.

4. Cupiditati nihil satis est: Naturæ satis est etiam parum. Parabile est, quod natura desiderat: ad manum est, quod satis est; ad supervacua sudatur.

Corporis exigua desideria sunt: quidquid ultra concupiscitur, libidini quæritur, non necessitati. Non est necesse omnia perscrutari maria, nec strage animalium ventrem onerare, nec conchyliâ ex ignito littore eruere. Dii Deæque istos perdant, quorum luxuria fines imperii Romani transcendit, & undique convehit cibos gulæ omnia nota fastidienti. O miserrabiles! quorum palatum non excitatur, nisi ad cibos, quos non eximius sapor, sed raritas, & dis-

cultas parandi pretiosos facit ; & qui cum famem exiguo pretio possint sedare , magno irritant !

5. Cn. Pompeio ægrotanti cum præcepisset medicus ut turdum ederet , negarent autem servi eam avem usquam æstivo tempore posse reperiri , nisi apud Lucullum , qui turdos domi saginaret ; prohibuit Pompeius inde peti , sed medico dixit : *Ergo nisi Lucullus perditus deliciis esset , non viveret Pompeius ?* Et aliam avem , quæ parabilis esset , jussit sibi apponi.

---

## CAPUT VII.

*Platonica & Siracusana mense.*

I. **T**IMOTHEUS , dux Atheniensis , tam felix in expugnandis urbibus fuit , ut ejus dormientis effigies depicta sit , tenentis rete , in quo Fortuna urbes cogeret. Quod quidem vel assentandi vel irridendi causâ excogitatum est. Certè ejusmodi honores ei ab Atheniensibus habiti sunt , qui antea nemini. Cum maximè & rerum gloriâ & potentiâ floreret , incidit fortè in Platonem extra Athebarum mœnia cum discipulis ambulantiem. Quem ut aspectu venerabilem contempexit , audivitque non de armis & classibus , non de tributis & stipendio aliisque ejus generis rebus differentem , sed de bono atque honesto : exclamavit : *O beatam vitam ! O veram felicitatem !* Quibus verbis significabat , ejusmodi colloquia omnibus divitiis atque honoribus sibi videri potiora. Eundem Timotheum ferunt , cum aliquando in Academia cœnavisset apud Platonem , fuisseque & frugali mensâ & erudito prudentique colloquio exceptus ; eo convivio fuisse mirè delectatum : cumque Platonem vidisset postridie , dixisse ; *Vestra quidem cœna non sag*



*lūm in præsentia , sed etiam postero die jucunda sunt.*

2. Et præclara epistola Platonis ad Dionis , qui ipsum in Siciliam vocaverat , propinquos , his ferè verbis : *Quo cū venissem ; vita illa beata quæ ferebatur , plena Italicarum Syracusanarumque mensarum , nullo modo mihi placuit ; bis in die saturum fieri : numquam pernoctare solum : cæteraque , quæ comitantur huic vitæ , in qua sapiens nemo efficitur unquam , moderatus verò multo minus. Neque enim mente rectè uti possumus , multo cibo & potione completi.*

Idem Plato cū videret Agrigentinos magnis impensis ædificare , nec minoribus cænare : *Agrigentini , inquit , ædificant , quasi semper victuri : & cenant , quasi ultimum cœnaturi.*

Platonis magister Socrates nonnullos divites ad cœnam vocaverat , & Xantippem uxorem pudebat modici apparatus : cui Socrates : *Bono esto animo , inquit , nam si homines boni frugique sunt , æquo animo ferrent ; si mali atque intemperantes de his nihil curandum.*

## C A P U T V I I I.

### *Convivia Lacedæmoniorum.*

1. **P**ROVIDIT Lycurgus ne quis Lacedæmoniorum privatim gulæ indulgeret. Itaque instituit , ut omnes sine ullo discrimine communi mensâ & frugali victu uterentur. Nemini licebat ad publica convivia venire præsumptis domi cibis expleto. Propterea acriter se se invicem observabant , atque eum , qui non biberet cum ipsis aut vesceretur , irridebant & objurgabant ut intemperantem & à promiscuo convictu fastidiosè abhorrentem. Singulis mensis quindenī accumbabant ut plurimum : nec quemquam abesse ,

nisi gravissimâ de causâ , licebat. Itaque cum è bello , quo Athenienses vicerat , reversus rex Agis , domi cum uxore vellet cœnare , portionem postulanti non miserunt magistratus.

2. Ad hæc convivia pueri quoque , sicut ad temperantiæ scholam , deducebantur. Ibi crebros de republica sermones excipiebant magistros liberè & facetè cavillantes audiebant , assuescebantque & ipsi jocari , & dicteria citra scurrilitatem jacere , atque aliorum cavillis non offendi : namque videbatur in primis Laconicum , cavilla æquo animo sustinere. Si quis tamen se eorum impatientem diceret , à facetiis in illum temperabatur.

Ut quisque intrabat , natu maximus commonstratis ei foribus , dicebat : *Ex his nihil hic dictorum egreditur.*

Inter obsonia prima laus erat juri nigro , quo senes maximè delectabantur , relictâ juvenibus carne. Ubi mediocriter biberant , sine face recipiebant se domum , neque permittebatur ad lumen incedere , ut discerent in tenebris & nocte commeare fidenter.

3. Sunt quidam delicatuli , mulieribus aliquando ciborum omnium fastidio laborantibus non dissimiles : nam & ipsi solitos cibos fastidiunt. Itaque ut obtusum ferrum nova acie eget : sic eorum stomachus acui quodam modo postulat nonnumquam , cive acerbo aliquo condimento. Quantum ab istis differebat Laconille ! Qui cum conspexisset quemdam ejusmodi delicatulum pretiosam aviculam sibi appositam præ fastidio renuere. *At mihi , dixit , etiam vultur & hircus sapiunt.*

## CAPUT IX.

*Castigata corporis obesitas.*

1. **L**ACEDÆMONIIS lex erat, ne quis vultu præferret molliorem colore fœmineo, aut corporis nimiam molem haberet: hoc enim segnitatem declarare videbatur, illud animum parum virilem. Decimo quoque die adolescentes Ephoris se se exhibebant conspiciendos. Si essent corpore bene compacto & per exercitia roborato, laudabantur: contra, si membra flaccida & molliora viderentur, succrescente per inertiam pinguedine, verberibus plectebantur. Itaque Nauclidem Polybiadæ filium, præpinguem per luxuriam factum, cum in mediam concionem perduxissent Ephori, & ibi Lysander eum graviter objurgasset, parum absuit quin è civitate ejicerent. Certè exilium minitati sunt, nisi emendaret vitam quæ Ionica magis, quàm Lacedæmonica erat: & corporis habitum, qui patriæ dedecori esse videbatur, temperantia & exercitiis corrigeret.

Censores Romani Equiti nimis pingui equum adimere soliti erant, sive minus idoneum esse rati hominem tanto corporis pondere ad faciendum Equitis munus: cive non omnino delictæ culpâ vacare videretur, cujus corpus tam immodicè exuberasset.

2. Non inutile erit pauca alia de severitate Censoriâ hîc exscribere.

Si quædam coram Censoribus erant intempestivè dicta aut facta, ea notatione suâ non carebant. Cujus rei omnium instar erunt hæc exempla duo. Censores P. Scipio Nasica & M. Popilius cum Equitum censum agerent, equum nimis strigosum, sed equitem ejus admodum succi

plenum & pinguem viderunt : *Et cur*, inquit, *ita est*, ut tu sis, quàm equus, curatior? Quoniam, inquit, ego me curo, equum Statius nihili servus. Visum est parum reverens esse responsum, relatusque inter ærarios est Eques.

Quidam amico apud Censores aderat advocatus. Is cum clarè nimis & sonorè oscitasset, parum abfuit quin plecteretur, & de notâ illi inurendâ deliberatum est. Sed cum ille dejurasset invitissimum se oscitatione victum fuisse, tenerique eo vitio quod oscedo appellatur, tum notæ jam destinatæ exemptus est.

## C A P U T X.

*Corporis voluptas non est digna hominis præstantiâ.*

1. **N**UNQUAM obliviscendum est, quantum natura hominis pecudibus reliquisque bestiis antecedit. Illæ nihil sentiunt nisi voluptatem, ad eamque feruntur omni impetu. Si quis verò hominum voluptate capiatur, ad eamque sit paulo propensior; occultat & dissimulat appetitum ejus, propter verecundiam. Ex quo intelligitur, corporis voluptatem non satis esse dignam hominis præstantiâ, eamque contemni & rejici oportere. Si verò sit quispiam, qui aliquid tribuat voluptati; diligenter ei tenendus est ejus fruendæ modus. Itaque victus cultusque corporis ad valetudinem referantur, & ad vires, non ad voluptatem. Atque etiam si considerare volumus, quæ sit in natura hominis excellentia & dignitas, intelligemus quàm sit turpe diffuere luxuriâ, & delicate ac molliter vivere; quamque honestum, parce, continenter, severe, sobriè.

Si divina nostris animis origo est, tendendum ad virtutem, nec voluptatibus corporis serviendum.



Dicebat Socrates : *Multos homines propterea velle vivere , ut ederent & biberent : se bibere atque esse , ut viveret.*

2. Corporis voluptas fragilis est , brevis , & eo vicinior fastidio , quò avidius hausta est. Ejus subinde necesse est , aut pœniteat hominem , aut pudeat. In ea nihil magnificum , aut quod naturam hominis Diis proximi deceat. Imò res humilis est , & fœda. Hæc est voluptas & homine & viro digna , non implere corpus , nec faginare , nec cupiditates irritare , quarum maxime optanda est quies : sed omni animi perturbatione carere.

Lyfandro Spartiatæ , cùm in Ioniam venisset , hospites ejus inter alia munera bovem & placentam miserunt. Ille oculis in placentam conjectis , quæsit quodnam esset illud cibi genus ? Respondit qui afferebat ; ex melle & aliis suavibus condimentis esse confectum. *Hoc ergo , inquit Lyfander , date helotibus ( qui servi erant ) : non est enim hominis liberi cibus.* Bovem verò jussit Lacédæmoniorum more apparari , & libenter jucundèque in cœna comedit.

Cùm Agesilaüs pariter oblata sibi à Thasiis esculenta & poculenta magni pretii multa helotibus distribui jussisset ; quærentibus causam , Thasiis respondit : *Eos , qui probitati ac fortitudini studerent , non decere istiusmodi irritamentis gulæ delectari : propterea quod ingenuos homines iis rebus moveri non oporteat , quibus servitia capiantur.* Itaque farinam tantum ab iis accepit.

## C A P U T X I.

*Corpus & animum ad patientiam exerce.*

1. **E**XERCENDUM est corpus , & ita afficiendum , ut obedire rationi possit in exequendis negociis , & in labore tolerando.

Corpus

Corpus humanum propè uti ferrum est. Ferrum si exerceas, conteritur: si non exerceas, tamen rubigo consumit. Item homines exercendo videmus conteri: si nihil exerceas, inertia atque torpedo plus detrimenti affert, quàm exercitatio.

Socrates, ut corpus adversus ea, quæ fortuito patienda essent, obfirmaret, dicitur, inter alios labores & exercitia, aliquando stare solitus à solis ortu ad solem alterum orientem, inconnivens, immobilis, ore atque oculis eundem in locum directis cogitabundus. In ipso frigore hiemis glaciem nudis pedibus calcabat. Collectâ corporis exercitationibus siti, non tamen prius bibebat, quàm primam puteo haustam aquæ urnam effudisset.

Diogenes pariter omni ex parte se ad laborum tolerantiam exercens, hieme statuas nive perfusas complectabatur, æstate se se in fervida arena voluptabat.

Quoniam majore corporis sarcinâ animus quasi opprimitur, & minus agilis est, exerceatur corpus. Sint tamen exercitationes breves: quæ tempori parcant, cujus præcipua ratio habenda est. Cito redi à corpore ad animum. Illum diebus à noctibus exerce. Hanc exercitationem non frigus, non æstas impedit, ne senectus quidem.

2. Animum domesticis malis ad patientiam exercebat Socrates. Ejus uxor Xantippe morosa admodum fuisse fertur & jurgiosa, ita ut per diem perque noctem marito molesta esset. Has ejus intemperies demiratus Alcibiades, interrogavit Socratem, quænam ratio esset cur meliorem tam acerbam domo non exigeret? Quoniam, inquit Socrates, cum illam domi talem perperior, exerceor atque insuesco, ut cæterorum quoque foris petulantiam & injuriam facilius feram: equitesque illos imitor, qui ferociorem equum eligunt,

*quem doment, futurum ratî, ut cæteris poſtea facilius uti poſſint.*

Cùm in conjugem, ipſâ judice, miſiſſimum, iracunda illa mulier aliquando coavicia & maledicta conjeciſſet, deinde verò ſordidam aquam effudiſſet: *Nonne, inquit amicis Socrates, verè dicebam, à Xantippe poſt tonitru pluviâ venturam?*

3. Mirâ quâdam ratione ſe ad ciborum abſtinentiam exercebant Pythagorei. Apparato enim omni genere ferculorum quæ in lautis conviviis apponi ſolent, cùm diutiſſimè oculos paviffent, eoque ſpectaculo comedendi cupiditatem excitaffent; ſtatim menſam tolli jubebant, & diſcedebant impranſi.

## C A P U T X I I.

*Bonæ valetudinis mater eſt frugalitas.*

1. **V**ALETUDO ſuſtentatur notiâ ſui corporis; & obſervatione earum rerum quæ prodeſſe ſolent aut obeſſe; & continentîâ in victu omni atque cultu, corporis tuendi cauſa; & prætermittendis voluptatibus: poſtremò arte eorum, quorum ad ſcientiam hæc pertinent.

Bonæ valetudinis priſcorum Romanorum quaſi quædam mater erat frugalitas, inimicia luxuriſis epulis. Maximis viris prandere & cœnare in propatulo verecundiæ non erat. Nec ſanè ullas epulas habebant, quas populi oculis ſubjicere erubeſcerent. Deinde ubi mores paulatim in pejus ruiſſent, imperari cœpit, ut patentibus januis prænſitaretur & cœnaretur, ſicque civium oculi luxuriæ modum facerent. Deinde variæ leges latæ ſunt, quibus non ſolum cœnarum ſumptus finitus eſt, ſed etiam genus ciborum.

2. Poſſeſt aliquatenus noſtrâ providentiâ lon-

gior prorogari huic corpusculo mora, si voluptates, quibus pars major hominum perit, poterimus regere & coercere. Plato erat quidem corpus validum ac forte sortitus: sed navigationes ac varia pericula multum detraxerunt viribus. Tamen omnia ferè vitæ suæ tempora inoffensa valetudine traduxit. In illius pestilentiae vastitate, quæ in belli Peloponnesiaci principiis Atheniensium civitatem internecino genere morbi depopulata est, ipse parcè ac moderatè victitando, & iis carendo voluptatibus quæ corpus & animum frangunt aut debilitant, communi omnium cladi nequaquam obnoxius fuit. Temperantia eum perduxit ad senectutem: & natali suo decessit, cum annum unum atque octogesimum impleisset. Dubium autem esse non debet, quin aliquos ex hac summa annos libenter fuisset remissurus. Nam cum eum juberent medici ex Academia, loco morbis infesto, demigrare Lyceum, ut valetudini consuleret; consilium illud aspernatus, ait: se ne in Atho quidem montem, ubi homines diutius quàm alibi vivere cōsedebantur, commigraturum, etiamsi sciret se illic omnium diutissimè victurum.

3. Medicina quondam paucarum fuit scientia herbarum, quibus sisteretur fluens sanguis, & vulnera cōirent paulatim. Deinde in hanc pervenit tam multiplicem varietatem. Minus illa negotii habebat, cum homines uterentur facili nec per artem corrupto cibo: qui postquàm cœpit non ad tollendam, sed ad irritandam famem quæri, & inventæ sunt mille condituræ, quibus aviditas excitaretur; quæ alimenta erant, onera facta sunt, dum malè assuescit venter plus capere, quàm potest; hincque exorti innumerales morbi, supplicia luxuriæ. Quando homines corpora opere ac vero labore durabant, & eos aut cursu, aut venatu, aut tellure versata defatigatos atque esurientes excipiebat do-



mi cibus parabilis & simplex: nihil opus erat tam magna medicorum supellectile, nec tot feramentis ac pyxidibus. Multos morbos ac medicos multa fercula fecerunt. Vide quantum rerum per unam gulam transitararum permisceat luxuria, terrarum marisque vastatrix, quot coqui, pistores, ministratores, ad coquendam & inferendam cœnam discurrant. Dii boni, quantum hominum unus venter exercet!

4. Cùm Mandanam filiam & Cyrus nepotem adhuc puerum epulis exciperet Astyages Medorum rex, patinas ei multas apposuit cum cuiusvis generis condimentis ac cibis. Ibi Cyrus dixisse ferunt: *Quantum tibi, mi ave, negotiorum est in Cœna: si ad omnes istas patinas manus extendere necesse est, & cibos hosce tam varios degustare! Tum Astyages, quid? inquit, an non hæc tibi cœna multo videtur melior esse Persicâ? Ad quæ Cyrus: nequaquam, ave. Nam via multo simplicior apud nos & rectior est ad satietatem, quàm apud vos. Etenim ad eam aliquid carnis & panis nos deducit: cùm vos eodem, quò nos tendentes, multas per ambages & circuitus suisum deorsum vagati, vix eò tandem perveniat, quò dudum nos pervenimus.*

### CAPUT XIII.

*Omne vitium ebrietas & incendit & detegit.*

1. **T**URPE est, plus sibi quempiam ingenere cibi & vini, quàm capiat, & stomachi sui non nosse mensuram. Quàm multa ebrii faciunt, quibus sobrii erubescunt? Non est animus in sua potestate, ebrietate devinctus. Onerati vino, ut cibum & potum, sic secretum, non continent: quod suum alienumque est, pariter effundunt.

Nihil aliud est ebrietas quam voluntaria infamia, & brevis furor. Hinc Alexander carissimum sibi ac fidelissimum amicum Clitum inter epulas transfodit. M. Antonium, magnum virum & ingenii nobilis, quæ alia res perdidit, quàm ebrietas, & Cleopatrarum amor? Hæc illum res hostem reipublicæ, hæc hostibus suis imparem, hæc crudelem fecit, cum inter apparatusissimas epulas vino gravis, sitiret tamen sanguinem. Solet nempe vinolentiam crudelitas sequi.

Omne vitium ebrietas & incendit & detegit, obstantemque malis conatibus verecundiam removet. Ubi possedit animum nimia vis vini, quidquid mali latebat, emergit: tunc libidinosus cupiditatibus suis, quantum petierint, sine dilatione permittit: tunc petulans non linguam, non manum continet. Crescit insolenti superbia, crudelitas sævo, malignitas livido: omne vitium laxatur & prodit. Adjice illam ignorationem sui, parum explanata verba, gradum errantem; vertiginem capitis, stomachi tormenta, cum effervesceat vinum ac viscera ipsa distendit.

2. Quæ gloria est, capere multum vini? Cum penes te palma fuerit, cum omnes convivas viceris virtute magnificâ, & nemo tam vini capax fuerit, vinceris à dol'o.

Aristippus cuidam gloriante quod multum bibens non inebriaretur: *Hoc*, inquit, & *multus facit*. Sic Demosthenes, cum legati ad Philip-pum missi, atque inde Athenas reversi, regem cognomine laudarent quod plurimum biberet: *Hoc*, inquit, *ei cum spongia commune est*.

Mirabatur Anacharsis quod Græci initio convivii cyathis parvis uterentur, ubi verò saturati essent, majoribus; judicans potum adhibendum esse tantum ad sedandam sitim: absurdum igitur esse tum bibere, cum jam sitis esset sedata. Idem interrogatus quo pacto quis vitare posset ne vini potator fieret: *Si*, inquit, *præ-*

*oculis habeat ebriorum indecora facta dictaque. Hinc Lacedæmonii ut liberos ab ebrietate absterrent, servos multum vini bibere coactos, atque ita ebrios, in eorum conspectum jubebant venire.*

Ebrietas hilarem unius horæ insaniam longi temporis tædio sæpius pensat.

3. Cùm Aftyagi mirum videretur, quòd Cyrus puer, pincernam Sacam egregiè imitatus in porrigendo sibi poculo ad bibendum, non prægustasset vinum, ut ille solebat; causam ab eo quæsit. Cui Cyrus: *Metuebam, inquit, ne vino admistum venenum esse. Nam cùm tu nuper die natali amicos convivio exciperes, Sacam istum vobis venenum infudisse animadverti. Videbam vos nec animis nec corporibus constare. Quæ nos pueros facere vetatis, ea faciebatis ipsi. Omnes simul vociferabamini, neque quisquam quid ab altero diceretur, attendebat. Cantabatis ridiculè admodum, jurabatis tamen cantum illum esse optimum. Quin etiam cùm surrexissetis ad saltandum, non modò non saltare ad nuntios, sed ne recti quidem stare poteratis: prorsusque obliti eratis, & tu & illi, regem esse te. Tum Aftyages: An verò, inquit, fili mi, pater tuus cùm bibit non sit ebrius? Nunquam profectò, respondit ille, finire enim tantum desinit.*

#### C A P U T X I V.

*Coërcendus luxus, & colenda frugalitas.*

1. **D**IOGENES vir ingentis animi, qui se complicit in dolio, & in eo cubitavit, divitias, sicut & Democritus, projecit, onus illas existimans, & effecit ne quid sibi eripi posset. Servus, quem sibi unicum servaverat, cùm effugisset; eum reducere, cùm monstraretur,

tanti non putavit. Turpe est, inquit, Manem sine Diogene posse vivere, Diogenem sine Mane non posse. Cum vidisset puerum cavâ manu bibentem aquam, fregit protinus exemptum è perula calicem, cum hac objurgatione sui: *Quandiu homo stultus supervacuas sarcinulas habui!*

Quoniam non est tantum roboris nobis, ut tale exemplum sequamur: angustanda certè sunt patrimonia. Optimus autem pecuniæ modus est, qui nec in paupertatem cadit, nec procul à paupertate discedit. Placebit nobis hæc mensura, si prius parcimonia placuerit, sine qua nullæ opes sufficiunt, & cum qua vel exiguæ satis patent. Poterit ipsa paupertas in divitias se, advocatâ frugalitate, convertere. Hinc Plinius ad Calvinam scribens, cui remittebat grandem pecuniæ summam debitam sibi ab ejus patre, hæc ait: *Non est quòd verearis ne sit mihi ista onerosa donatio. Sunt quidem omnino nobis modicæ facultates, dignitas sumptuosa, redditus, propter conditionem agellorum, nescio minor an incertior: sed quod deficit, ex redditu, frugalitate suppletur; ex qua, velut è fonte, liberalitas nostra decurrit.*

2. O miserum, quem delectat sui patrimonii liber amplus, & vasta spatia terrarum colenda per servos, & immensi greges pecorum per provincias pascendi, & familia quibusdam nationibus major, & diſicia privata laxitatem urbium vincencia! Si quidquid hebet, ei, quod cupit, comparet, pauper est. Neque enim unquam expletur nec satiatur cupiditatis sitis. Solebat Artalus Philosophus hac imagine uti: vidisti aliquando canem missa à domino frustra panis aut carnis aperto ore captantem? Quidquid exceperit, protinus integrum devorat, & semper ad spem novorum frustorum hiat. Idem evenit ejusmodi hominibus semper ad nova fortunæ munera erectis & attentis,



3. Assuescamus à nobis removeere pompam, servis paucioribus servire, vestes parare ad id cuius causâ inxentæ sunt, habitare contractius. Discamus membris nostris inniti, naturæ voluntati parentes, quæ pedes dedit, ut per nos ambularemus, sicut oculos, ut per nos videremus. Discamus victum cultumque non ad nova exempla componere, sed ut majorum suadent mores. Discamus continentiam augere, luxuriam coërcere, gulam temperare, paupertatem æquis oculis aspicere, frugalitatem colere, desideriis naturalibus parvo parata remedia adhibere, spes effrenatas velut sub vinculis habere: denique id agere ut divitias à nobis potius quàm à fortuna, petamus. Facit autem animus sibi divitias, nihil concupiscendo.

4. Si quis hoc sæculo, inquit Valerius, vir illustris pellibus hædinis pro stragula veste ulatur, quingentorum tantum assium sumptu in transmarinam provinciam eat, eodem vino eodemque cibo, quonautæ, uti contentus sit, tribus servis comitatus Hispaniam regat, nonne mirabilis existimetur? Atqui hæc libenter fecit, ac toleravit Cato superior, propter frugalitatis consuetudinem. Assueverat enim ab adolescentia, aquam in bellicis expeditionibus potare; si nimio æstu torqueretur, acetum; si vires deficerent, paululum vilis vini. Ipse scriptum reliquit: se nunquam vestem induisse quæ majoris prætii, quàm centum denariorum, esset: cum Consulatum gereret, idem vinum bibisse quod opifices, & obsonium ad cœnam è foro comparasse triginta sestertiis: idque reipublicæ causâ fecisse. Unde Seneca, ait: M. Catonem censorium tam reipublicæ Romanæ profuit nasci, quàm Scipionem: alter enim cum hostibus nostris bellum, alter cum moribus gessit. Canterio vehebatur, & hippoperis quidem impositis, ut secum utilia portaret. O quantum erat sæculi

decus, imperatorem triumphalem, Cenforium, & quod super omnia hæc est, Catonem, uno caballo esse contentum, & ne toto quidem! Partem enim occupabant sarcinæ ab utroque latere dependentes.

5. Scipio Æmilianus post duos inclytos Consulatus, & totidem triumphos, septem servis sequentibus officio legationis functus est. E Carthaginis & Numantiæ, quas deleverat, spoliis comparare certè plures potuerat: sed operum suorum ad se laudem, manubias ad patriam redundare maluit. Itaque cum per populi Romani socios, & exterarum nationes iter faceret, non mancipia ejus; sed victoriæ numerabantur: nec quantum auri & argenti, sed quantum dignitatis atque gloriæ, secum ferret, æstimabatur.

6. Cum Ætolorum gens vasa argentea magni ponderis & exquisitæ artis Q. Ælio Tuberoni Consulatum gerenti misisset per legatos, qui se in priore legatione fictilia in ejus mensa vasa vidisse retulerant; eos cum suis muneribus abire jussit, monitos ne voluntariæ paupertati, quæ à continentia oriretur, succurrendum putarent. Utinam, exclamat Valerius, hujus frugalitatis exemplum posterior ætas sequi voluisset! At nunc quo ventum est? A servis vix impetrari potest, ne eam supellectilem fastidiant, quâ tunc Consul uti non erubuit.

Sexdecim eodem tempore Ælii fuerunt, quibus una Romæ domuncula erat, & unus in agro Veiente fundus, cultores multo pauciores desiderans, quàm dominos habebat. Princeps civitatis Æmilius Paulus Ælio Tubertino, cujus tam pauperes Penates videbat, nuptum dedit filiam: quæ viri paupertate adeo non offensa est, ut illam, propter quam pauper erat, virtutem, maximè admiraretur.

7. Qualis P. Scipionis Africani villa fuerit, quale balneum, scribit ad amicum Seneca: In

ipſa Scipionis Africani villa jacens hæc tibi ſcribo. Video villam ſtructurâ lapide quadrato, murum circumdatum ſylvæ, turres in propugnaculum villæ erectas, balneolum anguſtum, tenebricoſum ex conſuetudine antiqua. Magna ergo me voluptas, ſimul & pudor ſubit contemplantem Scipionis mores ac noſtros. In hoc angulo ille Carthaginis horror abluebat corpus laboribus ruſticis feſſum: exercebat enim opere ſe, terramque, ut mos fuit priſcis, ipſe ſubigebat. Sub hoc ille teſto tam ſordido ſtetit, hoc pavimentum tam vile illum ſuſtinuit. At nunc quis eſt qui hæc lavari ſuſtineat? Sibi quiſque pauper videtur ac ſordidus, niſi parietes magnis & pretioſis ſpeculis, marmore, ebore, variisſque coloribus refulgeant. In hoc Scipionis balneo minimæ ſunt rimæ magis quàm fenestræ, ut ſine injuria muri lumen admitterent. At nunc balnea nolunt, niſi quæ totius diei ſolem fenestris ampliſſimis recipiant; niſi, dum lavantur, agros & maria proſpiciant. Sic quæ in uſum reperta fuerant, oblectamenta facta ſunt.

## C A P U T X V.

*Nihil eſt agriculturâ melius, nihil dulcius, nihil homine libero dignius.*

1. **I**N urbe luxuries creatur: ex luxuria exiſtat avaritia necesse eſt: ex avaritia erumpat audacia. Inde omnia ſcelera ac maleſicia gignuntur. Vita verò ruſtica, parcimoniæ, diligentiae, juſtitiae magiſtra eſt.

Vita ruſtica ſine dubitatione proxima & quaſi conſanguinea ſapientiae eſt.

2. Haud ſcio an ulla beator eſſe vita poſſit, quàm eorum qui agris colendis dant operam: non ſolùm quòd hominum generi univerſo cul-

tura agrorum est salutaris : sed etiam quòd delectationem affer, & copiam omnium rerum quæ ad victum hominum & ad cultum etiam Deorum pertinent. Apud veteres Romanos summi viri, clarissimique homines, qui omni tempore ad gubernacula reipublicæ sedere debebant, tamen in agris quoque colendis aliquantum operæ temporisque consumpserunt. In agris plerumque vivebant senatores & senes, & à villa in Senatum arcessiebantur. Sic M. Atilium sua manu ferentem agrum invenerunt, qui eum jussu Senatûs evocarunt ad imperium Populi Romani suscipiendum : unde illi cognomen Serranus fuit. Sed illæ rustico opere attritæ manus salutem publicam stabilierunt, ingentes hostium copias pessumdederunt ; & quæ modò arantium boiûm jugum rexerant, triumphalis currûs habenas moderatæ sunt : nec fuit deinde iis rubori, eburneo scipione deposite, agrestem stivam aratri repetere. Potest pauperes consolari Atilius ; sed multo magis docere locupletes, quàm non sit necessaria solidam laudem cupienti nimis anxia divitiarum comparatio.

3. Ducentis ante Atilii ætatem annis, cùm Romæ nunciatum esset Minucium Consulem atque exercitum ejus ab Æquis circumfessos teneri : tantus pavor, tanta trepidatio fuit, quanta, si urbem, non castra, hostes obsiderunt. Cùm autem in altero Consule Nautio parum esse præsidii videretur, Dictatoreque dici placeret, qui rem perculsam restitueret ; L. Quintus Cincinnatus omnium consensu Dictator est dictus. Ille, spes unica imperii Romani, quatuor tantum jugerum colebat agrum : nam ex septem, quæ prius possidebat, tria amiserat, volens, soluta pro amico multâ. Sicque ejus rura minus patebant, quàm nunc, inquit Valerius, multorum domus. Hic à legatis Senatûs sive fossam fodiens, sive arans, operi certè



agresti intentus, inventus est. Salute datâ invicem, redditâque, rogatus ut Senatûs mandata togatus audiret; togam properè è tugurio proferre uxorem Raciliam jussit. Quâ postquam indutus est, &, absterfo pulvere ac sudore, se Dictatorem à legatis consalutari audivit; Romam venit, & Minucio obsidione liberato, victos hostes pecudum in modum sub jugum misit, ne à rustici operis imitatione cessaret. Quæ quidem tanta velocitate gessit, ut dictatura in sex menses accepta sexto decimo die se abdicaverit: prorsus ut festinasse ad repetendum opus relictum videretur. Expeditione quippe finitâ, rediit ab boves triumphalis agricola.

4. P. Scipio Nafica, cùm Ædilitatem Curulem peteret, manumque cujusdam civis Romani rustico opere duratam more candidatorum tenacius apprehendisset; joci gratiâ interrogavit eum: *Num manibus solitus esset ambulare?* Quod dictum à circumstantibus exceptum, ad populum manavit, causamque repulsæ Scipioni attulit. Omnes namque rusticæ Tribus communem sibi ab eo factam injuriam judicantes, iram suam adversus contumeliosum ejus dictærium exercuerunt.

5. Cultura agrorum operâ, non impensâ, constat. C. Furius Cresinus, cùm in parvo admodum agello largiores fructus perciperet, quàm ex amplissimis agris vicinitas, in invidia magna erat, quasi fruges alienas in agellum suum pelliceret veneficiis. Quapropter die ei dictâ ad populum Romanum, damnationem metuens, instrumentum omne rusticum in forum attulit, & adduxit filiam validam atque benè curatam & vestitam, ferramenta egregiè facta, graves ligones, vomeres ponderosos, boves saturos. Postea dixit: *Veneficia mea, Quirites, hæc sunt: nec possum vobis ostendere, aut in forum adducere lucubrationes meas, vigiliasque & sudores.* Omnium sententiis absolutus est.

## CAPUT XVI.

*Omnes corporis motus decorum teneant.*

1. **S**TATUS, incessus, sessio, accubatio, vultus, oculi, manuum motus, teneant decorum, præsertim naturâ ipsâ duce, & magistra. Quibus in rebus duo maximè fugienda sunt, ne quid effeminatum aut molle, & ne quid durum aut rusticum sit.

2. Cùm pudorem pueris innasce vehementer cuperet Licurgus, iussit eos in vicis manum utrumque intra pallium continere, tacitosque incedere, nusquam circumspicientes; at ea tantum intuentes, quæ ante pedes essent.

Xenocrates Platonis discipulus dicebat: *Nihil interesse pedes ne, an oculos, in alienam domum aliquis defigat: tam enim peccare, eum qui oculos vertat quò non convenit, quàm illum, qui ingreditur quò non licet.*

Sic eùm prætereunte formoso puero exclamasset Sophocles, *ô puerum pulchrum!* dixit ei Pericles: *At enim non solum manus, sed etiam oculos habere abstinentes decet.*

3. Cavendum est ne aut tarditatibus utamur in gressu mollioribus, ut pomparum ferculis similes esse videamur; aut tam celeres festinatio- nes nostræ sint, ut anhelitus moveantur, vultus mutentur, ora torqueantur. Hinc Tigellium ridet Horatius, qui interdum currebat, quasi hostem fugeret; alias lentus incedebat tanquam Junonis sacra ferret.

## CAPUT XVII.

*A forma removeatur ornatus non dignus viro.*

1. **C**UM pulchritudinis duo genera sint, quorum in altero venustas sit, in altero dignitas:  
*Pars II.* K

venustatem muliebrem ducere debemus, dignitatem virilem. Ergo à forma removeatur omnis viro non dignus ornatus. Formæ autem dignitas coloris bonitate tuenda est, color exercitationibus corporis.

Sint procul à nobis juvenes, ut femina, comiti :

Fine coli modico forma virilis amat.

Forma viros neglecta decet.

Noſti juvenes barbâ & comâ præter modum nitidos, elegantes totos? Nihil ab illis speraveris forte, nihil solidum.

Diogenes Cynicus conſpiciens adoleſcentem cultu geſtuque parum virili: *Non te pudet, inquit, qui pejus tibi velis, quàm ipſa natura voluit? Si quidem illa te virum finxit: tu te ipſe refingis in feminam.*

Videns quemdam Metium formæ cauſâ ſibi nimis placentem Domitianus: *Vellem, inquit, tam formoſus eſſe, quàm Metius ſibi videtur.*

Anceps forma bonum mortalibus,

Exigui donum breve temporis,

Ut velox celeri pede laberis!

Res est forma fugax., qui ſapiens bono

Conſidat fragili?

. . . . . Rara eſt concordia formæ

Atque pudicitia.

2. Complures videas, quibus apud tonforem multæ horæ tranſmittuntur, dum decerpitur ſi quid barbæ proximâ nocte ſuccrevit, dum de ſingulis capillis in conſilium itur, dum diſjecta coma reſtituitur. Quis eſt iſtorum qui non ſollicitior ſit de capitis ſui decore, quàm de ſalute? qui non comptior eſſe malit, quàm honeſtior? O homines inter peſtinem & ſpeculum deſidioſè occupatos!

Ea quotidie comminiſcimus per quæ virili dignitati fiat injuria.

Formâ fuit Auguſtus eximiâ, & per omnes

ætatis gradus venustissimâ. Erat tamen omnis lenocinii negligens, & in capite comendo tam incuriosus, ut eo ipso tempore, quo illud tonsoribus committebat, aut legeret aliquid, aut etiam scriberet.

3. Regnante apud Lacedæmonios Archidamo, venit Spartam Ceorum legatus, jam senex, vir naturâ ostentator, & qui formosus videri vellet. Itaque cum illum puderet senectutis, crines suos, qui cani erant, dissimulaverat tincturâ. Ubi in concionem prodiit cum mentitis capillis, & ea dixit quorum causâ venerat: consurgens Archidamus, qui legati comam alieno colore tinctam deprehenderat. *Quid, inquit, hic veri & sani diceret, qui non in animo tantum, sed etiam in capite circumfert mendatium?* Explositque ejus dicta: de hominis ingenio, ex iis quæ videndo cognosci poterant, judicans.

Cum Adrianus Imperator cuidam canescenti aliquid negasset; eidem iterum postea accedenti, sed infecto capite, lepidè respondit: *Jam hoc patri tuo negavi.*

## CAPUT XVIII.

*E speculo consilium ad quædam.*

1. **E**x inventis speculis venit homini primò sui vultûs notia, deinde & ad quædam utiliora consilium: formoso, ut vitaret infamiam; deformi ut sciret redimendum esse virtutibus quidquid corpori deesset: juveni, ut flore ætatis admoneretur, illud tempus esse discendi, & fortia audendi: seni, ut indecora carnis deponeret, & de morte aliquid cogitaret.

Habebat quidam filiam turpissimam,

Idemque insigni & pulchrâ facie filium.

Hi speculum, in cathedra matris ut pos-  
tum fuit,

Pueriliter ludentes foris inspexerant.



Hic se formosum jactat : illa irascitur ;  
 Nec glorientis sustinet fratris jocos ,  
 Accipiens ( quid enim ? ) cuncta in contumeliam.

Ergo ad patrem concurrit læsura invicem ;  
 Magnâque invidiâ criminatur filium ,  
 Vir natus , quòd rem feminarum tetigerit.  
 Amplexus utrumque ille , & carpens oscula ,  
 Dulcemque in ambos caritatem partiens :  
*Quotidie , inquit , speculo vos uti volo ,*  
*Tu , formam ne corrumpas nequitiae malis ;*  
*Tu , faciem ut istam moribus vincas bonis.*

Socrates quoque Philosophus dicitur suasse discipulis , ut qui inspecto speculo formoso sibi videretur , caveret , ne dignitatem corporis malis moribus dedecoraret ; qui verò deformis , daret operam ut virtutis splendore vultûs turpitudinem regeret.

2. Natura facultatem nobis dedit nosmetipsos videndi. Fons cuique per lucidus imaginem suam reddit. Qualem fuisse putas cultum hominum ad hoc speculum secomentium ? Ætas illa simplicior beneficium atque inventum naturæ non vertebat in libidinem & luxum. Satis nitidi sibi videbantur , si squalorem opere collectum fluminis aquâ eluerent. Crinem sine arte formosi quatiebant , non aliter quàm jubam generosa animalia. Deinde cùm insitus mortalibus suû amor cœpit iis dulcem aspectum formæ suæ facere , & è terra metalla effossa sunt : hic in poculo , ille in vase ad alios usus comparato speciem suam inspexit curiosius : mox propria huic ministerio specula præparata sunt , & tandem immodestiùs crescente luxuriâ , totis paria corporibus ex auro argentoque facta sunt , & gemmis adornata ; ita ut unum ex his pluris feminae constiterit , quàm antiquorum fuit dos illa , quæ publicè dabatur Imperatorum pauperum filiabus.

## CAPUT XIX.

*Investitu mediocritas optima.*

1. **A**DHIBENDA est munditia non exquisita nimis: sicut fugienda agrestis negligentia. Eadem ratio est habenda vestitus: in quo, sicut in plerisque rebus, mediocritas optima est.

Alter se justo plus colit, alter se justo plus negligit.

Demosthenem, Atticæ eloquentiæ principem, tradunt vestitu nimis accurato fuisse. Hinc illi elegans vestis & molles tuniculæ ab æmulis ad-versariisque probro datæ sunt, nec ab indignis in eum verbis est temperatum.

Hortensius quoque omnium Oratorum ætatis suæ, si M. Tullium excipias, clarissimus, propterea exagitatus est: multaque in ipsis causis & judiciis sunt in illum dicta, quod munditiæ nimium studiosus, compositè amictus esset, manusque ejus inter dicendum forent argutæ admodum & gestuosæ.

Hæc ad deridendam Hortensii mollitiem addit Macrobius. Ut aptè circumamictus incederet Hortensius, in speculum intuens, togam corpori sic applicabat, ut rugæ non fortè, sed de industria, locarentur. Cùm aliquando procederet veste ad speculum ita compositâ; collegæ diem dixit, quod sibi in angustiis obviis offensus fortuito structuram togæ destruxerat.

2. Julia, cùm Augustum patrem venisset salutatum, senserat oculos ejus licentiore cultu suo offensos, licet ille tacuisset. Itaque postero die, mutato habitu patrem complexa est. At ille, qui pridie dolorem suum continuerat, gaudium continere non potuit, &: *Quanto magis, inquit, hic in filia Augusti cultus probabitur!* Ve-

rùm frustra Juliæ sæpè præcepit Augustus temperato inter indulgentiam severitatemque sermone, ut molliorem profusoremque cultum moderaretur. Nam cùm ei amicus, vir gravis, diceret, illam meliùs esse facturam, si se composuisset ad exemplar paternæ modestiæ; superbè respondit: *Ille obliviscitur se Cæsarem esse, ego memini me Cæsaris filiam.* Augustus quippe raro veste aliâ est usus, quàm contestâ ab uxore & sorore, & filiâ neptibusque. Quod & ab Alexandro magno factitatum accipimus, antequàm Persicos mores & vestes induisset. Nam cùm Sigygambi captivæ matri Darii multam purpuram misisset, admonerique jussisset, ut neptes suas assuefaceret vestes conficere, & dono dare; ubi reginam aspernari id munus audivit, & injuriam sibi factam putare: ipse ad eam venit, &: *Mater, inquit, hanc vestem, qua indutus sum, sororum non solum donum, sed etiam opus, vides. Nostri decipere me mores. Cave, obsecro, in contumeliam accipias ignorationem meam.*

3. Lycurgus juvenibus non ampliùs una veste uti toto anno permisit, nec quemquam cultiùs ornatum, quàm alterum, progredi, nec epulari opulentiùs: ne imitatio in luxuriam verteretur.

Ipse Lacedæmoniorum rex Agesilaüs, quatuor anni tempestatibus unâ tantùm veste induebatur; & cum in castris inter milites ageret, lectum non habebat molliorem quàm alii: hocque sæpe in ore ei erat: *Principem decere, non mollitiæ & deliciis, sed temperantiâ & fortitudine privatis hominibus præstare.* Eodem vitæ instituto etiam senex factus utebatur: & percontanti cuidam cur per acrem hiemem solo pallio tectus obambalaret sine tunica, illa ætate? *Ut, inquit, juvenes hanc vitæ rationem imitentur, cum exemplum habeant extremæ senectutis viros & principes.*

Quàm dissimilis Agesilao fuit apud Romanos Nero, tum multis aliis in rebus, tum in vestitu! Nam nullam vestem bis induit.

Cùm in regali folio sederet Cræsus pretiosissimis vestibus indutus ; Solonem interrogavit , an quid unquam vidisset pulchrius ? *Gallos* , inquit ille , & *phasianos* , & *pavones* : naturali enim & inimitabili colore ac pulchritudine fulgent.

## CAPUT XX.

*Nihil olere satius est quàm bene olere.*

1. **L**UXURIAM juvit multos odores miscere , & è cunctis unum facere : ita reperta sunt unguenta. Ab Asiaticis videtur venisse unguenti usus : illi madent eo , & accersito odore natum ex ingluvie fœtorem oris extinguunt.

Unguentarios Lacedæmonii urbe expulerunt , & properè cedere finibus suis jusserunt : quod oleum disperderent , & mollitiem ac luxum viderentur investuri.

Quidam adolescenti unguentis delibutum caput habenti , *Vide* , inquit Diogenes , *ne bonus capitis odor malum vitæ tuæ ac famæ odorem afferat.*

Cùm adolescens fragrans unguento accessisset ad Vespasianum , ut pro impetrato Magistratu gratias ageret ; hic , ne quàm occasionem corrigendi disciplinam prætermitteret , adolescentem vultu aspernatus , voce etiam gravissimâ increpuit : *Maluissèm alium oboluisse* ; munusque concessum revocavit.

2. In omnem vitam unguento abstinemus ( ait ipse de se Seneca ) , quoniam optimus odor in corpore est nullus.

Hoc mihi suspectum est quod oles bene ,  
Postume , semper.

Postume , non bene olet , qui bene semper olet.

Rides nos , Coracine , nil olentes ,



Malo , quàm bene olere , nil olere.

3. Qui in solem venit , colorabitur. Qui in unguentaria taberna resederunt , & paulò diutius commorati sunt , odorem secum loci ferunt. Sic qui apud Philosophum aut virum probum fuerunt , traxerint aliquid necesse est quod profuit.

## C A P U T   X X I.

*Dormi quantum satis est.*

1. **N**ATURA appetit animus aliquid agere semper , neque ullâ conditione quietem sempiternam potest pati.

Somnum , nisi requiem corporibus & medicinam quandam laboris afferret , nobis contra naturam datum putaremus : aufert enim sensus , actionemque tollit omnem. Endymionis somnum nobis profectò nolimus dari : idque si accidat , mortis instar putemus. Nam ut quisque optimè natus institutusque est , esse omnino nolit in vita , si gerendis negotiis aut doctrinæ studiis orbatus , possit paratissimis frui voluptatibus , & semper inertī quieti indulgere.

Propter nocturnam quietem dimidio tantum quisque spatio vitæ suæ vivit. Extendamus vitam agendo , nam vitæ argumentum & officium , actus est. Circumscribatur nox , & aliquid ex illa in diem transferatur.

Mycerinus Ægypti rex ab oraculo monitus sex tantum vitæ annos sibi superesse , hoc excogitavit , ut oraculum , quantum liceret , convinceret mendacii , & duodecim pro sex anni fierent. Quàm minimè potuit , somno indulgit , & accensis , cum nox appeteret , permultis lucernis , aut domi se continebat , aut agros & nemora pervagabatur.

2. Julianus Imperator noctes ad officia divi-

debat tripartita, quietis, publicæ rei, & Musarum. Quod & Alexandrum magnum fecisse legimus. Nocte verò mediâ semper exurgebat Julianus, non è p umis vel stragulis sericis ambiguo fulgore nitentibus, sed ex tapete & pelle.

Iaudare solebat Attalus Philosophus culcitram quæ resisteret corpori. *Tali utor*, inquit Seneca, *etiam senex, in qua vestigium apparere non possit. Brevissimo quoque somno utor.*

3. Vir bonus, qualem ex præceptis Pythagoræ describit Aufonius Idyllio 8.

Non prius in dulcem declinat lumina somnum,

Omnia quàm longi reputaverit acta diei :

Ut pravis doleat, capiat vel gaudia justis.

Hunc morem secutus Cato Censorius, quid quoque die dixerat, audierat, egerat commemorabat vesperi.

Quotidie ad rationem reddendam vocandus est animus. Faciebat hoc Sextius, ut, consummato die, cùm se ad nocturnam quietem recepisset, interrogaret animum suum : *Quod hodie malum tuum sanasti ? Cui vitio obstitisti ? qua parte melior es ?* Quid pulchrius hac consuetudine excutiendi totum diem ? Utor, inquit Seneca, hac consuetudine, & quotidie apud me causam dico. Cùm sublatum è conspectu lumen est, & conticuit uxor moris mei conscia, totum diem mecum scrutor, facta ac dicta mea remetior, nihil mihi ipsi abscondo, nihil transeo. Hoc quoque Horatius à se factitari solitum narrat ipse.

Hoc nos pessimos facit, quòd nemo vitam suam respicit. Quid facturi simus, cogitamus, & id ratò : quid fecerimus, non cogitamus. Atqui consilium futuri ex preterito venit.

4. Turpis est, qui alto sole in lecto dormiens jacet, qui vigilare medio die incipit, qui officia lucis noctisque pervertit. Quanta illa in animo pravitas est, averfari diem, & magnam vitæ

partem in noctem transferre ! Istis lucifugis causa est ista vivendi , communis vitæ fastidium , & gravis male conscientiae lux Quomodo vestitu se à cæteris distinguunt , elegantiam cœnarum , munditiis vehiculorum , sic volunt etiam temporum dispositi ne distinguî. Omnes isti , ut ita dicam , retro vivunt Omnia vitia contra naturam pugnant. Tenenda nobis via est , quàm illa præscripsit , nec ab eâ declinandum.

## CAPUT XXII.

*Nemo ferè saltat sobrius , nisi fortè insanit.*

1. **C**UM Cato Murænam Consulem saltasse accusasset ; his verbis respondit ei Cicero in oratione quam habuit pro Muræna. Saltatorem appellat L. Murænam Cato. Si verè objicitur saltatio , maledictum est vehementis accusatoris : sin falsò , maledici conviciatoris. Quare cum istâ sis auctoritate , Marce Cato , non debes temerè Consulem populi Romani saltatorem vocare : sed conspiciere quibus præterea vitiis affectum esse necesse sit eum , cui verè istud objici possit. Nemo enim ferè saltat sobrius , nisi fortè insanit : neque in convivio moderato atque honesto. Intempestivi convivii multarumque deliciarum comes est extrema saltatio.

Domitianus Questorium virum , quòd gesticulandi saltandique studio teneretur , movit Senatu.

2. Apud Romanos matronæ saltationem non inhonestam putabant , quippe quâ inter sacra utebantur : eratque inter probas quoque saltandi cura , sed non usque ad artis perfectionem. Itaque Semproniam reprehendit Salustius , non quòd saltare , sed quòd optimè , sciret. Erat , inquit , docta psallere & saltare elegantius quàm necesse est probæ. Multaque alia inerant , quæ instrumenta luxuriæ sunt.

Scipio triumphale illud & militare corpus movit ad numeros : non molliter se infringens , ut mos est multis incessu ipso muliebre[m] molliem vincentibus ; sed ut illi viri antiqui , qui solebant inter lusum ac festa tempora virilem in modum tripudiare , nec facturi erant famæ detrimentum , etiamsi ab hostibus suis spectarentur.

---

## CAPUT XXIII.

*Musica magna vis in utramque partem.*

1. **C**ANTU , fidibus , tibiis uti licet , dummodo ea moderata sint. Assentior enim Platoni , nihil tam facile in animos teneros atque molles influere , quàm varios canendi sonos : quorum dici vix potest quanta sit vis in utramque partem. Namque & incitat languentes ; & languescit excitatos : & tum remittit animos , tum contrahit.

Civitatum in Græcia multarum mores lapsi ad molliem sunt & pariter immutati cum cantibus.

2. Claros quosdam sapientiâ viros nemo dubitaverit studiosos musices fuisse. Duces maximos & fidibus & tibiis cecinisse traditum est , & exercitus Lacedæmoniorum musicis ad prelium accensos fuisse modis. Apud Græcos ille mos fuit , ut in conviviis post cœnam circumferretur lyra : cujus cum se imperitum Themistocles confessus esset , habitus est indoctior. Veterum quoque Romanorum epulis fides ac tibia adhibere , fuit moris.

Musica natura ipsa videtur velut muneri nobis dedisse ad tolerandos facilius labores. Siquidem & remiges cantus excitat , & fatigatos quantumlibet rudis modulatio solatur.

Ut manifestum fiat , inquit Quintilianus , quæ mihi , & quatenus , musica placeat : apertè pro-

fitendum puto, non hanc à me probari & præcipi, quæ nunc in scenis effeminata quidquid in nobis roboris virilis manebat maximè excidit: sed eam quâ olim viri fortes virorum fortium laudes canebant.

3. Habent isti iners negotium, qui in componendis, discendis, audiendis canticis operam ponunt; qui vocem, cujus rectum cursum natura optimum fecit, inflectunt & torquent inertissimè: quorum, cum ad res serias, sæpè & tristes, adhibiti sunt, exauditur tacita modulatio.

Quum animis insit naturâ quædam discendi aviditas; ii culpâ non carent, qui circa vana occupantur, honestis atque utilibus præteritis. Præclare itaque Antisthenes, cum quidam prædicaret insignem tibicinem esse Ismeniam: *At*, inquit, *non magni animi; alioquin non sit tam insignis tibicen.* Et Philippus filio Alexandro, cum suaviter admodum & peritè in convivio cecinisset: *Non te pudet tam bene canere?* Sat enim est, si regi audire canentes vacet: & magnum Muis honorem habet, si alios de ejusmodi rerum gloria certantes spectet. Qui verò ultro humiles artes exercet, hic suam ad utilia atque honesta sectanda socordiam profert. Post opportunam patris castigationem Alexander leviolem musicæ operam dedit, & delectatus masculo cantu, molles modulationes, ut morum perniciem, est averfatus. Accersivit ad se Timotheum tibicinem, quem ferunt, cum primum artis suæ speciem Alexandro exhiberet, accommodatè ad illius ingenium & mores cecinisse, non mollibus & remissis modis, sed ita acribus & incitatis, ut statim Alexander ad arma rapienda exilierit.

Cum deinde Alexander in Asiam profectus, campos, ubi veteris Ilia sedes monstrabantur, peragraret; quodam ex incolis lyram Paridis offerente: *Quid*, inquit, *mihi mollium delicia-*  
rum



*rum vile instrumentum offers? Achillis lyram quero, quâ fortis facta virorum fortium canebat.*

4. Demaratus Lacedæmoniorum rex, earum artium contemtor quæ solummodo delinirent aures, nullam autem publicæ rei veram utilitatem afferrent, audito egregio cantore, id unum dixit: *Ne iste mihi videtur non malè nugari.* Sic Archidamus Lacedæmonius cuidam citharædum admiranti ac laudibus extollenti: *ô amice, inquit, quid honoris ac præmii abs te ferent viri boni, cum Citharædum tantopere laudes?*

Ægyptii musicam non solum inutilem, sed etiam noxiam, ducebant, tanquam virorum animos effeminantem.

5. Musicæ artis peritos mirari se dicebat Diogenes, qui lyræ chordas ita aptarent, ut suavis concentus existeret, animi verè affectus inconcinnos haberent.

Ut in fidibus ac tibiis, quamvis paulum discrepent, tamen id à sciente animadverti solet: sic videndum est in vita moribusque nostris ne fortè quid discrepet; atque etiam multo magis, quia melior actionum, quàm sonorum, concentus est.

## C A P U T . X X I V .

*Bonis moribus damnosum est desiderare in spectaculo.*

1. **N**IHIL est tam damnosum bonis moribus, quàm in aliquo spectaculo desiderare: tunc enim per voluptatem faciliùs viria subrepunt. Ego certè confiteor imbecillitatem meam: nunquam mores, quos domo extuli, refero: aliquid ex eo quod composueram, turbatur: aliquid ex his quæ fugaveram, redit. Quid multa? Avarior redeo, ambiciosior, luxuriosior, imò verò crudelior & inhumanior, quia inter homines fui.

Dixit Ovidius de feminis ad publica spectacula euntibus :

Speſtatum veniunt , veniunt ſpectentur ut ipſæ.

Ille locus caſti damna pudoris habet.

2. Comœdiam ac tragœdiam moribus plurimum nocere exiſtimavit Cicero. Nam , poſtquam retulit aliquos Cæciliï verſus de amore , exclamat : *O præclaram emendatricem vitæ poëticam ! De comœdia loquor , quæ , ſi ejuſmodi vitia non probaremus , nulla eſſet omnino.* Allatis quoque non paucis verſibus , quibus nobiles tragœdiarum ſcriptores Sophocles & Æſchylus Herculem & Prometheum intoleranter dolentes exhibuerunt , ſubjungit : Videsne poëtæ quid mali afferant ? Lamentantes inducunt fortiffimos viros : molliunt animos noſtros : ita ſunt deinde dulces , ut non audiantur modò & legantur , ſed etiam edifcantur. Sic ad malam domeſticam diſciplinam vitamque umbratilem & delicatam cum acceſſerunt etiam poëtæ , nervos omnes virtutis elidunt. Quas illi obducunt tenebras ? quos invehunt metus ? quas inflammant cupiditates ? Rectè igitur à Platone educuntur ex eacivitate , quàm finxit ille , cum mores optimos & optimum reipublicæ ſtatum exquiret.

3. Cum Theſpis egiſſet ipſe Athenis , ut mos fuit veterum , tragœdiam quam ſcripſerat , audiente Solone jam ſene ; peractâ fabulâ convenit hominem Solon , quæſivitque , an ipſum non punderet tot & talia proferre mendacia in tanta hominum coronâ ? Reſpondit Theſpis , nihil incommodi eſſe hæc ~~per~~ ludum fingere ac dicere. Tum indignatus Solon ; terrâ baculo graviter percuſſa : *Atqui , ſi hunc ludum probamus & amplectimur , eum brevi in paſſionibus cæteriſque negotiis noſtris reperiemus.*

Non deſunt inter Tragicos , qui affectibus noſtris facem ſubdant , qui divitias velut unicum

vitæ ornamentum laudent, qui lucro innocentiam & bonam famam postponant, qui turpes voluptates jactitent.

4. Omnes fabularum actores, histriones, mimos, è republica sua exulare voluerunt Lacedæmonii: ut cives neminem audirent qui vel seriò vel joco quicquam in leges publicas & salubriter institutam disciplinam jactaret. Callipides actor tragædiarum totâ Græciâ celeberrimus, occurrens aliquando regi Lacedæmoniorum Agefilao, primùm salutavit eum, deinde confidenter semet admiscuit iis qui regem comitabantur, futurum sperans, ut rex ipsum præ cæteris comiter exciperet, propter celebrantam, quâ sibi plurimùm placebat, artem comicam. Quòd cum pro spe non succederet; tandem: *Non agnoscis me*, inquit, *ô Rex?* Tum respiciens eum Agefilaus, id unum respondit: *An non tu es Callipides mimus.*

Romæ quoque, etsi comœdia ac tragœdia populo placebant, omne histrionum genus malè audiebat. Itaque Cicero Roscium Comœdum, pro quo orationem habuit, laudans, hæc de illo dixit: *Cum artifex ejusmodi sit Roscius, ut solus dignus videatur esse, qui in scena spectetur: vir ejusmodi est, ut solus dignus videatur esse, qui eò non accedat.*

Imperante Tiberio decretum est: ne domos pantomimorum Senator introiret, ne eos egredientes in publicum ullus Eques Romanus comitaretur: aut alibi quàm in theatro spectarentur. Quin etiam paulo post histriones omnes Româ atque Italiâ pulsi.

Massilia civitas, severitatis custos acerrima, nullum apud se aditum mimis dabat, ne turpia spectandi consuetudo etiam imitandi licentiam afferret.

## CAPUT XXV.

*Subducendus populo est tener animus.*

1. **Q**UID tibi vitandum præcipuè existimem , quæris ? turbam. Nondum enim illi te tuto commiseris. Inimica est multorum conversatio. Nemo non aliquod nobis vitium aut commendat , aut imprimit : & quò major est populus cui commiscemur , hòc periculi plus est. Subducendus populo est tener animus & parum tenax recti : facillè transitur ad plures. Hoc est salutare , non conservari dissimilibus & diversa cupientibus. Socrati , Catoni , Lælio excutere mentem suam dissimilis multitudo potuisset : adeo nemo eorum etiam , qui maximè concinnando ingenio dant operam , ferre potest imperum vitiorum tam magno comitatu venientium. Unum exemplum aut luxuriæ , aut avaritiæ , multum mali facit : convictor delicatus paulatim enervat & emollit : vicinus dives cupiditatem irritat : quid tu accidere his credis , in quos publicè factus est impetus ? Discede ergo à turba , quantum potes. Cum his versare qui te meliorem facturi sunt : illos admitte , quos tu potes facere meliores. Mutuò ista fiunt ; & hominem , dum docent , discunt.

2. Cum Charondas , multarum apud Thurios legum auctor , videret eos qui optimam naturam sortiti , & bonis artibus instituti essent , plerumque corrumpi propter junctam cum flagitiosis hominibus consuetudinem , & multa inde in rempublicam mala redundare : lege cavit , ne quis perditorum civium familiaritate uteretur ; gravemque mulctam ei imponi jussit , qui initæ cum improbis pravisque hominibus consuetudinis convictus esset.



## CAPUT XXVI.

*Est adolescentis majores natu vereri.*

I. OFFICIA non eadem disparibus ætatibus tribuuntur, aliaque sunt juvenum, alia seniorum.

Est adolescentis majores natu vereri: exque his deligere optimos atque probatissimos, quorum consilio atque auctoritate nitatur. Ineuntis enim ætatis inscientia constituenda & regenda est senum prudentiâ.

Ut adolescentibus bonâ indole præditis sapientes senes delectantur: leviorque fit senectus eorum qui à juventute coluntur & diliguntur: Sic probi adolescentes senum præceptis gaudent, quibus ad virtutum studia ducuntur.

Magna fuit quondam capitis reverentia cani.

Inque suo prætio ruga senilis erat.

Apud antiquos Romanos neque generi neque pecuniæ præstantior honos tribui solitus erat, quàm ætati. Majores natu à minoribus colebantur ad Deorum propè & parentum modum, atque in omni loco inque omni re priores potioresque habebantur.

Credebant hoc grande nefas & morte pian-  
dum,

Si juvenis vetulo non assurrexerat, & si

Barbato cuicumque puer: licet ipse videret

Plura domi fraga, & majores glandis acervos.

Et convivio quoque seniores à juvenibus domum deducebantur: eumque morem Romanos ferunt accepisse à Lacedæmoniis, apud quos Lycurgus maximum honorem non divitum & potentium, sed senum, esse voluerat. Itaque nusquam tantum tribuebatur ætati, nusquam erat senectus honoratior: & Lyfandrum Lace-



dæmonium dicere aiunt solitum: *Lacedæmonia esse honesti hominum domicilia senectutis.*

2. Quum Athenis quidam in theatrum grandis natu venisset, ad spectandos ludos; in magno confessu locus ei à suis civibus non est datus. Cùm autem ad Lacedæmonios accessisset, qui certo in loco, quia legati essent, confederant, consurrexere omnes, & sedem seni inter ipsos dederunt. Quod ubi fieri populus adspexit: multiplici plausu comprobavit. Tunc quidam ex illis legatis dixit: *Athenienses scire quæ recta essent, sed facere nolle.*

3. Legibus cautum erat apud Lacedæmonios, ut adolescentes non solum parentes suos reverentur, eisque obedirent; sed seniores quoque omnes colerent. Itaque de viâ illis decedebant, è sedibus assurgebant, & consistebant quieti ac verecundantes dum illi transirent.

Cuilibet seni non modò licebat juniores omnes monere & verbis castigare, verùm etiam proposita pœna erat hoc officium non præstanti: ita ut qui peccantem juvenem increpare neglexisset, perinde puniretur ac si ipse peccasset. Quin, id moris erat, ut juniores à senioribus sibi obviam factis interrogarentur, quònam, & cujus gratiâ, irent?

4. Solebant Romani adolescentes cupidi doctrinæ & gloriæ, ad clarum aliquem virum aut applicare ipsi se, aut à parentibus deduci, quo duce in studiis & in instituenda vita uterentur.

Facillimè & in optimam partem cognoscuntur adolescentes, qui se ad claros & sapientes viros bene consulentes reipublicæ contulerunt. Quibuscum si frequentes fuerint, opinionem afferunt populo, eorum fore se similes, quos sibi ipsi delegerint ad imitandum. Ego, inquit Cicero, à patre ita eram ductus ad Scævola, ut, quoad possem & liceret, à senis latere numquam discederem. Itaque multa ab eo prudenter dispu-

tata, multa etiam breviter & commodè dicta memoriæ mandabam, fierique studebam ejus prudentiâ doctior. Quo mortuo, me ad pontificem Scævola[m] contuli, quem unum nostræ civitatis & ingenio & justitiæ præstantissimum audeo dicere.

Cicero in oratione pro Cœlio, his verbis ejus adolescentiam laudat. Fuit M. Cœlii prima ætas, primùm ipsius pudore, deinde etiam patris diligentia disciplinæque, munita: qui ut filio virilem togam dedit, continuò hunc ad me deduxit. Nemo hunc M. Cœlium in illo ætatis flore vidit, nisi aut mecum, aut in M. Crassi castissima domo, cum artibus honestissimis erudiretur. Fuit assiduus mecum, Prætor me: à me nunquam recessit.

5. Erat antiquitus institutum, ut à majoribus natu non auribus modò, verùm etiam oculis, disceremus, quæ facienda essent. Inde adolescentuli statim in castris militaribus præceptis imbuebantur, ut imperare parendo, & duces agere sequendo alios assuescerent. Inde honores petitori assistebant curiæ foribus, & consilii publici spectatores, antequam consortes, erant. Suus cuique parens pro magistro, & cui non erat parens, maximus quisque & vetustissimus pro parente, erat. Quæ potestas magistratibus esset, quæ cæteris libertas; ubi redendum, ubi resistendum omnem denique Senatorium morem, exemplis quod optimum est præcipiendi gesus, dolescentes docebantur.

---

## CAPUT XXVII.

*Vir bonus aspectus & cogitatus emendat.*

**N**ULLA res animos in pravum inclinabiles magis revocat ad rectum, quàm bonorum con-

versatio. Viri boni frequenter auditi, frequenter aspecti, nobis multorum preceptorum instar sunt: occursum mehercule ipse sapientum iuvat: & est aliquid quod ex magno viro vel tacente proficias.

Speusippus sororis Platonis filius, adolescens omnis officii negligens, iracundus, & libidinosus, cum iustas parentum objurgationes pati non posset, ad Platonem avunculum venit: qui eum domo exceptum non verbo ullo, non facto, læsit: sed ipse se placidum, atque ab omni irâ & libidine vacuum quotidie exhibens, hanc arte magnum homini pudorem incussit, & cum illum in admirationem atque imitationem sui rapuit, tum ad Philosophiæ studium accendit. Platonem arguebant amicorum nonnulli, quod protervum & contumacem adolescentem non castigaret. Ego verò, inquebat, castigo, & quidem maxime, vitæ meæ ratione demonstrans ei diu noctuque, quod sit honestarum & turpium rerum discrimen.

Aliquis vir bonus nobis eligendus est, ac semper ante oculos habendus, ut sic, tanquam illo spectante, vivamus, & omnia, tanquam illo vidente, faciamus. Hunc nobis custodem, hunc pædagogum, datum putemus. Magna pars peccatorum tollitur, si peccaturis testis adsistat. Aliquem itaque habeat animus, quem vereatur, & qui non aspectus tantum, sed etiam cogitatus, emendet. O felicem, qui sic aliquem vereri potest! ipse citò erit verendus. Elige itaque Catonem. Si hic videtur tibi nimis rigidus, elige remissioris animi virum Lælium: elige eum cuius placuit tibi & vita & oratio, & ipsius animum ac vultum tibi præsentem fingens, illum semper tibi ostende vel custodem vel exemplum. Opus est, inquam, aliquo ad quem mores nostri exigantur. Nisi ad regulam, prava non corrigas.

## CAPUT XXVIII.

*Multa nobis aliorum iudicio & exemplo faciendâ  
aut corrigenda sunt.*

I. **A**DOLESCENTI optimum erit propter ætatis  
inscientiam in iis quæ dubitationem affe-  
rent adhibere doctos homines, vel usu peritos,  
& quid his placeat exquirere. Ut enim pictores  
& ii qui signa fabricantur, suum quisque opus à  
vulgo considerari vult, ut, si quid reprehensum  
sit à pluribus, id corrigatur: sic aliorum iudi-  
cio permulta nobis & faciendâ & non faciendâ,  
& mutandâ, & corrigenda sunt.

Ex vitio alterius sapiens emendat suum.

Omnia mihi studia excussit dolor, quem ex  
morte Junii Aviti gravissimum cepi. Ita me dili-  
gebat, verebatur, ut me formatore morum, me  
quasi magistro, uteretur. Rarum hoc adoles-  
centibus nostris. Nam quævisquisque vel ætati  
alterius vel auctoritati ut minor cedit? Statim  
sapiunt, statim sciunt omnia: neminem verentur,  
imitantur neminem, atque ipsi sibi exem-  
pla sunt. Sed non Avitus, cuius hæc præcipua  
prudentia, quod alios prudentiores arbitraba-  
tur: hæc præcipua eruditio, quod discere vo-  
lebat. Semper ille aut de studiis aliquid, aut  
de officiis vitæ consulebat. Semper ita recedebat,  
ut doctior aut melior factus.

Appelles pictor egregius, cum tabulam pinxe-  
rat, eam inspiciendam proponebat transeunti-  
bus, & post ipsam latens, vitia, quæ à quo-  
que notarentur, auscultabat: vulgi enim iudi-  
cium sæpe præferebat suo. Is aliquando à futuro  
reprehensus in crepidis pictæ imaginis, statim  
quod peccatum fuerat emendavit. At eodem su-  
tore superbè propter priorem admonitionem ca-



villante circa crus imaginis die postero , indignatus Appelles prospexit , denunciavitque , *ne sutor supra crepidam judicaret*. Quod deinde in proverbium venit.

2. Quid aptè sit , quid à natura officioque discrepet , facile & commodum est judicare ex aliis : ut , si quid dedeceat alios , vitemus & ipsi. Fit enim nescio quo modo , ut magis in aliis cernamus , quàm in nobismetipsis , si quid delinquitur. Itaque ii facillimè corriguntur in dicendo , quorum vitia imitantur , emendandi causâ , magis stri.

Peras imposuit Jupiter nobis duas :

Propriis repletam vitiis post tergum dedit :  
Alienis ante pectus suspendit gravem.

Hac re videre mala nostra non possumus ;  
Alii simul delinquant , censores sumus.

Aliena vitia in oculis habemus : à tergo nostra sunt.

Erat inter discipulos Zenonis adolescens quidam mirè edax , qui in convivio nihil ferè obsoniorum sodalibus soleret relinquere. Huic appositum aliquando in mensa ingenem piscem sustulit Zeno , quasi eum ipse esset solus devoraturus. Cùm verò vorax adolescens in eum intueretur mirans atque indignabundus : *Quid ergo ?* ait Zeno : *num socios edacitatem tuam quotidie æquo animo ferre vis , qui hodie non fers meam ?*

## C A P U T   X X I X.

*Adolescentia in labore & patientia est exercenda.*

1. **A**DOLESCENTIA maximè à libinibus arcenda est , exercendaque in labore , & patientiâ tum animi tum corporis , ut ejus in bellicis & civilibus officiis vigeat industria. Itaque illi , qui Græciæ formam Rerum publicarum dede-



runt, corpora juvenum firmari labore voluerunt.

Cum animadverteret Lycurgus adolescentes plerumque ad injuriam faciendam proclives esse, & cupiditatibus voluptatum vehementibus urgeri; Lacedæmonios juvenes laboribus exerceri voluit venando, currendo, esuriendo, sitiendo, algendo, æstuando; interminatus, omnem ad honores & imperia aditum occlusum iri ei qui constituta legibus exercitia refugeret. Ut autem assuescerent non labori per reliquam vitam cedere, non hosti; in quotidianis inter ipsos exercitationibus & certaminibus res omnino serio agebatur, & ad mortem usque victoriæ instabant. Imò ad aram Dianæ certabant inter se pueri ipsi de verberum tolerantia, & qui plura pertulisset, maximam inde gloriam consequabatur. Spartæ, inquit Cicero, pueri ad aram Dianæ sic verberibus accipiuntur, ut multus sanguis exeat: nonnumquam etiam, ut, quum ibi essem, audiebam, ad necem. Quorum non modò nemo exclamavit unquam, sed ne ingemit quidem. Quinetiam in virgines, quæ cæteris in urbibus mollissimo cultu, parietum umbris occultæ, educantur, laboriosas exercitationes transtulerunt Spartiatæ: iisque palæstra, cursus, sol, pulvis, studio est. Impelluntur, feriuntur, cadunt: & ipse labor quasi callum quoddam obducit dolori.

Præter doloris ac laboris tolerantiam, hoc maximè edocebantur adolescentes Lacedæmonii, imperium pati, non magistratum solum, parentum, magistrorum, sed etiam quorumvis ætate majorum. Existimaverat quippe Lycurgus satius esse reipublicæ habere cives ad parendum bene institutos & promptos, quàm magistratus ad imperandum idoneos. Hincque Theopompus, quodam dicente Spartam incolumen stare, quia reges scirent imperare: Imò, inquit, quia cives parere. Fecit quippe instituta Lycurgi legibus

disciplina, ut reges propterea parentiores habuerint exercitus & fortiores.

2. Persarum liberi, quos veritati maximè & justitiæ studuisse diximus, ad temperantiam quoque libidinum domitricem instituebantur. Propterea non domi apud matres alebantur, sed apud præceptorem in scholis publicis, ad quas summo mane venientes quotidie, afferebant pro cibo panem, pro obsonio nasturtium, & aquæ è proximo flumine hauriendæ causâ, poculum. Accedebat multiplex corporis exercitatio, & severa magistris parendi disciplina: ad quam obedientiam maximè excitabantur tum adolescentum, tum senum exemplo, quos magistratibus impigrè obsequi cernerent. Postquàm è pueris excefferant, per decennium diu noctu permanebant in quodam foro, quod Liberale vocabatur; cibum ibi & somnum capientes, urbis custodiendæ & colendæ temperantiæ causâ. Quanto enim ad vitia proclivior proniorque adolescentia est, eo majore curâ & diligentia eam esse instituendam censebant Persæ. Non dabatur huc & illuc discurrendi licentia: & raro à magistris discedebant, nisi venationis causâ: Regem enim tum dimidia adolescentum pars sequebatur, eadem in prandium ferens cibaria & obsonia, quæ pueris dabantur: nec ante venationem perantam licebat prandere. Cui abstinentiæ assuescebant, ut in bello, si quando res cogeret, incediam perpeti possent.

3. Jugurthæ regis adolescentiam sic describit Sallustius: Ubi primum adolevit Jugurtha; pol-lens viribus, decorâ facie, ingenio validus, non se luxui neque inertiae corrumpendum dedit: sed equitare, jaculari, cursu cum æqualibus contendere: & cum omnes gloriâ anteire, omnibus tamen carus esse. Plurimum facere, & minimum ipse de se loqui.

Publius Scipio Æmilianus à tenera ætate græcis

cis litteris apprime imbutus , ut primum licuit , se Polybio ad optima quæque erudiendum tradidit. Cujus è congressu & contubernio , quod rebus omnibus anteferebat , tantos fructus tulit , ut non modò æquales suos , sed etiam majores natu , omni virtutum genere superaret. Temperantiæ & continentię laudem , prout ætati conveniebat , ante omnia comparare studuit. Quod quidem valdè difficile tunc erat : mirum enim est , quo impetu ad fœdas libidines & epulas juvenes eo tempore ferrentur. Quippe bello Persico diutius tracto , Græcorum in eo genere mollitiem celeriter hauserant Romani , & maximarum divitiarum compotes facti , habebant affatim unde luxuriam suam alarent atque exple-  
rent. At Scipio contrarium vitæ institutum secutus , & cum omnibus cupiditatibus , tanquam cum teterrimis belluis , colluctatus , intra quinquennium publicam modestiæ ac continentię laudem est adeptus. Hæc autem voluptatum abstinentia optimam ei valetudinem corporis attulit , quâ per totum vitæ spatium usus , amplissimam temperantiæ suæ mercedem percepit. Ad studium pudoris , cuius præcipua ei cura fuerat , accessit venandi exercitatio , quæ bellicæ fortitudinis quædam esse disciplina videbatur.

4. Draco Atheniensis , vir insignis integritate vitæ , & juris divini atque humani peritus , tulit Athenis multas leges : quas , quia acerbiores erant , dicebat Demades videri scriptas fuisse sanguine potius quàm atramento. Una ex illis legibus capitali supplicio plecti eum jubebat , qui convictus fuisset desidiæ.

Amasis quoque Ægyptiorum rex lege sanxerat , ut singulis annis accederent ad provinciarum præfectos : quibus quisquis probare non poterat se profiteri artem aliquam certam & honestam unde viveret , tanquam perniciosus humanæ societati civis , morte afficiebatur.

Lucani publica iudicia instituerant non desidæ solum, sed etiam luxuriæ. Quin & si quis his vitis infecto mutuam pecuniam dedisset, eâ pecuniâ multabatur.

## C A P U T X X X.

*Plura audiamus, loquantur pauca.*

1. **H**ÆC Pythagoræ in recipiendis instituendis-  
que discipulis ratio fuisse traditur. Adolescentium, qui se ad discendum obtulerant, mores naturamque conabatur pernoscere ex oris totiusque corporis habitu. Tum eos, qui explorati ab eo & idonei habitû fuerant, recipiebat in disciplinam, & jubebat tempus certum tacere, non omnes idem, sed alios aliud, pro æstimato captu solertiæ. Quinquennale ut plurimum erat silentium; neque quisquàm minus, quàm biennium, tacere solitus. Ubi res didicerant, rerum omnium, ut quidam putant, difficillimas, ut alii, facillimas, tacere audirequæ: tum potestas erat verba facere, & quærere, quæque audissent scribere, & quæ ipsi opinarentur, expromere.

Erat audiendi studiosus Epaminondas, ex hoc enim facillimè disci arbitrabatur. Itaque cum in circulum venisset, in quo aut de republica disputaretur, aut de Philosophia sermo haberetur; nunquam inde prius discessit, quàm ad finem sermo esset perductus.

2. Apud Persas lingua castigabatur gravius, quàm quodvis probrum: nec magnam rem sustineri posse credebant ab eo, cui tacere grave esset: quod homini facillimum voluerat esse natura. Regum arcana mirâ fide celabant: non spes, non metus, eliciebat vocem, quâ proderentur occulta.



Sic & Hispani sæpe tormentis pro servando rerum creditarum silentio immortui : adeo fortior illis taciturnitatis cura, quàm vitæ.

Pompeii cujusdam, Romani viri, virtus laudatur ; qui, dum legationis officio fungeretur, à Gentio Illyriorum rege interceptus, & Senatus consilia prodere jussus, ardenti lucernæ admotum digitum cremandum præbuit, eâque patientiâ regi simul & spem tormentis quicquam ex se cognoscendi abstulit, & expetendæ populi Romani amicitiae magnam cupiditatem iniecit.

3. Zeno inepta & nihil ad rem loquenti adolescentulo : *Idcirco*, inquit, *aures habemus duas, & os unum, ut plura audiamus, loquamur pauca.* Idem, interrogantibus eum legatis regis Ptolemæi, quid de se renunciari regi vellet : *Senem*, inquit, *renunciate à vobis conspectum Athenis, qui inter pocula fervere silentium sciat.*

Xenocratis Philosophi responsum quam laudabile ! Cum maledico sermoni quorundum hominum interesset, ac taceret, uno ex his quærente, cur solus ita linguam cohiberet : *Quia locutum fuisse me, inquit, aliquando pœnituit ; tacuisse, nunquam.*

Q. Cæcilius Metellus Macedonicus amico cuidam interroganti quid esset acturus ? *Tunicam*, inquit, *meam exurerem, si eam consilium meum scire existimarem.*

Antigonus, Philippo filio multis præsentibus quærente quando castra moturus esset : *Ecquid*, inquit, *times, ne solus tubam non audias ?*

Alium filere quod voles, primus file.

4. Sermo, qui in circulis, disputationibus, congressionibus familiarium, conviviiis versatur, sit lenis minimèque pertinax. Nec verò, tanquam in possessionem nostram venerimus, excludamus alios ; sed cum reliquis in rebus, tum in sermone communi, vicissitudinem non iniquam putemus. Videamus quibus de rebus sit ser-



mo. Si feriis, severitatem adhibeamus; si jocos, leporem. Sed quomodo rectissime præcipitur, ut in omni vita motus animi nimios rationi non obtemperantes fugiamus: sic ejusmodi motibus sermo debet vacare, ne aut ira existat, aut cupiditas aliqua, aut tale aliquid appareat. Profert enim mores plerumque oratio, & animi secreta delegit. Nec sine causa Græci prodiderunt, quemque ita dicere, ut vivat. Maxime verò curandum, ut eos quibuscum sermonem conferimus, & vereri & diligere videamus.

Habentur plerumque sermones aut de domesticis negotiis, aut de republica, aut de artium studiis atque doctrina. Danda igitur opera est, ut, si aberrare ad alia cœperit, ad hæc revocetur, oratio: sed utrumque aderunt res. Neque enim omnes iisdem rebus, nec omni tempore, nec similiter delectamur.

Cùm aliquid obscœnum coram te dictum fuerit: aut, si opportunitas feret, eum objurgabis, qui sermonem illum injecerit, aut silentio saltem, rubore, tristi vultu ostendes eam rationem tibi displicuisse.

## C A P U T X X X I.

*Adolescentiam ludis intersint majores natu.*

1. **N**ON in eadem intentione semper retinenda mens, sed ad lusus & jocos revocanda. Socrates deprehensus ab Alcibiade ludens cum filio infante, non erubuit. Agesilaus arundini insidens equitabat cum filio puero: & quum quidam eum derisisset: *Nunc*, inquit, *tace*: *cùm verò & ipse pater fueris, tunc rem narrabis*. Cæsar Augustus animi laxandi causâ, modò piscabatur hamo, modò talis nucibusque ludebat cùm pueris minutis, quos facie & garrulitate

amabiles undique conquirebat. Domitianus inter initia principatus quotidie secretum sibi per horam unam sumere solebat, & interini muscas captare, ac stylo præacuto configere: ita ut cuidam interroganti, essetne quis intus cum Cæsare, non absurdè responsum sit à Vibio Crispo: *Ne musca quidem.*

Lælium ferunt cum Scipione sæpe rusticatum, eosque incredibiliter repurascere esse solitos, cum es ex urbe, tanquam à vinculis, evolavissent. Vix audeo dicere de tantis viris, sed ita narratur: conchas eos ad Caietam & ad Laurentum legere consueisse, & ad omnem animi remissionem ludumque descendere. Scilicet quemadmodum volucres videmus fingere & construere nidos, easdem autem, cum aliquid effecerint, levandi laboris sui causâ, passim ac liberè volitare: sic nostri animi, negotiis & opere defessi, volitare quodammodo cupiunt.

2. Amasim Ægyptiorum regem cum admone-  
rent amici, eum parum è regia dignitate facere,  
quod inter epulas jocaretur: *Qui, inquit, arcum  
habent, eum cum est opus, intendunt, mox re-  
mittunt: si enim perpetuò intentus sit, frangatur  
necessè est, ita ut eo amplius uti non possint. Ea-  
dem est hominis ratio. Si assiduè seria tractare, &  
nihil sibi ad lulum indulgere velit: sensim mem-  
bris aut animo captus fiet.*

Puerorum in turba quidam ludentem Atticus  
Æsopum nucibus quum vidisset, restitit,  
Et quasi delirum risit. Quod simul sensit  
Derisor potius quàm deridendus senex,  
Arcum retensum posuit in media via:  
*Heus, inquit, sapiens, expedi quid fecerim.*  
Concurrit populus: ille se torquet diu,  
Nec quæstionis positiæ causam intelligit,  
Novissimè succumbit. Tum victor Sophus:  
*Citò rumpes arcum, semper si tensum habueris;  
At si laxaris, cum veles, erit utilis.*

Sic lusus animo debent aliquando dari,  
Ad cogitandum melior ut redeat tibi.

Danda est remissio animis: meliores acrioresque erunt post quietem. Ut agris non est imperandum singulis annis frumentum, citò enim exhauriet illos nunquàm intermissa fœcunditas: ita animorum impetum assiduus labor frangit.

3. Naturalem quandam voluptatem habent lusus jocusque. At eorum frequens usus omne animis pondus omnemque vim eripiet. Sic somnus refectiōni corporis necessarius est: hunc tamen si per diem noctemque continues, mors erit. Itaque subinde tantum indulgendum est animo, & dandum otium, quod ei alimenti ac virium loco sit.

4. Cùm adolescentes relaxare animos, & dare se jucunditati volent, caveant intemperantiam, meminerint verecundiæ, sine qua nihil rectum esse potest, nihil honestum. Quod erit facilius, si in ejus modi quidem rebus majores natu interesse velint. Ipsa quippe seniorum, sicut & magistratum, præsentia, verum pudorem & liberalem timorem animis solet infundere.

Proderit sine dubio, custodem tibi imposuisse & habere quem respicias. Cùm jam profeceris tantum, ut sit tibi etiam tui reverentia, licebit dimittas pædagogum: interim te aliquorum auctoritate custodi.

Verba quis auderet, coram sene, digna pudore,

Dicere?

Hinc Persæ qui in liberorum institutione plurimum studii ac diligentiae ponebant, lectos è senioribus viros iis præficiebant: & Lacedæmonii omnibus suorum ludis majores natu volebant interesse.

## CAPUT XXXII.

*In ludo ac joco modus retinendus.*

I. INTERROGATUS Socrates quænam juvenum virtus esset, respondit: *Ne quid nimis.*

Ludendi est quidam modus retinendus, ne nimis omnia profundamus, elatique voluptate in aliquam turpitudinem delabamur.

Appetitus omnes contrahendi sedandique sunt: & excitanda animadversio ac diligentia, ut nihil temerè inconsideratèque agamus. Neque enim ita generati à natura sumus, ut ad ludum & jocum facti esse videamur: sed ad severitatem potius, & ad studia quædam graviora atque majora.

Ludo & joco uti quidem licet: sed sicut somno & quietibus cæteris, cum gravibus seriisque rebus satisfecerimus.

2. Ipsum genus jocandi non profusum nec immodestum, sed ingenuum & facetum, esse debet. Ut enim pueris non omnem ludendi licentiam damus, sed eam quæ ab honestis actionibus non sit aliena: sic in ipso joco aliquod probi ingeni lumen eluceat.

Duplex omnino est jocandi genus: unum illiberale, petulans, flagitiosum, obscœnum: alterum elegans, urbanum, ingeniosum, facetum. Quo genere philosophorum Socraticorum libri referri sunt: multaque multorum tum Græcorum, tum Romanorum sunt facetè dicta.

Facilis est distinctio ingenui & illiberalis joci. Alter est libero dignus: alter, ne homine quidem, si rerum turpitudini adhibeatur verborum obscœnitas.

Perfæ quæcumque factu turpia erant, eadem & dictu turpia censebant. Itaque nihil dicere licebat, quod non facere fas esset.

Quod facere turpe est , dicere ne honestum  
puta.

3. Jocis tanquam sale , parcè utendum.

Vitandum est ne scurrilis jocus sit aut mi-  
micus.

Lædere nunquam velimus , longèque absit  
propositum illud , potius amicum , quàm dictum ,  
perdere.

Adversus miseros inhumanus est jocus.

Ea quæ dicit vir bonus , salvâ dignitate & ve-  
recundiâ decent : nimium enim risûs præmium  
est , si probitatis impendio constant.

Oratori longè recedendum est ab omni obscœ-  
nitate & verborum & sensuum.

Quædam satius est cum causæ detrimento ta-  
cere , quàm cum verecundiæ dicere.

## C A P U T   X X X I I I .

*Est cui magnò constitit dictærium.*

1. **C**UM Romæ medio foro quidam mortuus  
effleretur ; accessit ad eum scurra , & , in  
aurem quiddam insusurravit. Interrogatus ab iis  
qui aderant , quidnam dixisset ? *Mandasse* , res-  
pondit , ut *Augusto* nunciaret , nihil eorum ,  
quæ moriens plebi legaverat , solutum esse à *Tibe-  
rio*. Re auditâ , *Tiberius* accersitum scurram suâ  
legatorum parte donavit , & duci ad supplicium  
jussit , ut ipse *Augusto* verum nuncium ferret.

Longè alio in dicaces animo antea fuerat *Ti-  
berius*. Nam adversus convicia , malosque ru-  
mores , & famosa de se ac suis carmina , firmus  
ac patiens , subinde jactabat : *In civitate libera*  
*linguam mentemque liberos esse oportere*. Et ali-  
quando Senatu cognitionem de ejusmodi crimi-  
nibus ac reis flagitante : *Non tantum* , inquit ,  
*otii habemus* , ut implicare nos ejusmodi negotiis



*debeamus. Si quis temere aliquid locutus fuerit, dabo operam ut rationem factorum meorum dictorumque reddam.*

2. Cùm Theocritus Chius duceretur ad Antigonom regem quem offenderat, eumque solarentur amici, ac spem facerent fore ut regis clementiam experiretur, ubi ob ejus oculos venisset: *Omnem ergo, inquit, mihi spem salutis eripicis.* Erat enim Antigonus uno orbatus oculo. Audito amaro intempestivoque joco, Rex qui antea se Theocrito gratiam delicti facturum dixerat, hominem luce privavit.

3. Thacus Ægyptiorum rex, factus ex rege privatus, quod Agesilaum Lacedæmoniorum regem dicto falso & amaro vellicasset, quo tempore ad se venerat belli adjutor futurus. Quoniam enim Agesilaus brevi corporis staturâ erat, hoc ex Æsopi fabulis memoravit Thacus?

Mons paturibat, gemitus immanes ciens,  
Eratque in terris maxima expectatio:

At ille murem peperit.

Quæ cùm audisset Agesilaus; ira percitus: *videbor, inquit, tibi aliquando etiam leo.* Postea regno spoliatus Thacus ad Persas fugere coactus est.

Scipionem Nasicam, cùm ædilitatem peteret, repulsam passum esse suprâ retulimus, quod civem, cujus manus erant rustico labore duratæ, interrogasset: *An manibus solitus esset ambulare?*

Plerùmque stulti risum dum captant levem,  
Gravi distringunt alios contumeliâ,  
Et sibi nocivum concitant periculum.

## C A P U T X X X I V.

*Facetè dicta aut facta.*

1. CUM ad poëtam Ennium venisset Nascica, ei que à foribus quærenti Ennium ancilla

dixisset, domi non esse; Nasica sensit illam domini iussu ita repondisse, & eum intus esse. Paucis post diebus cum ad Nasicam venisset Ennius, & illum à janua quæreret: exclamat Nasica, *se domi non esse*. Tum Ennius: *Quid? ego non agnosco vocem, inquit, tuam?* Hic Nasica: *Homo es impudens: ego, cum te quærerem, ancillæ tuæ credidi, te domi non esse, tu mihi non credis ipsi?*

Siculus quidam, cui Prætor Scipio patrenum causæ dabat hominem nobilem, se admodum stultum: *Quæso, inquit, Prætor, adversario meo da istum patronum: deinde mihi neminem dederis?*

Patrono malo, qui vocem in dicendo obtuderat, suadebat Granius, ut mulsum frigidum biberet, simul ac domum rediisset: *perdam, inquit, vocem si id fecero. Melius est, respondit Granius, quam reum.*

Crassum, cum causam oraret, Lucio Helvio Lamiâ, homine deformi, odiosè interpellante: *Audiamus, inquit Crassus, pulcellum puerum. Cum esset arrisum: Non potui, inquit Lamia, mihi formam ipse fingere, ingenium potui. Tum hic. Audiamus, inquit, disertum. Multo etiam arrisum est vehementius.*

2. Cum Orator malus in epilogo misericordiam se movisse putaret; rogavit Catulum, videreturne misericordiam movisse! *Ac magnam quidem, inquit Catulus: neminem enim puto esse tam durum, cui non oratio tua miseranda visa sit.*

Poematibus scribendis operam dabat Siciliæ tyrannus Dionisius: & (quoniam in hoc genere, magis quàm in aliis, suum cuique pulchrum est, vixque ullus reperitur poëta, qui sibi non optimus videatur) magis ob carmina, quàm propter res bello bene gestas se se jactabat. Accersierat ad se, & præcipuo in honore habebat, quoscumque usquam arte poeticâ no-

biles esse audierat, eorumque judiciis poemata sua permittebat. At illi, ne regis benevolentiam & munera amitterent, quæ scribebat omnia probabant ac laudabant. Aderat inter eos Philoxenus, celeberrimus dithyramborum versuum artifex; qui unus adulari nescius, cum aliquando inepta à Dionisio recitata carmina audivisset, de iis quid sentiret liberè aperuit. Quà libertate offensus Rex poëta, reprehensorem suum a satellitibus abripi & in latomias, qui publicus carcer erat, detrudi iussit. Sed postridie ab amicis Philoxeno veniam dari postulanti-  
bus, exoratus, rursus ad epulas cum adhibuit. Carmina sua, ut solebat, ipse mirum in modum extulit; & de quibusdam versibus, quos omnium optimos existimabat sententiam Philoxeni exquisivit. Ille, nullâ ad regis interrogationem responsione factâ, ejus satellites vocavit, seque ad latonias reduci iussit. Tam facetam libertatem, quæ omnium convivarum risu excepta fuerat, æquo animo tulit Dionysius.

Non multo post admonitus oratusque ab amicis Philoxenus, ut à tam apertâ loquendi licentiâ tandem abstineret, pollicitus est se deinceps effecturum, ut & vera diceret, & Dionysii benevolentiam tamen retineret. Nec sanè refellit. Nam cum deinde tyrannus, quibusdam versibus, qui miserabiles affectus exprimerent, recitatis, illum interrogasset, qualos hi tandem viderentur? *Miserabiles*: respondit. Quâ verbi ambiguitate præstitit quod erat pollicitus. Rex enim ita accepit, quasi Philoxenus versus suos ad movendam commiserationem idoneos esse respondisset, atque adeo illos laudasset: alii verò sic interpretabantur (quæ erat vera dicterii sententia), quasi miseros: hoc est, pessimos, dixisset versus illos.

4. Lucersam accensam circumferens Diogenes, ambulabat in foro clarissimâ luce, quæ

renti similis. Rogantibus quid ageret, *hominem*, inquit, *quæro*: notans publicos civitatis mores, in qua vix quisquàm dignus esset hominis nomine.

Animadvertens quendam imperitè jaculantem, proximè scopum confedit: & cum ex eo quæreretur, cur id faceret: *ne fortè*, inquit, *ille me feriat*.

Ad Antisthenem, quem ferre molestius morbi dolores audierat, accessit cum fica: & cum ei dixisset Antisthenes: *Quis me hisce doloribus liberabit?* Ille, ostensâ ficâ: *Hæc*, ait. Cui Antisthenes: *Doloribus*, inquit, *dixi, non viâ*.

4. Prætor Prænestinus per timorem segniùs suos in prælium duxerat. Victis hostibus, eum quum Papirius Cursor Consul inambulans ante tentorium vocari jussisset, lictorem expedire securim jussit. Ad quam vocem exanimi stante Prænestino: *Agedum liCTOR*, inquit, *excide radicem hanc incommodam ambulantis*. Perfusumque ultimi supplicii metu dimisit.

Augustus penè nulli se invitanti negabat. Exceptus igitur à quodam cœnâ satis parcâ & penè quotidianâ, hoc tantùm insusurravit: *Non putabam me tibi tam familiarem*.

Iliensibus paulò seriùs Tiberium consolantibus de morte filii Drusi: *Se quoque*, respondit, *vicem eorum dolere, quod egregium civem Hectorem amississent*. Effluxerant autem tum plus quàm mille anni à morte Hectoris.

5. Cum Ciceroni in accusatione Verris aliquid obscuriùs locuto dixisset patronus Verris Hortensius. *Non intelligo hæc ænigmata*. Atqui debes, inquit Cicero, cum *Sphingem domi habeas*. Acceperat enim Hortensius à Verre Sphingem æneam magni pretii.

Maximo Consule mortuo die Decembris ultimo, Cæsar consulem horâ septimâ in reliquam partem diei renunciaverat Caninium. Quem cum plerique irent salutaturo de more: *Festinus*, inquit

inquit Cicero, priusquam abeat magistratu. De eodem Caninio scripsit Cicero : *Fuit mirificâ vigilantia Caninius, qui suo toto Consulatu somnum non viderit.*

Quidam adolescens, quem fama erat patri venenum dedisse in placenta, agebat ferocius, & Ciceroni probra ac maledicta minabatur? Cui Cicero : *Hoc, inquit, malo à te, quam placentam.*

Fabiæ Dolabellæ triginta se annos habere dicenti : *Verum est, inquit Cicero, nam hoc jam viginti annos audio.*

5. Cùm partâ Aëtiacâ victoriâ Romam ingrederetur Augustus; occurrit ei inter gratulantes opifex quidam, corvum tenens, quem instituerat hæc dicere : *Ave Cæsar, victor imperator.* Miratus Cæsar officiosam avem, viginti millibus nummorum emit. Socius opificis, ad quem nihil ex illa liberalitate pervenerat, affirmavit Cæsari habere illum & alium corvum, quem afferri postulavit. Allatus corvus verba quæ didicerat expressit : *Ave victor, imperator, Antoni.* Nihil propterea exasperatus Augustus, satis duxit jubere corvorum doctorem dividere acceptum munus cum contubernali. Salutatur similiter à psittaco, emi eum iussit. Idem miratus in pica, illam quoque mercatus est. Exemplum pauperem suturem sollicitavit, ut corvum institueret ad parem salutationem : sed cùm parùm proficeret, sæpe ad avem non respondentem dicere solebat : *Opera & impensa periit.* Tandem tamen corvus cæpit dicere dictatam salutationem. Hâc auditâ, dum transit Augustus, respondit : *Satis domi salutatorum talium habeo.* Tum corvus illa verba, quibus dominum querentem solebat audire, subrexit : *Opera & impensa periit.* Ad quod Cæsar risit, emique avem iussit quanti nullam adhuc emerat.

Solebat Græculus quidam descendenti è pala-



tio Cæsari Augusto honorificum aliquod epigramma porrigere. Id cum frustra sæpè fecisset, & tamen rursum eum idem facturum vidisset Augustus; breve sua manu in charta exaravit Græcum epigramma, & Græculo venienti ad se obviam misit. Ille legendo laudare, mirarique tam voce quàm vultu gestuque. Deinde cum accessisset ad sellam, quâ Cæsar vehebatur, demissâ in pauperem crumenam manu, paucos denarios protulit, quos principi daret, dixitque: *Se plus daturum fuisse, si plus habuisset.* Secuto omnium risu, dispensatorem Cæsar vocavit, & satis grandem pecuniæ summam numerari Græculo iussit.

7. Cum M. Pomponius Marcellus ex oratione Tiberii aliquid reprehendisset quasi minimè Latinum, affirmaretque contra Atæius Capito & esse illud Latinum, &, si non esset, futurum: *Certè mentitur Capito*, inquit Pomponius, *tu enim, Cæsar, civitatem dare potes hominibus, verbis non potes.*

Cum Favorini, viri Græcæ ac Latinæ linguæ peritissimi, verbum quoddam ab Adriano Imperatore reprehensum esset, atque ille cessasset: arguentibus eum amicis, quòd malè cederet Adriano de verbo quod idonei auctores usurpassent: *Non rectè suadetis*, inquit jocans Favorinus, *qui non patimini me illum doctiorem omnibus credere qui habet triginta legiones.*

8. Cum inter duos scelestos iudex esset Philippus Macedoniæ rex; auditâ causâ, pronuntiavit: *Ut alter è Macedonia fugeret, alter illum insequeretur.* Hoc faceto iudicio utrumque exulem esse iussit.

Deridenda erat, & sane derisui ab eodem Philippo habita est, Menecratis medici inanis superbia. Ille Syracusanus fuit: qui quia comitialibus morbis medebatur, in eam arrogantiam est prolapsus, ut ipse se Jovem diceret. Hanc

autem ab iis, quos curabat, mercedem pacificabatur, ut se per urbes Græciæ euntem comitarentur, minorum Deorum nomina & ornatum gerentes. Misit aliquando ad Philippum litteras, quibus erat hæc præfixa salutatio: *Menecrates Jupiter Philippo felicitatem*: Ad ea Philippus rescripsit: *Philippus Menecrati sanitatem. Suadeo tibi ut Anticyram te conferas*, In urbe autem Anticyra vel optimum nascebatur, vel optimè temperabatur, helleborum, quo cerebrum purgabatur. Cùm in Macedoniam ad Philippum venisset, lautissimum & strui convivium rex iussit, & novo Jovi ad epulas vocato lectum seorsim pascari, tum pro cibo acerram apponi. Ita suffitus ei fiebat, dum cæteri convivæ exquisitis vescerentur cibis. Gaudere primum Menecrates tali honore. At ubi obrepente sensim fame nihil escæ apponebatur esurienti, seque solo odore thuris à rege pasci tandem intellexit, jejunos & irrisus discessit.

## CAPUT XXXV.

*Excitatur laude æmulatio.*

I. CUM Quintilianus expendit ut illiusne sit pueros domi atque intra privatos parietes continere, an frequentiæ scholarum & publicis præceptoribus tradere; inter alia publicæ institutionis commoda hoc præcipuum prædicat, quod in schola audiet puer multa quotidie probari, multa corrigi: proderit alicujus oburgata desidia, proderit laudata industria: excitabitur laude æmulatio: turpe ducet cedere pari, pulchrum superasse majores. Accendunt hæc omnia animos: & licet ipsa vitium sit ambitio, frequenter tamen causa virtutum est

Honestum per se ipse expetendum indicant

pueri, in quibus, ut in speculis, natura cernitur Quanta studia decertantium sunt? Quanta ipsa certamina! Ut illi efferuntur lætitia, cum vicerunt! Ut pudet victos! Ut se accusari nolunt! Ut cupiunt laudari! Quos illi labores non perferunt, ut æqualium principes sint!

Utile est habere quos imitari primum, mox vincere velis.

2. Noctu ambulabat in publico Themistocles, quod somnum capere non posset, & causam quærentibus respondebat, *Miltiadis tropæis se à somno suscitari.*

Cui non sunt auditæ Demostenis vigilæ? Qui dolore se aiebat, si quando opificum antelucana victus esset industriâ.

Aristoteles vir summo ingenio, mirâ scientiæ copiâ, cum motus esset Isocratis Rhetoris gloriâ, dicere etiam cœpit, adolescentes docere, & eloquentiam conjungere cum Philosophia, ad quam Xenocratis quoque exemplo inconfusus accesserat.

3. Alexander paternæ laudis æmulator, cum eum urbem aliquam nobilem expugnasse, aut insigni victoriâ potitum esse, acciperet, adeo non ejusmodi nunciis lætabatur, ut inter æquales exclamaret: *O amici, omnia nobis præripiet pater, ne quidquam magnificum gerendum relinquet!* Achillis quoque, à quo se originem ducere prædicabat fortitudinem & gloriam ab Homero carminibus celebratam æmulatus, cum ad ejus tumulum in Sigæo adstitisset? *O fortunate, inquit, adolescens, qui tuæ virtutis Homerum præconem inveneris.* Et verè: nam nisi Ilias extitisset illa, idem tumulus, qui corpus Achillis contexerat, memoriam obruisset.

Julium Cæsarem ferunt, cum in Hispania, quò reipublicæ causâ missus erat, legendis Alexandri rebus gestis vacaret, aliquando diu cum cogitabundum hæsisse, deinde lacrymas

profudisse. Quarum causam quærentibus amicis : Nonne , inquit , idonea dolendi causa est , quòd nihildum præclari egerim , eam ætatem adeptus , quâ Alexander multa regna vicendo peragraverat.

4. Honos alit artes , omnesque incenduntur ad studia gloriâ : jacentque ea semper , quæ apud quosque populos improbantur. Itaque quò minus honoris erat Poëtis apud veteres Romanos , eò minora Poëticæ artis studia fuerunt : feròque ab illis Poëtæ vel cogniti vel recepti.

## CAPUT XXXVI.

*Famæ consulendum est.*

CUM nobis à natura moderationis , temperantiæ , verecundiæ partes sint datæ , cumque eadem natura doceat non negligere quomodo nos erga homines geramus ; est hominis ingenui & liberaliter educati , velle bene audire à parentibus , à propinquis , à bonis viris , ceterisque hominibus : ut non solum arrogantis est , sed etiam omnino dissoluti , negligere quid de se quisque sentiat. Quemadmodum autem pulchritudo corporis movet oculos , & delectat hoc ipso quòd inter se omnes partes cum quodam lepore consentiunt : sic movemus approbationem eorum quibuscum vivimus , ordine , & constantiâ , et moderatione dictorum omnium atque factorum.

Si cupis bene audire , disce bene dicere , & recte agere : sic enim perfrueris bonâ famâ.

Præclare Socrates dicebat hanc esse proximam & quasi compendiariam viam ad famam & gloriâ , si quis id ageret , ut qualis haberi vellet , talis esset. Quòd si qui inani ostentatione , & ficto sermone ac vultu stabilem se gloriâ consequi possentur , vehementer errant.

Ficta enim omnia celeriter tanquam flosculi decidunt, nec simulatum quidquam potest esse diuturnum.

Antè conscientiae consulendum est, quàm famæ.

## CAPUT XXXVII.

*Vive ut in publico.*

1. **T**UNC te virum bonum & felicem iudica; cum domi tanquam in publico vives; cum te parietes tui tegent, non abscondent. Plerumque parietes nobis esse circumdatos volumus, non ut tutius vivamus, sed ut peccemus occultius. Janitores ædibus nostris tam malefactorum conscientia opposuit, quàm superbia. Quid autem prodest recondere se, & oculos hominum auresque vitare? Mala conscientia etiam in solitudine anxia atque sollicita est: bona turbam advocat. Si honesta sunt quæ facis, omnes scient: si turpia, quid refert neminem scire, cum tu scias? O te miserum, si contemnis hunc testem!

Julii Drusi ædes pluribus ex partibus patebant vicinorum prospectui. Hoc incommodum faber, si quinque talenta ei darentur, se correcturum pollicebatur, effecturumque ne pars ulla esset obnoxia prospectui. Tum Drusus: *Decem, inquit, dabo si talem reddas domum meam, ut non vicini tantum, sed omnes etiam cives videre possint quomodo in ea vivam.*

2. Magna vis est conscientiae in utramque partem: ut neque timeant, qui nihil commiserint; & poenam semper ante oculos versari putent, qui peccarint.

Numquam secura est prava conscientia.

Tuta fortasse scelera esse aliquando possunt, secura non possunt. Prima & maxima peccan-



tium est pœna peccasse; nec ullum scelus, licet publica pœna non sequatur, impunitum est: quoniam sceleris in scelere supplicium est. Mala facinora conscientia flogellantur. Proprium est nocentium timere semper & expavescere. Bona conscientia prodire vult & conspici: ipsas nequitia tenebras timet.

Hanc Catilinæ & Jugurthæ post patrata flagitia & facinora imaginem expressit Sallustius.

Catilinæ animus impurus, Diis hominibusque infestus, neque vigiliis, neque quietibus sedari poterat: ita conscientia mentem excitam vexabat. Igitur color ei exsanguis: fœdi oculi: citus modò, modò tardus, incessus: prorsus in facie vultuque vecordia inerat.

Neque postea Jugurthæ dies ulla aut nox quieta fuit: neque loco, neque mortali cuiquam, aut tempori satis credere: cives hostesque juxtâ metuere: circumspectare omnia, & omni strepitu pavescere: alio atque alio loco sæpe contra decus regium noctu requiescere: interdum fomno excitus arreptis armis tumultum facere; ita formidine, quasi vecordia, exagitari.

3. Tiberio quoque facinora & flagitia sua in supplicium verterant: neque eum fortuna impediebat, quin tormenta pectoris suasque ipse pœnas in litteris ad Senatum scriptis fateretur. Itaque non frustra olim affirmavit vir sapientiâ præstantissimus, si recludantur tyrannorum mentes, posse aspici laniatus & ictus; quoniam ut corpora verberibus, ita sævitia, libidine, malis consultis, animus dilaceratur.

Dionysius major Siciliæ tyrannus indicavit ipse quàm parum esset beatus. Nam cum quidam ex ejus assentatoribus Damocles commemoraret in sermone copias ejus, opes, majestatem, magnificentiam ædium regiarum; negaretque unquam beatiorem illo quemquam fuisse: *Visne igitur, inquit, Damocle, quoniam hæc te vita*

*del cœtat, ipse eandem degustare, & fortunam experiri meam.* Cùm se ille cupere dixisset; collocari iussit hominem in aureo lecto, strato pulcherrimis stragulis; abacosque complures ornavit argento auroque cœlato. Tum ad mensam eximiâ formâ pueros delectos iussit consistere, eosque ad nutum illius intuentes diligenter ministrare. Aderant unguenta & coronæ, odores incendebantur, mensæ exquisitissimis epulis erant instructæ. Fortunatus sibi Damocles videbatur. At Dionysius in hoc medio apparatu fulgentem gladium, è lacunari setâ equinâ appensum, dimitti iussit, ut impenderet illius beati cervicibus. Itaque nec pulchros illos administratores aspiciebat, nec plenum artis argentum: nec manum porrigebat in mensam: jam ipsæ defluebant coronæ. Denique exoravit tyrannum ut abire liceret, quòd jam beatus esse nollet. Satisne videtur declarasse Dionysius, nihil esse ei beatum, cui semper aliquis terror ex conscientia malefactorum impendeat?

## C A P U T X X X V I I I.

*Vitæ genus eligere, res difficillima.*

I. **D**E eligendo genere vitæ deliberatio, est omnium difficillima. Ineunte enim adolescentiâ, cùm est maxima imbecillitas consilii tum id sibi quisque genus degendæ vitæ constituit, quòd maximè adamavit. Itaque ante implicatur aliquo certo cursu vivendi, quàm potuit judicare quid optimum esset. Plerique parentum præceptis imbuti, ad eorum morem & exemplum deducuntur. Alii multitudinis iudicio feruntur, & quæ majori parti pulcherrima videntur, ea maximâ exoptant. Nonnulli tamen sive felicitate quâdam, sive bonitate naturæ,

sive parentum disciplina, rectam vitæ secuti sunt viam.

2. In constituendo genere vitæ, potissimum habenda est ratio naturæ nostræ, modò non vitiosæ, ut constare nobismetipsis possimus, nec in ullo officio claudicare: deinde fortunæ. Suum igitur quisque noscat ingenium, acremque se & vitiorum & bonorum suorum judicem præbeat: ut ad quas res aptissimus erit, in iis potissimum elaboret. Si verò aliquando necessitas nos ad ea detruserit, quæ nostri ingenii non erunt: omnis adhibenda erit cura, meditatio, diligentia, ut ea, si non decorè, at quamminimè indecorè, facere possimus.

Si natura non feret, ut quis majorum studia atque instituta sequatur: si non poterit sive causas defensare, sive populum concionibus tenere, sive bella gerere: illa tamen præstare debet quæ erunt in ipsius potestate, justitiam, fidem, liberalitatem, modestiam, temperantiam; ut minus ab eo id, quod desit, requiratur.

---

## C A P U T   X X X I X.

*Magistratus non suis, sed civium, commodis consulat.*

I. **M**AGISTRATUS ea potestas, hoc munus est, ut præsit, præscribatque recta & utilia, & conjuncta cum legibus. Ut enim magistratibus leges, ita populo præsunt magistratus: verèque dici potest, magistratum legem esse loquentem, legem autem mutum magistratum.

Magistratibus opus est, sine quorum prudentiâ ac diligentia esse civitas non potest. Iis non solum obtemperare atque obedire cives oportet, sed etiam eos colere ac diligere. Plato verò im-

prios , & Titanum , qui Jovi adversati sunt , similes esse statuit , eos qui magistratibus adversentur.

Qui modestè paret , videtur qui aliquando imperet dignus esse.

Ubi voluisset Alexander Severus aliquos provinciarum rectores , præpositos , procuratores dare , nomina eorum publicè proponebat , ut , si quis è populo aliquid adversus eos criminis haberet , afferre posset : dicebatque , *quod Christiani ac Judæi facerent in eligendis Sacerdotibus , id fieri debere in provinciarum rectoribus , quibus & fortunæ hominum committerentur & capita.*

2. Qui reipublicæ præfuturi sunt , hoc Platonis præceptum teneant , ut , quidquid agant , ad eam referant , obliti commodorum suorum. Ut enim tutela , sic procuratio reipublicæ , ad utilitatem eorum qui commissi sunt gerenda est , non verò eorum quibus est commissa.

Mihi quidem videntur hæc omnia esse referenda ab iis qui præsunt aliis , ut ii , qui erunt in eorum imperio , sint quam beatissimi. Est enim non modò ejus qui civibus , sed etiam qui servis , qui mutis pecudibus præsit , eorum quibus præsit commodis utilitatique servire. Itaque gravis , & fortis civis , dignusque principatu , tradet se totum reipublicæ , eamque sic tuebitur , ut omnibus consulat. Non opes & potentiam consectabitur : omninoque ita justitiæ & honestati adhærescet , ut mortem oppetat potius , quàm eas deferat.

Adrianus , ubi ad imperium est evectus in concione & in senatu sæpe dixit : *Ita se rempublicam gesturum , ut non oblivisceretur populi rem esse , non propriam.*

3. Nullum vitium tetrius quàm avaritia , præsertim in iis qui rem publicam gubernant. Habere enim quæstui rem publicam , non modò turpe est , sed etiam sceleratum & nefarium. Nullâ

autem re consiliare facilius benevolentiam multitudinis possunt in qui præsumunt, quam abstinentiâ & continentiâ. Itaque caput est in omni procuratione negotii & muneris publici, ut avaritiæ pellatur etiam minima suspicio.

Cùm videret Cimon omnes ætatis suæ magistratus, præter Aristidem & Ephialtem, quæstui habuisse rempublicam Atheniensem, & magnas ex ea prædas collegisse; aliam viam ingressus, incorruptum se & intactum ab omni avaritiæ labe præstitit, dona oblata constantissimè repudiavit, omniaque gratis & innocenter per totam vitam & fecit & dixit.

Valerius Publicola cùm tres acceptissimos populus Romano Consulatus gessisset, mortuus est, gloriâ ingenti, copiis familiaribus adeo exiguis, ut funeri sumptus deesset. Itaque publicâ pecuniâ est elatus Menenius quoque Agrippa, quem senatus & plebs Romana pacis inter se faciendæ arbitrum legerant, ita pecuniæ inops decessit, ut sepulturæ honore caruisset, nisi à populo collatis in capita sextantibus funeratus esset.

Omni Macedonum gazâ, quæ fuit maxima, potitus est Æmilius Paulus. Tantam in ærarium populi Romani pecuniam invexit, ut unius imperatoris præda finem attulerit tributorum. At hic non modò nihil ex thesauris regis concupivit, sed ne ipse quidem spectare eos dignatus, per alios homines cuncta administravit: & nihil in domum suam intulit præter memoriam nominis sempiternam. Quin, si Valerio fides habeatur, adeo inops decessit, ut, nisi fundus, quem unum relinquerat, venundatus esset, non habuisset uxor ejus unde dotem reciperet. Imitatus patrem Scipio Æmilianus, nihilò locupletior, Carthagine eversâ, fuit: ut nihilò copiosior L. Mummius, cùm copiosissimam urbem Corinthum sustulisset. Italiam ornare, quàm domum suam, illi maluerunt. Quanquam Italiâ



ornata ipsa eorum domus videtur fuisse ornatio-  
rior. Sic & M. Marcellus, cum captis Syraculis  
quædam Romam asportasset, quæ victoriæ po-  
puli Romani monumenta & urbis ornamenta es-  
sent, nihil in ædibus suis, nihil in hortis, nihil  
in suburbano posuit; putavitque, si ejusmodi  
ornamenta domum suam non contulisset, do-  
mum suam ornamento urbi futuram. Singulo-  
rum enim abstinentia domestica, publicum ci-  
vitatæ decus est.

4. Cum secundo Punico bello Cn. Scipio Afri-  
cani patruus, ex Hispania Senatui scripsisset,  
petens ut sibi successor mitteretur, quia filiam  
virginem adultæ jam ætatis haberet, neque ei  
sine se dos expèdiri posset; Senatus, ne respu-  
blica bono duce careret, patris sibi partes de-  
sumpsit, consilioque uxoris ac propinquorum  
Scipionis constitutam dotem ex ærario erogavit,  
ac puellam nuptum dedit. Dos autem undecim  
millia æris fuit. In quo non solum humanitas  
Senatûs, sed etiam modus veterum patrimonio-  
rum, cognosci potest. Namque adeo fuerunt  
exigua, ut, quia Megullia quinquaginta millia  
æris dotem ad virum attulerat, Dotatæ cogno-  
men invidiosum invenerit.

Illis temporibus bona animi, non divitiæ, in  
cunctis rebus ponderabantur. Hæc conciliabant  
magistratus & imperia; hæc jungebant affinita-  
tes; hæc in foro, hæc in curia, hæc intra pri-  
vatos parietes plurimum poterant. Patriæ rem  
unusquisque, non suam, augere properabat;  
pauperque in divite, quam dives in paupere Im-  
perio, versari malebat.

5. Extat C. Gracchi è Sardinia provincia Ro-  
mam reversi oratio, in quâ hæc inter alia de se  
narrat: Versatus sum in provincia quomodo ex  
usu vestro existimabam esse, non quomodo am-  
bitioni meæ conducere arbitrabar. Nemo possit  
verè dicere assem aut eo plus in muneribus me  
accepisse,

accepisse, aut meâ causâ quemquam sumptum fecisse. Zonas, quas Româ proficiscens plenas argenti extuli, eas ex provincia inanes retuli. Alii Amphoras, quas vini plenas retulerunt, eas argento repletas domum reportarunt.

Contrâ verò pecuniæ quàm non contemptor fuerit Varus Quinctilius, Syriâ, cui præfuerat, declaravit: quàm pauper divitem ingressus, dives pauperem reliquit.

6. Cùm Ser. Sulpicius Galba Aurelius Cotta Consules in Senatu contenderent, uter adversus Viriatum in Hispaniam mitteretur, ac magna inter Patres dissensio esset; omnibus quonam Scipionis Æmiliani sententia inclinaretur expectantibus: *Neutrum*, inquit, *mihi mitti placet: quia alter nihil habet, alteri nihil est satis.* Imperii, in quo omnia licet pro arbitrio legere, æquè malam magistrâ judicans inopiam atque avaritiam. Quo dicto, ut neuter in provinciam mitteretur, obtinuit.

## C A P U T X L.

*Varia eorum, qui aliis præsumt, officia.*

g. **D**IFFICILE dictu est, quantopere conciliet animos hominum comitas affabilitasque sermonis.

In gerendo magistratu exercenda est facilitas & altitudo animi: ne, si irascamur aut intempestivè accedentibus, aut impudenter rogitantibus, in morositatem inutilem atque odiosam incidamus. Anui pauperculæ Philippum regem obsecranti, ut litem suam dijudicaret, cùm respondisset, sibi tempus ad ista non superesse: *Ne ergo si rex*, illa reposuit. Admiratus Philippus liberam vetulæ vocem, non solum ei aures præbuit, sed multam quoque jus sibi dici postulantium turbam audivit statim.

*Pars II.*



Cùm Augusto principi optimo quidam libellum supplicem porrigens, præ metu & verecundiâ nunc manum proferret, nunc retraheret: *Putas*, inquit jocans Augustus, *te assẽm elephantæ dare?* Jus ipse dixit assiduè, & in noctem nonnunquàm: si parum corpore valeret, letricâ ante tribunal collocatâ, vel domi etiam cubans.

Inter alia dicta Trajani hoc fertur egregium. Amicis culpantibus quòd nimium in omnes commis esset, respondit. *Talem se Imperatorem esse privatis, quales esse sibi Imperatores privatus optaret.*

Erat in Miltiade tum summa humanitas, tum mira comitas, ut nemo tam humilis esset, cui non ad eum aditus pateret. Contrâ Pausanias conveniendi facultatem petentibus non dabat, superbè respondebat, & creduliter imperabat.

2. Ita probanda est mansuetudo atque clementia, ut adhibeatur publicæ utilitatis causâ severitas, sine qua administrari civitas non potest. Nam ubi discrimen inter malos bonosque sublatum est, confusio sequitur, & vitiorum eruptio. Promiscuam habere & vulgarem clementiam non decet: & tam ignoscere omnibus crudelitas est, quàm nulli.

Bonis nocet, quisquis pepercerit malis.

Invitat culpam, qui peccatum præterit.

Modum tenere debemus Sed quia difficile est temperamentum; quidquid plus æquo futurum est, in partem humaniorem præponderet.

3. Objurgationes aliquando incidunt necessariae, in quibus utendum est fortasse, & vocis contentione majore, & verborum gravitate acriore. Sed, ut ad urendum & secandum medici, si nos ad hoc genus castigandi rarò invitiq̃ue veniamus, nec umquam nisi necessario, si nulla reperietur alia medicina. Sed tamen ira procul absit, cum qua nihil rectè fieri, nihil

consideratè, potest. Atque etiam significandum est, illud ipsum acerbitatis quod habet objurgatio, ipsius causâ, qui objurgetur, esse susceptum.

Omnis autem animadversio & castigatio contumeliâ vacare debet: neque referri ad utilitatem ejus qui punit aliquem aut verbis castigat, sed ad reipublicæ commodum.

4. Cavendum est etiam ne major pœna, quàm culpa, sit: & ne iisdem de causis alii plectantur, alii ne appellentur quidem.

Prohibenda maximè est ira in puniendo, optandumque, ut ii, qui præsunt aliis, legum similes sint, quæ ad puniendum æquitatem ducuntur, non iracundiâ. Quod vitium cum in privata quotidianaque vita levis esse animi atque infirmi videtur, tum verò nihil est tam deforme, quàm ad summum imperium etiam acerbitatem naturæ adjungere.

Cyri & Agesilaï, summo in imperio, nemo unquam verbum ullum asperius audivit.

Ad coërcitionem errantium sceleratorumque, irato castigatore non opus est. Omne pœne genus remedii loco admovebo. Varia in tot animis civium vitia video, & civitati curandæ adhibitus sum: pro cujusque morbo medicina quærat. Hunc sanet verecundia, hunc mutatio loci, hunc dolor, hunc egestas, hunc ferrum. Procedam in tribunal non furens, non infestus, sed vultu Legis: & illa solemnia verba damnationis pronuntiabo, non iratus, sed severus.

5. Cicero in egregiâ illâ ad Quintum fratrem Asiæ Prætorem epistolâ, quædam eum admonet ut faciat, quædam quod jam fecerit laudat, quæ hic paucis verbis referentur.

Sint hæc fundamenta dignitatis tuæ: tua primum integritas & continentia; deinde omnium qui tecum sunt, pudor: delectus in familiarita-

tibus percautus & diligens : familiæ gravis & constans disciplina. Quid autem erit negotii continere eos quibus præsis . si te ipse contineas ?

Sit summa in jure dicendo severitas : dum modo ea non varietur gratia , sed conservetur æquabilis.

Sed tamen parvi refert abs te ipso jus dici æqualiter & diligenter , nisi idem ab iis fiet quibus tu ejus muneribus aliquam partem commiseris. Neque enim satis est te ipsum justum esse , & abstinentem ; sed omnes ministros imperii tui tales præstare & sociis nostris & reipublicæ debes.

Constanti famâ ad me perlatum est , tibi omnium , quibus præes , salutem , liberos , famam , fortunas esse carissimas : te pecuniæ , te voluptati , te omnium rerum cupiditati sic jam biennium resistere , ut in Asiâ tam corruptrice provinciâ nihil , te ab summâ integritate continentîâque deduxerit : non itineribus tuis perereri homines , non sumptu exauriri ; esse , quocumque veneris , & publicè & privatim maximam lætitiâ , cùm urbs custodem , non tyrannum , domum hospitem , non expilatorem , recepisse videatur ; facillimos esse aditus ad te : patere aures tuas querelis omnium : nullius inopiam ac solitudinem , non modò publico accessu ac tribunali , sed ne domo quidem tuâ & cubiculo esse exclusam tuo : toto denique in imperio nihil acerbum esse , nihil crudele , atque omnia plena clementiæ , mansuetudinis , humanitatis.

## C A P U T X L I.

*Judicis est in causis semper verum sequi.*

I. **D**IGEBAT Pythagoras donorum à Deo homini concessorum hæc duo esse præstan-



issima, veritatem sequi, & benefacere aliis: his enim duobus mortales Deo propè similes fieri.

Thebis Ægyptiacis visebantur simulacra Judicum manibus carentium, & Præsidis eorum oculos in terram versos habentis. Quo significabatur, eos qui jus dicunt, nec donis, nec conspectu reorum moveri oportere.

Quoniam magna aut bona aut mala è judiciis aut æquis aut iniquis in publicam rem veniunt; Ægyptiis præcipua judiciorum cura erat. Optimos è majoribus urbibus viros triginta eligebant. Qui confessus nec Areopagitis Atheniensium nec Senatui Lacedæmoniorum, videtur fuisse postponendus. Hi unum ex se se, justitiâ maximè insignem, sibi Præsidem dicebant. Stipendium à Rege omnibus dabatur in victum & alias res necessarias. Cùm ad judicandum convenissent, Præses collo suo torquem aureum circumponebat, è quo suspensa erat, confecta ex pretiosissimis lapillis, imago quam Veritatem dicebant: & octo volumina, in quibus scriptæ erant leges Ægyptiorum, proponebantur in medium. Actor & reus, non verbis, sed scripto tantum, causam agebant: & postquam res satis liquere iudicibus visa erat, ferebatur sententia, & Præses veritatis imaginem convertebat in alterum è litigatoribus qui causâ vicerat. Hoc modo cuncta judicia peragere Ægyptiis solemne erat. Causidicorum oratione multum caliginis juri offundi arbitrabantur; & sæpe fieri, ut oratorum artes, actionis præstigiæ, lacrimæ periclitantium, iudicum aures oculos, animos sic afficerent, ut unam veritatem non ampliùs intuerentur.

2. Athenis in Senatum Areopagiticum neminem admitti fas erat, nisi & honesto loco natus, & vitæ modestiâ spectantissimum.

Nihil illis iudicibus constantius, nihil severius,  
Olij

nihil fortius. Qui causam apud eos dicebant, ab iis omnibus, quæ ad conciliandam benevolentiam & movendos affectus valent, jubebantur abstinere: quod si negligere viderentur, præconis voce cohibiti tacere cogeantur. Ne reorum quoque miserando aspectu iudices commoverentur, ipsâ nocte, nullis admotis luminibus, iudicia exercebant, summoque silentio sententiam tabellâ dabant, ita ut alter alterius sententiam ignoraret. Puerum coturnicum oculos eruentem dicuntur damnassee, iudicantes id signum esse perniciosissimæ mentis, multisque malo futuræ, si adelevisset. Iidem quid quisque Atheniensium ageret, aut quonam quæstu sustentaretur, diligentissimè inquirebant: ut cives vitæ rationem reddendam esse memores, honestatem sequerentur.

3. Si mnem, unum è Persarum iudicibus, quod pecuniâ acceptâ injustè iudicasset, rex Cambyzes morte plecti iussit; interemtoque detractâ pelle contexit tribunal, in quo ille federatum filium ejus Otanem ibidem sedere iudicem voluit, admonitum ut numquam paternæ culpæ ac penæ oblivisceretur. Severior postea Artaxerxes, alius Persarum rex, in quosdam malos iudices fuit: nam vivis pelles detrahi præcepit, iisque aliorum iudicum subscellia insterni, ut recens semper ante oculos haberent exemplum justitiæ non impunè violatæ.

Qui statuit aliquid parte inauditâ alterâ,  
Quum licet statuerit, haud æquus fuit.

4. Quemdam ex inimicis vocaverat in iudicium Aristides: & iudices, auditâ accusatione, confestim sententiam laturo videbantur de reo, quem audire abnuebant, notam omnibus accusatoris justitiam ac fidem reveriti. Tum Aristides in medium processit, unâ cum reo supplex concidit ad pedes iudicum, orans ut inimicus audiretur, & ex legibus cum eo ageretur.

Alexander primis regni annis, cùm in capitalibus causis judex federet, loquente accusatore alteram aurem admotâ manu occludebat. Interrogatus cur id faceret: *Illam*, inquit, *aurem reo integram servo.*

5. Nihil contra rempublicam, neque contra jusjurandum ac fidem amici causâ vir bonus faciet: ne si judex quidem erit de ipso amico. Ponit enim personam amici, cùm induit judicis. Hoc solum dabit amicitiae, ut veram amici causam esse malit, ut perorandæ liti tempus, quoad per leges liceat, accommodet. Itaque præclarum à majoribus accepimus morem ea tantum rogandi judicis, quæ salvâ fide facere posset.

Est sapientis judicis, meminisse non solum quid potestati suæ permissum sit à republica, sed etiam quid fidei commissum ac creditum: absolvere aliquando, quem oderit; quem verò amet, condemnare: non putare, sibi, quodcumque concupierit, licere: sed habere in consilio legem, religionem, æquitatem, fidem: libidinem autem, odium, invidiam, metum, cupiditatesque omnes amovere: maximèque rebus omnibus præferre conscientiam mentis suæ, quàm à Diis immortalibus accepimus, quæ à nobis divelli non potest: quæ si optimorum consiliorum atque factorum testis in omni vita nobis erit, sine ullo metu & summa cum honestate vivemus.

6. Chilo ille sapiens in re capitali amici sui aliquando judex fuit cum duobus aliis judicibus. Itaque aut amicus ei capite plectendus erat, aut legi adhibenda fraus. Consulanti secum quid in tam ancipiti casu faciendum esset, hoc optimum visum est. Sententiam, quâ amicum damnaverat, dissimulans ac tacens, duobus sociis judicibus, ut eum absolverent, persuasit: Sicque se & amici & judicis officio functum fuisse

existimabat. Verùm die vitæ supremo amicos circumstantes allocutus, cùm dixisset nihil à se commissum esse, cujus memoria aliquid ægritudinis afferret, morienti: confessus est sibi nondum liquere, rectène, an perperam, fecisset in illo amici judicio: hancque se ex eo facto capere molestiam, quòd metueret ne perfidi hominis fuisset, in eadem re, eodemque tempore, & communi negotio, aliis suasisse diversum ab eo quod ipse justum, & à se faciendum, duxerat. Virum sapientiâ præstantem hæc res meritò anxium & sollicitum habebat. Declinavit enim de via, & à justitia disciit, cùm falsum conservandi amici causâ consilium dedit.

7. Antigoni regis frater Marsias litem habebat, postulabatque ab eo sibi domi judicium institui: *Meliùs quidem*, inquit Antigonus, *in foro*, & *omnibus audientibus*, *res agetur*, *si nihil injustè facere in animo est*.

Philippum regem rogabat Harpalus, qui gratiâ plurimum valebat apud eum, ut propinquus & familiaris suus Crates, accusatus injuriarum, multam quidem solveret, sed non damnaretur publico judicio, ne inimicorum aliorumque hominum maledictis pateret. Cui Philippus: *Satius est ipsum propter culpam, quàm nos propter illum, malè audire*.

Cùm litis inter duos privatos judex esset Aristides, & alter, consiliandæ sibi judicis benevolentie causâ diceret adversarium multa in Aristidem injuriosè fecisse: *Quin tu potius*, inquit, *bone vir*, *si quid ille te læsit*, *eloquere*. *Tibi enim nunc*, *non mihi*, *judex sum*.

## C A P U T X L I I.

*Cives magistratibus pareant, magistratus legibus.*

1. **D**IVINA mens, prima & summa lex est, alia jubens, alia vetans: ex qua illa lex, quam Dii humano generi dederunt, profecta



est, Ratio, ad rectè faciendum impellens & à delicto avocans.

Constat profectò ad salutem civium, vitamque omnium quietam & beatam, conditas esse leges: eosque, qui primùm ejusmodi scita sanxerunt, populis ostendisse, ea se scripturos atque laturus, quibus susceptis honestè beatèque viverent. Vitiorum enim emendatricem legem oportet esse, commendatricemque virtutum: Ideoque supplicia vitiis proponit, præmia virtutibus.

Sicut morbos antè necesse est cognitos esse, quàm remedia eorum: sic cupiditates priùs natæ sunt, quàm leges quæ iis modum facerent. Vetusissimi mortalium, quorum ætas aurca dicta est, naturam & ducem & legem habentes, sine probro & scelere, atque ideo sine coercitionibus & pœna vitam agebant. Nec præmiis nec minis opus erat, cùm honestâ suoapte ingenio peterent, & nihil contra morem cuperent. At postquam pro modestia & pudore, ambitio, vis, aliæque cupiditates incessère, leges conditæ sunt. Sic Cretensis Minos, Spartanis Lycurgus, Atheniensibus Solon, leges prescripsit.

2. Lycurgus non habentibus Spartanis leges instituit, & suo exemplo confirmavit: siquidem nihil lege ullâ sanxit, cujus non ipse primus in se documenta daret. Populum in obsequia principes ad justitiam imperiorum formavit: parcimoniamque omnibus suavit, existimans laborem militiæ assiduâ frugalitatis consuetudine faciliorem fore. Tanto viro neque vitæ summa integritas, neque constantissimus erga patriam amor, neque leges salubriter excogitatæ, auxilio esse potuerunt, quominus infestos cives experiretur. Lapidibus enim aliquando petitis à divitibus quibusdam, quorum luxui frænos iniecerat, foro ejectus oculo etiam privatus fuit. Hoc facinus admisit adolescens



nomine Alcander, qui Lycurgi è foro fugientis tergo inhærens, respicientem percussit baculo, eique oculum excussit. Illum, sibi à populo traditum ad pœnam, egregiè ultus est Lycurgus: nam cùm domi ministrare sibi jussisset; mansuetudinis, frugalitatis, sanctitatisque suæ exemplo tantam in eo morum mutationem fecit, ut ille ex protervo & audaci adolescente in verecundum moderatumque transierit.

3. Codro rege Athenis extincto pro patriâ, administratio reipublicæ annuis magistratibus permissa est. Sed civitati nullæ tunc leges erant: quia voluntas Regum pro legibus habebatur. Lectus est itaque Solon vir ingenio & justitiâ insignis, qui velut novam civitatem legibus conderet. Hicque tanto temperamento inter plebem senatumque egit, ut ab utrisque parem gratiam traheret.

Solonem leges condentem irrisit Anacharsis, dixitque: *Leges Aranearum telis similes sibi videri. Quemadmodum enim, inquit, illæ infimiora animalia retinent, valentiora transmittunt: sic pauperes & humiles legibus constringuntur, divites & præpotentes eas perumpunt.* Idem Anacharsis, cùm concioni populi Atheniensis interfuisset: mirari se, dixit, quod apud Græcos verba facerent sapientes, stulti verò judicarent.

Interrogatus Solon quomodo optimus fieri posset civitatum status? Si, inquit, cives magistratibus obediant, magistratus autem legibus.

4. Archidamus cuidam quærenti, quinam Spartæ imperarent? *Leges, inquit, ac secundùm leges magistratus.*

Cùm Agesilaus Lacedæmoniorum Rex, subactâ Asiæ parte, adversus regem Persarum pergeret, maximamque haberet fiduciam regni ejus potiundi; ab Ephoris revocatus, eorum absentium jussis tam obediens fuit, quàm si privatus in comitio esset Spartæ: opulentissimo

regno præposuit bonam existimationem, multoque gloriosius sibi futurum duxit, si patriæ institutis paruisset, quam si bello Asiam superasset. Rediit itaque confestim, dicens: *Bonum imperatorem oportere legibus parere.*

Antiochus tertius omnibus regni sui civitatibus scripserat: *Si quid forte per litteras jussisset facere quod esset contra leges, ne sibi parerent.*

5. Charondas populi conciones ad vim & cruorem usque seditiosas pacaverat, lege cavendo, ut si quis eas cum ferro intrasset, continuo interficeretur. Interjecto deinde tempore, ipse ex longinquo rure, gladio accinctus domum repetens, subito indictâ concione, sicut erat armatus, in eam processit. Ubi cum ab eo, qui proximè confiterat, solutæ à se legis suæ admonitus fuisset: *Idem ego, inquit, illam sanguine meo sanciam.* Ac protinus ferro, quod habebat, districto incubuit. De Zaleuco vide lib. 3. c. 49.

Idem Charondas, ne leges suæ temerè abrogarentur ad arbitrium & libidinem eorum quibus graves essent, hac ratione præcaverat. Si quis quampiam è sancitis legibus abrogari vellet, & in ejus locum aliam novam inferri: is collo in laqueum immisso, verba faciebat ad populum de utraque lege. Ubi, latis suffragiis, visum erat veterem legem abrogandam esse, & novam accipiendam, ille discedebat nihil mali passus. Contra verò si prior lex retinenda, & nova rejicienda videretur, temerario novæ legis suasiore guttur perfringebatur eo, quo vinc-tus accesserat, laqueo.

6. Jus civile neque inflecti gratiâ, neque perfringi potentiâ, neque adulterari pecuniâ debes. Si non modò oppressum, sed etiam desertum aut negligentius adservatum fuerit: nihil est quod quisquam se se habere certum, aut à patre accepturum, aut relicturum liberis, arbitretur.

Non ea olim erat , quæ nunc sæculum tenet. legum negligentia , nec interpretando sibi quisque eas aptas faciebat : sed suos potius mores ad illas accommodabat.

7. Dictum est ab eruditissimis viris , nisi sapientem , liberum esse neminem. Quid est enim libertas ? Potestas vivendi ut velis. Quis igitur vivit ut vult , nisi qui recta sequitur , qui gaudet officio , qui legibus non propter metum pareret , sed eas sequitur atque colit , quia id rectum & salutare maximè esse judicat : qui nihil dicit , nihil facit , nihil cogitat denique nisi libenter ac liberè : apud quem nulla res est quæ plus polleat , quàm ipsius voluntas ac iudicium ? Soli igitur hoc contingit sapienti , ut nihil faciat invitus , nihil dolens , nihil coactus.

Non minùs apud viros bonos honestas , quàm apud alios necessitas , valet.

Interrogatus Aristipus , quid præ cæteris hominibus eximium haberent Philosophi ? *Hoc* , inquit , *quæd si leges omnes tollantur , æquabiliter tamen victuri simus.*

Legem nocens veretur , fortunam innocens.

Quam angusta innocentia est , ad legem bonum esse ! quanto latius officiorum patet , quàm juris regula ! quàm multa pietas , humanitas , liberalitas , iustitia , fides exigunt , quæ omnia publicæ leges non jubeant !

Quod non vetat lex , hoc vetat fieri pudor.

## CAPUT XLIII.

*Vitiosi Principes plus exemplo , quàm peccato , nocent.*

1. **U**T cupiditatibus & vitiis principum infici solet tota civitas , sic emendari & corrigi continentia. Nam licet videre , si temporum memoriam repetas , qualescumque summi civitatis

civitatis viri fuerunt , talem civitatem fuisse ; & quæcumque mutatio morum in principibus extiterit , eandem in populo secutam esse.

Cum L. Lucullo magno viro magnificentia villæ Tusculanæ objiceretur ; respondebat : *Duos se habere vicinos , alterum Equitem Romanum , alterum libertinum : quorum cum essent magnificæ villæ , id sibi concedi oportere , quod iis , qui tenioris ordinis essent , liceret.* At non videbat ab ipso natum esse , ut illi talia cupe-  
rent. Nam Lucullus , summus aliqui vir , profusæ in ædificiis , convivis , & apparatus luxuriæ primus auctor fuit : eumque ob injectas moles mari , & suffossos montes , haud infacete magnus Pompeius Xerxem togatum vocare assueverat. Pauci autem , atque admodum pauci , honore & gloriâ amplificati , vel corrumpere mores civitatis vel corrigere possunt. Itaque eo perniciosius de republica merentur vitiosi Principes , quod non solum vitia concipiunt ipsi , sed etiam ea insuadunt in civitatem , plusque exemplo quàm peccato , nocent.

2. Princeps optimus faciendo docet ; & licet sit imperio maximus , exemplo major est.

Non tam imperio nobis opus est , quàm exemplo ; quippe malus recti magister est metus , Melius homines exemplis docentur.

Lex velit honesta ; nemo non eadem volet.

..... Componitur orbis

Regis ad exemplum , nec sic inflectere sensus Humanos edicta valent , ut vita regentis.

Mobile mutatur semper cum Principe vulgus.

Vespasianus legibus æquissimis , quodque vehementius est , vitæ specie , vitiorum plura Romæ abolevit.

Theodosio Imperatori , quod lapsos mores exemplo suo restituerit , his verbis gratulatur Latinus Pacatus: Ubi primum imperium accepisti , non contentus ipse vitis carere , alienis



vitiis corrigendis curam adhibuisti, idque moderate, ut suadere potius honesta, quam cogerere, videreris. Et quia vel longo Orientis usu, vel Principum remissione, tantus multos luxus infecerat, ut adulta consuetudo non facile mutari posse videretur, nequis se pati injuriam putaret, à te voluisti incipere censuram; impendia Imperatoriæ domûs minuisti, & ad mensam vix necessarium adhibendo sumptum, quod naturâ difficillimum est, emendasti volentes. An quis ferret molestè se ad principis modum coerceri? aut subtractum sibi aliquid doleret de privata luxuria, cum videret Imperatorem rerum potentem, terrarum hominumque dominum, parcè viventem, modico & castrensi cibo contentum? Ab hoc aulam omnem laboris patientiæ, frugalitatis exemplis abundantem? Tuæ, Imperator, epulæ: mensis communibus sunt parciores. Hinc in omnes, quiescentibus leguminis, luxuriæ pudor, & parcimoniæ studium venit. Sic est enim, sic est: *Exasperat homines imperata correctio, blandissimè jubetur exemplo.*

3. Cavendum est viro honorato & principi, si ipse domum ædificet, ne extra modum sumptu & magnificentiâ prodeat. Quo ingenere multum mali etiam in exemplo est: studiosè enim plerique, præsertim in hanc partem, facta Principum imitantur. Ut L. Luculli virtutem quis? quàm multi villarum magnificentiam imitati sunt? quarum quidem certè est adhibendus modus, & ad mediocritatem revocandus.

In Agesilao Lacedæmoniorum rege illud in primis admirabile fuit, quod cum maxima ei munera à Regibus, & Dynastis, & civitatibus mitterentur, nihil unquam in domum suam contulerit, nihil de victu, nihil de vestitu Lacorum mutaverit. Domo eadem fuit contentus, quâ Euristhenes progenitor majorum suorum fuerat usus: quam qui intrârât, nullum signum



libidinis, nullum luxuriæ videre poterat; contrà plurima patientiæ atque abstinentiæ: sic enim erat instructa, ut nulla in re differret à cuiusvis inopis atque privati domo.

M. Cato Consularis & Censorius villas suas ne tectorio quidem perlitas fuisse scribit ad annum usque ætatis suæ septuagesimum; atque postea addit: *Neque mihi ædificatio, neque vas, neque vestimentum ullum est pretiosum, neque pretiosus servus, neque ancilla. Si quid est quo uti possim, utor: si non est, egeo. (Id est, facile careo). Sûd quemque uti & frui per me licet. Mihi vitio quidam vertunt, quia multis egeo; at ego illis, quia nequeunt egere.*

Crassus ille dives nullam, præter eam in qua habitabat, domum ædificavit: dicebatque, homines ædificandi cupidos, omnibus everti fortunis solere.

Cùm esset pecuniosus Atticus, nemo illo minus ædicator fuit. Domum habuit Romæ in colle Quirinali ab avunculo hæreditate relictam; cuius amœnitas non ædificio, sed sylvâ, constabat. Ipsum tectum antiquius ædificatum, magis venustum erat quam sumptuosum: in quo nihil commutavit, nisi quod vestitute coactus est.

Habitavit Augustus in ædibus modicis, neque laxitate neque cultu conspicuis: ubi sine marmore ullo aut insigni pavimento conclavia: ac per annos amplius quadraginta in eodem cubiculo hieme & æstate mansit. Instrumentum quoque ejus & suppellex vix privatæ elegantiae erant. Idem tamen Romam, quam pro majestate Imperii non satis ornatam invenerat, adeò excoluit, ut jure sit gloriatus, marmoream se relinquere, quam lateritiam accepisset.

Anno urbis conditæ 628, Censores Cassius & Longinus Lepidum Æmilium augurem, virum Consularem, coram se adesse jusserunt, quòd sexmillibus æris ædes conduxisset. *At nunc, in-*

quit Velleſus qui centum & quinquaginta poſt annos ſcribebat , ſi quis tanti habitet , vix ut Senator agnoſcitur. Adeò mature à rectis in prava , à pravis in præcipitia pervenitur.

## CAPUT XLIV.

*Potentia decori eſt , ſi ſalutaris ſit.*

1. **N**EMINEM ex omnibus hominibus magis quàm Regem aut principem decet clementia. Ita enim potentia decori gloriæque eſt , ſi ſalutaris ſit. Quæ verò gloria eſt , valere ad nocendum ?

Illius demum magnitudo glorioſa & ſtabilis eſt , quem omnes tam pro ſe eſſe , quàm ſuprà ſe , ſciunt : cujus curam pro ſalute ſingulorum atque univerſorum tuendâ quotidie experiuntur : quo procedente , non , tanquam noxium animal è cubili proſilierit , diſſuglunt , ſed tanquam ad clarum & beneſicum ſidus certatim advolant , objicere ſe pro illo mucronibus inſidiantium paratiſſimi.

Magnam fortunam magnus animus decet : magni autem animi eſt proprium , placidum eſſe tranquillumque , & injurias atque offenſiones deſpicere. Regem ſæva & inexorabilis ira non decet.

Talis ſit civibus ſuis Princeps , quales ſibi Deos velit. Quod ſi Dii placabiles & æqui delicta potentium non ſtatim fulminibus perſequantur : quanto æquis eſt hominem hominibus præpoſitum miti animo exercere imperium ?

Si , quoties homines peccant , ſua fulmina mittat

Jupiter , exiguo tempore inermis erit.

Quod Principis officium eſt ? quod bonorum parentum , qui objurgare liberos nonnumquam

blandè , nonnumquam minaciter solent , aliquando admonere etiam verberibus. Nunquid aliquid sanus filium propter primam offensam exheredat ? Hoc quod parenti , etiam Principi faciendum est , quem aliquando Patrem patriæ , titulo omnium pulcherrimo , appellamus , ut sciat datam sibi potestatem patriam , quæ est temperatissima.

2. Nulla Regi gloria est ex sæva animadversione : quis enim dubitat eum multum posse ? At contrà maxima , si nec suæ nec alienæ iræ serviat.

Id facere laus est quod licet , non quod libet.

Minimum decet licere , cui multum licet.

Cùm ab Alexandro magno flagitaret mater Olympias mortem cujusdam infantis , & discitaret , spe faciliùs impetrandi quæ vellet , eum se per novem menses utero portasse ; prudenter respondit : *Aliam , parens optima , posce mercedem : hominis enim innocentis solus beneficio nullo pensatur.*

Antonius Pius hanc celebratam Scipionis sententiam sæpe in ore habebat : *Malle se unum civem servare , quam mille hostes occidere.*

Theodosius , conquerente quodam ex familiaribus , quòd fontes morte non multaret : *utinam ,* inquit , *& mortuos liceret ad vitam revocare.*

Vespasianus nunquam cæde cujusquam lætatus , justis suppliciis illacrymavit etiam & ingemuit.

Primis annis imperii Neronis , animadversurus in latrones duos Burrhus Prætorii cohortibus præfectus , vir egregius , petebat à Nerone , ut scriberet nomina eorum in quos præterea animadverti vellet ; hocque sæpe dilatum , ut tandem fieret , instabat. Invitus invito cùm cartham tradidisset ; exclamavit Nero : *Vellem nescire litteras.* Quam diversa illa vox erat à Caligulæ voto ; qui optabat , *Populus Romanus*

*unam cervicem haberet , ut ipse uno ictu & uno die crudelitatem expleret.*

3. Ad Cæsarem Augustum delatum est L. Cinnam insidias ei struere. Dictum est & ubi , & quando , & quibus consciis , & quemadmodum , aggredi vellet. His auditis Augustus consilium amicorum in posterum diem advocari iussit: ipsi interim inquieta nox fuit. Gemens subinde voces emittebat varias & inter se contrarias. *Quid ? ego percussorem meum securum ambulare patiar , me sollicito ? Ergo non dabit pœnas , qui tot civilibus bellis frustra petatum caput , tot navalibus , tot pedestribus præliis incolume , immolare ad aras constituit , postquam pax terrâ marique parta est ? Rursus silentio interposito , sibi magis , quàm Cinnæ , iratus , seque ipse compellans : Quid vivis , inquiebat , si perire te tam multorum interest ? quis finis erit suppliciorum ? quis sanguinis ? Ego sum nobilibus adolescentulis expositum caput , in quod mucrones acuunt. Non est tanti vita , si , ut ego non perzam , tam multi perdendi sunt. Interpellavit tandem illum Livia uxor , & Admittis , inquit , muliebre consilium ? Fac quod medici solent , qui , ubi usitata remedia non procedunt , tentant contraria. Severitate nihil adhuc profecisti : nunc tenta quomodo tibi cedat clementia. Ignosce L. Cinnæ. Deprehensus est , jam nocere tibi non potest , prodesse jam tuæ potest.*

Bene suadere visa est Livia : gratias ei egit Augustus , Cinnam ad se accersivit , dimissisque omnibus è cubiculo , delatum ad se indicium exposuit , adjecit locum , socios , diem , ordinem insidiarum : & cum sua in eum beneficia plurima commemorasset , pro quibus ille infandam cædem paraverat : his verbis desit : *Vitam tibi , Cinna , iterum do , prius hosti , cum te in hostium meorum castris invenerim , nunc insidiatori ac parricidæ. Ex hodierno die inter nos amicitia incipiat : & quam libenter ego tibi vitam do , tam*

*libenter tu mihi eam debeas.* Post hæc detulit ei ultro Consulatum, questus quod non auderet petere : amicissimum fidelissimumque habuit, hæres illi solus fuit : & nullis amplius insidiis ab illo petitus est, id clementiæ beneficio consecutus, quod antea severitate frustra quæsierat.

4. Populis id quod acerbissimum est ; quòd tributa pendant, non ita acerbum debet videri. Illud cogitent, nullum à se neque belli externi, neque discordiarum domesticarum, calamitatem obfuturam esse, nisi alicujus imperio regerentur. Id autem imperium cum exerceri sine vectigalibus ac tributis nullo modo possit : æquo animo parte aliquâ suorum fructuum pacem sibi sempiternam redimant atque otium.

Neque quies gentium, sine armis ; neque arma, sine stipendiis ; neque stipendia, sine tributis, haberi queunt.


Vectigalia nervi sunt reipublicæ.

Tiberius præsidibus provinciarum onerandas esse tributo provincias scribentibus rescripsit : *Boni pastoris esse, tondere pecus, non deglubere.*

Trajanus exactiones improbens & detestans : *fiscum lieni similem esse, dicebat, quo crescente artus reliqui tabescunt.*

*Finis secundæ Partis.*





# I N D E X

Selectarum è profanis Scriptoribus  
Historiarum.

P A R S A L T E R A.

## LIBER QUARTUS. DE FORTITUDINE.

CAPUT I. <i>A</i> NIMI fortitudo duplex , pag.	1.
II. <i>B</i> ellicæ fortitudinis exempla ,	2.
III. Fortitudo domestica non est inferior militari ,	7.
IV. Imperare sibi , maximum imperium est ,	11.
V. <i>V</i> itiorum irritamenta sunt fugienda ,	13.
VI. <i>A</i> ngusti animi est amare divitias , magni com- temnere ,	14.
VII. Quod satis est cui contigit , nihil amplius optet ,	16.
VIII. Optimus quisque Græcorum pauperrimus ,	18.
IX. <i>P</i> arvo contentus sapiens , paupertatem non timet ,	21.
X. Divitiæ atque otium pestes virtutis ,	22.
XI. <i>V</i> era bona virtus & doctrina ,	24.
XII. Cavenda est gloriæ cupiditas , neque imperia expetenda ,	26.
XIII. Hoc est regnare , nolle regnare cum possis ,	29.
XIV. Gloriæ & famæ jactura facienda est publicæ utilitatis causâ ,	32.

- XV. *Mortem ac dolorem contemnere fortis animi est ,* 34.
- XVI. *Non quàm diù , sed quàm bene , vixeris , refert ,* 35.
- XVII. *Mortem æquo animo oppetit , qui bene vixit ,* 37.
- XVIII. *Humatio contemnenda in nobis , non negligenda in nostris ,* 40.
- XIX. *Tollatur fortunæ discrimen in morte ,* 53.
- XX. *Viro forti fortiter ferendus est dolor ,* 55.
- XXI. *Dolorem ferri fortiter posse , multorum exempla docent ,* 56.
- XXII. *Quæ dura sunt , fiunt leviora patientiâ ,* 59.
- XXIII. *Aliorum respice incommoda , ut mitius feras tua ,* 61.
- XXIV. *Ira furor brevis est ,* 63.
- XXV. *Nihil minus , quam irasci , punientem decet ,* 64.
- XXVI. *Ne inimicis quidem irascendum ,* 66.
- XXVII. *Ira sui impotens est & pertinax ,* 67.
- XXVIII. *Circumscribenda multis modis ira est ,* 68.
- XXIX. *Imitanda multorum in summâ potentiâ lenitas ,* 70.
- XXX. *Minimis rebus exasperari insania est ,* 72.
- XXXI. *Lingua diligentissimè continenda ,* 73.
- XXXII. *Quanto superiores sumus , tanto nos summissus geramus ,* 75.
- XXXIII. *Ne assentatoribus patefaciamus aures ,* 77.
- XXXIV. *Fortis & constantis animi est non perturbari in rebus asperis ,* 82.
- XXXV. *Viri boni nati sunt in exemplar , & eos sibi præparat Deus ,* 83.
- XXXVI. *Præclara est universæ vitæ æquabilitas ,* 84.

LIBER QUINTUS.  
DE  
TEMPERANTIA.

- R**ATIONE duce per totam vitam eundum est , 86.
- II. In sedatione perturbationum animi vita beata , 87.
- III. Malus beatæ vitæ iudex populus , 88.
- IV. Corpori indulgendum , non serviendum , 91.
- V. Cibus & potus desiderio conduntur , 92.
- VI. Disce parvo esse contentus , 93.
- VII. Platonica & Siracusana mensæ. 95.
- VIII. Convivia Lacedæmoniorum , 96.
- IX. Castigata corporis obesitas , 98.
- X. Corporis voluptas non est digna hominis præstantiâ , 99.
- XI. Corpus & animum ad patientiam exerce , 100.
- XII. Bonæ valetudinis mater est frugalitas , 102.
- XIII. Omne vitium ebrietas , & incendit & detegit , 104.
- XIV. Coërcendus luxus , & colenda frugalitas , 106.
- XV. Nihil est agriculturâ melius , nihil dulcius , nihil homine libero dignius , 110.
- XVI. Omnes corporis motus decorum teneant , 113.
- XVII. A forma removeatur ornatus non dignus viro , 111.
- XVIII. E speculo consilium ad quædam , 115.
- XIX. In vestitu mediotritas optima , 117.
- XX. Nihil olere satius est quàm bene olere , 119.
- XXI. Dormi quantum satis est , 120.
- XXII. Nemo ferè saltat sobrius , nisi fortè insanit , 122.

- XXIII. *Musicæ magna vis in utramque partem,*  
123.
- XXIV. *Bonis moribus damnosum est desidere in  
spectaculo,* 125.
- XXV. *Subducendus populo est tener animus,* 128.
- XXVI. *Est adolescentis majores natu vereri,* 129.
- XXVII. *Vir bonus aspectus & cogitatus emendat,*  
133.
- XXVIII. *Multa nobis aliorum judicio & exemplo  
facienda aut corrigenda sunt,* 133.
- XXIX. *Adolescentia in labore & patientia est exer-  
cenda,* 134.
- XXX. *Plura audiamus, loquamur pauca,* 138.
- XXXI. *Adolescentium ludis intersint majores natu,*  
140.
- XXXII. *In ludo ac joco modus retinendus,* 143.
- XXXIII. *Est cui magnò constitit dictærium,* 144.
- XXXIV. *Facile dicta aut facta,* 145.
- XXXV. *Excitatur laude æmulatio,* 151.
- XXXVI. *Famæ consulendum est,* 153.
- XXXVII. *Vive ut in publico,* 154.
- XXXVIII. *Vitæ genus eligere, res difficillima,*  
156.
- XXXIX. *Magistratus non suis, sed civium, com-  
modis consulat,* 157.
- XL. *Varia eorum, qui aliis præsent, officia,* 161.
- XLI. *Judicis est in causis semper verum sequi,* 164.
- XLII. *Cives Magistratibus pareant, magistratus  
legibus,* 168.
- XLIII. *Vitiosi Principes plus exemplo, quàm pec-  
cato nocent,* 172.
- XLIV. *Potentia decori est, si salutaris sit,* 176.


Finis Partis alterius.

361 - 90











Deacidified using the Bookkeeper process.  
Neutralizing agent: Magnesium Oxide  
Treatment Date: July 2006

## PreservationTechnologies

A WORLD LEADER IN PAPER PRESERVATION

111 Thomson Park Drive  
Cranberry Township, PA 16066  
(724) 779-2111

HECKMAN  
BINDERY INC.




**AUG 90**

N. MANCHESTER,  
INDIANA 46962





LIBRARY OF CONGRESS



0 003 040 813 5

